


# Miti yan Papia



Portions of the Holy Bible in the Nukna Language of Papua  
New Guinea

**Miti yan Papia**  
**Portions of the Holy Bible in the Nukna Language of Papua New**  
**Guinea**  
**Buk Baibel long tokples Nukna long Niugini**

copyright © 2013, 2017, 2020 Wycliffe Bible Translators, Inc.

Language: Nukna

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-24

---

PDF generated using Haiola and XeLaTeX on 11 Nov 2022 from source files dated 19 Aug 2022  
a89ec59a-f2e8-504d-b0fa-4fd1a6687573

Contents

RUT . . . . .	1
Mak . . . . .	5
Luk . . . . .	32
Aposel . . . . .	79
Galesia . . . . .	123
Efesus . . . . .	131
Filipai . . . . .	138
Kolosi . . . . .	144
1 Te . . . . .	150
2 Te . . . . .	155
1 Ti . . . . .	158
2 Timoti . . . . .	165
Tit . . . . .	170
Filemon . . . . .	173

## Rut

### *Naomi yan káin rám wáik ká tunggafuik*

<sup>1</sup> Uláp rám ámna yáilá yá Israel pin yáni tángga áturáng hára, pana ore káman wahára kesák maming táwi Israel káwak káin tunggafuik. Rám wahára ámna káman it Betlehem Juda ále káinnan dá kung hánámá Moab káwak káin rám kimo árin ingga áwáná nanggená yará yot kámuk kuráng. <sup>2</sup> Ámna wata kutná ku Elimelek, hang áwáná kutná ku Naomi, iná nanggená yará wata kut yándi ku Malon káling Kilion. Wawu hun yáni ku Efrata háranan, it Betlehem Juda ále káinnan, watá kung Moab káwak káin átkiuráng.

<sup>3</sup> Átang Naomi náulá Elimelek ká kámurán du áwáná yá nanggená yará yot yáni rewe áturáng. <sup>4</sup> Nanggená yará yá Moab náráwa yará áwá yándi ya ihumálák. Káman da kutná ku Rut, hang nukngá wata kutná ku Orpa. Kulá wakáin yara 10 hám wáina áturáng. <sup>5</sup> Kulá Malon káling Kilion dá hányon kámurán du, Naomi wu náulá me nanggená yará wa muná.

<sup>6</sup> Átang árongga Naomi yá naruk ku Juda ále káin Táwi yá rám álosim ámna náráwaná yámán sungngi yáni yá tunggafengga árán du málám Moab káwak wa nambáná yará yot sangga kukuya tiktiyawik táuráng. <sup>7</sup> Kulá málám ále átuk wa sangga nambáná yará yot Juda ále ya kukuya kálu hulátiuráng.

<sup>8</sup> Kungga átang, Naomi yá nambáná yará wa yánuk, “Mamam sándi yan it hulá ya son sándi kundimálák. Táwi yá sán saháng tolinek, náuta sándá nánáun sándi há kámutumálák wa iháng toliumálák me nák neháng tolingga áwánggoemálák wáinanyon. <sup>9</sup> Wáina wata ku Táwi yá háláng sámán du, nánáun sándi nukngá ihángga watán it káin álosim átkuineráng.”

Wáina yánánga ku, árong Naomi yá kápang kumen kutkáyawát táwi hánám táuráng. <sup>10</sup> Wáina tángga sangga nambáná yará yá son inumálák, “Muná, nát tu kákkot kákkán tombongga há hánám kuinemán.”

<sup>11</sup> Enendu Naomi yá miuk, “Son kundimálák, uriwana yará. Náuta ku nákkot kuinemán? No nange son iháng te sán nánáun sándi háháleyan tárak ma árat, <sup>12</sup> wata ku son sándi kundimálák, uriwana yará. Náku ku náráwa há hálet, son náunna ma táindát. Kálu kámá ing árán iná ku ing tátáyan, kula yáungán no náunna tángga, wahára kungga nángánanggena iháng te <sup>13</sup> sándá háleng yámánga árán watá titiha wawu káluná muná. Sándá nánáun sándi muná átnát tán tárak ku muná. Uriwana yará, pahán márapmá náni wu tárak wáina re, enendu nákkán du táwi hánám. Táwi yá neháng wáik tán átkoet.”

<sup>14</sup> Naomi yá wáina yánán son kutkáyawát táwi hánám táuráng. Kulá Orpa yá ku nambáná sangga kukuya pukon kang kumiuk, iná Rut tá ku nambáná káto poláng mángga tángga átuk.

<sup>15</sup> Wáina tángga árán du Naomi yá inuk, “Kang, nukka wu son há koek, málámbán tombong me málámbán ánutuná ya, máriná ya isutang kung.”

<sup>16</sup> Wáina inán, Rut tá miuk, “Kepmangga son kukuya ma nanáng seindalák. Ko rekáin kuinelák, náku ku wakáin kuinet; me rehára átnelák, náku ku wakáin átnet. Kákkán tombong wawu nákkán tombong, me kákkán Ánutu wawu nákkán Ánutu. <sup>17</sup> Ko rekáin kámutnelák, náku ku wakáin yon kámure neháng usineráng. Náut kámá káman dá ma náháng horeindák. Kátkámut tá rewe náháng horeinek. No mena ná met ná ma isure hálendu Táwi yá álo neháng wáik hánám táinek.” <sup>18</sup> Kulá Naomi yá kan Rut tá kikilingga málám bot kukuya tán kangga ku, Naomi yá me kámá son ma inuk.

<sup>19</sup> Yándi wu yayará kungga kungga Betlehem káin kung hiúmálák. Rám it wahára kung hiúmálák hára, it pálak hárámutang áwáng kápánga ku náráwa yá miuráng, “Kák ka Naomi puk me?”

<sup>20</sup> Wáina met, Naomi yá yánuk, “Naomi\* ing ma mantáng namindaráng. Ináku Mara† ing mantáng namineráng, náuta Ánutu Uliháláng Márúmá watá neháng wáik tán watá pahánna kinan ukuro hánám átak. <sup>21</sup> No kut wawu kutná kutná na pálak, iná Táwi yá nangot áwáng sáek wawu kutná kutná na muná. Náuta Naomi ing mantáng nameráng? Táwi Uliháláng Márúmá yá neháng wáik tán márapmá yá nákkot átak.”

<sup>22</sup> Náwu Naomi yá Moab káwak sangga áwuk watán pingnga. Nambáná Moab náráwa Rut watyot áwumálák. Wa áwumálák wawu bali‡ mamará hulátitiná kálu.

## 2

### *Rut tá Boas yan hái káin sungngi ya suliuk*

\* 1:20: Kut Naomi watá hulá ku ‘kikngá pálak.’ † 1:20: Kut Mara watá hulá ku ‘áyák hánám.’ ‡ 1:22: Bali wawu rais ina.

<sup>1</sup> Kulá Naomi káungáná káman kutná ku Boas. Ámna wawu Elimelek kán hun háranan, hun wata kinan ámna kutná pálak átnándak.

<sup>2</sup> Kulá hang Moab náráwa Rut watá Naomi ing inuk, “Nepmatá hái káin kungga bali kátu yákyákmak táená wa kámolin. Káman niyá nahánga álo ingga nanán hálendu kámonet.”

Wáina men Naomi yá inuk, “Álo kuinelák, uriwana.” <sup>3</sup> Wáina inán Rut málám kungga hái káin yáup ámna yá bali maránga ihánga kut márin yáni ya kátu yákyákmak táená wa kámondang kuk. Kulá Rut tá hái wawu Boas yan ingga ma narená kuk, iná Boas wawu Elimelek kán hun háranan.

<sup>4</sup> Rám waháranon, Boas yá Betlehem kálu áwánga yáup ámnaná yánuk, “TÁwi yá sányot átnek.”

Ing yánán watá inuráng, “TÁwi yá kuram táng kaminek.”

<sup>5</sup> Wáina inát átang sangga, kulá Boas yá yáup ámnaná táwi yáni ya átuk wa ináng suliuik, “Náráwa máto áning gu niyan hun háranan?”

<sup>6</sup> Wáina inán yáup ámna táwi yáni watá inuk, “Wawu Moab náráwa máto Naomi yot Moab ále káwak sangga áwumálák. <sup>7</sup> Náráwa watá ing nanek, ‘Álo satá no yáup ámna yá bali maránga hárotang tingga kungga árát, márin yáni káin yákyákmak táená wa kámondang urum tinet me?’ Iná náráwa wawu yáup hára re átak, hilápmá hánám áwánga inggálu. Rám hátetná kimo re sima kinan putung hangga sek narek.”

<sup>8</sup> Kulá Boas yá kung Rut wáina inuk, “Náráwa máto, kándáng narinelák. Ko kung hái nukngá káin bali ma kámonándalák. Hái ná sangga ma kuindalák. Nákkán yáup náráwa yot nahára átnéráng. <sup>9</sup> Hálangga katá hái rehára yáup ámna yá maránga árát tu nákkán yáup náráwa yásutang wakáin kungguinelák. No yáup ámna na há yánáng rákit táet, kák keháng lem ma tátáya. Sala yá manmanin du, umi yáup ámna yá kátnáwáng kulená kárangngá káin átak kungga waháranan náinelák.”

<sup>10</sup> Wáina inán Rut tá turingga hangga kurákmáta táng hang káwak káin tingga Boas inuk, “Nák ku áwená. No náut álosim kákkán kálu táng tunggap táe ko nák nahánga neháng tolelák?”

<sup>11</sup> Wáina inán Boas yá hurik tángga ing inuk, “Ko náula yá kámurán nan mamya me it káwakka yápmangga áwulák ngáyá áwáng ámna náráwa uláp ma naráng yámená watyot átang nambáka ya rina rina táng mángga áwánggoelák, wawu erek hánám há met narut. <sup>12</sup> TÁwi Israél yan Ánutu ya hitná tárang káin árátá watá pinya tátáya áwulák. TÁwi yá álosim rina táulák wáinanon tán sambe yá kákkán káin táwi hánám tunggafeinek.”

<sup>13</sup> Wáina inán Rut tá inuk, “Táwina, nák ku yáup náráwa ka waháranan muná, me kutna muná, enendu ko nák nahánga neháng tolelák. Ko sutna táng láláp táelák, hang ko me nuk hára naháng melák.”

<sup>14</sup> Kulá sungngi nana rám hára ku Boas yá Rut inuk, “Nákáin áwánga másáng kámá ihánga másáng kátu kimo satá wáin ingirángngá kinan han nang.”

Kulá Rut tá yáup ámna tangtang putung han Boas yá bali sená kámá imán Rut tá nangga kawilá hahatin kátu yápmán áturáng. <sup>15</sup> Wáina tángga ku Rut tá tárutang yáup káin kun, Boas yá yáup ámna náráwaná yánuk, “Sat Rut tá bali máran tangtang álo kámonek, ma me táng mindaráng. <sup>16</sup> Hang sándá bali kámá hárorená waháranan watán da uying hirarát han áwáng ihán kangga ku ma me táng mindaráng,” ingga yánuk.

<sup>17</sup> Kulá Rut tu hái káin bali kámondang átnarán du it tá yonyon tin kangga ku málám bali kámonduk wa kátingga páliná ihuk, wata márapmá náwu isikimo muná táwi sim, kilo náwu 10 kilo wáina ina. <sup>18</sup> Rut tá árong bali bek wa táng hip tánggatang it Betlehem káin son kun, nambáná yá bali kámondang ihánga kuk wa káuk. Hang káen sungngi náukngá kátu ihánga kuk wa Naomi imuk.

<sup>19</sup> Wáina tán kangga nambáná yá inuk, “Kula rekáin yáup tángga bali táwi hánám kámondalák? Ni ámna yá kaháng tunggap tángga keháng tolek wawu TÁwi yá kuram táng minek.”

Kulá wahára ku Rut tá niyan hái káin yáup táuk wa nambáná inuk, “Ámna kutná niyan hái káin no kula yáup táet wawu Boas.”

<sup>20</sup> Wáina inán Naomi yá nambáná inuk, “TÁwi yá kuram táng minek. Málámbá há átaráng me há kámurená álosimmá wa hiták nálanggáatak.” Wáina inánga son hang miuk, “Ámna wawu nánin sip kátu, watá kák kehánga náula kámutuk wata kutná meng mirak tátáyan álo kámá\*.”

\* 2:20: Juda yan kálu wu ing, ámna káman dá áwáná tángga kámurán náráwa watá máto yon árán hálendu ámna watán sipmá kátu yá wa áwáná ya táinek. Kulá Naomi yá me Rut inuk wawu wáina wata.

<sup>21</sup> Kulá Moab náráwa Rut watá miuk, “Me nukngá káman Boas yá ing nanek, ‘Kák ku nákkán yáup ámma náráwa tangtang rewe árátá kungga bali yot wit† mamará watán rám bá sáliknginek.’”

<sup>22</sup> Wáina inán Naomi yá nambáná Rut inuk, “Wawu álosim, uriwana, ko watán yáup náráwa watyot re átnelák. Háí kámá káin kungngará keháng lem tánirot.”

<sup>23</sup> Wáina inuk wata ku Rut tá Boas yan yáup náráwa watyot átang bali yot wit kánkámon tángga átninggáran bali yot wit mamará watán rám bá sálikngiuk. Kulá rám ore wahára Rut tá nambáná yot átkiumálák.

### 3

#### *Boas yá Rut táng álolo táuk*

<sup>1</sup> Rám káman Naomi yá Rut inuk, “Uriwana, no kák pinya tátáyan da sulindet, watá ku pinya táinek. <sup>2</sup> Kulá Boas wawu nánin hun háranan ámma ni watán yáup náráwa yot ko yáup tángngátalák. Kula yáungán wawu bali komená káin bali kipmá kotnándek. <sup>3</sup> Wata ku umi kuhánga sutya oel mungnganá kikiná kuhánga lap álosim wa tawinelák. Wáina táng hálingga ku bali itná káin hang heinelák. Enendu ámma wata rahálá hára ma tunggafená árátá umi sungnginá wa erek nang hálinek. <sup>4</sup> Kulá rám watá pándák hangga ruhán, ko ále rehára ruhek wa kándáng káinelák, kulá wahára ku kuinelák ngáyá hárammá kálu tek yaling mángga hang pándák átnelák\*. Wahára ku rina rina tátá wa watá kaninek.”

<sup>5</sup> Wáina inán Rut tá Naomi inuk, “Rina rina nanelák wawu álo isutang táinet.” <sup>6</sup> Kulá Rut tá bali itná káin kung hangga nambáná yá rina rina tátáya inuk wa erek hánám táng háliuk.

<sup>7</sup> Kulá Boas yá umi sungnginá nang hálingga pahálá yá álosim hálen málám ruruháya bali tená tangtang káin kung háuk. Wáina kangga Rut tá kilakkon hánám kuk ngáyá hárammá kálu tek yaling mángga hang hárammá hulá káin pándák átuk. <sup>8</sup> Kálu wa tunggafiuk wawu yáung táitná Boas yá ruhánga átnáran náut kámá yá táng mirak tán hurik tángga numkálu hangga káu ku náráwa káman dá hárammá hulá káin pándák árán ikik hárammutuk.

<sup>9</sup> Wáina kangga Boas yá inuk, “Kák ku ni?”

Ing inán náráwa watá inuk, “Nák ku Rut, kangán yáup náráwa. Kák ku Elimelek sipmá kátu wata ku ko nák nehánga náunna kámutuk wata kutná meng mirak táinelák.”

<sup>10</sup> Wáina inán Boas yá inuk, “Náráwa máto, Táwi yá kuram táng kaminek. Ko náwu kangán álosim wa pukon náula yan hun wa elelák. Álosim wa kálak táulák wawu wáina sim, iná kula pálik táelák nátá ku álosim hánám, náuta ko ámma máto kutná kutná yáni pálak me kutná kutná yáni muná yan káin ma kulák. <sup>11</sup> Wáina ta ku, náráwa máto, ma pitáindalák. No kákkán kálu sareng kaminet. Tárák rina tángngátalák watá ku it náta kinan nan ámma náráwa kámuk watá kák ku náráwa kándáng hánám ingga naráng kameráng. <sup>12</sup> Wawu pálipuk nák ku kákkán hun tangtang nan no álo pinya tánggem, enendu nák ku mulangán sim, iná ámma káman sip kátu hánám átak. <sup>13</sup> Yáungán nahára álo átnelák. Hilápmá no ámma wa ine káinemán. Watá álo háláng kamámáyan háleudu álo wáina táinek, iná watá ma háláng kaminán men, wawu no álo háláng kaminet pálipuk Táwi rahálá hára. Álo son pándák átnará it tá háinek.”

<sup>14</sup> Wáina inán Rut tá son Boas hárammá hulá káin pándák átnáran it tá háiháya tángga átuk kálu Rut tá tárutuk hára yáup ámma ruhánga áturáng watá kámá ma káuráng. Wáina tárurán du Boas yá inuk, “Náráwa yá bali itná káin áwelák ka ku ni kámá káman dá ma hánám narindak.”

<sup>15</sup> Ing inángga son Boas yá miuk, “Lap kátu yáila káin uselák wa táng áwáng táng hálak tángga álák.” Ing inán wáina tángga árán, Boas yá bali 20 kilo hám wáina kulin wata kinan han, háláng mángga táng hip tángga málámba ketnán tin du háná kuk. Kulá wata torong hára ku Boas yá hangga it táwi káin kuk.

<sup>16</sup> Rut tá nambáná yá átuk káin kung hen kangga Naomi yá ináng suliuk, “Uriwana, kuelák ka rina hánám hálek?”

Ing inán Rut tá me pingnga Boas yá me rina rina inuk wa erek hánám Naomi ináng háliuk. <sup>17</sup> Kulá son Rut tá ing miuk, “Boas yá ing nanek, ‘Ketya páliná muná nambáka yan káin ma kuindalák,’ ing mengga, bali 20 kilo hám wáina ná namán tángga áwet.”

<sup>18</sup> Wáina inán Naomi yá miuk, “Uriwana, me yá rina kuinek wata hálengga yolop átnará, náuta Boas yá emá me yáupmá tángga árán kungga kula re me yá kándáng háleindek.”

### 4

#### *Boas yá Rut áwáná ya táuk*

† 2:21: Wit wawu rais ina. \* 3:4: Rut tá tárák wa táuk, wawu Juda yan kálu isutang táuk, wawu Boas yá tárák wa kangga áwáná ya tátáya.

<sup>1</sup> Kulá hang Boas yá it Betlehem kumbi kálu mungnganá\* káin árongga wahára putung háuk. Waháranyon sip kátu ni Boas yá miuk watá áwán kangga Boas yá mantánga inuk, “Nukna, áwánga nahára putung hang.” Wáina mantánga inán ámma watá áwáng putung háuk.

<sup>2</sup> Boas yá ámma yáilá 10 it waháranan watá áwát ing yánuK, “Áwáng nahára putung haniráng.” Wáina yánán áwáng wahára málám bot putung áturáng. <sup>3</sup> Kulá Boas yá sipmá kátu wa inuk, “Naomi, ni Moab ále káwak sangga áwuk, watán káwak kátu káman yuyuwáyan átak wawu náti ya sip náti kátu Elimelek watán hára. <sup>4</sup> Wata ku kák kaninet ingga naret wa kanin, káwak wawu ko yuwinelák. No mená met náwu ámma náráwa me ámma yáilá putung átaráng wata rahán yáni hára. Álo yuyuwáya hálendu, ko yuwáng. Iná muná hálendu, nanatá no narin. Nukngá yá wáina tátáyan muná wawu ko rewe yuwinelák, enendu ko muná ing metá ámma nukngá wa yuyuwáyan wawu nák.”

Wáina inán du Boas yan sip kátu watá miuk, “Álo no yuwinet.”

<sup>5</sup> Wáina men Boas yá miuk, “Rám rina hára ko káwak kátu Naomi ketná hára átak wa yuwinelák, waháranyon Rut kámurená kawátná wa áwáka ya táinelák, wáina tátá ku kámurená wata kutná me watán káwak watá hiták átneráng.”

<sup>6</sup> Wáina men kangga sipmá kátu watá miuk, “Nák ku ma yuwindát, náuta no kutná kutná na wa horengga naya nángánanggena wa yámánga kátu nangge nukngá yáyámáya takta naret. Ko kaya yuwáng, náuta no ma yuwindát wata.”

<sup>7</sup> (Uláp Israel káwak káin kutná kutná son yuyuwá me imán kamán tátá mená watá sálíngkek ingga wawu ámma káman dá málámbán sendol yalingga táng nukngá imánggiuk. Kálu watá ku Israel káin hiták meng tunggap tánggiuk me yá sopsowek ingga.)

<sup>8</sup> Kulá hang ámma sip kátu watá Boas inuk, “Ka yuwinelák.” Wáina mengga sendol ná yalingga táng Boas imuk.

<sup>9</sup> Kulá Boas yá ámma yáilá me ámma náráwa kámuk yánuK, “Náwu sándá wa há káeráng, no Naomi ketná hára kutná kutná Elimelek kán me Kílion káling Malon dán hára átak wa há yuwet wata ku sárumna káin namáng rosingga átkuineráng. <sup>10</sup> Wata kátu háranon, no Moab náráwa Rut wa hányon táinet, Malon kawátná wa áwána háleinek, watá ku kámurená yan kut me watán káwak ká hiták átneráng, hang kámurená kutná watá ma muná kuindák, hunná hára me itná hulá nahára. Sán du háláng namámáya átneráng.”

<sup>11</sup> Ámma náráwa kámuk urum wahára áturáng me ámma yáilá watá miuráng, “Nán du háláng kakamá. Táwi yá tán náráwa ni kákkán it káin áwáng háinek wawu Resel káling Lea ina háleinek, yarán watá tombong Israel táng tunggap táumálák wáina. Iná kák ku ámma kutná kutná pálak Efrata hun hára it Betlehem kinan kutya táwi átnelák. <sup>12</sup> Hang Táwi yá ráulaka kaminek, náráwa máto wata kinan nan wawu Juda káling Tamar nangge yándi Peres† yan hun ina.”

#### *Rut tá Naomi ená táng tiuk*

<sup>13</sup> Kulá hang Boas yá Rut tu áwána ya táuk. Tánga Boas yá Rut yot káman hálen Táwi yá táng álolo tán kawilá átang nanggená ámnaná táng tiuk. <sup>14</sup> Kulá hang náráwa yá Naomi inuráng, “Táwi kutná meng tarut tánin, Táwi yá eka káman háláng kakamáya kamek. Nangge wata kutná yá Israel kinan táwi hánám háleinek. <sup>15</sup> Nángánangeka ámnaná 7 dá átang keháng tolinggalát wawu hangga sim, iná nambáka watá kák ka kikiná naránga mángngátak wawu táwi hánám. Iná nambáka yá nanggená táng tek, wata ku nangge watá kákkán átkuku táng mirak táinek, me tátáwi háletá pinya táinek.”

<sup>16</sup> Kulá Naomi yá nangge kimo wa tánga táng poláng mángga pinna kándáng tánga átkiuk. <sup>17</sup> Náráwa nuknukngá wahára árená watá ing miuráng, “Naomi yan nangge ámnaná káman tunggafeng mek!” Iná nangge kimo wata kutná ku Obed ing mantáuráng. Obed wawu Jesi naning, iná Jesi wawu Devit naning.

#### *King Devit tán tombong*

<sup>18</sup> Kulá náwu Peres yan hun tombong: Peres wawu Hesron naning, <sup>19</sup> iná Hesron wawu Ram naning, iná Ram wawu Aminadap naning, <sup>20</sup> iná Aminadap wawu Nason naning, iná Nason wawu Salmon naning, <sup>21</sup> iná Salmon wawu Boas naning, iná Boas wawu Obed naning, <sup>22</sup> iná Obed wawu Jesi naning, iná Jesi wawu Devit naning.

\* 4:1: Juda yan it yáilá me it kikimo yan kumbi kálu mungnganá tangtang wahára wawu ámma yá urum tátá komená.

† 4:12: Peres yan hun wawu kut yáni árená hang tombong hásak máringga kuená.

## Mak ká Ánutu yan me pingnga uyiuk

*Jon Umi Kuháng Yámámá yá Jesu yan kálu tiyawiwuk  
(Mat 3.1-12; Luk 3.1-9,15-17; Jon 1.19-28)*

<sup>1</sup> Náwu Ánutu Nanggená Jesu Ámna Náráwaná Son Iháhá watán me pingnga álosim watá hulátek.

<sup>2</sup> Ánutu yá Nanggená me ing inán Aisaia yá me wanyon uyiuk ngá ná:  
“Naráng. No ámna niyá me tángga kung áwáng tátá wa kálak suring me kuinek,  
watá kálu tiyawing kaminek,”\*

<sup>3</sup> wawu “man dá ále komkomá páliná muná káin ing mantáinek,  
‘Táwi yan kálu tiyawineráng,

kálu kándáng hánám wa táng toling mineráng,’”† wáina uyiuk.

<sup>4</sup> Kulá me wa isutang gu Jon Umi Kuháng Yámámá yá ále komkomá páliná muná káin áwángga yánuK, “Pahán hurik tángga áwáng umi kuhát tu Ánutu yá mukmuro sáni wa yawonek.” <sup>5</sup> Wáina yánán du Judia ále káinnan me Jerusalem ámna náráwa táup hánám watá watán káin kuráng ngáyá kung mukmuro yáni meng tungga tángga Jodan umi kinan árát Jon dá umi kuháng yámuk. <sup>6</sup> Jon dá kutná kutná mongiwuk wawu kamel rommá yá táng tolená, iná let songgo kepma yá táng tolená watá ku pánápmá hára táng kik tángga, sungginá ya wu yot maming tátáwi watyot kitembong páyom tunggun yáni wa nangiwuk. <sup>7</sup> Kulá watán me wu ná: “Nák torong káin ámna káman áwínek wata hálángngá wu nák neháng hátek, hang ámna nák ina tá turing hang watán sendol páupmá yayaliyan tárak muná. <sup>8</sup> No ku umi hánám watá kuháng sámét, iná watá ku Iruk Káungá watá kuháng sámínek.”

*Jon dá Jesu umi kuháng muk  
(Mat 3.13-17; Luk 3.21-22)*

<sup>9</sup> Rám wahára Jesu wu it Nasaret ále Galili kálu áwáng kung Jodan umi kinan han Jon dá umi kuháng muk. <sup>10</sup> Rám Jesu yá umi sangga kep káin árángga áwuk, wahára hánám Jesu yá káuk ku alek ká ang tán Iruk ká iráp tánarám bá ina kahet hang málám hára ep tángga árán, <sup>11</sup> rám waháranon me káman alek kálu ing háuk: “Kák ku nák Nanggena. No kák ka kikiná hánám naret. No kák ka pahánna álosim hánám naret.”

*Satan dá Jesu ingirungngingiya táuk  
(Mat 4.1-11; Luk 4.1-13)*

<sup>12</sup> Rám waháranon Iruk ká Jesu suring mán ále komkomá páliná muná káin kung <sup>13</sup> rám 40 átuk wata kinan Satan dá ingirungngingga kungga átuk. Málám songgo páyom bá árená káin wa árán angelo yá pinná tángga áturáng.

*Jesu yá disaepel hulátingga mantángga ihuk  
(Mat 4.12-22; Luk 4.14-15; 5.1-11)*

<sup>14</sup> Kulá Jon táng it káto káin tit wata torong káin du Jesu yá Galili ále káin son kungga Ánutu yan pingnga álosim wa meng tárut tángga kuk. <sup>15</sup> “Kulá rám bu áwek, Ánutu yan átkuku wu enanggon áwek. Pahán hurik tángga pingnga álosim wa narángga pahán sáni káin káto tingga átkuineráng!” ing yánuK.

<sup>16</sup> Kulá Jesu málám umi pátum Galili wata tákto kálu kungga kápuk ku Saimon yot kulaná Endru wu umben san umi pátum kinan han átnárán, náuta yándi wu káut iháhá ámna. <sup>17</sup> Wa kápángga Jesu yá yánuK, “Áwáng nák nasurán du no sále ámna nangge iháháyan háleinemálák.” <sup>18</sup> Wáina yánán waháranon yándi wu umben yápmangga Jesu isutang kumálák.

<sup>19</sup> Málám kimo hásak sim kungga kápuk ku Sebedi nanggená Jeims yot kulaná Jon du bot kinan umben yándi iháng toktolik tángga átnárán. <sup>20</sup> málám kung ma táng husiwuk ináku háng hánám mantáng yámán, nan yándi Sebedi san bot kinan ámna iháng yuwán áwuráng watyot árát, yándi wu Jesu isutang kumálák.

*Jesu yá iruk wáik isutuk  
(Luk 4.31-37)*

<sup>21</sup> Wahára átang gu it Kapaneam káin kung wakáin átang Sabat hára Jesu yá kungga miti itná kinan hangga Táwi yan me yánáng toliuk. <sup>22</sup> Rám Jesu yá wa yánáng tolingga átuk wahára ámna náráwa wa narángga áturáng watá kangga háramuturáng, náuta Jesu káuráng wawu ámna kutná pálak ká ina yánáng tolingga átuk, lo yan tiksa yá yánáng tolingngátaráng wáina muná.

\* 1:2: Malakai 3.1 † 1:3: Aisaia 40.3



<sup>23</sup> Wahárayon ámna iruk waík ká ep táená miti itná wata kinan yon átuk watá mantáuk, <sup>24</sup> “Jesu Nasaret nan, rina táng námámáya áwelák? Kák ka nán hám náháng lem tátáya áwelák? Nák ku há naret kák ku wa ingga, kák ku káungá hánám Ánutu yan káinnan dá áwelák!”

<sup>25</sup> Wáina inán Jesu yá ing me táng muk, “Yolop átang ámna wa sangga hang!” <sup>26</sup> Wáina inán iruk waík watá ámna wa muwantang manná mantángga sangga hangga kuk.

<sup>27</sup> Wáina kangga ámna náráwa watá háramutang yáni meme táurang, “Náwu rina? Me náwu hurápmá hálangngá pálak! Iruk waík me yánán watán milun suweráng,” ingga yáni miurang. <sup>28</sup> Kulá wata pingnganá watá sokmuná hánám Galili ále wa kung hilák táuk.

*Jesu yá ilalák mara máro hánám iháng tárut táuk*  
(Mat 8.14-17; Luk 4.38-41)

<sup>29</sup> Kulá rám miti itná wa sangga Saimon káling Endru yan it káin kuráng, wahára wu Jeims káling Jon du káman kuráng. <sup>30</sup> Rám wahára wu Saimon silummá wu ilalák tángga sutná yá ángarángin kome káin átak ingga Jesu inát naruk. <sup>31</sup> Wáina háendu kung ketná hára tángga táng tárut tán, ilalák watá san náráwa málám sungngi tiyawing yámuk.

<sup>32</sup> Kulá yonyon kálu káe yá kung han it tá pup táuk kálu, ámna náráwa yá ilalák mara me iruk waík ká ep ihená wa ihángga Jesu yan káin áwuráng. <sup>33</sup> It waháranan táup hánám watá áwáng it kálu mungnganá kálu tuwatang áturáng. <sup>34</sup> Ámna náráwa táuppon áwát Jesu yá ilalák yáni hulá hulá wa iháng toliuk. Hang iruk waík ká ep ihená wa táuppon yásut yámuk, iná iruk waík ká kutná hiták meng tunggap tátá wa olet yáni máuk, náuta há naráng meráng wata.

*Jesu yá ále rákit káman káin sáponga táuk*  
(Luk 4.42-44)

<sup>35</sup> Hilápmá hánám it tá páyung átuk kálu Jesu yá tárutang it sangga ále rákit ore káman káin kung sáponga táuk. <sup>36</sup> Átang sim bu Saimon yot nuknukngá watá suling muráng. <sup>37</sup> Yáni waku kung kangga sat warán du inuráng, “Kámuk hánám kák ka sulingga átaráng!” <sup>38</sup> Wáina inát tu Jesu yá yánu, “Wa sat nánda ku rehára kámá kunin — it kámá enang nákáin — náuta wakáin me pingnga hányon yáinet. Wata hánám bu no áwut.” <sup>39</sup> Wáina mengga hangga Galili ále kinan átkungga miti itná kinan Táwi yan me pingnga yánánga, hang iruk waík yásut yámánga kuk.

*Ámna ilalák lepra ná pálak*  
(Mat 8.1-4; Luk 5.12-16)

<sup>40</sup> Ámna káman ilalák lepra pálak watá áwáng tulá hára imángga hangga kiling muk, “Ko narátá álo háendu neháng tolitá no Táwi rahálá hára rongrongngá hálin<sup>†</sup>.”

<sup>41</sup> Ing inán Jesu málám pahán ukuro pálak ketná kálan kung tánggangga inuk, “No pahán kamet, rongronging!” <sup>42</sup> Wáina inán wahárayon ilalák lepra watá san sutná yá rongrongiuk.

<sup>43</sup> Wáina tángga Jesu yá suring mán háná kuinán tán ing inuk, <sup>44</sup> “Kándáng narinelák, ko ni kámá káman ma inindalák, ináku kung sutya wa pris káman elengga ku Ánutu ya towet sing námáya Moses yá ilalák ká álo hálen rina tátáya miuk wáina tátá ku kámá yá kahángga ku ilalákngá yá álo hálek ingga kahineráng.” <sup>45</sup> Enendu ámna watá kuk ngáyá kung me wa raták yánáng halingga kuk. Hulá wata ku Jesu yá itná itná áturáng watán káin raták kung áwáng tátá wawu muná, ináku ále rákit wakáin re átuk, enendu ámna náráwa wakáinnan wakáinnan watá watán káin áwuráng.

## 2

*Jesu yá ámna ket hárammá waík táng toliuk*  
(Mat 9.1-8; Luk 5.17-26)

<sup>1</sup> Rám kámá átang sangga Jesu yá it Kapaneam kinan son kung hen ámna náráwa yá wáina áwángga it káman da kinan átak ingga naruráng. <sup>2</sup> Wáina hálen táup hánám watá áwáng it pahálá kinan me kep káin wa áwáng tuwatang arát Jesu málám wahára Táwi yan me yánu. <sup>3</sup> Wahárayon, ámna káman kuratná náut wawu erek kámut hálená wawu málám re áwáwayan muná, wata ku ámna 4 yá sum tát kámuk áwuráng. <sup>4</sup> Áwángga káuráng gu Jesu rupmá káin kung heheyan du muná náuta ámna náráwa yá kik hánám arát, áwáng it ketná arángga kung it hungnganá yalingga wakálu kangkang pálak sat Jesu rupmá hára háuk. <sup>5</sup> Wáina tát Jesu yá málamba naráng háting muráng wa kangga ku ket hárammá waík wa inuk, “Nanggena, no mukmuroka wa yawodat.”

† 1:40: Juda yan kálu ku ing ilalák lepra pálak wawu Táwi rahálá hára ku rongrongngá muná.

<sup>6</sup> Wáina inán lo yan tiksa kámá wahára áturáng watá kangga ku ing narángga átkiuráng, <sup>7</sup> “Náuta ku ámna nátá wáina menggoek? Ánutu yan kome táin ingga hám tánggoek! Ámna káman dá kátu sasayan tárák kámá muná, Ánutu yá rewe ku wáina tátáyan.”

<sup>8</sup> Waháranyon Jesu málám pahálá yá há naruk, pahán yáni káin wáina narángga átaráng ingga hálandu yánuk, “Náuta ku wáina naráng háteráng? <sup>9</sup> Ilalák mara inánáyan du me rina ku tiyapmá hánám ininet? ‘Mukmuroka ku yawondat,’ me ‘Tárutang kangkangga tángga hangga kung’? <sup>10</sup> Enendu ing narineráng Ámna Nanggená watá káwak náta ketná kátu sasa watán hálang tángga átak.” Wáina yánánga son ilalák mara wa inuk, <sup>11</sup> “No kanin, tárutang kangkangga tángga itya ya kung.” <sup>12</sup> Wáina inán waháranyon málám tárutang kangkangngá tánggatang rahán yáni hára hangga kuk. Wa kangga kámuk háramutang Ánutu kutná meng tárut tángga ing miuráng, “Tárák kámá ing ma hánám káumán!”

*Jesu yá Liwai mantáng muk.*

*(Mat 9.9-13; Luk 5.27-32)*

<sup>13</sup> Kulá son Jesu málám umi pátum tákto kálu kungga árán, ámna náráwa kik hánám watá áwát málám wahára Táwi yan me pingnga yánuk. <sup>14</sup> Wahára átang son kungga káuk ku Liwai\* Alfus nanggená wu takis iháhá itná hára putung átnarán kangga ku inuk, “Áwángga nák nasulák,” Wáina inán Liwai málám tárutang isutang kuk. <sup>15</sup> Kulá rám Jesu yá Liwai yan it káin kungga disaepelná yot sungngi nangga áturáng, wahára wu takis iháhá me “mukmuro mara” táup hánám Jesu isutang áwuráng watyot kámuk átang sungngi náuráng. <sup>16</sup> Wahára tombong Farisi wata kinan nan lo yan tiksa watá kat Jesu yá takis iháhá me “mukmuro mara” watyot sungngi nangga árát, árong disaepelná wa yánuráng, “Náuta ku Jesu yá takis iháhá me mukmuro mara yot sungngi náeráng?” <sup>17</sup> Wáina met Jesu yá narángga yánuk, “Ámna káman ilalákná muná yá dokta yan káin ma kungngáatak, ináku ilalákná pálak watá ku dokta yan káin kungngáatak. No áwut wawu ámna náráwa kándáng árená wa mantáng yámamáya ma áwut, ináku mukmuro mara wa mantáng yámamáya áwut.”

*Jesu yá sungngi sangga sáponga tátá wata yánuk*

*(Mat 9.14-17; Luk 5.33-39)*

<sup>18</sup> Kulá rám káman Jon dán disaepel yot Farisi wu sungngi sangga árát, ámna náráwa kámá yá áwáng Jesu inuráng, “Jon dán disaepel yot Farisi yan disaepel yá ku sungngi sanggoeráng, iná kákkán du muná.”

<sup>19</sup> Wáina inát Jesu yá yánuk, “Ámna káman dá náráwa káman yot ket tántán tátáya átang nuknukngá men áwánggalát watá watyot átang sungngi álo sanggalát me muná? Wáina kámá ma árak. Rám ore watá watyot átgálat wahára wu herongnge átnát tán rám. <sup>20</sup> Iná rám káman áwinek wahára wu ámna ni náráwa tátáya táinek wa áwáng há tángga kuineráng, wahára wu wáina nuknukngá yá sungngi sanggalát.

<sup>21</sup> “Hang káman dá lap kátu mirak táng kakngá ya hinangngá ma rákarenggim. Iná wáina tánggim wawu mirak watá kakngá wa uyin hinangngá maming táwi hálenggim. <sup>22</sup> Hang káman dá wáin mirak wa táng meme kepma kakngá hára ma kulinggim. Iná wáina tánggim wawu wáin mirak wata mulá yá meme kepma wa rárahánggim, wáina tán du yayará wáin yot meme kepma wawu yáup yándi muná hálenggalán, wáina wata ku wáin mirak wawu meme kepma mirak háranon kukuliyán.”

*Sabat hára yáup ma táená wata Jesu yá yánuk*

*(Mat 12.1-8; Luk 6.1-5)*

<sup>23</sup> Rám káman Sabat hára Jesu yá disaepelná yot yáni waku wit hái orek yáni kálu kunggatang disaepelná yá wit páliná wa kámá kátungga ihuráng. <sup>24</sup> Kulá Farisi yá wa kápánga Jesu inuráng, “Kang, náuta ku disaepelka yá Sabat hára kálu wáina ma tátáya mená wa táeráng?”

<sup>25</sup> Wáina met narángga Jesu yá yánuk, “Sán kámá Devit tá tombongngá yot háing yámán táuráng wa sángingngátaráng me muná? <sup>26</sup> Pris táwi yáni kutná Abiata watán rám hára Devit málám kung Ánutu yan it kinan hang, másáng horengga Ánutu yan tit káungá hánám hálená wa pris káman inán másáng wa imán náuk, wawu kálu hitik táuk, pris yá re nanaya mená wa, kámá iháng imán tombongngá yámánga náuráng. Devit tá wáina táuk, enendu Táwi yá kandák táelák ingga ma inuk.”

<sup>27</sup> Waháranyon ing yánuk, “Ánutu yá ámna nangge hálang yáyamáya Sabat táng tunggap táuk; ámna nangge yá Sabat hálang imámáya ma táng tunggap táuk. <sup>28</sup> Wata ku Ámna Nanggená wawu Táwi, Sabat tán hányon.”

\* **2:14:** Liwai wawu Matyu kutná nukngá.

## 3

*Sabat hára Jesu yá ámna ketná wáik táng toliuk  
(Mat 12.9-14; Luk 6.6-11)*

<sup>1</sup> Rám káman Jesu yá kung miti itná kinan háuk, wahára wu ámna káman ketná kámurená wakáin hányon áran, <sup>2</sup> ámna kátu wu Jesu yá tárak rina tán kangga táng me hára tinin ingga áwáng átúrang, wáina hárendu Sabat hára ná ámna wa táng tolin kanin ingga kangga átkiuráng. <sup>3</sup> Kulá Jesu málám ámna ketná kámurená wa inuk, “Wa átúrang wata kondon yáni hára wa hetang álák.”

<sup>4</sup> Wáina inánnga son wahára átúrang ngá wa yánu, “Retá ku Sabat hára kálu kándang hálek, álosim táinemán me wáik táinemán? Háláng yámamá me ráháng kámur tátá?” Wáina yánán wahára átúrang watá náng ingmen átúrang. <sup>5</sup> Málám kuk hánám kárek háleंगा pahán yáni káto wa kangga pahálá mārāwin ámna wa inuk, “Ketya wa uying ráng táng.” Ing inán ketná uying ráng tán ketná yá álosim háliuk. <sup>6</sup> Kulá waháryon Farisi yáni waku hangga kungga Herot tán tombong kápánnga Jesu utkámur tátáya me hulátangga hárotúrang.

*Urum táwi yá Jesu isutang kuráng  
(Mat 12.15-16; Luk 6.17-19)*

<sup>7</sup> Jesu málám disaepelná yot hangga umi pátum káin kut ále Galili nan ámna nárāwa urum táwi watá yásutang kuráng. <sup>8</sup> Wáina wáina tánggoek ingga naruráng hára wu ámna nárāwa táup táwi hánám ále Judia kálu, it yáilá Jerusalem kálu, ále Idumea kálu, me umi Jodan numkálu, hang it yáilá Tair me it yáilá Saidon kálu nan dá Jesu yan káin áwuráng. <sup>9</sup> Ámna nárāwa yá kik hánám hálen kome muná kangga disaepelná yánu, “Bot káman tiyawing namániráng, náuta ámna nárāwa yá neháng kik pásinirot.” <sup>10</sup> Táup hánám há iháng toliuk hálen, ilalák pálak watá há tángganin ingga málám hára re seng inisurán tángga áwáng kik hánám átúrang. <sup>11</sup> Rám iruk wáik ká kanggiuráng hára wu iháng hang kondolá hára kátangga ing mantánggiuráng, “Kák ku Ánutu Nangganá!” <sup>12</sup> Ing menggiuráng, enendu me káto mengga yánánggiuk, “Nák ku wa ingga ma meindaráng.”

*Jesu yá aposelná 12 iháng tunggap táuk  
(Mat 10.1-4; Luk 6.12-16)*

<sup>13</sup> Rám káman Jesu málám ále yáilá káin áráng átang málámbá niya narek wa mantáng yámán málámbán káin áwuráng. <sup>14</sup> Málám ámna 12 iháng tunggap tángga kut aposel\* yámánnga yánu, “Sán du nákkot átnérang. Rám kámá wu suring sáme Táwi yan me wa yánánnga átningguineráng, <sup>15</sup> me háláng tángga iruk wáik wa yásut kuineráng.” <sup>16</sup> Ámna 12 iháng tunggap táuk wawu: Saimon, Jesu yá kut nukngá Pita imuk wa, <sup>17</sup> hang Jeims wu Sebedi nangganá hang kulaná Jon (yarán wawu Boanerges ing mantáng yámuk wawu wata hulá wu punam bá ina táinémálák), <sup>18</sup> hang Endru, Filip, Batolomiu, Matyu, Tomas hang Jeims Alfius nangganá, Tadius hang Saimon wawu tombong káman kutná Selot† waháranan, <sup>19</sup> hang Judas Iskariot, wawu ámna niyá Jesu táng káyam ket yáni hára tiuk wa.

*Jesu yá Belsebul yot yáup táek ingga miuráng  
(Mat 12.22-32; Luk 11.14-23; 12.10)*

<sup>20</sup> Jesu málám it káman da kinan kung hang átnarán, ámna nárāwa kik táwi watá son áwáng hiuráng, wáina hárendu málám disaepelná yot yáni re átang sungngi yáni nanayan ku muná. <sup>21</sup> Wáina tát Jesu sipmá kátu yá wa naruráng hára wu “Ámna wawu hohek, wata ku kung engotang áwáin,” ing mengga kuráng.

<sup>22</sup> Hang lo yan tiksa Jerusalem kálu átang háuráng watá ing miuráng, “Iruk wáik yáin yáni, Belsebul,† watá ep tán tánggoek, hang watán háláng hára kungga nuknukngá wa yásutkoek.”

<sup>23</sup> Wáina mengga arát tu Jesu yá mantáng yámán áwat me tárak hára yánu, “Rina tángga ku Satan dá Satan isurán kuinek? <sup>24</sup> Káwak káman hára árená yá yáni yon honhoren tánggalát wawu káwak watá kándang ma átgim. <sup>25</sup> Hang amba káman hára árená yá yáni yon honhoren tánggalát wawu amba watá kándang ma átgim. <sup>26</sup> Hang Satan dán tombong gá yáni yon honhoren tánggalát wawu kándang ma átgim, tombong wawu há sálikngingim. <sup>27</sup> Iná ámna káman dá ámna hánghálángngá yan it kinan raták kung hang kutná kutná wakáin ma ihánnga kunggim, ináku ámna hánghálángngá wa kálak ket hárammá hárotang tingga ku wáina álo tánggim. <sup>28</sup> No pálipuk hánám ing sáin, Táwi yá ámna yan mukmuro me sárum meme táiné wawu álo yawon yáminek. <sup>29</sup> Iná káman dá Iruk Káungá wata sárum meme táinek wawu kátuná wa ma sáindák, mārāpmá ná wawu rāmá rāmá átang kuinek.”

<sup>30</sup> “Ámna wawu iruk wáik ká watyot átkoek,” ing miuráng wata ku wa yánu.

\* **3:14:** Kut aposel wata hulá wu me tángga kungga áwángga tátá. † **3:18:** Tombong Selot wawu Juda nan ámna urum kámá watá ku Rom ráhánnga yásutinin ingga tángga átnándaráng. ‡ **3:22:** Belsebul wawu Satan kutná nukngá.

*Jesu maming got yakukulaná yá áwuráng  
(Mat 12.46-50; Luk 8.19-21)*

<sup>31</sup> Kulá Jesu maming got yakukula watá áwáng kep káin átang ámna káman suring mát kung it kinan Jesu inán áwáng kep káin kápápáya kung han, <sup>32</sup> ámna náráwa kik táwi áwálák áturáng watá inuráng, “Mama yot yakukulaka wu kák ka sulingga áwáng kep káin átaráng.”

<sup>33</sup> Ing inát watá miuk, “Mama me yakukulana wu ni?”

<sup>34</sup> Wáina mengga áwálák hálang sulingga wahára putung áturáng wa yánuK, “Kaniráng! Nahára átaráng sándu mamna me yakukulana! <sup>35</sup> Niyá Ánutu yan me isutang átningguinek wawu náK yakukulana me yit ilomna me mam ilomna.”

## 4

*Jesu yá ámna káman dá irit táulá hái káin haliuk ka me táráknká yánuK  
(Mat 13.1-23; Luk 8.4-15)*

<sup>1</sup> Son Jesu yá umi pátum tákto káin átang Táwi yan me yánang tolingga átnárán ámna náráwa yá áwáng táup hánám tuwarát kápánga bot káman umi ketnán átuk wata ketnán Jesu yá áráng putung árán ámna náráwa yá áwáng umi pátum tákto káin áturáng. <sup>2</sup> Málám me wa táwi hánám tárak hára tingga yánang tolingga kungga átang yánuK, <sup>3</sup> “Sándá narániráng! Ámna káman dá iritná táulá halin ingga kuk. <sup>4</sup> Málám halingga kungngárán kámá yá kálu hára hat, iráp pá áwáng erek nang háliuráng. <sup>5</sup> Iná kámá yá ále sup kárak hára háuráng watá ku sopmuná hánám áráng hiuráng náuta kung káwak kinan ma háuráng. <sup>6</sup> Kulá káe yá háliuk wahára wu kápán há roningga háuráng, náuta ráhun yáni muná wata. <sup>7</sup> Táulá kámá yá wu ále uran kánggárángngá kinan kung háuráng háleudu áuráng, enendu árángga pálin yáni sásáyan tárak ku muná, náuta uran kánggárángngá watá iháng usuk. <sup>8</sup> Hang táulá kámá yá ku káwak álosim hára háuráng háleudu áráng hengga pálin yáni álo kámá hánám wa sángga áturáng. Kámá yá pálin yáni táwi simsim tit, kámá yá tátáwi tit, kulá kámá yá ku maming tátáwi hánám tiuráng.”

<sup>9</sup> Hang Jesu yá ing yánuK, “Káman ni kárámanná pálak háleudu watá me ná narinek.”

<sup>10</sup> Kulá ámna náráwa yá erek kung háliuráng, wahára wu disaepelná 12 watyot kámá rupmá tangtang áturáng watá me táráknká yánuK wata hulá ya ináng suliuráng. <sup>11-12</sup> Ináng sulit tu yánuK, “Kámá kep káin átaráng wawu me táráknká kálu re yánáná wáina háleudu ‘rendá rahán yáni hálangga átneráng enendu páliná wu ma káindáráng, me rendá narineráng enendu wata hulá hánám bu wáina ingga ma narindáráng. Wáina tángga átninggan pahán yáni hurik tát Táwi yá kátu yáni saiwon.\*” Iná sáni wu Ánutu yan átkuku watán me kiláknká wata hulá hánám wawu Ánutu yá sán há sáliuk.”

<sup>13</sup> Son Jesu yá ing yánuK, “Sándu me táráknká náwu ma naráráng me rina? Rina tángga wu me táráknká nukngá wata hulá wa narineráng? <sup>14</sup> Ámna káman dá irit táulá halingngátak wawu káwak náta ketnán Táwi yan me halingngátak. <sup>15</sup> Ámna kámá wu irit táulá yá kálu hára hangngátaráng wáina, rám Táwi yan me narángngátaráng waháranon du Satan dá áwáng me narángngátaráng wa táng hirarán kung yámángngátak. <sup>16</sup> Iná kámá wu irit táulá yá sup kárak hára hangngátaráng wáina, Táwi yan me wa narángga sopmuná hánám tángga wata herongge hánám tángngátaráng, <sup>17</sup> enendu ráhun yáni ma koená wata tángga wu rám hátetná kimo re átnárát márappá me tárak wáik rina rina yá Táwi ya naráng háting meráng wakálu áwángngátak, wahára wu sopmuná hánám naráng hákhátik yáni sangngátaráng. <sup>18</sup> Hang kámá wu irit táulá yá ále uran kánggárángngá hára hangngátaráng wáina Táwi yan me wa há narángngátaráng, <sup>19</sup> enendu káwak kán kutná kutná wata narángpak tángngátaráng, me kikiná hulá hulá watá yángárungngingngátak, me kutná kutná kápáng narángngátaráng. Watá iháng usán Táwi yan me watá páliná ma sángngátaráng. <sup>20</sup> Iná kámá wu irit táulá káwak álosim hára hangngátaráng wáina, wata tángga Táwi yan me wa narángga tángga páliná sángngátaráng wawu kámá yá pálin yáni táwi simsim tit, kámá yá tátáwi tit, kulá kámá yá ku maming hánám tátáwi tingngátaráng.”

*Lam kasingga táng kilak ma tingngátaráng  
(Luk 8.16-18)*

<sup>21</sup> Jesu yá ing yánuK, “Káman dá lam kasingga tángga áwánggim wawa baket kinan káin me tebol tárang káin hám tinggim? Wáina muná. Ináku tebol ketnán tinggim watá ku álo.

<sup>22</sup> Me kámá tum táená wawu hiták háleineráng, hang me kámá kilak átaráng wawu hiták meng tunggap táineráng. <sup>23</sup> Káman dá me nanaráyan kárámanná pálak háleudu watá me ná narinek.”

<sup>24</sup> Waháranon sengsáráp tingga ku ing miuk, “Me rina nareráng wa kándáng hánám wa naráng hátingga átneráng. Tárak rina tánggoeráng wawu Ánutu yá wáinanon táng sámánga,

\* 4:11-12: Aisaia 6.9-10

wata ketnán nukngá sengsaráp táng sáminek. <sup>25</sup> Káman niyá me páliná watá átmek hálenđu Ánutu yá wata ketnán nukngá yot tingga iminek. Iná káman niyá me páliná wa ma átmák hálen wawu isikimo rina átmek watyot imáng hutang ihinek.”

*Irit tá áráng heheyán me tárák tingga yánuk*

<sup>26</sup> Hang ing hányon yánuk, “Ánutu yan átkuku wawu ing ina: ámna káman dá irit táulá káwak káin halingga sangga, <sup>27</sup> yáungán ruhinek me káen sengsulingga átkuinek, wahára rina rina áráng hengga árángga átaráng wawu ma narángngátak. <sup>28</sup> Káwak málmábayon du muk yámán árángngátaráng, hulátingga murán yáni, hang yumin yáni, hang yumin yáni kinan du pálin yáni tingngátaráng, <sup>29</sup> Áráng hengga kungga pálin yáni sangga álikngingga árát tu pálin yáni mamaráyan rám hálengngátak, wahára wu márúma yá áwánga maránga ihángngátak.”

*Mastet táulá hára me tárák tingga yánuk*

*(Mat 13.31-32; Luk 13.18-19)*

<sup>30</sup> Son Jesu yá yánuk, “Ánutu yan átkuku wata wu náut ina ingga mengga sáninet, me tárák ku náut hára mengga sáninet? <sup>31</sup> Ánutu yan átkuku wawu mastet táulá ina isik hánám kimo káwak kinan halingngátaráng. <sup>32</sup> Enendu rám watá áráng hengga tihangngátak wahára wu hái káin kutná kutná hená wa iháng hátingga maming táwi hánám wa tihangngátak. Ketná palá tingga árán alek káin iráp pá kahetang áwáng wahára tángga sek naránga yongnga ya átnándaráng.”

<sup>33</sup> Rám máro yon Jesu yá Táwi yan me wa tárákngá wáina re tárák hára yánuk. Watá nanará yáni káin álo nanaráyan kálu wahára yánánggiuk. <sup>34</sup> Málám me kámuk yánánggiuk wawu tárák hára re tingga yánánggiuk, iná máriya málám re disaepelná yot átang wahára ku wáina wáina ingga hulá yot kándáng hánám yánáng tolinggiuk.

*Jesu yá iruk táwi wa inán sáuk*

*(Mat 8.23-27; Luk 8.22-25)*

<sup>35</sup> Rám wahára it tá yonyonlingga áwán du Jesu yá disaepelná yánuk, “Umi pátum tákto numkálu kunin,” <sup>36</sup> ing yánán disaepel yá Jesu yá bot átuk wata kinan re áráng árát ámna naráwa káwan táwi wa yápmangga kuráng, waháranon bot kámá watyot hányon kuráng. <sup>37</sup> Kungga átnará, iruk maming táwi yá tán umi pátum punggilá yá hilák singga bot ketnán hanghang tángga árát, bot tá hála umi pátum kinan háin ingga tángga átuk. <sup>38</sup> Kulá Jesu wu bot yangngá káin miung ketnán ruhánga árán disaepelná yá táng mirak tángga inuráng, “Tiksa, náni ya urák náni wa narángoelák me? Hang suwindemán!”

<sup>39</sup> Wáina inát, málám tárutang iruk wa me táng mángga umi pátum punggilá wa yánuk, “Kilak! Yolop hánám átniráng!” Wáina yánán iruk ká san umi yá láláwingga hánám wa átuk.

<sup>40</sup> Kulá hang disaepelná wa yánuk, “Náuta ku pitángoeráng? Sándá naráng hákhátik sáni wa muná hánám puk me?”

<sup>41</sup> Wáina yánán, yáni wawu háramutang pikpito naránga yáni meme táuráng, “Náwu ni? Iruk kot umi pátum punggilá yá watán me narángoeráng náwu!”

## 5

*Jesu yá iruk wáik isutuk*

*(Mat 8.28-34; Luk 8.26-39)*

<sup>1</sup> Jesu yá disaepelná yot Galili umi pátum wa hitik tángga Gerasen ále káin kung hengga, <sup>2</sup> rám Jesu yá bot sangga háuk waháranon ámna káman iruk wáik ká ep táená watá tanggán káin átang kakaya áwáng hiuk. <sup>3</sup> Ámna wawu tanggán káin átnándak, wahára ámna káman dá ámna wa háthárot tán tárák ku muná, sen dá enendu muná yon. <sup>4</sup> Rám kámá sen dá ket hárammá káto hárotnándaráng, enendu sen uying rákrákit tángngátak. Káman dá hálangngá táng hang titiyan du muná. <sup>5</sup> Rámá rámá káen me yáungán wawu ále yáilá káin tanggán dá átak wakáin re átang huhumenman pálak málmábayon sutná sutná wa sup pá marángngátak.

<sup>6</sup> Málám mulángán káin átang Jesu kangga hururung ingmen kung kondolá hára tulá hára imánga han, <sup>7-8</sup> Jesu yá inuk, “Iruk wáik, ámna wa sangga hang!” Wáina inán naránga hahatingga ingmen ing mantáuk, “Jesu, Ánutu Árená Hánám wata Nanggená, rina táng namindelák? Ma keháng lem táindát ingga Ánutu rahálá hára nanáng!”

<sup>9</sup> Ing inán Jesu yá inuk, “Kutya ku ni?” Ing inán, watá miuk, “Nák ku iruk wáik tombong hásak wata táwi yáni ya átnándat, wáina wata ku kutna wu Tombong Hásak.” <sup>10</sup> Wáina inánga ále nahára ma násutnándalák ingga kiling muk.

<sup>11</sup> Put urum táwi káman du ále yáilá isikimo wata álatná kálu enang waháranon sungngi nangga árát. <sup>12</sup> Kulá iruk wáik watá Jesu kiling muráng, “Suring námátá put wa átaráng wata kinan kung hanin.” <sup>13</sup> Wáina ing met, Jesu yá álo ingga yánán iruk wáik watá ámna waháranan áráng hengga kung put wa áturáng wata kinan háuráng. Put káwan táwi wata sale

yáni wu 2000 watá hururung ingmen ámuta re hangga umi máta porá isikimo hára hitangga kung umi pátum kinan hangga umi nangga kámuturáng.

<sup>14</sup> Wáina tát, ámna put wa pin yáni táená watá wa kangga pitánga kungga pingnga wa it kinan me ále wata kátu káin yánát ámna náráwa yá rina tunggafek ingga kakaya kuráng. <sup>15</sup> Rám ámna náráwa yá Jesu yá átuk káin wa áwánga káuráng gu ámna iruk wáik ká ep táená táng toliuk wawu sutná kándáng tánggánengga, nanaarán yá kándáng hálen, wahára putung árán, kangga pitáuráng. <sup>16</sup> Kulá rendá wahára átang rahán yáni yá káuráng watá wu ámna iruk wáik ká ep táená wawu wáina wáina ingga áwuráng wa yánuráng, hang put tu wáina táeráng ingga hányon yánuráng. <sup>17</sup> Kulá me pingnga wa naránga ámna náráwa yá ále ná sanga kung ingga sonson Jesu yolopon kiling muráng.

<sup>18</sup> Kulá Jesu málám bot ketnán áruk wahára wu ámna iruk wáik ká ep táená táng toliuk watá káman kunin ingga Jesu kiling muk. <sup>19</sup> Enendu Jesu yá álo ingga ma inuk, ináku ing inuk, “Itya káin kung sipya kátu Táwi yá urákka naránga kutná táwi rina táng kamek wa wáina ingga yáinélák.” <sup>20</sup> Wáina inán du ámna watá kung Dekapolis ále káin wáina ingga Jesu yá kutná táwi rina táng muk wa yánánga kun ámna náráwa yá wa naránga ikik háramuturáng.

*Náráwa máto kámurená yot náráwa ilalák mara iháng tárut táuk  
(Mat 9.18-26; Luk 8.40-56)*

<sup>21</sup> Rám Jesu yá bot ketnán umi pátum wa son hitik tángga kung numkálu átuk, wahára ámna náráwa yá kik hánám wa áwáng áwálák táuráng. <sup>22</sup> Wáina tát átnarán, miti itná yan ámna yáilá káman kutná Jairus watá áwáng Jesu kangga tulá hára imánga hangga <sup>23</sup> inánga pahálá yot hánám kiling muk, “Uriwana máto yá kámutnándek. Ko áwáng ketya yá tánggatá álo hálangga tárutang há átnek.”

<sup>24</sup> Wáina inán du Jesu yá watyot kun, ámna náráwa táwi hánám watá isutang kungga uying kákkárik táng mánga kuráng. <sup>25</sup> Kulá náráwa káman wahára átuk wawu yara 12 wata kinan yipitná ya rímá rímá kungga rewe átnándak. <sup>26</sup> Málám dokta máro hánám watán káin kun hálang imánin ingga tánggátaráng, enendu sut láwit táwi hánám imánggátaráng, me supmá kámuk hánám sáuk, enendu ilalákná yá álo hálená ina ku ilalák watá táwi hánám wa hálangga átnándak. <sup>27</sup> Málám Jesu yá wáina wáina tánggátak ingga met naránga ku, sárumá ya káwan táwi kungga áturáng wata kinan kung lapmá hásak hára wa tánggáuk, <sup>28</sup> náuta, “Na hánámá lapmá hásak káin tánggáinet wawu há álo háleinet,” ingga naránga átuk wata. <sup>29</sup> Waháranyon hánám sip pá hangga átnándak watá sálikngin málám sutná káin naruk ku sutná márawingga átnándak watá pukon sálikngingga kun, <sup>30</sup> waháranyon Jesu yá naruk ku hálangngá kátu yá sanga kun málám hurik tángga kik táwi kunggaturáng wa yánu, “Niyá nákkán lap tánggaek?”

<sup>31</sup> Ing men disaepelná yá inuráng, “Kang, ámna náráwa kik hánám keháng rosingga koeráng, enendu ko ku melák, ‘Niyá nehánggaek?’ ingga melák.”

<sup>32</sup> Wáina inuráng, enendu Jesu málám emá re niyá nehánggaek ingga áwálák hálangga kuk. <sup>33</sup> Jesu yá wáina tán kangga náráwa ni ilalákná yá álo hálen naruk, málám pitánga yángyáng pálak áwáng háramá hulá hára turingga hangga wáina wu pálipuk ingga inuk. <sup>34</sup> Wáina wáina ingga inán Jesu yá inuk, “Uriwana, naráng hákhátikka watá keháng tolek. Pahán láláp hára kuinelák, iná ilalák wawu pukon kepmáek.”

<sup>35</sup> Jesu yá wa inánga emá me tángga átnarán, ámna kámá miti itná yan ámna yáilá watán it káinnan dá áwáng inuráng, “Uriwaka wawu há kámutak. Márapmá watyot tiksa ma imindalák.”

<sup>36</sup> Wáina inát Jesu málám watán me wa káramatingga há naruk, enendu ámna yáilá wa inuk, “Ma narángpak táindalák, ináku naráng hákhátik hára káto átnelák.”

<sup>37</sup> Wáina inánga málám yánán kámá yá ma isutang kuráng, ináku Pita, Jeims hang Jon, Jeims kulaná, watyot re kuráng. <sup>38</sup> Yáni wu rím miti itná yan ámna yáilá watán it káin kung hangga Jesu yá kápuk ku huhumenman tángga kutkáyawát wa irawa hára ingmen tánggarát. <sup>39</sup> Málám kung it kinan hangga yánu, “Náuta wu kut me huhumenman ná tángga átkoeráng? Nangge náwu ma kámurak, ináku ruhángga átak.”

<sup>40</sup> Wáina yánán watá yut mánga árát málám yánán erek ingmen kep káin hat, naning maming got disaepelná káman áturáng wa ihángga nange tng sat átuk wakáin kung háuráng. <sup>41</sup> Málám hang nange wata ketná hára tángga inuk, “Talita kum” (wawu ing “Náráwa kimo, no kanet ‘Táruálák!’”). <sup>42</sup> Waháranyon hánám náráwa máto watá tárutang kung áwáng tán kangga ikik hánám háramuturáng. Náráwa kimo wawu yaraná wu 12. <sup>43</sup> Waháranyon málám sungngi kámá imát náik ingga yánánga ku kungga kámá wáina táek ingga ma yáyánáya olet yáni máuk.

## 6

*Profet tu itná hulá hára kutná árená muná  
(Mat 13.53-58; Luk 4.16-30)*

<sup>1</sup> Kulá Jesu málám rehára átuk wa sangga itná hulá káin disaepelná watyot kuráng. <sup>2</sup> Rám Sabat tá áwáng hiuk hára wu miti itná káin Táwi yan me yánáng tolingga árán, urum táwi wa narángga áturáng wata kinan máro hánám bá yon háramutang me keke ing miuráng, “Ámna nátá nanará wawu rekáinnan ihuk? Nanará álosim náwu niyá imuk ngáya tángga tárák hulá hulá wa hányon tánggoek? <sup>3</sup> Náwu kapenda me náut? Náwu Maria nanggená Jaims, Josep, Judas hang Saimon wata tat yáni me rina? Hang yitná ilommá nahára nányot há átnándamán.” Wáina mengga kuk táng mángga watán me wa pálipuk ingga ma naruráng.

<sup>4</sup> Wáina met Jesu yá yánuk, “It yáni hulá me málámbán hun kinan me málámbán itná pahálá kinan rewe ku profet tu kut yáni árená muná.” <sup>5-6</sup> Jesu málám naráng hákhátik yáni muná wa kangga háramutuk, wata ku málám wahára ket tárák kámá táwi sim ma táuk, ináku ilalák mara yarákimo wahára ketná yá ihánggápán álo háliuráng wa rewe. Wáina tángga Jesu málám itná itná kungga Táwi yan me wa yánáng tolingga átkuk.

*Jesu yá disaepel 12 suring yámuk  
(Mat 10.5-15; Luk 9.1-6)*

<sup>7</sup> Málám disaepelná 12 wa mantáng yámán áwát, iruk wáik yásusut watán háláng wa yámángga yará yará suring yámán kukuya ing yánuk. <sup>8</sup> “Náut kámá káman kálu watán ma ihindaráng ináku to rewe ihineráng. Másáng ma ihindaráng, yák ma ihindaráng me sup kámá tumá kinan árát ma ihindaráng. <sup>9</sup> Sendol re moneráng, iná sut tátámot tán hánám kámá ma ihindaráng. <sup>10</sup> It rehára ruhineráng watá wahára re átang kungga it kapme wa sáineráng. <sup>11</sup> Iná it káman dá herongnge ma táng sámángga ma sáhená yan tárák árát, me sándán me ma narát, wawu háram sáni káin káwak káhumá wa káting halit wahára han du kuineráng, watá ku watyot me yá átak háleinek,” ingga yánuk.

<sup>12</sup> Kulá disaepel watá hangga kungga pahán hurik táineráng ingga ámna náráwa yánángga kuráng. <sup>13</sup> Yáni waku iruk wáik táuppon yásut yámángga ilalák mara táuppon oel kulingga kuháng yámángga ku ilalák yáni háranan iháng tárut tángga kuráng.

*Jon Umi Kuháng Yámamá wa salá ták maruráng  
(Mat 14.1-12; Luk 9.7-9)*

<sup>14</sup> Kulá Jesu kutná yá táwi hánám hálengga kungga árán du King Herot tá rina rina tunggafengga átuk wa naruk. Kátu kámá yá wu ing mengga kunggarát, “Jon Umi Kuháng Yámamá kámutuk watá son hám tárutuk wáina hálendu ket tárák hulá hulá tátáyan háláng wawu wahára átak.” <sup>15</sup> Kulá kátu kámá yá wawu Elaija ingga menggaturáng, iná kátu kámá yá wu profet uláp hánám átkiuráng waháranan ina ingga menggaturáng.

<sup>16</sup> Iná Herot tá ku wa narángga wu ing miuk, “No yáne Jon salá maruráng watá son tárutuk!”

<sup>17</sup> Jon wawu huphuráp Herot málámbá yánán kung ket tángga hárotang táng it káto kinan tiuráng. Wa táuk wawu náuta kulaná Filip áwáná Herodias wa Herot tá áwáná ya tán, <sup>18</sup> wata ingga ku Jon dá ing mengga sonson tángga árán, “Herot ko kulakka áwáná áwáka ya táulák wawu kandák.” <sup>19</sup> Wáina inángga sonson tángga áwán du Herodias yá pahálá kuk hánám naráng mángga áwánggiuk, enendu utkámut tátáyan kálu kámá ma tunggafenggiuk, <sup>20</sup> náuta Herot tá Jon dá naráng mánggiuk wawu ámna kándáng rongrongngá, wata ku Jon dá hányon pitáng mángga kándáng hánám pinná tánggiuk. Rám Herot tá Jon dán me naránggiuk hára wu naráng yakyawák tángga narángpak hánám tánggiuk, enendu son Jon dán me nanará ya wu kikiná naránggiuk.

<sup>21</sup> Pukon da ku Herodias yan rám álosim káman dá áwuk wawu Herot tá tunggafiuk watán rám. Wata ku umi sinak maming táwi tátáya kapman dán ámna yáin yáni me tewé ámna yáin yáni watyot ále Galili yan ámna yáilá wa iháng uyiuk. <sup>22</sup> Rám wata kinan du Herodias uriwa yá áwáng rahán yáni hára wa táit pánáp tángga árán Herot yot ámna hulá hulá watá kangga álosim naruráng. Wáina hálendu king gá náráwa wa inuk, “Ko náuta kámá narángga naninelák wawu no há hánám kaminet.” <sup>23</sup> Ing inángga me káto hánám mengga miuk, “Pálipuk hánám ko náuta narángga naninelák wawu no há kaminet wata tárákná ku ále káwak no pinna táet wa huk tángga numkálu kamánggem wáina.”

<sup>24</sup> Wáina inán náráwa málám hangga kuk ngáyá kung maming inuk, “Náut nanamáya ininet?”

Ing inán maming gá inuk, “‘Jon Umi Kuháng Yámamá wata yáilá ya naret,’ ingga ininelák.”

<sup>25</sup> Wáina inán náráwa málám sokmuná hánám son kung king inuk, “Nák ku ko kula pálik hánám nahára Jon Umi Kuháng Yámamá wata yáilá wa tera hára tingga táng áwáng naminelák ka naret.”

<sup>26</sup> Wáina inán king gá naránpak táwi hánám táuk, enendu me káto hánám mengga inuk me ámna yáilá sungngi nanaya áwuráng wata rahán yáni hára hálendu milunná ma yaliuk.

<sup>27</sup> Ináku wahárayon yáup ámnaná suring mán Jon yáilá tángga áwáwáya kuk. Ámna watá kung Jon it káto káin átuk wakáin salá ták maránga <sup>28</sup> táng tera hára tingga táng áwáng náráwa wa imán watá táng kung maming imuk. <sup>29</sup> Wa naránga Jon dán disaepel yá áwáng tambun wa táng kung tanggán káin usuráng.

*Jesu yá ámna 5000 wa sungngi sing yámuk*

*(Mat 14.13-21; Luk 9.10-17; Jon 6.1-14)*

<sup>30</sup> Aposel kuráng watá átkut sálin áwáng Jesu rupmá áwálák átang wáina wáina táumán me wáina yánáng toliumán ingga erek ingmen inuráng. <sup>31</sup> Rám ore wahárayon du ámna náráwa watá táup hánám kung áwáng tángga árát tu Jesu yá aposelná yot sungngi yáni nanayan tarák muná hálendu yánu, “Sáni re hánám áwát nákkot kungga ále rákit kangga wakáin sek naráin.”

<sup>32</sup> Ing yánánga yáni re hánám bot hára árángga ále rákit káman káin kuráng. <sup>33</sup> Enendu táup hánám bá há kápuráng wáina hálendu wakáin koeráng ingga há naránga it ále ore wakáinnan watá háram kálu hururung ingmen watá kálak kung hiuráng. <sup>34</sup> Jesu yá kung hengga kápuk ku ámna náráwa táup hánám watá árát kápánga urák yáni naruk, náuta sipsip márum yáni muná ina hálendu málám Táwi yan me táwi hánám wa yánáng toliuk.

<sup>35</sup> Kulá it tá há yonyon tin kangga disaepelná yá áwáng inuráng, “Nákáin du ále páliná muná káin átnáne há yonyon tek. <sup>36</sup> Wáina wata ku ámna náráwa álo suring yámátá it kámá káin há yáni kungga sungngi yáni kangga yungga nanggalát me?”

<sup>37</sup> Ingga inát Jesu yá yánu, “Náut kámá nanayan wawu sáni kangga yámineráng.”

Ing men watá inuráng, “Ámna káman dá yáup yap 8 tángga sup ihángngátak, wáina watá ku álo kung másáng yungga yámátne nanggalát.”

<sup>38</sup> Ing met Jesu yá yánu, “Másáng tum pa rina tá átaráng ingga kaniráng.”

Ing men kungga kangga ku inuráng, “Másáng tum 5 hang káut yará yá átaráng.”

<sup>39</sup> Wáina inát tu Jesu yá yánán ámna náráwa wa disaepel yá iháng urum kámá kámá tit kepong álo kámá hára wa putung háuráng. <sup>40</sup> Kulá putung áturáng wawu urum kámá 50 kámá 100 wáina wáina re áturáng. <sup>41</sup> Wáina árát Jesu málám másáng tum 5 watyot káut yará wa ihángga átang alek kálu hálangga Táwi yan káin sáponga tángga másáng wa hikuk tángga iháng disaepelná yámán ámna náráwa wa ting yámánga kut, málám káut yará wa wáinayon tángga yámán kámuk ting yámánga kuráng. <sup>42</sup> Wa yámát nangga kámuk hánám kawin yáni hahatín, <sup>43</sup> disaepel yá másáng me káut káhumá áturáng wa iháng rápmám 12 wa tuwat hánám munduráng. <sup>44</sup> Iná ámna náráwa sungngi wa náuráng wata sale yáni wu táup hánám, iná 5,000 wawu ámna sale yáni re.

*Jesu yá umi ketnán yángyáreng kuk*

*(Mat 14.22-36; Jon 6.16-21)*

<sup>45</sup> Kulá wahárayon Jesu yá disaepelná sokmuná kuniráng ingga suring yámán watá kálak umi pátum numkálu it Betsaida káin kukuya bot ketnán árángga kut, málám ámna náráwa urum wa yánán sansan tángga kuráng. <sup>46</sup> Watá kung hálit kápánga málám ále yáilá álatná káin sáponga tátáya áruk.

<sup>47</sup> Rám it tá pup táuk wakálu ku bot tá umi pátum táitná káin kunggatuk, iná Jesu yá ku málám re ále yáilá káin há átuk. <sup>48</sup> Málám hálangga kápuk ku iruk maming táwi hánám hásingga árán du disaepelná yá pul tángga kukuya iháng husingga árát. It háiháiya kálu málám umi ketnán yángyáreng iháng hátin ingga tángngarán du, <sup>49</sup> disaepelná yá hálangga káuráng gu umi ketnán tangtareng áwánga árán yáni wu kangga utni ingga ohok táuráng, <sup>50</sup> náuta disaepel kámuk kangga pikpito hánám naruráng, enendu wahárayon ing yánu, “Káto háleineráng! Náwu na áwet. Ma pitáindaráng.” <sup>51</sup> Wáina yánánga málám árángga bot ketnán káin kun wahárayon iruk watá sangga hang náng ingmen árán kangga ikik hánám hárámuturáng, <sup>52</sup> náuta nanará yáni yá kándáng ma naráng rákit táuráng hálendu másáng gá sambe tiuk wata wu manyon naráng hátiuráng.

<sup>53</sup> Kulá yáni wu umi pátum wa hitik tángga Genesaret káin kung hengga bot wa wahára puting sat átuk. <sup>54</sup> Kulá bot káinnan dá sangga káwak káin háuráng wahárayon ámna náráwa yá Jesu kangga há naráng hátiuráng. <sup>55</sup> Wáina hálendu yáni waku hururung ingmen it yáni it yáni kungga ilalák mara wa iháng kangkang hára tingga ihángatang Jesu yá rehára átak wa nangnaráng wakáin kunggiuráng. <sup>56</sup> Hang ále rehára rehára kunggiuk wahára wu itná itná kámuk it yáilá me it nanggená waháranan dá ilalák mara iháng áwáng urum komená yáni



hára tingting tánggiuráng. Wáina ting sat áran du kiling mát tu álo san watá lapmá ilungngá re kimo tánggagaya, iná niyá wáina há tángganggiuráng wawu há álo hálenggiuráng.

## 7

### *Rongrongngá yot tu rongrongngá muná ya me táuráng*

(Mat 15.1-20)

<sup>1</sup> Rám káman Farisi yot lo yan tiksa yá Jerusalem káin átang áwuráng watá áwáng Jesu kang áwálák tángga <sup>2</sup> kápúráng gu Jesu yan disaepel kátu yá ket yáni kálak ma yawolená\* sungngi nangga árat. <sup>3</sup> Farisi me Juda kámuk wawu tátáwi yáni yan kálu káman wáina isutnandaráng wawu ing, ráma ráma ket yáni kálak yawondang gu sungngi nangngátaráng, iná ket yáni ma yawolená sungngi ma nangngátaráng. <sup>4</sup> Rám maket komená sangga it káin áwángngátaráng hára wawu áwáng ket yáni kálak yawondang gu sungngi nangngátaráng, me tátáwi yáni yan kálu hulá hulá isurená wa isutnandaráng. Kálu káman du ing kap me umi kárangngá me tipot yanyawon táená wa.

<sup>5</sup> Wáina háleudu Farisi yot lo yan tiksa watá Jesu inuráng, “Rina tángga ku disaepelka yá tátáwi náni yan kálu wa isutang ket yáni rongrongngá ma hálen sungngi nanggoeráng?”

<sup>6</sup> Wáina inát tu Jesu yá yánuK, “Ámna kusákná sánda puk hánám Ánutu yá profet Aisaia inán kándáng hánám ing mengga uyiuk:

‘Ámna náráwa náwu milun dá re meng toling namángngátaráng,  
iná pahán yáni wu nepmang kung mulangan hánám átaráng.

<sup>7</sup> Hánámá sut tá re nanáng sáknngingátaráng,

hang me mengngátaráng wawu ámna yan meng rákit mená wa rewe Táwi yan me ina yánángngátaráng.’†

<sup>8</sup> Sándu Ánutu yá meng rákit me tiuk wa sat kun du ámna nangge yan kálu wa re káto tángga átkoeráng.”

<sup>9</sup> Hang ing yánuK, “Sándu álo kámá hánám ing tánggoeráng! Ánutu yan meng rákit me wa iháng numkálu tingga ku ámna sánin kálu wa rewe isutang átkoeráng! <sup>10</sup> Kulá Moses yá ing miuk, ‘Mam nan sáni ya tarang káin átneráng,’‡ iná, ‘Niyá naning maming me waík yáninek wawu utkámút táineráng.’§ <sup>11</sup> Enendu, ket tarák sáni wawu hulá kámá. Sándá ku ing mengngátaráng, ámna káman dá naning me maming ing yánánggim, ‘Sup me kutná kutná náwu sán sámánggem, enendu Ánutu yan pingnga ingga há miut, wata ku ma sámindát,’ <sup>12</sup> wáina tángga ku sat naning me maming ma hálang yámángngátak. <sup>13</sup> Wáina tángga ku tátáwi sáni yan kálu wa uying sat áwán Ánutu yan me wa táng hang tinggoeráng, hang kálu wáinanyon nukngá kámá hányon tánggoeráng.”

<sup>14</sup> Hang son Jesu yá urum táwi wa mantáng yámán málámbán káin áwát yánuK, “Sán kámuk nákkán me ná káramatingga kándáng hánám narineráng. <sup>15-16</sup> Náut kámá káman kep káinnan dá kung ámna me náráwa káman da kinan hangga watá tán mukmuro pálak ma hálenggim, ináku náutá ámna me náráwa kinan káinnan dá áwáng kep káin hangngátak watá tán du mukmuro pálak hálengngátak.”

<sup>17</sup> Kulá máriya urum táwi áturáng wa sangga kung it kinan háuk, wahára ku disaepelná ya me tarákná wa yánuK wata hulá nanaráya ináng suliuuráng. <sup>18</sup> Wáina ináng sulit Jesu yá yánuK, “Sánda nanará sáni muná yon me? Ing wa ma kangngátaráng me? Náut kámá káman kep káinnan dá kung ámna me náráwa sut kinan hangngátak, watá tán ámna me náráwa watá mukmuro pálak ma hálengngátak. <sup>19</sup> Náuta watá kung pahán kinan ma hangngátak, ináku kung kombán káin hangga ku kámun kálu ámna nangge sut sangga kep káin kungngátak.” (Wa men du disaepel yá naruráng sungngi kámuk hánám wawu rongrongngá.)

<sup>20</sup> Waháranyon kungga ku ing miuk, “Náutá ámna me náráwa sut kinan átang áwáng kep káin hangngátak watá tán du mukmuro pálak hálengngátak. <sup>21</sup> Kulá ámna me náráwa pahán kinan nan dá áwáng hangngátak ku nanará waík, márámamák, manek, ámna nangge utnut, náun áwán dá ámna náráwa nukngá yot márámamák tátá, <sup>22</sup> há áran nukngá ya mengmeng, ket tarák kandák kámá yáyále, me kusák, put ang gán ket tarák, kápang naknarák, mengmán mengmán, kaya narátá árená háhále, hang hohonáyan ket tarák. <sup>23</sup> Wáina watá hánám bu pahán kinan nan dá áwáng hangga ámna me náráwa táng waík tángngátak.”

### *Fonisia náráwa yan naráng hákhátik*

(Mat 15.21-28)

\* **7:2:** Rám disaepel kátu yá ket yáni ma yawolená sungngi nangga áturáng wawu Farisi yá kápát tu Táwi rahálá hára rongrongngá ma háliuráng. Rongrongngá ma háliuráng wawu ket káin wata ma miuráng, ináku Juda tátáwi yáni yan me páilák uyená hitik táeráng ingga wata miuráng. † **7:7:** Aisaia 29.13 ‡ **7:10:** Son Ihuk 20.12; Lo 5.16 § **7:10:** Son Ihuk 21.17; Pris 20.9

<sup>24</sup> Jesu yá ále wa sangga Tair ále káin kuk ngáyá kung it káman da kinan kung hangga ku káman dá Jesu wáina átak ingga nanará watá taktak mán kilak árin ingga átuk, enendu kilak átnát tán tárak muná. <sup>25</sup> Kulá náráwa káman uriwa iruk wáik ká ep táená watá Jesu yá wáina áwek ingga pingnganá naránga waháranon áwáng hárammá hulá hára tulá hára imánga turingga háuk. <sup>26</sup> Náráwa wawu ále Fónisia Siria káwak káin tunggafiuk, iná málám wawu hun Juda waháranan muná. Watá áwáng iruk wáik ká uriwa ep táená wa isurátá kuik ingga Jesu kiling muk.

<sup>27</sup> Wáina inán Jesu yá inuk, “Hulátingga hánám bu satá nangge yá náuta nareráng wa kálak naniráng. Nangge yan sungngi wa iháng ang yáni yámátne kándáng ma háleindák.\*\*”

<sup>28</sup> Ingga Jesu yá inán náráwa watá miuk, “Pálipuk, ámna hulá, enendu ang gu tebol tárang káin nangge yá sungngi náená káhumá watá hat hányon nangngátaráng.”

<sup>29</sup> Wáina men Jesu yá inuk, “Wáina melák wata ku álo kung. Iruk wáik wawu uriwaka sangga há koek.”

<sup>30</sup> Kulá náráwa wawu hangga itná káin son kungga káuk ngá ku uriwa wu iruk wáik ká sangga kun kome hára hang pándák áran.

*Jesu yá ámna káman kárámáná tungngá, mená muná wa táng toliuk*

<sup>31</sup> Kulá Jesu yá Tair ále wa sangga Saidon ále kálu kungga hangga Dekapolis ále kálu kungga umi pátum Galili káin kung hiuk. <sup>32</sup> Wakáin kungngárán ámna káman kárámáná tungngá yot tu meme tátáya táng husingngátak wa engotang áwuráng ngáyá áwáng Jesu rupmá hára sangga ketná yá ámna wa tánggagaya kiling muráng.

<sup>33</sup> Wáina inát Jesu málám ámna wa engotang urum táwi wa yápmangga kep sim kungga ketná kálongngá numnum iháng kárámáná hinangngá numnum ihánggápangga, son alupmá murán ketná káin han táng ámna watá elákná káin tánggangga <sup>34</sup> málám hálen alek kálu áran pahálá yot urákná naránga irukngá uyingga inuk, “Efata!” (wata hulá ku ing, “Yaling!”††). <sup>35</sup> Wáina tán rám waháranon ámna wata kárámáná yá ruwarán elákná yá álo hálen wahára átang gu hiták meme tánggatuk.

<sup>36</sup> Kulá wahára átang Jesu yá olet yáni káto hánám tángga ni kámá káman ma inindaráng ingga yánánga sonson táuk, enendu ámna náráwa yá meng isurát kungga táwi hánám háliuk.

<sup>37</sup> Ámna náráwa yá wa naránga ikik hánám háramutang ing miuráng, “Kutná kutná wu kándáng hánám wa tánggoek. Watá tán káráman yáni tungngá yá ruwarát, me yáni muná yá meme tánggoeráng.”

## 8

*Jesu yá ámna náráwa 4000 wa sungngi sing yámuk  
(Mat 15.32-39; 16.1-4; Luk 12.54-56)*

<sup>1</sup> Rám ore wahára ámna náráwa urum táwi kámá yá áwáng árát, Jesu yá wa kápán sungngi yáni muná hálen disaepelná mantán áwát yánuuk, <sup>2</sup> “Ámna náráwa nátá áwáng nákkot árát rám kalálu hálek ka náut kámá kámá nanayan ma átyámák, wata ku urák yáni naret. <sup>3</sup> Iná no hánámá hánám suring yáme kuineráng wawu kálu hára hálet yángom tin háineráng, náuta kámá wu kálu mulangan hánám áwuráng.”

<sup>4</sup> Wáina yánán disaepelná yá inuráng, “Enendu náwu ále rákit káin átaman, ni hánám bá ku sungngi tárak hára ihánga áwán yámátne nanggalát?”

<sup>5</sup> Wáina ingga met Jesu yá yánuuk, “Másáng tum ba rina tá átaráng?”

Ing yánán, “Másáng tum bu 7 dá átaráng,” ingga inuráng.

<sup>6</sup> Wáina inát Jesu málám ámna náráwa wa yánán káwak hára wa putung hang árát, málám másáng tum ihánga átang sáponga tángga tángga hikhuk tángga iháng disaepelná yámán ámna náráwa ya ting yámánga kuráng. <sup>7</sup> Hang káut isikikimo yarákimo hányon árát, wata sáponga hányon tángga iháng disaepelná yámán watyot ámna náráwa ya ting yámánga kuráng. <sup>8</sup> Kulá ámna náráwa yá nangga álo náemán ingga kátu yápmat, disaepel yá kátu kátu wa iháng rápmám 7 wa tuwat hánám monduráng. <sup>9</sup> Ámna náráwa sale yáni wu 4000 náut wáina watá árát suring yámán kut <sup>10</sup> waháranon málám bu disaepelná yot bot ketnán árangga Dalmanuta ále kálu kuráng.

<sup>11</sup> Farisi yá áwuráng ngáyá áwáng Jesu yot me inán kanán tángga ingirungngin ingga ing inuráng, “Alek kálu nan tárak kámá nálang.” <sup>12</sup> Ing inát Jesu málám narán maráwin yánuuk, “Náuta ku rám nátán ámna náráwa yá tárak yáyáleya nanángoeráng? No pálipuk ing sánin, tárak káman ma hánám káindáráng.” <sup>13</sup> Wáina yánánga kung bot ketnán árangga son umi pátum hitik tángga numkálu kuk.

\*\* 7:27: Me tárákná ‘nangge’ ya mek wawu Juda ámna náráwa, iná ‘ang’ ga mek wawu ámna náráwa káwak kámá káinnan. Juda yá ámna náráwa kámá káinnan wawu ‘sándu ang’ ingga yánangngátaráng. †† 7:34: Me Aramek kálu “efata” wata hulá nukngá wawu “ruwalák”.

*Farisi yot Herot tán yis ya me tárákná yánuK*

*(Mat 16.5-12)*

<sup>14</sup> Rám disaepel yá bot ketnán kuráng wahára wu kalot yámán másáng kámá ma ihená kuráng, iná káman re yá ku bot kinan átuk. <sup>15</sup> Kungga átang Jesu yá yánuK, “Kándáng gon átéráng, Farisi yot Herot tán yis ya hálang rákit tánggatneráng.”

<sup>16</sup> Wáina yánán yáni inán kanán tángga ku miuráng, “Náwu másáng muná wata nánek.”

<sup>17</sup> Kulá Jesu málám wáina wata puk me táeráng ingga ku yánuK, “Náuta ku másáng muná wata mená tánggoeráng? Sándá pálipuk ma kangguráng me ma naráng hátingguráng? Pahán sáni wa káto me? <sup>18</sup> Sándu rahán sáni pálak enendu ma kangguráng, me káráman sáni pálak enendu ma narángguráng. Ket tárák rina rina tángngátat wawa sándá ma naráng hátingguráng me? <sup>19</sup> Rám no másáng tum 5 wa 5000 dán da hikhuk táut hára nat kátu árát rápmám rina molát tuwaturáng?”

Ing yánán “12” ingga inuráng.

<sup>20</sup> “Iná rám no másáng tum 7 wa 4000 dán da hikhuk táut hára nat kátu árát rápmám rina molát tuwaturáng?”

Ing yánán “7” ingga inuráng.

<sup>21</sup> Kulá Jesu yá yánuK, “Wáina kangga ku rina tángga kámá ma re naráng hátingguráng?”

*Jesu yá ámna rahálá kunángngá táng toliuk*

<sup>22</sup> Kulá it Betsaida káin áwáng árát ámna náráwa urum káman dá ámna rahálá kunángngá káman engotnáwáng tánggang ingga Jesu kiling muráng. <sup>23</sup> Wáina inát Jesu málám rahálá kunángngá wa ketná hára tángga it kapme wa sangga kep káin kung átang ámna wata rahálá káin alupmá muráng ketná yá tánggangga inuk, “Náut kámá kámá hálangga káelák me?”

<sup>24</sup> Ing inán ámna watá hálang san kun miuk, “Ámna náráwa kápet tu káráp pá ina kung áwáng tángga árát.”

<sup>25</sup> Wáina men Jesu yá son ketná iháng ámna wata rahálá numnum tin rahálá yá rongrongngá hánám hálangga kándáng árená wáina hálen kutná wa kándáng kápuk.

<sup>26</sup> Wáina tán Jesu yá itná ya suring mán kun ing inuk, “Kungga it kapme táwi káin ma átkuinalák.”

*Pita yá kák ku wa ingga Jesu inuk*

*(Mat 16.13-20; Luk 9.18-21)*

<sup>27</sup> Jesu yá disaepelná yot yáni wu kungga it yáilá Sisaria Filipai watán it nanggená kinan kinan átningga ku kálu hára kunggang gu yánáng suliuK, “Nákka ámna náráwa yá ni ingga menggoeráng?”

<sup>28</sup> Ing yánán watá inuráng, “Kámá yá ku ‘Jon Umi Kuháng Yámámá,’ ingga menggoeráng, iná kámá yá ku ‘Elaija,’ ingga menggoeráng, iná kámá yá ku ‘profet nukngá’ ingga menggoeráng.”

<sup>29</sup> Wáina inát Jesu yá yánuK, “Iná sáni wu náikka ni ing menggoeráng?”

Wáina yánán Pita yá miuk, “Kák ku Ánutu yá ámna suring mán hangga ámna náráwaná son iháháya miuk wa.”

<sup>30</sup> Wáina inán Jesu yá ni kámá kámá wáina ingga ma yánindaráng ingga káto táng yámuk.

*Jesu yá kámutang son tárutnek wata yánuK*

*(Mat 16.21-28; Luk 9.22-27)*

<sup>31</sup> Kulá Jesu málám disaepelná yot átang gu Ámna Nanggená wawu sut láwit táwi hánám narinek, me ámna yáilá, lo yan tiksa me pris tátáwi yáni watá táng kep tit utkámút táineráng ngáyá rám kaláhu átang gu son tárutnek ingga wáina yánuK. <sup>32</sup> Málám me wa hiták hánám yánán kangga wata ingga Pita yá engot hang kep kálu átang me táng muk.

<sup>33</sup> Enendu Jesu yá hurik tángga disaepelná kápángatang Pita me táng mángga miuk, “Satan, sárumna káin kung! Kák ku Ánutu yan nanará wa ma isuralák, ináku ámna yan nanará isutalák.”

<sup>34</sup> Wáina inángga ku ámna náráwa urum táwi mantáng yámán áwáng disaepelná yot árát tu yánuK, “Káman dá náK natnasut ta ku málámbán pahán wa sang hálingga málámbán maripong sunnga tánggatang gu náK nasutnek. <sup>35</sup> Iná niyá málámbán átkuku wata narángpak táinek wawu átkukuná watá muna kuinek, iná káman niyá náK me, me pingnga álosim wata ingga átkukuná wa sáinek wawu átkukuná watá ma muná kuindák. <sup>36</sup> Ámna káman dá káwak kán kutná kutná álosim erek átmánggim, enendu átkuku sásáliná muná wa ma tánggim, wahára ku kutná kutná watá ku rina hánám hálang imánggim? <sup>37</sup> Irukngá watá átkuku tátáya narángga wata yumnakngá Ánutu náut imánggim? <sup>38</sup> Rám nátán ámna náráwa wawu ámna mukmuro hang Ánutu ya kalot yámená. Sán háranan káman dá náK me nákkán me wata

reprepmá tánggim, máriya rám kálu Ámna Nanggená yá Naning gán yamá hálángngá pálak wata kinan angeloná káungá watyot áwánggim wahára wu reprepmá yon kanggim.”

## 9

<sup>1</sup> Hang ing hányon yánuk, “No pálipuk hánám ing sánin, kámá sán nahára átaráng wawu ma kámurená átnárát Ánutu yan átkuku watá hálángngá pálak áwán káineráng.”

*Jesu sutná yá hulá kámá háliuk  
(Mat 17.1-13; Luk 9.28-36)*

<sup>2</sup> Rám 6 átang gu Jesu yá Pita, Jeims hang Jon yángotang ále yáilá hasák táwi káin yáni kámuk hánám wa áráng áturáng. Áráng wakáin átang gu kondon yáni kálu sutná watá hulá kámá hánám wa hálen káuráng. <sup>3</sup> Kutná kutná tánggánengga átuk watá hakokowak hánám sireretná pálak háliuráng, wawu káwak ketnán ámna káman dá tán wáina ma tunggafenggim. <sup>4</sup> Átang kangngárát tu waháranon Moses káling Elaija yá kondon yáni kálu wa tunggafengga Jesu yot me inán kanán tánggaturáng.

<sup>5</sup> Wáina kangga Pita yá Jesu inuk, “Tiksa, nánda nahára átaman wawu álosim hánám, wata ku sima kaláhu usinemán, káman kákkán káman Moses yan hang káman Elaija yan.” <sup>6</sup> Disaepel kaláhu wawu pikpito hánám narángga áturáng, wata ku Pita yá wáina meinet ingga ma narená hánámá miuk.

<sup>7</sup> Wáina men átnárát mukam bá tunggafengga áwáng iháng támotuk, wata kinan du me káman ing áwuk, “Náwu nák Nanggena, no wata kikiná hánám naret. Watán me narineráng!”

<sup>8</sup> Wa narángga waháranon hálang sulingga káuráng gu ni kámá káman yáni yot wahára wu ma árán káuráng, ináku Jesu yá re wahára árán káuráng.

<sup>9</sup> Rám ále yáilá káin átang áwáng hanggaturáng wahára wu Jesu yá me káto mengga ing yánuk, “Náut káeráng wawu ni kámá káman ma hánám inindaráng, ináku árát kungga Ámna Nanggená yá kámurená háranan tárutnek.” <sup>10</sup> Wáina yánán yáni waku rina káuráng wa sat yáni yot re árán du “kámurená háranan dá tárutnek” wata hulá ya yáni inán kanán táuráng <sup>11</sup> ngáyá ku ing ináng suliuráng, “Náuta ku lo yan tiksa yá menggoeráng Elaija yá kálak hánám áwinek?”

<sup>12</sup> Wáina inát Jesu yá yánuk, “Wawu pálipuk Elaija yá kálak áwáng kutná kutná wa kámuk son iháng tolinek. Enendu me káman ing uyená átak wa háting márak tángga narineráng. Ámna Nanggená wu láwit táwi hánám wa narinek me wa kat hánámá háleinek. <sup>13</sup> No ing sánin, Elaija wu há áwuk wahára ámna yá yánin pahán isutang rina rina wa há táng muráng, wawu Ánutu yan me hára wata rina uyená wa isutang.”

*Jesu yá nangge káman iruk waík pálak wa táng toliuk  
(Mat 17.14-23; Luk 9.37-45)*

<sup>14</sup> Disaepel nukngá yá áturáng wakáin áwáng hengga kápurang gu ámna náráwa táwi hánám watá iháng áwálák tánggarát lo yan tiksa yá watyot menmen tánggarát, <sup>15</sup> ámna náráwa táwi watá Jesu yá áwáng hen kangga ku waháranon ikik hánám háramutang kang memeya rupmá káin hururung ingmen kuráng.

<sup>16</sup> Kut Jesu yá yánuk, “Náuta menmen tángga átkoeráng?”

<sup>17</sup> Ingga yánángga átnárán ámna káman urum táwi wata kinan átuk watá topmá inuk, “Tiksa, no nanggena iruk waík ká ep tángga milunná pop táená wa engotang áwet. <sup>18</sup> Rám rina hára watán rám hálanggátak wahára wu káto tánggatang táng san káwak hára han máta sángátin árán pululu yá áráng hekhek tángga sutná yá kándang nangga átnándak. Isutniráng ingga disaepelka yánet, enendu tát men sáeráng.”

<sup>19</sup> Wáina inán Jesu yá yánuk, “Ámna náráwa sándu naráng hákhátik sáni muná. Sányot rám rina átkuinet? Rám rina sándá márappmá namineráng? Nangge wa tángga nákkán káin áwániráng.”

<sup>20</sup> Wáina yánán nangge wa tángga Jesu yan káin áwát iruk waík watá Jesu káuk hára wu nangge wa tán hárikhárik tángga árán háting san káwak hára hangga kinkiwon tángga pululu yá máta kálu áráng hekhek tánggatuk.

<sup>21</sup> Wa kangga Jesu yá nangge wata naning inuk, “Rina hára hulátingga wu tárak ing tángga áwuk?”

“Nangge kimo háranon hulátiuk,” ingga naning gá inuk. <sup>22</sup> “Rám kámá wu háting se káráp káin me umi káin hangga kámurik ingga tángngátak, wata ku ko álo rina kámá tánggim me, urák náni narángga álo háláng námánggim me rina?”

<sup>23</sup> Wáina inán Jesu yá inuk, “Náuta ku wáina melák, ‘Ko álo me?’ Káman niyá naráng hákhátik hára átnek wawu kutná kutná erek álo tánek.”

<sup>24</sup> Wáina men nangge wata naning gá waháranon mantáuk, “Naráng hákhátikna wu átak, enendu isikimo, wata ku ko háláng námángga tátá táwi háleinek.”

<sup>25</sup> Jesu yá káuk ku ámna náráwa táup hánám watá wakáin hururung re uyingga kung wata tángga ku málám iruk waík wa me táng muk, “Kák ku káráman yot milun mátap yotugut watán iruk, no kanet nangge wa sangga áráng hengga kungga ku son áwáng waháranyon ma háindalák.”

<sup>26</sup> Wáina inán iruk waík watá mantáng pilingga hárikhárik táwi hánám tángga nangge wa sangga áráng hengga kuk. Ámna náráwa táup táwi yá kat tambun dá ina arán du nangge wawu há kámutak ingga káuráng. <sup>27</sup> Enendu Jesu yá ketná hára tánggatang táng hip tángga san hetang átuk.

<sup>28</sup> Wata torong hára it kinan kung hangga yáni kámuk hánám átang gu disaepel yá Jesu inuráng, “Rina ta ku nánda ma isurátne kuk?”

<sup>29</sup> Wáina inát Jesu yá yánuk, “Wáina wawu sáponga hára re kungga ku watá áráng hengga kuineráng.”

<sup>30-31</sup> Kulá yáni wu ále wa sangga Galili kálu kuráng, wahára wu Táwi yan me wa disaepelná re yánáng tolinggatuk, wata ku wakálu átaráng ingga káman dá nanará wata Jesu yá taktak muk. Wata kinan ing yánuk, “Ámna Nanggená wawu táng káyam ket yáni hára tit utkámuk táineráng, enendu rám kaláhu átang gu son tárutnek.” <sup>32</sup> Wáina yánuk enendu disaepel yá wáina wata nánek ingga ma naráng ruwat táuráng, me wata hulá ya ináng susuliya wu hányon pitáuráng.

*Niyá ku máta ya átnek?*

*(Mat 18.1-5; Luk 9.46-48)*

<sup>33</sup> Rám káman it Kapaneam káin áwáng hiuráng wahára wu áwáng it káman da kinan átang gu Jesu yá yánáng suliuik, “Kálu káin náuta menmen tángga áweráng?” <sup>34</sup> Kálu káin du niyá máta átgim ingga mengga wata menmen ná tángga áwuráng, wata ku mátan ma táená áturáng.

<sup>35</sup> Kulá putung átang gu Jesu yá disaepelná 12 wa mantán áwát tu yánuk, “Iná káman dá máta átnát ta naránga wu málám táng mári pukon da tingga kámuk kán yáup nangge hálangga átnek.”

<sup>36</sup> Wáina yánánga Jesu málám nangge kimo káman táng áwáng yáni yot ting san arán poláng mángga átang yánuk, <sup>37</sup> “Káman niyá nák kutna hára nangge kimo ná táng álolo táinek wawu nák neháng álolo táinek, hang káman niyá nák neháng álolo táinek wawu nák neháng álolo ma táindák, ináku niyá nák suring namuk wata táng minek.”

*Káman niyá nánda káyam ma táng námindák wawu nánda nuk náni*

*(Mat 10.42; Luk 9.49-50)*

<sup>38</sup> Kulá Jon dá Jesu inuk, “Tiksa, nánda káumán du ámna káman dá kák kutya hára iruk waík yásutang arán, kangga wáina ma táindalák ingga káto táng mumán, náuta wawu nánda n tombang muná.”

<sup>39-40</sup> Wáina men Jesu yá miuk, “Ma káto táng mindaráng. Káman niyá nánda káyam ma táng námindák wawu nánda nuk náni, wata ku ni kámá káman nák kutna hára ket तरák hulá hulá táinek watá torong hára náka me kandák kámá ma meindák. <sup>41</sup> No pálipuk hánám ing sánin, káman niyá náka naránga sáhán sán du Son Iháháyan Ámna watán pingnga hálen umi kátang sáminek wawu wata yumnakngá watá ma yakyawing mindák.

*Kutná kutná tán náni mukmurinémán*

*(Mat 18.6-9; Luk 17.1-2)*

<sup>42</sup> “Hang sup maming táwi táng kák sala hára putingga sat kung táp kinan hangga há kámugim enendu kákkán márapmá wawu isikimo. Iná ko tátá nangge kikimo naráng hákhátik yáni nák hára átak waháranan káman dá kung mukmuro tánggim wawu kákkán márapmá wu maming hánám táwi. <sup>43-44</sup> Hang ketya káman dá kangorán kandák tángga wu wa maránga satá kuinek. Kungga átkuku kinan hahaya ku ketya káman re yá wu álo kámá, náuta ketya yará pálak arán kung sup pora káráp lánggop sásáliná muná kinan háilon. <sup>45-46</sup> Hang háramya káman dá kangorán kung kandák tángga wu maránga satá kuinek. Kungga átkuku kinan hahaya ku háramya káman re yá wu álo kámá, náuta háramya yará pálak arán keháng sat kung sup pora kinan háilon. <sup>47</sup> Hang rahála káman dá kangorán kandák tángga wu rahála káman wa holengga satá kuinek. Kungga Ánutu yan átkuku kinan hahaya ku rahála káman re yá wu álo kámá, náuta rahála yará pálak arán keháng sat kung sup pora káin háilon. <sup>48</sup> Sup pora

‘watán umbeng wawu ma kámutnándaráng,

me káráp lánggop wawu ma sálíngindák.’\*<sup>\*</sup>

\* 9:48: Aisaia 66.24

49 Tawi yan káin towet sinin ingga ku sol tingga ku táng káráp singngátaráng. Ámna náráwa kámuk ku wáinanyon háleineráng.

<sup>50</sup> “Sol tu álosim hánám, enendu rák kíkngá watá sálinek wahára wu rina tátá wu kikngá yá son tunggafeinek? Ka tátá sol yá ina átnék, me nangge nuknukka yot orek sáni hára pahán káman re átneráng.”

## 10

*Jesu yá náun áwán dá honhoren tátá wata miuk  
(Mat 19.1-12; Luk 16.18)*

<sup>1</sup> Kulá Jesu yá ále wa sangga Judia ále kálu kungga Jordan umi wa hitik tángga kung numkálu árán du ámna náráwa táwi hánám watá watán káin áwáng het tu málámbá tángngátak wáina son Tawi yan me wa yánáng toliuk.

<sup>2</sup> Wáina tángga átnárán du Farisi kámá yá áwuráng ngáyá ku ingirungngingiya ináng suliuráng, “Náin me páilák wahára ámna káman dá áwána isutgim wawa kándáng me?”

<sup>3</sup> Wáina inát Jesu yá yánu, “Moses yá me páilák rina sánuk?”

<sup>4</sup> Wáina yánán watá inuráng, “Moses wu ing miuk, ‘Ámna yá papia kátu kimo sansan tátáyan uyingga náráwa imángga ku álo isurán kuinek.’”

<sup>5</sup> Wáina inát tu Jesu yá yánu, “Tátáwi sáni yot sándu yáin sáni wu káto hánám, wata ku Moses yá meng rákit me wa uyiuk. <sup>6</sup> Enendu hulátingga hánám Ánutu yá kutná kutná iháng tunggap táuk, wahárayon ‘ámna me náráwa iháng toliuk.’” <sup>7</sup> Wáina wata ku ámna yá naning maming yápmangga áwána yot káman háleingga, <sup>8</sup> yará watá sut káman háleinemálák. <sup>†</sup> Wáina wata ku yándin yándin ma átnándamálák, ináku káman hánám re átnemálák. <sup>9</sup> Wata tángga wu Ánutu yá náut iháng tántápin táuk wawu ámna yá ma kátng rákit táindaráng.”

<sup>10</sup> Kulá it kinan áturáng wahára wu disaepel yá wata son Jesu ináng suliuráng. <sup>11</sup> Inát tu yánu, “Káman niyá áwána isutang náráwa nukngá táinek wawu áwána kakngá wa pahálá táng wáik tángga málámbá márámamák kálu wahára kung hang átnék. <sup>12</sup> Hang káman niyá náulá isutang ámna nukngá táinek wawu márámamák há táinek.”

*Jesu yá nangge kikimo yápmat nákkán káin áwániráng ing miuk  
(Mat 19.13-15; Luk 18.15-17)*

<sup>13</sup> Rám káman ámna náráwa yá nangge kikimo ihángga Jesu yá ihánggárik ingga watán káin áwángngárát, disaepel yá me táng yámuráng. <sup>14</sup> Wáina tát kápángga Jesu málám pahálá wáin yánu, “Sat nangge kikimo watá nákkán káin áwániráng, ma kung háting yámindaráng, náuta Ánutu yan átkuku kinan kung haha wawu ámna niyan pahán dá nangge kikimo ná ina átnék watán. <sup>15</sup> No pálipuk ing sánin, káman niyá Ánutu yan átkuku wa nangge kikimo yá tángga átaráng wáina ma táindák, wawu kung átkuku wata kinan ma kung háindák.” <sup>16</sup> Wáina yánángga hang nangge wa iháng poláng yámángga ketná yá yáin yáni hára usáng hang tingga kuram táng yámuk.

*Ámna kutná kutná ná pálak ká Jesu yot meme táumálák  
(Mat 19.16-30; Luk 18.18-30)*

<sup>17</sup> Jesu yá tárutang kálu hulátingga kunggatuk wahára ámna káman dá hururung áwáng tulá hára imángga Jesu kondolá hára hangga inuk, “Tiksa álosim, rina tángga ku átkuku sásáliná muná wa táinet?”

<sup>18</sup> Wáina inán Jesu yá inuk, “Náuta ku ámna álosim ing nanelák? Ni kámá káman álosim muná, Ánutu káman dá re ku álosim. <sup>19</sup> Meng rákit mená wu há narelák wa, ‘ámna ma utnándalák, márámamák ma táindalák, manek ma táindalák, nangge nukka ya me kusák ma meindalák, kámá iháng yakyawák tángga kutná kutná ma iháng yámindalák, hang nanya me mamya tarang káin re átnelák.”<sup>†</sup>

<sup>20</sup> Wáina inán ámna watá inuk, “Tiksa, nangge kimo hára átang áwáng ná átat hára wu meng rákit mená wawu erek hánám há isutnándat.”

<sup>21</sup> Wáina inán Jesu yá kan kikinin inuk, “Kák ku náut kámá káman da re kesák táelák. Wawu kungga kutná kutná átyamek wa erek iháng yumnak tángga sup wa iháng ukuro átaráng wa yámángga ku ná nasutnelák. Wáina tángga ku alek kán átkuku álosim wa táinelák.”

<sup>22</sup> Wáina inán narángga kurákmáta yá wáik hálen pahálá yá máráwin hangga háná kuk, náuta kutná kutná ná táwi hánám átmuráng wata.

<sup>23</sup> Watá kun Jesu yá háleing kung disaepelná kárek kápángga yánu, “Ámna niyá kutná kutná ná táup hánám watá kungga Ánutu yan átkuku kinan haha wawu hálang hánám!”

\* 10:6: Hulá 1.27 † 10:8: Hulá 2.24 ‡ 10:19: Son Ihuk 20.12-16; Lo 5.16-20

<sup>24</sup> Jesu yá wa yánán naránga disaepelná yá háramurát kápánga Jesu yá son yánuk, “Nángánanggena, Ánutu yan átkuku kinan kung haha wawu hálang hánám! <sup>25</sup> Samap hinangngá hára kamel yá huruk kuku watán mápápmá wawu maming táwi, enendu ámna kutná kutná ná pálak ká kung Ánutu yan átkuku kinan haha watán mápápmá watá wa táng hátek.”

<sup>26</sup> Wa men naránga disaepelná yá ikik hánám háramutang yáni inán kanán tánga miuráng, “Kulá wáina wata ku niyá hánám bu átkuku sásáliná muná wa táinek?”

<sup>27</sup> Wáina met Jesu yá kárek hánám kápánga yánuk, “Ámna nangge yá rewe wu ma tátáyan, enendu Ánutu yá ku álo. Kutná kutná kámuk wawu Ánutu yá re ku álo táinek.”

<sup>28</sup> Wáina yánán Pita yá ing inuk, “Naráng, nándu kutná kutná náni erek hánám yápmang hálingga ku kák kasutumán!”

<sup>29</sup> Wáina inán Jesu yá yánuk, “No pálipuk hánám ing sánin, kámá niyá nák me, me pingnga álosim wata ingga itná, yakukula, málám ilommá, maming naning, yanángánangge, me ále háiná yápmáinek, <sup>30</sup> wata tánga ku náut yápmáinek wata topmá 100 torong hára tingga yáminek. Rám ná átang kuinemán háरणyon Ánutu yá it me yakukulak, málám ilom, nan mam, nángánangge me ále hái táup hánám wa yáminek, hang kámá yá iháng káyam hányon táineráng. Kulá máriya rám kálu wu átkuku sásáliná muná wa táineráng. <sup>31</sup> Iná kámá rendá máta átaráng wawu mári káin háineráng, iná kámá rendá mári átaráng watá máta káin kuineráng.”

*Jesu yá kámutang tátárut wata miuk*

*(Mat 20.17-19; Luk 18.31-34)*

<sup>32</sup> Kulá Jesu málám kálu máta yárengga disaepelná yot árángga Jerusalem kálu kuráng. Disaepel wu naránpak pálak kunggarát tu ámna náráwa káman kuráng wawu pingpitáng kungga átkiuráng. Kulá kunggangat gu Jesu yá son disaepelná 12 wa rewe iháng kung kep sim átang gu málám hára rina tunggafeinek wata yánuk. <sup>33</sup> Ing yánuk, “Kaniráng, nán ná áwemán náwu árángga Jerusalem káin kuinemán, wakáin du Ámna Nanggená wawu táng pris yáin yáni me lo yan tiksa wata ket yáni hára tineráng. Watá wu táng me hára tingga utkámút tátáya me hárotneráng ngáyá wu son táng ámna ále kámá káinnan da ket yáni hára tineráng. <sup>34</sup> Wáina tit tu watá ku ináng kekkek tánga alup yáni málámba ketnán uráhángga honggem bá utang táng kung utkámút táineráng, enendu rám kaláhu átang gu son tárutnek.”

*Jeims káling Jon dá náuta narumálák wa Jesu inumálák*

*(Mat 20.20-28)*

<sup>35</sup> Kulá Sebedi nanggená yará, Jeims káling Jon, watá Jesu yan káin áwáng ing inumálák, “Tiksa, nátá rina táng nánámáya kaninemát wa isutang ko wáina hánám táng nánámáya naremát.”

<sup>36</sup> Ingga inán Jesu yá yánuk, “No rina táng sáminet ta naremálák?”

<sup>37</sup> Wáina yánán watá inumálák, “Ko kut táwi hánám tánga átang gu nát háranan káman táng ketya álak kálu hang káman táng ketya kandák kálu náháng ting satá putung átnemát.”

<sup>38</sup> Wáina inán Jesu yá ing yánuk, “Sán du náuta memát ingga wu ma narámálák. Sándá kap no náinet hára wa álo náinemálák, me umi no kuhinet wawa álo kuhinemálák me?”<sup>§</sup>

<sup>39</sup> Ing yánán watá miúmálák, “Nát tu álo.” Ing men Jesu yá yánuk, “Sán du no kap náinet wahára há náinemálák, me umi no kuhinet wahára há kuhinemálák, <sup>40</sup> enendu ketna álak kálu me kandák kálu putung átnát wawu no wáina ingga ma mindát, ináku kome wawu Ánutu yá niyan tiyawiwuk watán.”

<sup>41</sup> Kulá disaepel nukngá 10 watá wa naruráng hára wu Jeims káling Jon da kuk táng yámuráng. <sup>42</sup> Kulá Jesu yá kámuk mantáng yámán áwát tu yánuk, “Sáni há nareráng wa, ále kámá káinnan dán yáin yáni átnándaráng, watá ku yáni ya narát árená hálen yáin yáni hánám átnándaráng. Hang ámna hulá hulá tátáwi watá kálu rina tingga táng káto tát tu ámna náráwa yá wa rewe isutnándaráng. <sup>43</sup> Wáina watá sányot ma átnándak. Niyá orek sáni hára ámna hulá átnát ta ku sándán yáup nangge átnek, <sup>44</sup> hang niyá máta átnát ta ku kámuk kán yáup nangge háleinek. <sup>45</sup> Sándá ku no ket tárák rina sálengga áwánggoet wáinanyon tánguineráng. Ámna Nanggená málámbáyon áwuk wawu ámna náráwa yá yáup tánga wa hálang imóamáya muná, ináku watá yáup tánga ku wa hálang yámámáya me málámbán átkuku wa ámna náráwa máro hánám wa son iháháya sáinek wata áwuk.”

*Batimeus yá Ánutu yan hálang káuk*

*(Mat 20.29-34; Luk 18.35-43)*

<sup>§</sup> 10:38: Kap me umi ya yánuk wawu málámbá mápápmá suwánga láwit narinek wata yánuk.

<sup>46</sup> Kulá Jesu me disaepelná yáni wu Jeriko hára áwáng hiuráng ngáyá ámna náráwa urum táwi watyot it yáilá wa sangga kungga káuráng gu ámna rahálá kunángngá kutná Batimeus, Timeus nanggená, wawu kálu tákto káin putung átang ámna náráwa sup pa mantáng yámánga árán. <sup>47</sup> Watá rám wahára Jesu Nasaret nan wawu kálu wa isutang áwek ingga naránga ku mantáuk, “Jesu, Devit Nanggená, náka urákna naráng!”

<sup>48</sup> Wáina mantán du ámna táup hánám watá me táng mánga inuráng, “Yolop álák!” ing inuráng, enendu emá re hánám hahatingga mantánga átuk, “Devit Nanggená, náka urákna naráng!”

<sup>49</sup> Wáina naránga Jesu yá tareng kátingga yánuk, “Mantáng mát áwik.” Ing yánán mantánga rahálá kunángngá wa inuráng, “Kák ka mantáek. Herongge naránga tárutang áwáng!” <sup>50</sup> Wáina inát málám lap hásák torong káinnan wa yalingga san kun sokmuná hánám tárutang Jesu yan káin áwuk.

<sup>51</sup> Áwán Jesu yá inuk, “No rina táng kakamáya narelák?”

Ing inán rahálá kunángngá watá inuk, “Tiksa, rahána háháleya naret.”

<sup>52</sup> Wáina inán Jesu yá inuk, “Kung, naráng hákhátikka yá keháng tolek.” Ing inán wahárayon rahálá yá álo hálen Jesu sárummá ya isutang kuk.

## 11

*Jesu yá Jerusalem kinan ámna hulá yá ina kung háuk*

*(Mat 21.1-11; Luk 19.28-40; Jon 12.12-19)*

<sup>1</sup> Kulá Jesu yá disaepelná yot Jerusalem tangtang ále yáilá Olif káin it Betfage yot it Betani káin kung heheya átang gu Jesu yá disaepelná yará suring yámánga yánuk, <sup>2</sup> “Kungga it áning hára kung henga wahárayon káinemálák ku donki máto káman wahára puting sat átak wawu káman dá wata ketnán putung átang ma kung áwáng táená wa páupmá yaling mánga ku engotang áwinemálák. <sup>3</sup> Iná káman dá sáhánga sáninek, ‘Náuta ku wáina tánggoemálák?’ ing sánán du ing ininemálák, ‘Táwi yá wata narek, ka ku rám hátetná kimo yáup imánga ku son san áwinek.’”

<sup>4</sup> Wáina yánán disaepelná yará yá kungga káumálák wu donki máto wu kep káin kálu hára it kálu mungganá tangtang puting sat árán, yándi wu yalinggarán kápánga, <sup>5</sup> ámna wahára hetang áturáng watá yánuráng, “Sán du náut tánggoemálák, donki páupmá wa yalingga rina táng mindemálák?” <sup>6</sup> Wáina yánát yándi wu Jesu yá rina yánuk wáina yánán du yápmat donki wa engotang kumálák. <sup>7</sup> Yándi wu engotang Jesu yan káin áwánga lap yándi hákhásák sut yándi háranan \* wa yalingga iháng Jesu yá putung átnát ta donki ketnán tiumálák. <sup>8</sup> Kulá wáina tin Jesu yá donki ketnán putung átang áwánga átuk wahára kátu táwi watá lap yáni hásák wa yalingga iháng kálu hára eliuráng, iná kámá yá wu kándumá ina wata ilángá ále wahára árená maruráng wa iháng kálu hára tiuráng. <sup>9</sup> Kámá máta kuráng me kámá mári isutang áwuráng watá ohok menman tánga mangmantáng kuráng, “Táwi kutná meng tárut tánin!”

“Niyá Táwi kutná hára áwek wawu Ánutu yá há táng álolo táená watá áwek!”†

<sup>10</sup> “Nan náni Devit háranan átkuku álosim watá áwek wawu Ánutu yá há táng álolo táená watá áwek!”

“Táwi alek káin átnándak wata kutná meng tárut tánin!”

<sup>11</sup> Wáina mantánga engotang kungga árát Jesu málám Jerusalem kinan hangga kungga Táwi yan it káungá hánám wakáin kuk. Málám kung háleng sulingga kutná kutná wa erek hánám kápánga sangga it tá há yonyoliuk hálendu Betani ya disaepelná <sup>12</sup> watyot son kuráng.

*Jesu yá Táwi yan it káungá hánám kinan sup yáupmá tánga átnándaráng wa yásutuk.*

*(Mat 21.12-19; Luk 19.45-48; Jon 2.13-22)*

<sup>12</sup> Kulá son tembát náya Betani sangga kungkung gu Jesu wu háing muk. <sup>13</sup> Wáina naránga málám háleng kung káráp fik káman da ilángá kangga wata hulá káin páliná pálak me muná ingga kakaya kuk. Málám hulá káin kungga káuk ku páliná ku muná ilángá re, náuta wawu watá páliná sásáyan rámá muná. <sup>14</sup> Málám wáina kangga ku káráp wa inuk, “Son pálinya ma hánám titá náindaráng.” Wáina inán disaepelná yá me wa há naruráng.

<sup>15</sup> Kulá Jerusalem káin kung henga ku Jesu málám Táwi yan it káungá hánám ba kapmená káin kung hangga rendá kutná kutná tingga yungga tánga átnándaráng ku yásutang tebol sup imán kamán tánga átnándaráng me ámna iráp kikimo yumnak táená watán tongtong wa iháng hurik tánga sungguling yámuk. <sup>16</sup> Wáina tánga ku kutná kutná yumnak tátáyan

\* **11:7:** Juda ámna náráwa wu kutná kutná tiringtorong mongiuráng. Wáina wata ku torong káin molená wa yalingga tiumálák. † **11:9:** Kap 118.25-26



wa ihangga Táwi yan it káungá hánám kapme kálu wa kung áwáng tátáya káto táng yámuk.  
<sup>17</sup> Wáina tángga ku ing yánuk, “Me ing uyená yá átak,  
 ‘ “Táwi yan it wawu wáina árán káwakngá káwakngá watá áwáng urum tángga sáponga tátáyan  
 it,” ingga mengguineráng,<sup>‡</sup>

enendu sándá tát tu ‘manek mara yan ále kilakngá ina’<sup>§</sup> hálanggoek.”

<sup>18</sup> Wáina yánán naránga ámma náráwa táwi watá háramutang me yánáng toliuk wa narát kikiniuk. Wáina tát kápánga pris yáin yáni me lo yan tiksa watá Jesu ya pitáng mángga kálu rehára kungga utkámút tánin ingga kálu ya suliuráng.

<sup>19</sup> Kulá árát yonyon tin du Jesu yá disaepelná yot it yáilá wa sangga hangga kuráng.

*Káráp fik ká kumkumiuk  
 (Mat 21.20-22)*

<sup>20</sup> Tembát náya hilápmá Jesu yot disaepelná yáni wu kunggatang káuráng gu káráp fik ku ulapmá káin átang kung hang ráhulá káin du kumkumengga árán. <sup>21</sup> Pita málám kangga naráng hátingga ku Jesu inuk, “Tiksa, kang! Káráp fik kuip me táng málák wawu kumkumengga átak!”

<sup>22</sup> Wáina inán Jesu yá ing yánuk, “Ánutu ya naráng háting minéráng. <sup>23</sup> No pálipuk ing sánin, ni kámá káman dá pahán yará hára muná ináku ‘Ánutu yá wáina táinek’ ingga naráng hátingga ále yáilá ná inánggim, ‘Hiring ingmen táp káin hitang,’ ingga inánggim wawu wa isutang wáina tánggim. <sup>24</sup> Wata ku ing sánin, náuta naránga sáponga hára Ánutu ininemán ingga narineráng wahára pálipuk wáina há náminek ingga naránga inineráng wata tángga pálipuk há sáminek. <sup>25-26</sup> Hang rám hetang átang sáponga táineráng wahára narát nuk sáni káman yot orek sáni hára honhoren dá árán, wawu watán kátu wa sat tu Nan sáni alek káin watá hányon sándán kátu wa sáinek.”

*Jesu háláng wa niyá kamuk ingga ináng suliuráng  
 (Mat 21.23-27; Lúk 20.1-8)*

<sup>27-28</sup> Jesu yá disaepelná yot yáni wu son Jerusalem káin kuráng ngáyá kung Táwi yan it káungá hánám watán kapme káin sengsulingga árán pris yáin yáni, lo yan tiksa me ámma hulá hulá watá watán káin áwáng ináng suliuráng, “Kák ku háláng náwu rekáinnan táng gu ket tárák hulá hulá wa tánggoelák? Háláng náwu niyá kamuk?”

<sup>29</sup> Wáina inát tu Jesu yá miuk, “No me káman sánáng sulindet, wa topmá nanát tu no niyá háláng namán wa tánggoet ingga sáninet. <sup>30</sup> Jon dá umi kuháng yámánggiuk wawu alek kálu nan me ámma yan káinnan? Wata nanániráng!”

<sup>31</sup> Wáina yánán yáni yon inán kanán tángga ku miuráng, “Nándá ‘alek kálu nan,’ ingga ininemán wawu náninek, ‘Náuta ku Jon dán me wa pálipuk ingga ma naráng háting kuráng?’ ingga náninek. <sup>32</sup> Iná nándá ‘ámma yan káinnan,’ ingga meinemán wawu kandák náhineráng.” Wáina miuráng, náuta ámma náráwa kámuk hánám Jon wawu pálipuk profet káman ingga há nareráng, wata ku pitáng yámuráng.

<sup>33</sup> Wáina mengga ku Jesu inuráng, “Nán ma narámán.”

Wáina inát Jesu yá yánuk, “Nák ku wáinanyon ma sánindát háláng wawu niyá namán du ket tárák wa tánggoet ingga.”

## 12

*Jesu yá ámma wáik ká wáin hái pinná táuráng ga me tárakngá yánuk  
 (Mat 21.33-46; Lúk 20.9-19)*

<sup>1</sup> Kulá wahára átang gu Jesu yá me tárák hára tingga ámma náráwa yánuk. “Ámma káman dá wáin hái káman hinggga kumbiná táng hálingga, wáin táulá yáreng hikhilák tátáyan áram pingga, hang it hásak káman átang hálang rákit tátáyan tángga ku hái wa táng ámma kámá yá wahára sup yáupmá tátáya ket yáni hára sangga ku málám hangga mulangán hánám káin kuk. <sup>2</sup> Málám wáin dá pálná tená rám kálu ku yáup nangge káman suring mángga ing inuk, ‘Kungga wáin hái pinná tánggátaráng ámma wa yánátá ku wáin pálná kámá kamát ihánga áwáng’, ingga inán kuk, <sup>3</sup> enendu ámma hái pinná tángga áturáng watá káto tángga utang ketná pálná muná hánámá son suring mát kuk. <sup>4</sup> Wáina kangga son yáup ámma nukngá suring mán kung hen kangga wa wáinanyon yáilá hára kátingga táng wáik tát reprepma naránga kun, <sup>5</sup> son nukngá suring mán kuk, wawu kung hen pukon utkámút táuráng. Enendu nukngá táuppon emá re suring yámán kunggiuráng wawu kámá hánámá ráhángga kámá ráhánggá kátámút tánggiuráng.

‡ 11:17: Aisaia 56.7 § 11:17: Jeremaia 7.11 \* 12:2: Israel yan kálu ku wáina: Háí kámá iháng kámá ya ket yáni hára tit pin yáni tánggátaráng wawu hái watá pálná tin pálná kátu ku márúmá yá ihán pálná kátu ku hái pinná tátá watá ihángngátak.

<sup>6</sup> “Kulá káman re pukon suring mámáyan dá átuk, wawu nanggená málámbá wata kikiná hánám narangga átnándak wa suring muk wawu ing mengga, ‘Watán me álo narineráng, me watán milun álo suwineráng.’

<sup>7</sup> “Wáina mengga suring muk, enendu nanggená watá kung hen kangga ámna hái káin yáup tángga áturáng watá yáni meme táuráng, ‘Ámna wa áwek watá ku máriya naning gán kutná kutná ihinek. Áwát utkámút tángga ku kutná kutná ná wawu náni ya ihinemán.’  
<sup>8</sup> Wáina mengga árong káto tángga átang utkámút tángga mangga sat wáin hái kep káin kuk.

<sup>9</sup> “Kulá wáin hái wata márumá yá wu rina hánám táinek? Málám áwinek watá áwáng ámna wáin hái káin sup yáupmá tángga árená wa erek ingmen ráháng kátkámút tángga ku wáin hái wa táng kámá yá pinná tátáya ket yáni hára tinek. <sup>10</sup> Ánutu yan me ing uyená wa kámá sáningga kangngátaráng me muná?

‘It tátá yá sup wáik ingga kangga táng sat kuk,  
watá inggálu it hálángngá ya káto hánám átkoek.

<sup>11</sup> Táwi málámbá wa táuk  
wa nánda katne álosim hánám hálengoek.’†”

<sup>12</sup> Kulá Juda yan ámna hulá wa wáina yánán me tárákná náwu náni ya mek ingga há narangga ku rina tángga Jesu ket tánin ingga kálu ya suluráng. Enendu ámna náráwa urum táwi wata hányon pitáuráng, wáina háleendu sangga há yáni kuráng.

*Takis Sisa imóamá me muná?*

*(Mat 22.15-22; Luk 20.20-26)*

<sup>13</sup> Máriya ku Farisi kámá yot Herot tán tombong kámá yot suring yámát Jesu yan káin kung ingirungngitne me kandák kámá rina men kanin ingga wata kuráng. <sup>14</sup> Yáni wu kung Jesu inuráng, “Tiksa, há naremán kák ku me kándáng re menggoelák. Kut yáni háená me árená wawu me tárák káman re yánánggoelák. Me pálipuk wahára re ámna náráwa Ánutu yá tirik tárák rina ta narek wa yánáng tolinggoelák. Kulá rina narelák? Takis Sisa† imóamá wa kándáng me muná? <sup>15</sup> Álo iminemán me ma imindámán?”

Wáina inát Jesu málám nangnarungngeráng ingga há narangga yánuk, “Náuta ku nák nangnarungnging goeráng?” Ing yánangga ku yánuk, “Sup táulá wa tángga áwát no káin.”  
<sup>16</sup> Wáina yánán sup táulá wa táng áwáng imát kangga ku yánuk, “Náwu ni utniná me ni kutná?”

Ingga yánán yáni wu inuráng, “Sisa yan.”

<sup>17</sup> Wáina inát tu Jesu yá yánuk, “Náut Sisa yan wa Sisa imóangga, náut Ánutu yan wa Ánutu imineráng.” Wáina yánán kangga hárámuturáng.

*Tátárut ráma ya Sadyusi yá Jesu ináng suluráng*

*(Mat 22.23-33; Luk 20.27-40)*

<sup>18</sup> Kulá ámna urum káman kut yáni Sadyusi wawu ámna náráwa kámurená wu ma tárutnándaráng ingga narángngátaráng watá Jesu ináng sulinin ingga Jesu yan káin áwuráng. <sup>19</sup> Áwáng átang ináng suluráng, “Tiksa, Moses yá me ing uyingga ting námuk, ámna káman dá kámutang áwáná nanggená muná sáinek wawu kulaná yá náráwa wa tángga tatning gán da nange maránga tinek. <sup>20</sup> Rám káman tatning kukulak sewen dá átkiuráng. Átang tat yáni táwi watá áwáná káman táuk enendu nanggená muná átang kámujuk. <sup>21</sup> Wáina háleendu son kulaná wata hangga hára watá náráwa kawát wa táuk wa wáinanyon kámurán, son wata hangga hára watá táuk wa wáinanyon kámujuk. <sup>22</sup> Wáina re táng kung táng kung tatning kukulak sewen wa nange yáni muná re átang kámút háliuráng, hang pukon da ku náráwa kawát yáni watá hányon kámujuk. <sup>23</sup> Tatning kukulak sewen wata áwá yáni háliuk, wata ku máriya tátárut kálu ku ni hánám ba áwáná ku wa háleinek?”

<sup>24</sup> Wáina inát Jesu yá yánuk, “Táwi yan me uyená me Ánutu yan háláng wa ma nararáng me rina, háleendu kandák wa menggoeráng? <sup>25</sup> Rám kámurená yá tárutneráng wahára wu náun áwán ma átnándaráng, ináku angelo yá alek káin átnándaráng wáina átneráng. <sup>26</sup> Hang ámna náráwa kámurená yá tárutneráng watán me wu Moses yan papia káin pingnga káman ma hám sáningga kangngátaráng. Káráp isikimo hára káráp pá ranggatuk rám wahára Ánutu yá Moses inuk, ‘Nák ku Abraham, Aisak me Jepok watán Ánutu.’§ <sup>27</sup> Ánutu wawu kámurená yan Ánutu muná, ináku ámna átkuku yáni pálak watán Ánutu. Iná sándá wa meráng wawu kandák hánám hálek!”

*Meng rákit mená resim bá ku táwi hánám?*

*(Mat 22.34-40)*

† 12:11: Kap 118.22-23 † 12:14: Kut Sisa wawu ámna nange kutná muná, ináku me King wáinanyon du Rom me kálu. § 12:26: Son Ihuk 3.6

<sup>28</sup> Lo yan tiksa káman áwánga naruk ku Jesu yot meme tánggarát, málám naruk ku me hurikngá Jesu yá álo kámá hánám yánánga árán naránga málám hang wáinanyon inuk, “Ánutu yá meng rákit mená nándá isusut ta miuk wahára ku meng rákit mená kátu wa iháng hátek?”

<sup>29</sup> Wáina inán Jesu yá miuk, “Táwi hánám bu ná: ‘Israel sán kámuk hánám narineráng, Táwi Ánutu náni wu káman re. <sup>30</sup> Táwi Ánutu ka wata pahála yot, irukka yot, hálánga yot me nanaráka yot kámuk hánám kikiná wata narinelák.’\*\* <sup>31</sup> Hang wata hangga ná ku ná: ‘Kaya kikiná naránggátalák, wáinanyon nangge nukka ya kikiná narinelák.’†† Me nukngá náta torong káin ma árak.”

<sup>32</sup> Wáina inán lo yan tiksa watá miuk, “Kándáng hánám melák, tiksa. Ánutu wu nukngá kámá muná, málám káman re ingga pálipuk hánám melák. <sup>33</sup> Ánutu ya pahán náni yot, nanará náni yot me háláng náni yot kámuk hánám kikiná narinemán, me náni ya kikiná naránggátamán wáinanyon nangge nuk náni ya kikiná narinemán, watá ku kutná kutná Ánutu ya towet sing mát káráp pá rang hálingngátak me taha hulá hulá ting mángngátaráng wa iháng hátek.”

<sup>34</sup> Jesu yá káuk ku me wa kándáng hánám naránga topmá inán kangga inuk, “Kák ku Ánutu yan átkuku wa sang kung mulangán ma áralák.” Wáina inán kangga ku wahára átang gu ámma yá me nukngá ináng susuliya pitáng muráng.

*Ámma náráwa son iháhá wawu ni nanggená?*

*(Mat 22.41—23.7; Luk 20.41-47)*

<sup>35</sup> Jesu yá Táwi yan it káungá hánám kumbiná kinan me yánáng tolingga kungga átang gu yánuk, “Rina ta ku lo yan tiksa yá ku ing menggoeráng, ‘Ámma ni Ánutu yá ámma náráwaná son iháháya miuk wawu Devit nanggená?’ <sup>36</sup> Iruk Káungá yá Devit málámba pahálá kinan átang pahálán hangga árán ing miuk,

‘Táwi Ánutu yá Táwina ing inuk,

“Ketna álák kálu putung árátá,

no káyamya wa ráhánnga iháng hang ting se árát ko wa iháng hátingga átnelák.” ††

<sup>37</sup> “Devit málámá ku Táwina ingga miuk, rina tángga ku son du nanggená?”

Wáina men ámma náráwa urum táí áturáng watá naránga herongnge hánám naruráng.

<sup>38</sup> Wáina mengmeng gu yánuk, “Lo yan tiksa wa kándáng kánggápáng átneráng. Lap hákhásák tánggánengga sengsulingga átning kungngátaráng, hang náhánnga meng tárut táng námániráng ingga maket álele wa átning kungngátaráng, <sup>39</sup> me umi sinak táená káin me miti itná káin kome máta káin átnin ingga naránggátaráng. <sup>40</sup> Hang yáni wu náráwa kawát wa yángyárunngingga it yáni náut wa yáni ya ihángngátaráng, hang náhániráng ingga sáponga wawu hásak hánám wa tángngátaráng. Máriya rám kálu ámma wáinaná wawu mápápmá táwi hánám wa ihineráng.”

*Náráwa kawát tá tahaná Ánutu ya ting muk*

*(Luk 21.1-4)*

<sup>41</sup> Jesu málám Ánutu yan sup titi komená tangtang putung átang gu áwáng sup tingga kungkung tángga árát tu wa kápánga átkiuk. Sup yáni pálak ámma máro hánám bá yon áwáng sup tátáwi yon tingga kunggiuráng. <sup>42</sup> Kulá waháranon ukuro kawát káman dá áwáng sup isikimo yará tarákná wu wan toea ina wa tiuk.

<sup>43</sup> Wa kangga Jesu málám disaepelná mantán awát yánuk, “No pálipuk hánám ing sánin, náráwa kawát ukuro watá ku sup táwi hánám wa kátu iháng hátingga Ánutu yan pingnga tek. <sup>44</sup> Kátu táwi wawu há átyámek háranan kátu re ihángngáwáng teráng, iná wa wawu kámá málám háláng imán átnát wawu muná, pukon du wa tángngáwáng tek wa rewe.”

## 13

*Rám bá sáliknginek wahára tárák ká kolek hulá hulá tunggafeineráng*

*(Mat 24.1-51; Luk 21.5-36)*

<sup>1</sup> Rám Jesu yá Táwi yan it káungá hánám wa sangga háuk, waháranon du disaepelná káman dá Táwi yan it káungá hánám táená wa kangga inuk, “Kang, tiksa! It álo kámá hánám ba kápáng! Hang it rámán yáni ya sup mamíng tátáwi hánám tingga árángga koená ya kápáng!”

<sup>2</sup> Ing inán Jesu yá inuk, “It tátáwi kápelák watán sup káman dá nukngá ya ketnán ketnán du ma átnándaráng, ináku erek táng hirárat háineráng.”

<sup>3</sup> Wáina yánánga Jesu yá disaepelná yot kungga ále yáilá Olif káin kung hengga putung átang Táwi yan it káungá hánám wa kangga átang, kulá Pita, Jeims, Jon hang Endru wata

\*\* 12:30: Lo 6.4-5 †† 12:31: Pris 19.18 †† 12:36: Kap 110.1

kilakon inang suliurang, <sup>4</sup> “Nan nánang rina hára ku kutná kutná watá tunggafeinerang? Me tárak kolem bu rina rina tunggafengga kungga ku watá tunggafeinerang?”

<sup>5</sup> Wáina inát Jesu yá yánu, “Kándang hánám kangkang átnerang, kámá yá áwáng sángsárungnginirót. <sup>6</sup> Kámá yá ku áwáng nák kutna mengga ku ‘Nák ku wa,’ ing mengga ámma náráwa máro hánám wa sángsárungnginerang. <sup>7</sup> Hang kun erawák tát me kun erawák kán iruk me wa narangga ku háramutang ma pitáindarang. Ále marápmá watá álo tunggafeinerang, enendu rám bá sálikngingi wa ma hálená átnék. <sup>8</sup> It kámá yá it kámá yot erawinerang, me king tombong kámá yá king tombong kámá yot erawinerang. Hang kánggáning gá it káwak kámá kámá káin táinek, me sungngi kesák tunggafeinek. Wawu náráwa yá kawin átang nangge tátáya hánámá uláng yámángngátarang wáina.

<sup>9</sup> “Háleng rákit tángga tiyawingga átnerang. Sáháng ámma yáilá yan káin me hára tinerang, me miti itná kinan honggem bá sárahinerang. Me náka ingga tángga sáháng kapman táwi me king rahán yáni hára tit hetang átang me pingnga álosim yáininerang. <sup>10</sup> Iná Táwi yan me pingnga álosim wawu wa kálak meng isurát káwakngá káwakngá erek kung hilák táinek. <sup>11</sup> Kulá rám rina hára sáháng kung me hára titiya sáhanga kut wawu rina meinémán ingga narangpak ma táindarang. Ináku rám waháranyon Ánutu málámbá rina sáminek wa meinerang, náuta wawu sáni ma meindarang ináku Iruk Káungá watá meinek.

<sup>12</sup> “Ámma náráwa kámá yá tatning kulak me tatning yit iháng káyam ket yáni hára tit ráháng kátkámut táinerang, hang nanan yáni yá nángánangge yáni wáinanyon táinerang, hang nangge yá nan mam yáni iháng káyam tángga kámá yánát ráháng kátkámut táinerang. <sup>13</sup> Me náka ingga tángga ámma táup pá hánám bon sánda taktak yáminek. Enendu niyá káto árán kungga rám bá sáliknginek kálu wawu Ánutu yá iháng kung málámbán pingnga tinek,” ingga Jesu yá miuk.

<sup>14</sup> Kulá niyá me ná sánginek watá kándang hánám narinek. Jesu yá ing miuk, “Sándá káinerang gu ‘náut kámá wáik maming táwi hánám’\* watá ále káungá arená wa áwáng táng lem tángga táng wáik wáik pukon hánám táng san árán, wahára wu niyá Judia ále hára átnerang wawu pitángga ále yáilá káin kuinerang. <sup>15</sup> Ni kámá káman dá itná hungnganá ketnán átnék watá itná pahálá kinan hangga náutná kámá káman ma tángga kuindák. <sup>16</sup> Hang ni kámá káman dá hánám káin átnék watá son kung itná káin sutná tánggáneyan lap hásák wa ma táindák. <sup>17</sup> Rám wahára náráwa kawin pálak me nangge kongakngá muk yámángga átnerang wata ku urák yáni narinet. <sup>18</sup> Sáponga tángga árát tu rám watá kotkotná me ále rámá kálu ma tunggafeindak, <sup>19</sup> náuta rám wawu rám wáik hánám wata. Hulátingga Ánutu yá kutná kutná men tunggafurang wahára átang áwáng rám nahára wáina kámá ma tunggafuik, hang rám wáik wa tunggafeinek wata torong káin máriya rám wáinanyon kámá ma tunggafengguindák. <sup>20</sup> Iná Táwi yá ‘Rám wa ma táng hátet táin,’ ingga miuk iná wu ámma náráwa káman kámá ma átgim, enendu ámma náráwa málámbá nakán ingga há kangaliuk wata narangga ku ‘Rám wa táng hátet táin,’ ingga miuk. <sup>21</sup> Rám wahára ku ni kámá káman dá sáinek, ‘Kánirang, ámma Ánutu yá málámbán ámma náráwa son iháháya miuk wawu nákáin ná átak’, me ‘Áning káin átak’ ingga sánát tu pálipuk ingga ma narindarang. <sup>22</sup> Kámá yá áwáng gu ing sángsárungnginerang, ‘Nák ku Ánutu yá málámbán ámma náráwa son iháháya miuk wa’, me ‘Nák ku profet káman,’ ing mengga ket tárak kolem hulá hulá met tunggafen Ánutu yá ámma náráwa nakán ing mengga kangaliuk wa wáina álo tánin ingga álo iháng yakyawák tánggalát. <sup>23</sup> Wata ku kándang hánám háleng rákit tángga átnerang, rina rina tunggafeinek wawu há sánang hálet wa.

<sup>24</sup> “Iná rám wáik tunggafeinek wata sárumá káin du ‘káe yamá watá páyung tìn yap pá yamá ma máindák.

<sup>25</sup> Kulá alek káin hitung gá sohingga hat

alek kán kutná kutná watá yángyáng táinerang.’†

<sup>26</sup> “Rám wahára ámma náráwa yá káinerang gu Ámma Nanggená yá mukam kinan ulihálángngá yot sireretná mangga áwinek, <sup>27</sup> ngáyá angeloná suring yámán ámma náráwa málámbán pingnga ingga kangaliuk wa kámonerang, káwak tákto numnum ánuta ámuta wata ore kinan ámma náráwa kámuk hánám kámonerang.

<sup>28</sup> “Sándá wu káráp fik wahára tárak tingga narinerang. Pan yáni hára puto tingga kungga iláng yáni mirak ká áráng hekhek tát kangga ku káe rámá háleindek ingga narángngátarang. <sup>29</sup> Wáinanyon ále watá tunggafen kangga ku Ámma Nanggená wu áwáng hálingga kálu mungnga káin átak ingga narinerang. <sup>30</sup> No pálipuk hánám ing sánin, ámma náráwa rám ore

\* 13:14: Daniel 9.27; 11.31; 12.11 † 13:25: Aisaia 13.10; 34.4

nátan watá manyon kámurená árat tu ále watá kámuk tunggafeinek. <sup>31</sup> Alek me káwak wawu sáliknginek, iná nákkán me wawu ma sálikngindák.”

*Káman dá Jesu yá áwáwáyan rám bu ma narák.*

<sup>32</sup> “Ni kámá káman dá hulá hulá wa tunggafeinek watán rám wa ma narák, alek káin angelo me Nanggená wa manyon narárang, ináku Nan málámbá re narangga átak. <sup>33</sup> Tiyawingga hálangga átnerang! Náuta sándu rám rina hára wu rám watá tunggafeinek wawu ma narárang. <sup>34</sup> Wawu ing ina, ámna káman dá itná sangga kálu mulangan káin kukuya yáup horengga yáup ámna yáinin yáinin yámangga ku ámna kálu mungnga pinná tátá wa kándang hánám hálangga átnelák ingga ináinggim wáina.

<sup>35</sup> “Wata ku rámá rámá sándu hálangga átnerang, náuta rina hára it márumá yá son áwinek wawu sándu ma narárang. Yonyon kálu me yáung táitná me hurák ká mantangga árat wahára me hilápmá hánám wawu ma narárang. <sup>36</sup> Kámá emá re ruhánga átnárát sopmuná hánám áwánga sáhiwon. <sup>37</sup> Me rina sán sánet wawu ámna náráwa erek hánám wa yánet, wata ku hálangg rákit tángga átnerang!”

## 14

*Náráwa káman dá Jesu yáilá káin oel kuliuk  
(Mat 26.1-16; Luk 22.1-6; Jon 12.1-8)*

<sup>1</sup> Angelo yá Iháng Hátiuk hang Israel yá Másang Yisná Muná Náena watán rám káungá wata narang hátingga umi sinak tátá watán rám yará yá áran du pris tátáwi yáni me lo yan tiksa watá kálu rekálu kilakon Jesu ket tángga utkámút tánin ingga suluirang. <sup>2</sup> Enendu ing miurang, “Rám umi sinak rámá hára muná náuta ámna náráwa yá náhangga kuk tángga kun táng hilák tánirot.”

<sup>3</sup> Wahára wu Jesu wu it Betani káin ámna Saimon huphuráp ilalák lepra tángga átkiuk watán it káin sungngi nangga átnarán, náráwa káman áwuk watá márúk káman sup álosim hánám kutná alabasta watanan dá táng tolená wata kinan oel mungnganá kikiná ále ká nang kutná nad wata uminá yá táng tolená yumnakngá táwi hánám bá yuyuwáyan tárák wa táng áwáng kátang márák tángga oel wa Jesu yáilá káin kulin háuk.

<sup>4</sup> Wáina tán kangga ámna kámá wahára áturang háranan watá pahán káráp hára yáni meme táurang, “Náuta ku oel álo kámá wa táng lem tánggoek? <sup>5</sup> Oel wata supmá yá yara ore káman ni ukuro árená álo háláng yámámáyan tárák. Nándá wa táng yumnak tángga supmá wa iháng ni ukuro wa yámátne ku kándang hálanggim,” wáina mengga náráwa wa me káto inánga me táng murang.

<sup>6</sup> Wáina inát kangga Jesu yá yánuK, “Sat árik, náuta ku pahán máráp imángoerang? Watá nák álo kámá hánám neháng tolek. <sup>7</sup> Ni ukuro wawu rámá rámá sáni yot átnerang. Rina hálangg yáminán du rám kámá wu wáina hálangg yáminérang. Iná nák ku rámá rámá sányot ma átnándát. <sup>8</sup> Náráwa nátá álo tátáyan wawu wa táek. Watá oel sutna káin tek wawu áram kinan rám rina átnát wata tiyawing namek. <sup>9</sup> No pálipuk hánám ing sáinin, káwakngá káwakngá Táwi yan me pingnga álosim mengg isurát rehára rehára kuinek wawu náráwa nátá rina táek wa hányon mengga narángguinerang.”

<sup>10</sup> Wáina yánang hálín du disaepelná 12 wata orek yáni háranan Judas Iskariot watá pris tátáwi yáin yáni yan káin Jesu táng yámán ket tátáya hangga kuk. <sup>11</sup> Pris yáin yáni yá Judas yan me wa narangga herongnge hánám tángga sup kaminemán ing inurang. Kulá Judas málámbá ku wahára átang gu kálu rekálu ku Jesu táng ket yáni hára tin ingga kálu ya suliuK.

*Jesu yá disaepelná yot sungngi náurang*

*(Mat 26.17-30; Luk 22.7-23; Jon 13.21-30; 1 Ko 11.23-26)*

<sup>12</sup> Kulá Israel yá Másang Yisná Muná Náena watán rám hulátitiná wahára wu sipsip nanggená utang singga Angelo yá Iháng Hátiuk wata narang hátingngátarang, wahára wu disaepel yá Jesu inurang, “Nándá rekáin kungga ku rám táwi watán sungngi tiyawitne ku nanaya narelák?”

<sup>13</sup> Wáina inát tu Jesu yá disaepelná yará suring yámangga yánuK, “Sán du it yáilá wata kinan kung hangga káinemálák ku ámna káman dá umi kátang tánggatang áwáng kálu hára sáháng tunggap táinek, wa isutang kuinemálák. <sup>14</sup> Kungga it reta kinan han kangga ku it wata márumá ininemálák, “Tiksa yá ing mek, “Nákkán it pahálá ku re, wahára ku no disaepelna yot sungngi nangga Angelo yá Iháng Hátiuk ngá rám wata narang hátinemán?”’ <sup>15</sup> Wáina inán du it pahálá táwi torong káin kutná kutná wakáin erek tiyawená wa sálen du wakáin sungngi náni nanayan wa tiyawinemálák.”

<sup>16</sup> Wáina yánán disaepel yará yándi wu kumálák ngáyá it yáilá kinan káin wa kungga káumálák ku kutná kutná wu Jesu yá yánuK wáina hánám re há tunggafen kangga ku yándi wu sungngi wa há tiyawing háliumálák.

<sup>17</sup> Kulá it tá pup táuk wahára ku Jesu yá disaepelná 12 watyot áwáng hiuráng. <sup>18</sup> Kulá rám sungngi nangga áturáng wahára ku Jesu yá yánuK, “No pálipuk hánám ing sánin, káman nahára sungngi nangga átamán orek náni háranan káman dá ku nák neháng káyam ket yáni hára tin ket nehineráng.”

<sup>19</sup> Wáina yánán disaepelná yá naránga pahán yáni yá márawin yáni káman káman inuráng, “Nákka háam melák?”

<sup>20</sup> Wáina inát, Jesu yá yánuK, “12 sán háranan káman. Másáng iháng rápmám kinan nákkot satne háinek wata orek sáni háranan káman. <sup>21</sup> Ámna Nanggená ya sutná hára rina tunggafeyea uyená wawu wáina há tunggafeinek. Iná ukuro hánám bu ni ámna yá Ámna Nanggená táng káyam ket yáni hára tinek wa, watán marápmá wawu táwi táí hánám, iná maming gá ámna wa ma táng tiuk iná wawu álo kámá,” ingga yánuK.

<sup>22</sup> Kulá rám sungngi nangga áturáng wahára ku Jesu yá másáng táng Ánutu yan káin sáponga tángga hikhuk tángga disaepelná yámángga yánuK, “Ná ihániráng, náwu nák yánumna.”

<sup>23</sup> Wáina yánángga son hang wáin kap tángga Ánutu yan káin sáponga tángga yámán wahára erek nang hálit tu <sup>24</sup> yánuK, “Náwu nák sipna ámna náráwa máro hánám bá Ánutu yot pahán káman háháleyan kule háek. <sup>25</sup> No pálipuk hánám ing sánin, no wáin son ma náindát, ináku máriya Ánutu yan átkuku mirak káin du wáin hurápmá wa náinet,” wáina ingga yánuK.

<sup>26</sup> Kulá hang kap káman mantánga sangga ku hangga ále yáilá Olif káin kuráng.

*Jesu yá oleinelák ingga Pita inuk*

*(Mat 26.31-35; Luk 22.31-34; Jon 13.36-38)*

<sup>27</sup> Jesu yá disaepelná yánuK, “Sán erek hánám naráng hákhátik sáni yá han pitánga kuineráng, náuta me ing uyená yá átak, ‘No pin yáni tátá utkámút táe

sipsip pá hángghánáng táineráng.\*”

<sup>28</sup> Enendu máriya tárutang sangga ku no kálak Galili káin kuinet.”

<sup>29</sup> Wáina men Pita yá miuk, “Iná kátu kámuk wata naráng hákhátik yáni yá han kepmáineráng hálen, nák ku ma kepmáindát.”

<sup>30</sup> Wáina men son Jesu yá Pita inuk, “Pálipuk hánám kanin, kula yáung nahára hurák ká rám yará ma mantáéná árán du ko hánám puk ‘nák Jesu ma naráng mát’ ingga rám kaláhu meinelák,” ingga inuk.

<sup>31</sup> Enendu Pita yá táng hánggháláng tángga sonson ing miuk, “Nák ku kákkot álo kámútnet. Kák ka ma naráng kamát ingga ma meindát,” ing men disaepel kámuk árong wáina re miuráng.

*Jesu yá Getsemani káin sáponga táuk*

*(Mat 26.36-46; Luk 22.39-46)*

<sup>32</sup> Kulá ále kutná Getsemani káin kuráng ngáyá ku Jesu yá disaepelná yánuK, “Nahára putung átnárát no kung sáponga táin.” <sup>33</sup> Wáina yánánga ku kátu yápmangga Pita, Jeims yot Jon wa re ihánga málám bot kunggatang pahálá yá káto hálengga márawiuk. <sup>34</sup> Wáina hálendu yánuK, “Irukna yá táwi hánám márawin wata márapmá ná yá hála nutnándek. Nahára átang gu hálang rákit tángga átnárát.”

<sup>35</sup> Wáina yánánga Jesu málám isikimo kungga sim bu táng hang káwak hára kátingga sáponga táuk, wawu kálu kámá átak hálendu rám wáik watá táng háhátí wáina ta. <sup>36</sup> “Aba†, Nanna,” ing miuk, “ko rina rina wawu álo tánggim re. Nák hára márapmá wa táng satá kuii. Enendu ko nákkán pahán ma isutnándalák ináku kakán pahán isutnelák.”

<sup>37</sup> Kulá son málám hurik tángga disaepelná yan káin áwánga kápuk ku ruhánga árát, Pita inuk, “Saimon, kák ka ruhánga átkoelák me? Rám hátetná kimo ma hálang rákit tángga átgim me?” <sup>38</sup> Hálangga sáponga tángga átnéráng watá ku ingirungngi hára ma háindáráng. Pálipuk, pahán dá ku álo táinemán ingga narángngátaráng, enendu sut tá ku hálangngá muná.”

<sup>39</sup> Wáina mengga Jesu málám kung sáponga wanyon son táng hálingga sangga, <sup>40</sup> son áwánga kápuk ku rahán yáni yá márawin ruhánga árát, málám iháng tárut táuk wahára wu wáina ininemán ingga kámá ma naráng hátiuráng.

<sup>41</sup> Málám son kuk ngáyá rám kaláhuná hára son áwuk wahára wu yánuK, “Sánda emá re ruhánga sek naránga átkoeráng me? Álo ruheráng! Rám bu áwek. Kaniráng, Ámna Nanggená táng mukmuro ámna ket yáni hára tinderáng. <sup>42</sup> Tárurát kunin! Nák neháng ket yáni hára titi wawu ná áwek ná.”

*Judas yá Jesu táng káyam ket yáni hára tiuk*

*(Mat 26.47-56; Luk 22.47-53; Jon 18.2-11)*

\* 14:27: Sekaraia 13.7 † 14:36: Me Aramek kálu ‘Aba’ wawu ‘Nan’.

<sup>43</sup> Emá me yánangga átnarán du disaepelná 12 háranan Judas yá waháranon há áwáng hiuk. Pris tátáwi yáni, lo yan tiksa me ámna hulá watá suring yámát ámna tombong háśák táwi watá ket yánin du kápik honggem bot iháangga watyot áwáng hiuráng.

<sup>44</sup> Ámna Jesu táng yámámáya tiyawiuw watá ku tarák ing táinet ingga huphuráppon ing há yánuk, “Ámna káman no kang kumeinet wawu Jesu ku wa, ket tángga pinná kándáng tángga ku tángga kuineráng.” <sup>45</sup> Kulá Judas málám sopmuná ingmen Jesu rupmá káin kungga, “Tiksa!” ing ináangga árong há kang kumiuk. <sup>46</sup> Wáina tán kungga ámna tombong táwi watá ket tángga káto táuráng. <sup>47</sup> Kulá ámna káman enanggon hetang átuk watá árong kápikngá uyingga táuk ngáyá mangga pris táwi yáni yan yáup ámna hára kátin kápik ká káramanná numkálu sating san háuk.

<sup>48</sup> Kulá Jesu yá wáina yánuk, “Nák ku tewe ámna tombong káman da máta yáreng yámámá hám, wáina hálendu sándá kápik kot honggem bot iháangga átang gu ná k ket neháangga kunin ingga áweráng? <sup>49</sup> Rámá rámá wu sáni yot há átkoet, Táwi yan it káungá hánám bán kumbi kinan me sánang tolingga átninggoet, wakáin du ket ma neháng kuráng. Enendu Ánutu yan me yá rina mek watá kungga kándáng re háleinek,” ing yánuk. <sup>50</sup> Kulá wahára átang gu disaepelná yá erek hánám sangga hárátiuráng.

<sup>51</sup> Rám wahára wu ámna máto káman lap káman re sutná hára tawáangga Jesu isutang kungngárán, wa árong ket tángngárát <sup>52</sup> lap wa sangga muláng pitáknká kuk.

*Ámna hulá rahán yáni hára Jesu táng me hára tiuráng  
(Mat 26.57-68; Luk 22.54-55,63-71; Jon 18.12-14,19-24)*

<sup>53</sup> Jesu ket tángga sat warán tánggatang pris táwi yáni watán káin kut pris tátáwi yáni me ámna hulá hulá me lo yan tiksa watá kámuk áwáng háwuru táuráng. <sup>54</sup> Pita málám Jesu isutang kuk, enendu kung mulángán sim átuk. Málám kung pris táwi yáni yan it kumbiná kinan káin kungga it pinná tátá yá káráp singga elengga árát tu watyot putung átang kárápmá elengga átuk.

<sup>55</sup> Kulá pris tátáwi yáni me kaunsel kámuk watá hulá rehára kungga ku Jesu utkámút tánin ingga hulá ya suliuuráng, enendu hulá ya sulit men sáuráng. <sup>56</sup> Ámna máro hánám watá áwáng me kusák wa iháng tingga miuráng, enendu me yáni iháng áwáng miuráng watá kámá kámá háliuráng.

<sup>57</sup> Kulá kámá yá ku tárutang Jesu ya me kusák ing miuráng, <sup>58</sup> “Ing men narumán, ‘No ámna yá Táwi yan it káungá hánám táená wa kátin márák tángga son rám kaláhu kinan re nukngá táng tárut táinet wawu ket tá ma táindát.’” <sup>59</sup> Enendu me yáni iháng áwáng miuráng watá wáinanon kámá kámá háliuráng.

<sup>60</sup> Kulá pris táwi yáni watá kaunsel rahán yáni hára tárutang Jesu inuk, “Me hulá hulá kák ka menggoeráng wa rina? Kák ka me topmá kámá meinelák me muná?” ingga inuk. <sup>61</sup> Enendu Jesu yá me topmá kámá ma yánuk, ináku náng ingmen átuk.

Wáina árán pris táwi yáni watá son inuk, “Kák ku ámna Ánutu yá ámna náráwaná son iháhaya miuk wa me? Ánutu nánda ináng sáknngingngátamán wata Nanggená me?”

<sup>62</sup> Wáina inán du Jesu yá miuk, “Wawu ná k. Hang káineráng gu Ámna Nanggená wu Ánutu Uliháláng Márúmá wata ketná álák kálu putung átnek ngáyá alek kán mukam wata ketná áwinek.”

<sup>63</sup> Wáina men naráangga pris táwi yáni watá sutná káin lapmá tánggánengga átuk wa ráráhangga<sup>†</sup> miuk, “Náuta ku me nukngá met nanaráya háleinemán? <sup>64</sup> Táwi yan kome tángga me mukmuro hánám wa há men naremán wata ku rina nareráng?”

Wáina yánán kámuk hánám miuráng, “Me mukmuro hánám mek wata álo kámá ku kámurán sáliknginek.” <sup>65</sup> Wáina mengga ku alup yáni málámba ketná uráháangga lap pá rahálá pop tángga hárot kik táng sat árán, ket yáni mukátang utang gu inuráng, “Profet me meng, niyá nutak ingga!” Kulá waháranon du it pinná tátá yá táng kung hányon uturáng.

*Pita yá Jesu ma naráng mát ingga yánuk  
(Mat 26.69-75; Luk 22.56-62; Jon 18.15-18,25-29)*

<sup>66</sup> Pita málám it ámang kálu kumbi kinan káin átang káráp elengga átnarán, pris táwi yáni yan yáup náráwa káman dá wahára áwuk ngáyá <sup>67</sup> Pita kárek ingmen kangga ku ing inuk, “Kák ku Jesu Nasaret nan watyot hányon átnngngátalák.”

<sup>68</sup> Ing inán Pita yá olang mángga inuk, “Pálipuk hánám ko náuta melák wawu ná ma narát.” Ingga ináangga sangga málám kumbi kálu mungnganá tangtang kun waháranon hurák káman dá mantáuk.

<sup>†</sup> 14:63: Juda yan kálu wu rám ámna káman dá pahán márap tángga ku wata lapmá ráráhangngátak. Jesu yá ‘Nák ku Ánutu Nanggená’ ingga men du pris táwi yáni watá pahán márap tángga lapmá ráráhuuk.

<sup>69</sup> Kulá son yáup náráwa watá káuk ku wahára árán, kangga ku ámna ále wahára hetang áturáng wa son yánuk, “Ámna náwu Jesu yan tombong.” <sup>70</sup> Wáina men Pita yá son olengga, “Nák muná” ing miuk.

Kulá isikimo átang sim bu ámna wahára hetang áturáng watá Pita inuráng, “Pálipuk kák ku Jesu yan tombong, náuta kák ku Galili nan yon.”

<sup>71</sup> Wáina inát tu Pita yá yánuk, “Pálipuk hánám Ánutu rahálá hára met, nák Jesu ma naráng má! Kandák me háleudu Ánutu yá álo neháng lem táinek. Ámna wa menggoeráng wawu nák ma naráng má!”

<sup>72</sup> Wáina yánangga árán waháranyon hurák ká son mantáuk. Kulá Pita yá Jesu yá me rina inuk wa naráng hátiuk: “Hurák ká rám yará ma mantáena árán du ko nák wa ma naráng má! ingga rám kaláhu meinelák.” Kulá wahára wu Pita yá pahálá utang táwi hánám wa kutuk.

## 15

*Jesu tángga Pailat tán káin kuráng*

*(Mat 27.1-2,11-26; Luk 23.1-5,13-25; Jon 18.28—19.16)*

<sup>1</sup> Kulá hilápmá hánám pris tátáwi yáni me ámna hulá hulá me lo yan tiksa hang kaunsel kámuk watá urum tángga rina tátá wa meng tolingga sat warán Jesu páup pá hárotang tángga kungga táng Pailat ketná hára tiuráng.

<sup>2</sup> Wáina tát tu Pailat tá inuk, “Kák ku Juda yan king me?”

Ing inán watá miuk, “Wa melák wáina,” ingga inuk.

<sup>3</sup> Kulá wahára wu pris tátáwi yáni watá me hulá hulá wa metne Jesu yá mrapmá há suwik ingga miuráng.

<sup>4</sup> Wa met Pailat tá son inuk, “Me kámá meinelák me? Kang, me wu rina kámá ingmen meng sat áwáng kákkán kálu átak.”

<sup>5</sup> Wáina inuk, enendu Jesu yá me topmá kámá ma inán Pailat tá háramutuk.

<sup>6</sup> Kulá wahára wu Pailat tán kálu káman ing isutnandaráng, Angelo yá Iháng Hátiuk rám wahára wu Pailat tá ámna náráwa yan milun isutang it káto kinan nan ámna káman ní yáni kutná met tu wa yaling mán kep káin hangngatak. <sup>7</sup> Rám wahára wu it káto kinan ámna káman kutná Barabas yot tu nuknukngá niyá Rom bán kapman yot honhoren tángga ámna kámá yot erawánga ráháng kátkámut táuráng watá árát, <sup>8</sup> ámna náráwa urum táwi watá áwáng Pailat inuráng, “Álo ka tángngatalák wáina táinelák me?”

<sup>9</sup> Wáina inát tu Pailat tá yánuk, “Juda yan king ná sáe kuinek ka nareráng me rina?”

<sup>10</sup> Wáina yánuk náuta watá ku há naruk pris tátáwi yáni watá Jesu málámbán yáup pa kalán yon táng áwáng ketná hára tiuráng. <sup>11</sup> Enendu pris tátáwi yáni watá ámna náráwa pahán yánin hangga yánát tu Barabas ya re miuráng.

<sup>12</sup> Wáina met tu Pailat tá yánuk, “Kulá Juda yan king ingga sáni menggoeráng náwu rina táng minet?”

<sup>13</sup> Wáina yánán, “Maripong hára kátiti!” ingga mantáuráng.

<sup>14</sup> Wáina mantát Pailat tá yánuk, “Wawu náuta? Kandák rina táuk ka?” ing yánán naránga hahatingga hánám ing mantánggaturáng, “Maripong hára kátiti!”

<sup>15</sup> Kulá ámna náráwa urum táwi watá herongnge nanaráya wu Barabas yaling mán watán káin kun tewe ámna yánán honggem bá kálak Jesu urát tu maripong hára kátitiya sang yámuk.

*Tewe ámna yá Jesu ináng kekkek táuráng*

*(Mat 27.27-31)*

<sup>16</sup> Kulá tewe ámna yáni waku Jesu engotang kapman dán it álosim kumbiná kinan kung hang átang tewe ámna áturáng wa erek ingmen mantát áwát tu <sup>17</sup> lap sipsipmá hásak káman táng tánggáneng mángga páup rimrim ina táng áwáng king gán kálaháng ina yáilá yan tárak mang pondang yáilá káin sat hang átuk. <sup>18</sup> Wáina erek ingmen tánggáneng máng sat árán du me kekkek sonson ing inuráng, “Juda yan king, kák ku kutya árená hánám!” <sup>19</sup> Wáina inángga ku sonson ingmen honggem táng yáilá hára wa kátingga alup yáni málamba ketnán uráhingga áturáng. Yáni wu tung yáni hára imángga hangga ináng sákingiya ina táuráng. <sup>20</sup> Wáina tángga ináng kekkek táng hálingga ku lap sipsipmá tánggáneng muráng wa yaling mángga ku málámbán hánám wa iháng son tánggáneng mángga ku maripong hára kátitiya engotang kuráng.

*Jesu maripong hára kátingga táng áráng tiuráng*

*(Mat 27.32-44; Luk 23.26-43; Jon 19.17-27)*

<sup>21</sup> Ámna káman it yáilá Sairini nan kutná Saimon wawu Aleksenda káling Rufus nan yándi. Watá it yáilá Jerusalem kinan kung háin ingga tángngarán inángga suring má! Jesu yan maripong wa táng mángga kuk. <sup>22</sup> Wáina tángga ku Jesu wu engotang ále káman kutná Golgata wakáin kuráng (kut watá hulá wu yáin kuratná watán ále). <sup>23</sup> Kulá wakáin kung gu



wáin táng kuram nukngá sut táng láláp tátáyan watyot táng yawák táená wa imuráng, enendu Jesu yá wa ma náuk. <sup>24</sup> Wáina tán du táng maripong há kátená wahára ránam ting sat árán piring gá káturáng. Iná sut tánggánene wawu iháng horengga ting sat árán du kakarák laki wa tángga niyá ku náut ihinek wa kangga iháháya táuráng.

<sup>25</sup> Jesu táng piring gá káturáng wawu ráb bu hilápmá 9 kilok hálangga árán, <sup>26</sup> hulá resim hára táng me hára tiuráng wa uyingga táng maripong hára káturáng wawu ing:

NÁWU JUDA YAN KING.

<sup>27-28</sup> Rám wahára wu manek mara yará yot iháng wáinanyon maripong hára káturáng, káman ketná álák kálu hang káman ketná kandák kálu. <sup>29</sup> Iná rám Jesu wa káting sat átuk wahára ámna náráwa niyá kálu wakálu áwánga kanggiuráng wawu me keke inánga yáin yáni kahondang gu menggiuráng, “Kulá! Kák ku Táwi yan it káungá hánám káting márák tángga rám kaláhu kinan re son táng tárut tátáya miulák. <sup>30</sup> Kulá kayon ka háláng imánga maripong sangga hang,” ingga inánggiuráng.

<sup>31</sup> Iná pris tátáwi yáni me lo yan tiksa watá wu wáinanyon me keke ing mengga yáni inán kanán táuráng, “Kámá háláng yámángngátak, wáinanyon málámá málámbon háláng imámáyan du muná! <sup>32</sup> Pálipuk Ánutu yá ámna náráwaná son iháháya san áwuk, me pálipuk Israel yan king hálendu, maripong hára káting sat átak wa sangga han kangga ku nándá pálipuk ingga naráng háting minemán.” Ing met ámna yará Jesu inanyon káting sat átumálák watá wáinanyon ináng kekkek kon tángga átumálák.

*Jesu yá kámutuk*

(Mat 27.45-56; Luk 23.44-49; Jon 19.28-30)

<sup>33</sup> Kulá 12 kilok hálangga árán du ále káwak watá kámuk páyung tingga árán kungga yonyon kálu 3 kilok háliuk. <sup>34</sup> Hang 3 kilok hálangga árán du Jesu yá hahatingga hánám ing mantáuk, “Eloi, Eloi lama sabatani?” Wata hulá wu ing, “Ánutuna, Ánutuna, náuta nepmáelák?”\*

<sup>35</sup> Wáina mengga mantán naránga ku kámá enanggon wahára hetang áturáng watá ku ing miuráng, “Narániráng, Elaija ya mantáng máng tek ka†.”

<sup>36</sup> Kulá ámna káman dá ku hururung ingmen kung matres kátu ina táng wáin hára tin pumen táng kári hára yuwingga táng Jesu yá nanaya imánga ku miuk, “Sat málám re árán kanin, Elaija yá áwáng táng san háinek hám,” ingga miuk.

<sup>37</sup> Kulá Jesu yá hahatingga hánám mantánga ku kámutuk.

<sup>38</sup> Kulá Táwi yan it káungá hánám kinan lap maming táwi watá ku torong káin átang kung tárang káin pana huk ingmen raráhángga numnum kuk. <sup>39</sup> Iná tewe ámna táwi yáni wu Jesu kondolá kálu wahára átang Jesu yá mantáuk wa naruk me rina kámutuk wa kangga miuk, “Pálipuk hánám ámna náwu Ánutu Nanggená!”

<sup>40</sup> Hang rám wahára wu náráwa kámá hányon áwáng mulangán sim hetang átang kangga áturáng. Orek yáni hára wu Maria it Makdala nan, hang Maria ámna máto Jeims káling Joses mam yánda, hang káman du Salome. <sup>41</sup> Huphuráp Galili káin du náráwa urum watá hánám bu Jesu isutang átingga ku hahaná rina hálenggiuk wawu watá háláng imánggiuráng. Iná náráwa kámá wahára máro yon áturáng wawu Jesu málám bot Jerusalem káin wa áwuráng watá áturáng.

*Jesu táng kung tanggán yáni sup hinangngá káling tolená wata kinan tiuráng*

(Mat 27.57-61; Luk 23.50-56; Jon 19.38-42)

<sup>42</sup> Kulá rám tembát ut Sabat ingga ku tiktiyawik tátá rámá wáina hálendu yonyon há hálén kangga ku <sup>43</sup> Josep it Arimatea nan wawu málám bu kaunsel me ámna náráwa yá ámna álosim ingga há naráng meráng, iná málám wawu Ánutu yan átkuku wata hálangga átnándak. Josep pu ma pitáuk ináku Pailat rupmá káin kung henga Jesu yan káwak sut wa namáng ingga inuk. <sup>44</sup> Wáina inán Pailat tá Jesu wu há kámutak wa naránga hárámutang gu tewe ámna táwi yáni wa mantán áwán inuk. “Jesu wa pálipuk há kámutak me?” ingga inuk. <sup>45</sup> Kulá Pailat málám tewe ámna táwi yáni watán káin pálipuk ingga kándáng naránga sangga ku káwak sut wa álo táinelák ingga Josep inuk. <sup>46</sup> Wáina inán Josep málám lap hásak káman yungga táng kung Jesu tambun wa táng hang lap watá kámuk pondang táng kung sup hinangngá káling tolená wakáni tingga, árong sup táwi káman kiwolán áwáng hinangngá wa pop tángga átuk. <sup>47</sup> Kulá Maria it Makdala nan me Maria Joses maming wawu há átang gu Jesu tambun táng rehára teráng ingga wawu há kápumálák.

\* 15:34: Kap 22.1 † 15:35: Aramek me kálu kut Eloi me kut Elaija wawu hála tarák yánda káman re wáina wata ku ámna náráwa yá Jesu yá rina mantáuk wa kándáng ma narená ‘Elaija’ ing mek ingga naruráng.

## 16

*Jesu yá son tárutuk**(Mat 28.1-10; Luk 24.1-53; Jon 20.1-23)*

<sup>1</sup> Sabat hára sek nanará ráma watá sálin du Maria it Makdala nan, Maria Jeims maming hang Salome watá kutná kutná mungngan yáni kikiná wa yungga ihángga kung Jesu sutná káin kuháng mámáya tiyawuiráng. <sup>2</sup> Sonda hulátitayan ráh hulátiuk wahára wu káe yá áráng hen wahárayon tanggán káin kuráng. <sup>3</sup> Kálu káin kungga átang gu yáni inán kanán táuráng, “Tanggán hinangngá hára sup táwi wawu niyá kiwolán kuinek?”

<sup>4</sup> Wáina mengga kung hengga tanggán hinangngá hára hálengga káuráng gu sup maming táwi wawu há kiwon hong tená. <sup>5</sup> Kulá tanggán hinangngá hára kung hangga káuráng gu ámna máto káman lap háasák haknga tánggánená watá ket álák kálu putung áran kangga ikik hárámutang pitáuráng.

<sup>6</sup> Wáina tát kápánga watá yánu, “Ma pitáindaráng. Sán du Jesu Nasaret nan táng maripong hára kátiuráng wata suléráng. Wawu son há tárutang koek! Nahára ma árak. Áwángga táng tiuráng ngá komená wata kaniráng. <sup>7</sup> Kulá kungga ku Pita yot disaepelná nukngá yáneráng, ‘Jesu wu watá kálak Galili káin koek. Málámbá me rina sánu, wa isutang Galili káin kungga káineráng.’”

<sup>8</sup> Wáina yánán nanará yáni yá yakyawin yángyáng pálak náráwa kaláhu wawu hangga tanggán wa sangga hururung ingmen kuráng ngáyá kung pikpito naránga ni kámá káman ma inuráng.

<sup>9</sup> \*Rám sonda hulátitiná hára ku Jesu yá son tárutang kungga hulátingga hánám bu Maria it Makdala nan watán káin kálak tunggafiuk. Náráwa wawu huphuráp Jesu yá iruk wáik 7 yásut muk wa. <sup>10</sup> Náráwa málám kuk watá kung nini Jesu yot átnnggiuráng watá pahán yáni márapmá naránga kutang átkuráng wa ing yánu, <sup>11</sup> “Jesu ku son tárutak, no há káet,” ingga yánu, enendu watán me wawu kusák ingga naruráng.

<sup>12</sup> Kulá máriya ku Jesu yá málámbán tombong háranan ámna yará yá Jerusalem sangga kálu hára kungga átnárán tárák kámá hálengga watán káin tunggafeng yámuk. <sup>13</sup> Wáina kangga ámna yará watá son áwáng wáina káemát ingga nuknuk yánu wa yánumálák, enendu watán me wa kusák kon ingga naruráng.

<sup>14</sup> Máriya ku Jesu yá disaepelná 11 dá sungngi nangga átnárát watán káin tunggafeng yámánga, naráng hákhátik yáni káto muná hang kámutang son tárurán há káemán ingga yánát kusák ingga naruráng wata me táng yámuk.

<sup>15</sup> Málám ing yánu, “Kuineráng watá kungga káwakngá káwakngá erek ingmen kung hálingga ámna náráwa erek ingmen me pingnga álosim ná yánánga kuineráng. <sup>16</sup> Ámna náráwa niyá náka naráng háting namánga umi kuhinek wawu Ánutu yá son tán málámbán pingnga hálinek. Iná niyá náka ma naráng háting namindák wawu Ánutu yá isurán átkuku wa ma táindák. <sup>17</sup> Kulá Ánutu ya naráng háting mánga átnéráng wawu tárák ing tát kápinéráng: Nák kutna hára iruk wáik yásut yámánguineráng, me nukngá kámá ma narená wa álo me tánguineráng, <sup>18</sup> kunap ket yáni yá ihángguineráng, náut kámá ámna iháng lem tátayan náineráng enendu watá ma iháng lem táindák, hang ket yáni yá ilalák mara ihánggápát ilalák ká álo háleng yámánguinek.”

<sup>19</sup> Táwi Jesu yá me wa yánáng hálingga áran du Ánutu yá tánga áránga alek káin kungga ketná álák kálu ting san putung átkoek. <sup>20</sup> Kulá wahára átang gu disaepel yá hangga itná itná erek ingmen kungga me pingnga álosim wa yánánga kuráng. Táwi málámbá disaepel yot átang háláng yámánga me menggiuráng wa táng káto táng yámámáya ket tárák hulá hulá wata ket yáni hárá tánggiuk.

\* **16:9** Nanará ámna kámá yá ing naráng átaráng, lain 9 kung 20 hára sálikngkek wawu Mak málámbá ma uyuiuk. Ámna kámá yá uyuiuk.

## Luk ká Ánutu yan me pingnga uyiuk

*Luk ká me pingnga ná uyingga Tiofilas yan san kung muk*

<sup>1</sup> Ámna táup pá yon tárák ka Ánutu yá yáup rina táuk watán me pingnga uyiuráng watá áwáng rám nahára páliná yá hiták tunggafen kanggoemán. <sup>2</sup> Hulátingga hánám niyá rahán yáni yá kangga Ánutu yan me watán yáup nangge hálengga áturáng watá yon meng isurát áwánga nándán káin áwuk wanyon uyiuráng. <sup>3</sup> Wáina kangga ku na hulátingga kándáng hánám yánáng sulingga narut ná wa, álo kámá ku no hányon uyin ingga naránga ku wa táng tombong hára tingga, ámna hulá Tiofilas, kákkán da uying kamet. <sup>4</sup> Wa kangga ku me rina narulák wawu pálipuk ingga narinelák.

*Jon Umi Kuháng Yámamá yá tunggafeinek ingga angelo yá Sekaraia inuk*

<sup>5</sup> Judia yan king kutná Herot watán rám hára pris káman kutná Sekaraia wawu pris Abiya watán tombong háranan, iná áwáná Elisabet wawu Aron dán tombong háranan. <sup>6</sup> Yándi wu Ánutu rahálá hára kándáng hánám wa átnándamálák, me Táwi yan meng rákit mená rina átaráng wa kándáng hánám isutnándamálák. <sup>7</sup> Enendu nangge yándi wu muná. Elisabet wawu náráwa kátoná háleudu nangge ma iháng tingngátak, wata ku yayará hánámá átang kungga ku há tátáwi háliumálák.

<sup>8</sup> Rám káman Sekaraia yan tombong gá pris yáup tátáya kuráng ngáyá ku Sekaraia málám Ánutu rahálá hára átang yáup táuk. <sup>9</sup> Kulá pris yá kakarák káman satu\* wa tát Ánutu yá wahára kungga Sekaraia táng tunggap tán du Táwi yan it káungá hánám kinan hangga towet mungnganá kikiná sinek ka. <sup>10</sup> Towet sisi rám wahára wu ámna náráwa táup hánám watá Táwi yan it káungá hánám kep káin urum átang sáponga tángga áturáng.

<sup>11</sup> Rám wahára ku Táwi yan angelo yá tunggafeng mángga towet sisiyan tingnaknak tákto ket álák kálu hetang átuk. <sup>12</sup> Wáina kangga Sekaraia málám ikik ingmen háramutang pikpito hánám naruk, <sup>13</sup> enendu angelo yá ing inuk, “Sekaraia, ma pitáindalák. Ánutu yá kákkán sáponga wawu há naruk. Áwáka Elisabet wawu nanggeka ámnaná táinek, wata kutná ku Jon mantáinelák. <sup>14</sup> Watá ku pahála táng láláp tán álo kámá hánám naránga heronge háleinelák, iná ámna náráwa táup hánám watá Jon dá tunggafeinek wata heronge táineráng, <sup>15</sup> náuta Táwi rahálá hára wu Jon kutná yá táwi hánám háleinek. Watá wáin me umi káto nukngá átaráng wa ma nang kuindák, iná nangge wawu manyon tunggafená mam kinan átnek waháranon Iruk Káungá watá watyot átnek. <sup>16</sup> Watá tán Israel nan ámna náráwa táup hánám watá pahán yáni hurik tángga Táwi yáni Ánutu yan káin kuineráng. <sup>17</sup> Watá Elaija yan tárák me háláng wa tángga watá kálak áwán du Táwi yá áwinek. Wáina tán du nanan yáni yan pahán wa táng hurik tán nángánangge yáni ya pahán yámineráng, me milun yayali ámna náráwa watá nanará álosim tángga ámna náráwa kándáng hálineráng, hang ámna náráwa tiyawing yámán Táwi ya háleng mineráng.”

<sup>18</sup> Wáina inán Sekaraia yá angelo wa inuk, “No rina tángga ku kákkán me ná pálipuk ingga narinet? Nawu tátáwi hánám me áwána wu wáinanyon tátáwi yon.”

<sup>19</sup> Kulá angelo yá inuk, “Nák ku Gabriel. Ánutu kondolá hára hetang átnándat wa suring namán me pingnga álosim ná kák kakanáya áwet. <sup>20</sup> Wata kula wu me ma me táená áratá kungga rám rina hára me kanet náta páliná yá tunggafeinek, náuta ko nákkán me ná pálipuk ingga ma narálák wata, me náwu pálipuk hánám há tunggafeinek rámá wu Ánutu yá narek hára wa,” ingga inuk.

<sup>21</sup> Iná ámna náráwa yá ku Sekaraia ya hálengga átang gu naránpak tángga átkiuráng rina tángga ku Táwi yan it káungá hánám kinan rám hásák átkoek ingga. <sup>22</sup> Wáina átang áwáng kep káin háuk wahára káuráng gu ma kápáng mená ket tárák re tángga átuk, wáina háleudu it káungá kinan káin tárák kámá káek ingga naruráng.

<sup>23</sup> Wáina re átang kungga watá yáup tátá watá sálíknjin du hangga itná ya kuk. <sup>24</sup> Wata sárumká káin átang árongga áwáná Elisabet tu kawilá átuk háleudu yap 5 wata kinan wawu kilakngá re átkiuk. <sup>25</sup> Iná Elisabet tá ku miuk, “Táwi yá yon men du náta tunggafeng namek. Málámbá pahán láláp namán ámna náráwa rahán yáni hára reprepamá watá sálíknjing namek.”

*Angelo yá Jesu nangge yá tunggafeinek ingga Maria inuk*

\* 1:9: Pris yá kakarák satu ina wa tángngátaráng watá ku ámna táng tunggap tátáya. Wáina tátne ku Ánutu málámbáyon ámna táng tunggap táik ingga naránga tángngátaráng.

<sup>26</sup> Elisabet tá kawin yap 6 há áran du Ánutu yá angelo Gabriel wa suring mán ále Galili kinan it Nasaret wakáin kuk, <sup>27</sup> wawu kungga náráwa máto hurup hánám káman kutná Maria watán káin kuk. Iná náráwa máto wawu ámna kutná Josep wa tátáya pingnganá meng sat áran, ámna wawu Dewit tán tombong háranan. <sup>28</sup> Angelo Gabriel watá Maria yan káin kungga ku inuk, “Káe álo, náráwa kák, kák ku Táwi yá kákkot átang pahán kamek.”

<sup>29</sup> Wáina inán naránga Maria yá háramutang narángpak tángga ing naruk, “Me náwu rina hánám?” <sup>30</sup> Wáina tán kangga angelo yá inuk, “Maria, ma pitáindalák. Ánutu yá pahán álosim kák ka naráng kamek. <sup>31</sup> Narelák, kák ku kawila átang nangge ámnaná táng tinelák, wata kutná wu Jesu ing mantáinelák. <sup>32</sup> Watá kutná yá táwi hánám hálengga kungga áran du Ánutu yá kut ing iminek, Ánutu Árená Hánám wata Nanggená. Táwi Ánutu málámbá táng táwiná Dewit tá kut táuk kut wáinanyon wa imán <sup>33</sup> watá wu Jekop pán tombong gán king hálengga ráma ráma átang kungga ámna náráwa pín yáni tátáyan hálang wa tángga átang kung kuinek.”

<sup>34</sup> Wáina inán Maria yá inuk, “Rina tángga ku wáina tunggafeinek? Nák ku máto hurup hánám átat.”

<sup>35</sup> Wáina inán angelo yá inuk, “Iruk Káungá watá kákkán káin áwán du Ánutu Árená Hánám watán hálang watá kák keháng támorán du rongronggá káungá hánám máriya tunggafeinek wawu Ánutu Nanggená ing mantáng mineráng. <sup>36</sup> Wáinanyon Elisabet sipya kátu wawu náráwa kátoná nangge ma tátáyan tátáwi watá kawilá áran yap 6 hálengga átak wawu nangge ámnaná táng tinek. <sup>37</sup> Ánutu yá náut kámá káman ma tátáyan kámá ma árak.”

<sup>38</sup> Wáina inán Maria yá inuk, “Nák ku Táwi yan yáup náráwa. Nák hára rina tunggafefeya melák wawu wáina álo tunggafeinek,” ingga inán du angelo yá sangga kuk.

#### *Maria yá Elisabet kakaya kuk*

<sup>39</sup> Rám wahára Maria yá sopmuná ingmen tiyawingga it káman Judia ále káin ále yáilá isikikimo átaráng wakáin kuk <sup>40</sup> ngáyá kung Sekaraiia yan it kinan hangga heronge me Elisabet inuk. <sup>41</sup> Wáina inán Elisabet tá Maria yan me wa naruk wahárananyon nangge kawin kinan átuk watá háták árángga han du Elisabet wawu Iruk Káungá watá áwáng ep táuk. <sup>42</sup> Wáina tán du hahatingga hánám mantáuk, “Táwi yá álo kámá hánám keháng tolingga kuram kák kamuk watá kuram náráwa kámá yámuk wa iháng hátek, me nangge táinelák wawu kuram hányon imuk! <sup>43</sup> Enendu náku rinaná hálendu Táwina wata maming gá nákkán káin áwek? <sup>44</sup> Rám ko heronge me nanelák watá kung káramanna káin háek wahárananyon nangge kawinna kinan watá heronge tángga háták árángga háek. <sup>45</sup> Táwi yá wáina tunggafeinek ingga kanán pálipuk ingga narulák, wata ku kákkán káin kuram bá kuinek!”

#### *Maria yan kap*

<sup>46</sup> Maria yá ing miuk,

“Pahánna yá Táwi kutná meng tárut táet,

<sup>47</sup> iná irukna yá ku Ánutu hálang nanamá wata heronge táng mek,

<sup>48</sup> náuta náku ále hánám ina

enendu yáup náráwaná náku, málámbá neháng toktolik tángngátak.

Rám inggálu me máriya átang kuinek kálu ámna náráwa kámuk ká,

‘Ánutu yá kuram álosim wáina táng muk,’ ingga mengguineráng,

<sup>49</sup> náuta Ánutu Ulihálángngá Pálak watá kutná táwi hánám náka táng namek.

Kutná watá káungá hánám átang kuinek.

<sup>50</sup> Watán ukuro watá kung nini wata naráng háting mángga átaráng watyot átnek,

ámna náráwa ráman náhára átaráng me ámna náráwa máriya tunggafengga áruineráng.

<sup>51</sup> Ketná yá yáup tátáwi hánám wa tángga,

ámna niyá náku árená ingga átnándaráng wa iháng hánghánáng tán káman káman táuráng,

<sup>52</sup> Watá king tátáwi wa iháng hang tingga

ámna kut yáni muná wa lhángngaráng tiuk.

<sup>53</sup> Ámna niyá háng yámán áturáng wa kutná kutná álosim sing yámán nangga kawin yáni háhátuik,

iná niyá kutná kutná yáni pálak áturáng wawu yásuran hangga hánámá há yáni kuráng.

<sup>54-55</sup> Ánutu yá táwi ilom náni me rina yánuk wa isutang

yáup nángánanggená Israel nán hálang námuk,

me pahán káman mená rina miuk wa naráng hátingga

Abraham bot ráulaná nán urák náni naruk.”

Maria yá me wáina meng háliuk.

<sup>56</sup> Maria málám Elisabet yot yap kaláhu náut wáina átang sangga ku son itná hulá ya kuk.

*Jon Umi Kuháng Yámamá watá tunggafiuk*

<sup>57</sup> Kulá Elisabet tá nangge tátáyan rámá yá há áwán du nanggená ámnaná táng tiuk.  
<sup>58</sup> Elisabet tán it hulá me sipmá kátu watá Táwi yá pahán ukuro táwi hánám wáina naráng mek ingga pingnga naruráng hára ku kámuk áwáng háláng imáangga wata herongená táuráng.

<sup>59</sup> Yáni wu árát kungga rám 8 hárendu kepmá mamaráya áwuráng ngáyá ku áwáng nangge wata kutná wu Sekaraia naning kutná wanyon imánin ingga táuráng, <sup>60</sup> enendu mamingá gá ing yánuk, “Muná! Kutná ku Jon mantáinemán.”

<sup>61</sup> Wáina men nuknukngá watá inuráng, “Náula yot sándán hun me tombong háranan káman da kut ná kámá wáina muná.”

<sup>62</sup> Wáina hárendu son naning ga ket tárak táng muráng, nangge wata kutná wa ni ing meinek ingga. <sup>63</sup> Kulá naning málám árong náut kámá káman kolem uyiyyian da yánán táng imát uyiuk ku, “Kutná wu Jon,” ingga uyin kangga háramutang nangnga yáni háuk.

<sup>64</sup> Waháranon du son mená me tángga Ánutu kutná meng tárut táuk. <sup>65</sup> Wáina tán kangga ku itná hulá watá nangnga yáni han pahán yáni kinan pikpiták táuráng, hang waháranon pingnga watá ále yáilá isikikimo Judia kinan erek kung hálín naráangga wáina wáina ingga mengga naráangga kuráng. <sup>66</sup> Kulá ámna náráwa niyá pingnga wa naruráng watá ku háramutang nanará yáup táwi tángga ku yáni meme táuráng, “Nangge wawu máriya ámna rinaná hánám háleinek?” Táwi yan háláng watá watyot átuk, wata ku wáina miuráng.

*Sekaraia yan kap*

<sup>67</sup> Kulá Iruk Káungá watá nangge wata naning Sekaraia hára ep táwi tán du watá profet me ing miuk,

<sup>68</sup> “Táwi Israel yan Ánutu wata kutná meng tárut tánin,  
 náuta watá áwáng ámna náráwaná son há ihinek.

<sup>69</sup> Yáup nanggená Dewit tán tombong hára kungga ku  
 ámna háng hálángngá táwi káman háláng nánámáyan da námuk,

<sup>70</sup> wawu uláp profet káungá milun yáni hára me miuk wanyon isutang háláng námáangga kuinek.

<sup>71</sup> Káyam ket yáni hára me rendá pahán ma námáráng  
 wata ket yáni hára son há náhinek,

<sup>72</sup> wawu uláp tátáwi náni urák yáni naráangga  
 pahán káman mená káungá hánám tiuk wa naráng hátingga isutang átkoek.

<sup>73</sup> Me káto hánám málámba kutná háranon mengga táwi náni Abraham inuk,

<sup>74-75</sup> wawu káyam ket yáni háranan son nánáháya,  
 wáina tán du nándá rámá rámá málámba rahálá hára rongrongngá kándáng re átang  
 watán yáup tátáya, narángpak me pikpiták tángga átnát ta muná.

<sup>76</sup> “Iná nanggena kák ku máriya Ánutu Árená Hánám watán profet ing mantáng kamineráng,  
 náuta ko kálak kungga ku Táwi yan kálu sareng mángga kuinelák.

<sup>77</sup> Ko kátu náni sasa wahára kungga  
 son náhinek ingga nanará wa metá narinemán,

<sup>78</sup> náuta Ánutu yá pahán yot ukuro naráng námángngátak,  
 wáina wata ku alek káin káe yá áráng hengga yamá wa man káwak káin nándán da háinek.

<sup>79</sup> Yamá wa háinek wawu hang niyá páyung hára me kátkámut tán yongnga hára átaráng  
 wa átkuku yan kálu yálen wa isutang kuineráng.”

Sekaraia yá profet me wáina meng háliuk.

<sup>80</sup> Kulá máriya ku nangge watá tihangga iruk hára káto háleangga kuk ngáyá ále komkomá ámalum re káin wa átkiuk. Átang kungga rámá hárendu áwáangga Israel rahán yáni hára hiták háliuk.

## 2

*Jesu nangge yá tunggafiuk*

<sup>1-3</sup> Rám wahára it yáilá Rom watá ále káwak pin yáni tángga áturáng, me Kuirinius yá provins Siria yan kawana átuk. Wata kinan Sisa\* Ogastas yá meng rákit me káman tiuk wawu ing, ámna náráwa kut yáni erek hánám wa uying hálíneráng, wáina hárendu ámna náráwa yá it yáni hulá hánám káin kung árát tu kut yáni iháháya miuk. Wawu Rom bá hulátangga hánám ámna náráwa kut yáni uyiuráng.

<sup>4</sup> Kulá Josep wawu hunná wu Dewit háranan itná hulá Betlehem, wáina wata ku it Nasaret ále Galilí káin átuk wa sangga it Betlehem ále Judia ya kuk. <sup>5</sup> Josep málám kukuya ku árong

\* **2:1-3:** Kut Sisa wawu ámna nangge kutná muná, ináku me King wáinanyon du Rom me kálu.

Maria áwáná ya tátáya pingnganá há ináng sat átuk watyot kumálák. Iná Maria wawu kawilá pálak. <sup>6</sup> Kulá rám kung Betlehem káin átumálák wahára wu Maria ya nangge tátá rámá ya áwán, <sup>7</sup> nangge yáilá táng tiuk wawu nangge ámnaná. Málám nangge tángga táng lap kuliná ya támotang táng bulmakau ya sungi náená rápmám wata kinan ting san átuk, náuta lumbu it wawu há tuwaturáng.

*Angelo ya sipsip pin yáni tátáyan káin tunggafuráng*

<sup>8</sup> Kulá ore waháranon du sipsip pin yáni tátá wawu it Betlehem tangtang káin yáungán sipsip yáni pin yáni tángga átkiuráng. <sup>9</sup> Kimo átang káuráng gu Táwi yan angelo ya tunggafuik wahára wu Táwi yamá ya yáni yot iháng támotang árán kangga pikpito táwi hánám naránggarát tu <sup>10</sup> angelo ya yánuk, “Ma pitáindaráng. No me pingnga álosim tángga áwet. Ámna náráwa kámuk hánám bá pingnga ná naránga ku heronge táwi hánám táineráng. <sup>11</sup> Kula Dewit tán it káin náráwa káman dá nangge táng tek. Nangge watá wu máriya sán kámuk háláng sámínek, wawu Táwi, ámna náráwaná son iháhaya háek. <sup>12</sup> Iná tarák ku ing káineráng, nangge káman lap kuliná ya támotang táng bulmakau ya sungi náená rápmám wata kinan ting sat átnék.”

<sup>13</sup> Wáina meng hálin waháranon angelo alek káinnan tombong hásák ká yon hang sengsaráp tit kámuk Ánutu kutná ing meng tárut táuráng,

<sup>14</sup> “Ánutu Árená Hánám, kutná meng tárut tánin,

iná káwak káin ámna náráwa nini Ánutu ya pahán yámán átaráng watá pahán láláp átnéráng.”

<sup>15</sup> Kulá angelo watá yápmangga alek káin kut tu sipsip pin yáni tátá watá yáni meme tángga ing miuráng, “Betlehem káin kungga náuta tunggafek ngáya Táwi ya nánek wata kanin.”

<sup>16</sup> Ing mengga sopmuná ingmen hangga kungga sulíng kung káuráng gu Maria káling Josep pot nangge wawu bulmakau ya sungi náená rápmám wata kinan pándák ting san árán. <sup>17</sup> Yáni wu kung há kangga sangga ku nangge wata angelo ya rina yánuk wa meng isurát kuk, <sup>18</sup> iná ámna náráwa niyá sipsip pin yáni tátá ya me wa met naruráng watá ku háramutang nangnga yáni háuk. <sup>19</sup> Iná María ya ku me, me tarák rina rina nangge watán kálu tunggafuik wa erek iháng pahálá káin tingga ku naráng hátingga átkiuk. <sup>20</sup> Kulá sipsip pin yáni tátá yáni wu angelo ya me rina yánán naruráng wa isutang kung rahán yáni ya wáina hánám há kangga ku Ánutu ya heronge táng máng táng máng son kuráng.

*Jesu nangge tángga Táwi yan it káungá hánám káin kuráng*

<sup>21</sup> Jesu ya tunggafengga rám 8 árán du kepmá maránga ku kut Jesu wa imuráng. Kut wawu huphuráp ma tunggafená árán yon angelo ya Maria há inuk.

<sup>22</sup> Kulá Moses yan meng rákit me wa isutang rám rina átang Táwi rahálá hára rongrongngá háháleya tená watá sálikngin du Josep káling Maria ya Jesu nangge wa tángga Jerusalem káin Táwi imóamáya kumálák. <sup>23</sup> Wa kumálák wawu Táwi yan meng rákit me ing uyená wa isutang, “Nangge ámnaná hulátingga hánám náráwa káman dá táng tinek wawu táng Táwi yan pingnga tineráng.”<sup>†</sup> <sup>24</sup> Hang Táwi yan meng rákit me ing uyená, “iráp balu yará me kámut máto yará waháranan yará,”<sup>‡</sup> iháhaya mená wa isutang iráp yará yot ihánga Táwi ya taha ting mámáya kumálák.

<sup>25</sup> Iná Jerusalem káin ámna káman wakáin átnándak wawu kutná ku Simion. Ámna wawu kándáng hánám átang rámá rámá Táwi yot ronrosin hánám árán Iruk Káungá watá watyot átnándak. Simion wawu Ánutu ya Israel pahán láláp yáyámáya miuk wata hálangga átnándak. <sup>26</sup> Iruk Káungá watá há inuk, “Kák ku ma kámurená átang Táwi ya ámna náráwaná son iháhaya ámna san áwáwáya miuk wa há káinelák.”

<sup>27</sup> Kulá Iruk Káungá watá engorán málám kungga Táwi yan it káungá hánám kumbiná wata kinan kung háuk. Rám Jesu naning maming gá meng rákit me ya rina mek wa tátáya tángga áwán, <sup>28</sup> Simion málám árong nangge wa táng poláng mángga átang Ánutu kutná ing meng tárut táuk,

<sup>29</sup> “Táwi, nák ku yáup nanggeka.

Uláp miulák wáina nepmatá no kung pahán láláp hára átang kámutnet.

<sup>30</sup> Ko kálu rina tángga son nánáhaya táulák wawu na rahánna ya há káet.

<sup>31</sup> Ko ámna náráwa rahán yáni táwi hára wa tiyawing námulák

<sup>32</sup> wawu kup, kup watá yamá mangga Ánutu yan átkuku wa ámna náráwa káwak kámá káinnan wa yáleinek,

me kákkán ámna náráwa hánám Israel wata kut yáni meng tárut táinek.”

<sup>33</sup> Wáina men naránga nangge wata naning maming gá háramutang nangnga yándi háuk, <sup>34</sup> enendu Simion dá kuram táng yámánga sangga nangge wata maming Maria inuk, “Ánutu

<sup>†</sup> 2:23: Son Iháhá 13.2,12    <sup>‡</sup> 2:24: Pris Yáup 12.8

yá nangge ná táng tunggap táuk watá tán Israel nan táup hánám naráng hákhátik yáni muná átaráng watá háineráng, hang táup hánám naráng hákhátik yáni pálak watá árangga kung áteráng. Iná nangge wahára ku Ánutu yan tárak watá wahára áran kangga árna náráwa táup hánám watá meng mineráng. <sup>35</sup> Wáina wata ku árna táup hánám watán pahán káin kilak árená wa táng hiták tit, kawu kápi ká pahála káin keháng topmet ina narinelák,” ingga inuk.

<sup>36-37</sup> Kulá profet náráwa káman átkiuk kutná wu Ana wawu Fanuel uriwa Aser yan tombong háranan. Iná málám bu náulá yot ket tántán tángga yara 7 rewe átang náulá yá kámurán du náráwa kawát átang kungga tátáwi hánám háliuk wawu yaraná 84. Málám bu Táwi yan it káungá hánám ma sangngáatak, káen yáungán Táwi ináng sákngingga átnándak. Iná rám kámá ku sungi sangga sáponga tángtáng tángngáatak. <sup>38</sup> Rám waháranon hánám hiták áwáng hengga Ánutu ya heronge táng mángga ku árna náráwa Jerusalem hára Ánutu yá hálláng námik ingga hálengga áturáng wa nangge wata yánángga kuk.

<sup>39</sup> Kulá Josep káling Maria yá Táwi yan meng rákit me yá rina tátáya mená wa erek táng hállangga ku son hurik tángga ále Galili káin it yáni Nasaret ta kuráng. <sup>40</sup> Iná nangge watá ku hángghálángngá tingtihang nanaráná yá álosim hánám hálengga áran, Ánutu yá kuram táng mángga kungga átuk.

*Nangge máto Jesu watá Táwi yan it káungá hánám káin kuk*

<sup>41</sup> Yaraná yaraná wu Jesu naning maming gu Jerusalem káin rám táwi Angelo yá Iháng Hátiuk<sup>S</sup> wa kakaya kungngátamálák. <sup>42</sup> Hang Jesu wawu yaraná 12 hálengga átuk wahára wu kálu rina isutnándaráng wanyon isutang Jerusalem káin rám yáni táwi wa kakaya kuráng. <sup>43</sup> Rám táwi watá sálíngiuk wahára wu nangge máto Jesu wawu Jerusalem káin há áran naning maming gu wáina ingga ma narená sangga kumálák. <sup>44</sup> Yándi wu nuknuk yáni watyot há koeráng ingga narángga ku káe káman wa há kuráng ngáyá ku sip yáni kátu me nuknuk yáni watyot áweráng ingga wata orek yáni káin wa táng sulingga kumálák. <sup>45</sup> Yándi wu táng sulin men du son kungga Jerusalem káin sulindin ingga wakáin kumálák. <sup>46</sup> Kulá yándi wu sulingga átkun rám kaláhu hálen du kungga káumálák ku nangge yándi Jesu wu Táwi yan it káungá hánám kumbiná kinan káin wa tiksa orek yáni káin putung átang me met narángga son yánáng sulingga áran, <sup>47</sup> árna wahára áturáng watá watán me wa narángga háramuturáng, náuta nanaráná me, me táng hurik táng yámángga átuk wa kangga. <sup>48</sup> Kulá naning maming gá káumálák hára wu nangnga yándi han maming gá inuk, “Nanggena, náuta ket wáina nálelák? Nanya yot nátá kák ka narángpak tángga suling kamángga átninggoemát.”

<sup>49</sup> Ing inán Jesu yá ing yánuk, “Sándu náuta wu nák ka suling namángga átninggoemálák? Álo kámá ku no Nanna yan it káin átnet wa naremálák me muná?” <sup>50</sup> Wáina yánuk enendu naning maming gá wáina ta nánek ingga wu ma naráng rákit táumálák.

<sup>51</sup> Kulá wahára átang gu naning maming got Nasaret káin kuráng ngáyá ku milun susuwá re táng yámángga átninggiuk, iná maming gu me, me tárak rina rina tunggafiuk wa iháng pahálá káin tingga ku naráng hátingga átkiuk. <sup>52</sup> Iná Jesu málám bu táwi hánggháleng nanaráná yá álo kámá hánám háliuk. Ánutu yá wa kan álo kámá hánám háliuk, wáinanon árna náráwa yá kat álo kámá yon háliuk.

### 3

*Jon Umi Kuháng Yámamá yá Jesu yan kálu sariuk  
(Mat 3.1-12; Mak 1.1-8; Jon 1.19-28)*

<sup>1</sup> Sisa Taiberius yá Rom bán king hálengga yara 15 átuk wahára wu Pontius Pailat tá provins Judia yan kawana áran, Herot tá distrik Galili pinná tán kulaná Filip pá distrik Ituria yot Trakonis pin yándi tán du Lisania yá distrik Abilene pinná táuk. <sup>2</sup> Kulá Anas káling Kaifas yá ku pris yáin yáni ya átumálák, wahára ku Sekaraia nanggená Jon wawu ále komkomá amálum re káin wa áran Ánutu yá áwáng málámbán me wa wakáin Jon inuk. <sup>3</sup> Inán hangga kuk watá kungga Jodan umi tangtang káin áturáng wa yánuk, “Sándá pahán hurik tángga áwáng umi kuhát tu Ánutu yá mukmuro sáni wa yawonek.” <sup>4</sup> Kálu wa tunggafiuk wawu profet Aisaia yá Ánutu yan me ing uyiuk wa isutang:

“Man dá ále komkomá páliná muná káin ing mantáinek,

“Táwi yan kálu tiyawineráng,

kálu kándáng hánám táng toling mineráng.

<sup>5</sup> Ále pahálá átaráng wa erek ingmen molát tuwarát,

<sup>S</sup> 2:41: Rám wawu Ánutu yá Isip káin Israel árna náráwa son iháhaya angelo yá áwáng Israel nángánangge yáni iháng hátingga Isip nángánangge yáni ráháng kátkámut táuk wata naráng hátingngátaráng.

ále yáilá me ále kangkandángngá átaráng wa erek ingmen ping yanyawon táineráng. Kálu tulátulá arená wa tát kándáng re hálet, kálu wáik wa táng toktolik tát kándáng re hálineráng.

<sup>6</sup> Wáina háendu ámna náráwa kámuk hánám watá Ánutu yá son ihinek wa hiták káineráng, ”\* ingga wáina uyiuk.

<sup>7</sup> Kulá Jon dá ámna náráwa káwan táwi umi kuháng námik ingga áwuráng wa yánuK, “Sán kunap wáik nángánange, Ánutu yá pahán káráp táng sámánga sáháng lem táinek. Niyá sánán pitánga kungga rám wáik sándán káin tunggafein ingga táek wa táng háhátiya táeráng? <sup>8</sup> Sándá pálipuk pahán hurik hánám táeráng háendu tirik tárák sáni watá meinek. Hang sáni ya mengga, ‘Nándu Abraham e ilommá,’ ingga ma meindaráng. No ing sánin, Ánutu yá sup ná átaráng háranan men álo Abraham e ilommá háleineráng. <sup>9</sup> Káráwasi wu káráp hulá káin há átak. Káráp retá páliná kándáng ma sáindák wawu maránga táng káráp lánggop kinan san kuinek.”

<sup>10</sup> Wáina yánán ámna náráwa watá inuráng, “Iná nándu rina táinemán?”

<sup>11</sup> Wáina inát tu Jon dá yánuK, “Ámna káman dá siot ná yará pálak árán du káman táng ni siot ná muná wa iminek, hang niyá sunginá pálak háendu wáinanyon táinek,” ingga yánuK.

<sup>12</sup> Hang takis iháhá ámna kámá hányon umi kuháng námik ingga áwuráng watá inuráng, “Tiksa, nándu rina táinemán?”

<sup>13</sup> Ing inát Jon dá yánuK, “Takis sup ihinán du kapman dá rina iháháya mená wáina re ihineráng,” ingga yánuK.

<sup>14</sup> Kulá tewe ámna yá hányon inuráng, “Iná nándu rina táinemán?”

Wáina inát watá yánuK, “Ámna nukngá iháng piták tángga sup yáni manek ma iháng yámindaráng, me kámá ya me kusák hára ma meng yámindaráng. Sup rina sáháng yunggoeráng wawu sáni wu tárák hára álo ingga narineráng,” ingga yánuK.

<sup>15</sup> Ámna náráwa yá ále wa tán kangga pahán yáni tárurán nanará yáup táuráng, “Jon wawu ámna Ánutu yan ámna náráwa son iháhá wa hám,” ingga miuráng. <sup>16</sup> Iná Jon dá ku yánuK, “No ku umi yá kuháng sámét, iná káman máriya áwinek wata hálángngá wu nák neháng hátek, hang ámna wáik nák ina tá watán sendol páupmá yayaliyan tárák muná. Watá wu Iruk Káungá yot káráp lánggop pot kuháng sáminek. <sup>17</sup> Málám sarak tángga áwinek ngáyá áwáng wit horengga páliná álosim wa iháng itná kinan tingga kepmá wawu iháng káráp sásáliná muná hára wa sin rang hálineráng.” <sup>18</sup> Jon málám wáina yánánga me kámá yot me pingnga álosim watyot yánánga pahán yáni táng tárut táuk.

<sup>19</sup> Rám káman Jon málám kapman dán ámna yáilá káman Herot wa me táng muk, náuta kulaná ya áwáná Herodias táuk, me kálu kandák nukngá kámá hányon átmeráng wata ingga.

<sup>20</sup> Wata me táng mán du Herot tá kandákngá nukngá waháranon sengsaráp tiuk wawu Jon táng kalabus it kinan tingga kálu káto táng muk.

*Jon dá Jesu umi kuháng muk*

*(Mat 1.1-17; 3.13-17; Mak 1.9-11)*

<sup>21</sup> Kulá Jon dá ámna náráwa kámuk hánám umi kuháng yámuk waháranon du Jesu ya umi hányon kuháng muk. Wáina kuháng mán du Jesu málám sáponga tángga átnarán waháranon alek ká ang tán, <sup>22</sup> Iruk Káungá watá hang málám hára ep tángga árán kauráng wawu iráp tánarám ina. Kulá waháranon me káman alek kálu wáina háuk, “Kák ku nák Nanggena. No kák ka kikiná hánám naret. No kák ka pahánna álosim hánám naret.”

<sup>23</sup> Rám wahára wu Jesu málám bu yaraná 30 hám wáina hálengga árán miti yáup hulátiuk. Kulá ámna náráwa yá ku Josep nanggená ingga kauráng, iná Josep wawu Heli nanggená, <sup>24</sup> iná Heli wawu Matat nanggená, iná Matat wawu Liwai nanggená, iná Liwai wawu Melki nanggená, iná Melki wawu Janai nanggená, iná Janai wawu Josep nanggená, <sup>25</sup> iná Josep wawu Matatias nanggená, iná Matatias wawu Amos nanggená, iná Amos wawu Nahum nanggená, iná Nahum wawu Esli nanggená, iná Esli wawu Nagai nanggená, <sup>26</sup> iná Nagai wawu Mat nanggená, iná Mat wawu Matatias nanggená, iná Matatias wawu Semen nanggená, iná Semen wawu Josek nanggená, iná Josek wawu Joda nanggená, <sup>27</sup> iná Joda wawu Joanan nanggená, iná Joanan wawu Resa nanggená, iná Resa wawu Serubabel nanggená, iná Serubabel wawu Sealtiel nanggená, iná Sealtiel wawu Neri nanggená, <sup>28</sup> iná Neri wawu Melki nanggená, iná Melki wawu Adi nanggená, iná Adi wawu Kosam nanggená, iná Kosam wawu Elmadam nanggená, iná Elmadam wawu Er nanggená, <sup>29</sup> iná Er wawu Josua nanggená, iná Josua wawu Eliesa nanggená,

\* 3:6: Aisaia 40.3-5



iná Eliesa wawu Jorim nanggená, iná Jorim wawu Matat nanggená,  
 iná Matat wawu Liwai nanggená,<sup>30</sup> iná Liwai wawu Simion nanggená,  
 iná Simion wawu Juda nanggená, iná Juda wawu Josep nanggená,  
 iná Josep wawu Jonam nanggená, iná Jonam wawu Eliakim nanggená,  
<sup>31</sup> iná Eliakim wawu Melea nanggená, iná Melea wawu Mena nanggená,  
 iná Mena wawu Matata nanggená, iná Matata wawu Natan nanggená,  
 iná Natan wawu Dewit nanggená,<sup>32</sup> iná Dewit wawu Jesi nanggená,  
 iná Jesi wawu Obed nanggená, iná Obed wawu Boas nanggená,  
 iná Boas wawu Salmon nanggená, iná Salmon wawu Nason nanggená,  
<sup>33</sup> iná Nason wawu Aminadap nanggená, iná Aminadap wawu Atmin nanggená,  
 iná Atmin wawu Arni nanggená, iná Arni wawu Hesron nanggená,  
 iná Hesron wawu Peres nanggená, iná Peres wawu Juda nanggená,  
<sup>34</sup> iná Juda wawu Jekop nanggená, iná Jekop wawu Aisak nanggená,  
 iná Aisak wawu Abraham nanggená, iná Abraham wawu Tera nanggená,  
 iná Tera wawu Nahor nanggená,<sup>35</sup> iná Nahor wawu Seruk nanggená,  
 iná Seruk wawu Reu nanggená, iná Reu wawu Pelak nanggená,  
 iná Pelak wawu Eber nanggená, iná Eber wawu Sela nanggená,  
<sup>36</sup> iná Sela wawu Kainan nanggená, iná Kainan wawu Arpaksat nanggená,  
 iná Arpaksat wawu Siem nanggená, iná Siem wawu Noa nanggená,  
 iná Noa wawu Lamek nanggená,<sup>37</sup> iná Lamek wawu Metusela nanggená,  
 iná Metusela wawu Enok nanggená, iná Enok wawu Jaret nanggená,  
 iná Jaret wawu Mahalalel nanggená, iná Mahalalel wawu Kenan nanggená,  
<sup>38</sup> iná Kenan wawu Enos nanggená, iná Enos wawu Set nanggená,  
 iná Set wawu Adam nanggená, iná Adam wawu Ánutu nanggená.

## 4

*Jesu yá ingirungngingi hára kuk  
 (Mat 4.1-11; Mak 1.12-13)*

<sup>1</sup> Iruk Káungá yá Jesu hára hángnálángngá hánám ep tán málám Jodan umi wa sangga son hurik tángga kuk. Kulá Iruk Káungá yá engotang ále komkomá amálum re káin kuk. <sup>2</sup> Jesu yá wakáin kung árán rám 40 wata kinan Satan dá áwáng ingirungngingga átuk. Rám ore wahára Jesu wawu sungi ma náená átkuk hálendu rám 40 wata sásáliná káin du táup hánám háing mángga átuk.

<sup>3</sup> Kulá Satan dá wáina kangga ku áwáng inuk, “Pálipuk kák ku Ánutu Nanggená hálendu sup wa metá másáng háleik,” ingga inuk.

<sup>4</sup> Enendu Jesu yá me táng hurik tángga ing inuk, “Me ing uyená átak, ‘Ámna náráwa wu sungi yá re hálang yámán ma átkuindáráng.’<sup>\*</sup>”

<sup>5</sup> Wáina inán wahára átang gu Satan dá son Jesu engotang árángga kungga wakáin átang káwakngá káwakngá kámuk wa sokmuná hánám eliu. <sup>6</sup> Wáina átang elen kan du inuk, “No hálang wa kame ko wa pin yáni tángga átang kutya árená hánám wáina átnelák. Ále kutná kutná wawu nákkán há háliuk, wata ku no ni imin ingga wawu iminet. <sup>7</sup> Wáina wata ku ko nák nanáng sáknitá ku no ále kutná kutná wa kaya kamínet.”

<sup>8</sup> Wáina inán Jesu yá inuk, “Ánutu yan me ing uyená átak, “Táwika Ánutu káman re ináng sáknngingga wata tárang káin átnelák.”<sup>†</sup>”

<sup>9</sup> Ingga wáina inán Satan dá Jesu engotang Jerusalem káin kuk ngáyá kung Táwi yan it káungá há sák hánám wata hungnganá káin san árán du inuk, “Pálipuk kák Ánutu Nanggená hálendu, nahára átang hitangga hang,<sup>‡</sup> <sup>10</sup> náuta Ánutu yan me ing uyená, ‘Málámbá angeloná yánán kándáng hánám pinya táineráng.

<sup>11</sup> Watá ket torong kehát tu

háramya káin sup pá ma kutnándák.”<sup>‡</sup>”

<sup>12</sup> Wáina inán Jesu yá inuk, “Ánutu yan me yá ing mek, ‘Ko Táwi Ánutu ka wa táng ingirungngingi hára ma tindalák.’<sup>§</sup>” ingga inuk.

<sup>13</sup> Kulá Satan dá me wa mengga Jesu ingirungngin men du sangga rám nukngá ya hálang muk.

*Nasaret tá Jesu isurát kuk  
 (Mat 4.12-17; 13.53-58; Mak 1.14-15; 6.1-6)*

\* 4:4: Meng Rákít 8.3 † 4:8: Meng Rákít 6.13 ‡ 4:11: Kap 9.11-12 § 4:12: Meng Rákít 6.16

<sup>14</sup> Jesu málám Iruk Káungá yan háláng hára Galili ále káin son kun, wáina áwek ingga kut pingganá watá ále ore wakáin erek ingmen kung háliuk. <sup>15</sup> Málám miti itná wahára wahára me yánáng tolingga kun kangga áмна náráwa táup táí watá Jesu málámba kutná meng tárut tálaga kuráng.

<sup>16</sup> Wáina tálaga arát tu Jesu málám bu it Nasaret káin kuk, iná Jesu wu huphuráp it wahára átang táwi háliuk. Sabat hára wu ráma ráma tángngátak wáina málám miti itná káin kung háuk ngáyá ku Ánutu yan me wa sángin ingga tárutuk. <sup>17</sup> Kulá yáni wu profet Aisaia yan papia táng imát málám wa kot kung me rina naruk wa uyená wa káuk:

<sup>18</sup> “Táwi yan Iruk ká nákkot átak,

náuta Táwi málámbá neháng tunggap tálaga

me pingnga álosim wa áмна náráwa ukuro átaráng wa yánánaya suring namuk.

Hang áмна náráwa kalabus it kinan átaráng wa men along kukuya

me rahán yáni wáik wa men rahán yáni yá álo háháleya,

hang áмна nukngá yá iháng hang tingga iháng lem tánggoeráng wa háláng yámamáya,

<sup>19</sup> hang ‘Táwi yá áмна náráwaná iháng álolo tátáyan ráм hálek,’ ingga meng tunggap tátáya suring namuk.”\*\*

<sup>20</sup> Wáina sángin hálingga Jesu málám papia wa táng pop tálaga áмна papia pinná tátá wa imánga ku putung háuk. Iná áмна náráwa miti itná kinan áturáng watá rahán yáni wu Jesu hára re arát tu <sup>21</sup> ing yáuk, “Ánutu yan me sánga nareráng watá páliná kulapálik nahára páliná yá há tunggafek,” ingga yáuk.

<sup>22</sup> Kulá wahára áturáng watá kámu kutná meng tárut tálaga me álolo sim táwi milunná káinnan háukngá naruráng wata háramutang yáni meme táurang, “Náwu Josep nanggená ingga há naremán watá ku rina tálaga ku me táwi wáina wa mek?”

<sup>23</sup> Wáina met Jesu yá yáuk, “Sándá ku nák ing háм naninderáng, ‘Dokta, ko kaya sutya kálak táng toling! It Kapaneam káin rina tátá pingngaka narumán, wáinanyon itya hulá hára ná táng.’”

<sup>24</sup> Hang ing yáuk, “Pálipuk hánám ing sánin, profet káman itná hulá hánám watá ku pahán ma imángngataráng. <sup>25</sup> No ing pálipuk sánin, Elaija yan ráм hára wu Israel kinan náráwa kawát tu táup hánám wa áturáng. Rám wahára wu ále yá ma táená árán yara kaláhu yap 6 hálen káwak ketnán sungi yá kesák táwi háliuk. <sup>26</sup> Enendu wahára wu Ánutu yá Elaija suring máin Israel náráwa kawát káman dán káin ma kuk, ináku suring máin kawát káman it Sarepat, Saidon ále káin wa kuk. <sup>27</sup> Hang profet Elaisa yan ráм hára wu Israel kinan ilalák lepra pálak ku táup hánám wa áturáng, enendu káman waháranan da sutná yá ma rongrongiuk, ináku káwak Siria nan áмна kutná Naman wata sutná yá re ku rongrongiuk.”

<sup>28</sup> Wáina yánán naránga áмна náráwa miti itná kinan áturáng watá kámu hánám kuk táwi táurang. <sup>29</sup> Yáni wu tárutang seng isutang táng uyingga it kep káin kuráng. It yáni wawu ále yáilá isikimo káman hára hálendu engot kung porá hára satne háik ingga táurang. <sup>30</sup> Enendu málám orek yáni hára wa yolopon kungga háná kuk.

*Jesu yá iruk wáik isutuk*

*(Mak 1.21-28)*

<sup>31</sup> Jesu málám kuk ngáyá kungga ále Galili kinan it Kapaneam wakáin háuk ngáyá Sabat hára wu áмна náráwa Táwi yan me yánáng tolingga árán <sup>32</sup> áмна náráwa yá kauráng gu áмна kutná pálak me hálángngá pálak ká ina yánánga árán naránga wata háramuturáng.

<sup>33</sup> Kulá miti itná kinan áмна káman iruk wáik ká ep táená watá átang hahatingga hánám ing mantáuk, <sup>34</sup> “Hae! Jesu Nasaret nan, rina táng námamáya áwelák? Kák ka nán háм náháng lem tátáya áwelák? Kák ku wa ingga nák ku há naret, kák ku rongrongngá hánám Ánutu yan káinnan áwelák!”

<sup>35</sup> Wáina inán Jesu yá ing me táng muk, “Yolop átang áмна wa sangga hang!” Wáina inán iruk wáik watá áмна wa orek yáni hára táng san han áráng hengga kuk, enendu áмна wa káma ma táng lem táuk.

<sup>36</sup> Wáina tán kangga áмна náráwa wahára áturáng watá háramutang yáni inán kanán táurang, “Nanggula, me náwu rinaná!? Iruk wáik yánángoek wawu áмна kutná pálak me hálángngá pálak ká ina yánán áráng hengga kunggoeráng!” ingga miurang. <sup>37</sup> Kulá wáina tálaga árán kut pingnganá watá ále wata kinan it kámu kung hilák táuk.

*Jesu yá áмна náráwa táup pon iháng toliuk*

*(Mat 8.14-17; Mak 1.29-39)*

<sup>38</sup> Jesu málám miti itná wa sangga Saimon dán it káin kuk. Rám wahára wu Saimon silumná wu ilalák tálaga sutná watá ángárángngá hánám wáina árán du háláng imáng ingga Jesu inurang. <sup>39</sup> Wáina inát Jesu yá kung náráwa wata rupmá tangtang átang ilalák wa me

\*\* 4:19: Aisaia 61.1-2

táng mán ilalák watá wahára re san náráwa wawu waháranyon tárutnárang sungi tiyawing yámuk.

<sup>40</sup> Kulá yonyon tin káe yá kung hangga átuk kálu wu ámna náráwa yá nuknuk yáni ilalák hulá hulá yá ihená wa ihangga Jesu yan káin áwát Jesu yá ketná yá ihanggápán álo hánghálang táuráng. <sup>41</sup> Jesu yá men iruk wáik máro hánám watá ámna náráwa yápmangga árang hengga hahatingga ing mantánggiuráng, “Kák ku Ánutu Nanggená!” Wáina met kangga ku málám me táng yámangga olet yáni káto tán watá me kámá ma me tánggiuráng, náuta há naruráng wawu Ánutu yá ámna náráwaná son iháhaya suring mán áwuk.

<sup>42</sup> Hilápmá hánám Jesu wu hangga ále rákit káman káin kung árán ámna náráwa yá suling kung ále re káin átuk wakáin kangga táng putitne ma nápmangga kuindak ingga táuráng.

<sup>43</sup> Enendu Jesu yá yánuK, “Nák ku kungga Ánutu yan átkuku watán me pingnga álosim wa it kámá káin hányon yáinet, náuta náK ku yáup wa tátáya Ánutu yá suring namán áwut.”

<sup>44</sup> Wáina yánangga ku Judia ále káin miti itná yáni kinan Ánutu yan me wa yánangga átkuk.

## 5

*Jesu yá disaepelná hulátingga mantáng yámuk.*

*(Mat 4.18-22; Mak 1.16-20)*

<sup>1</sup> Rám káman Jesu wu umi pátum Genesaret\* tákto káin hetang átang Ánutu yan me wa yánangga árán ámna náráwa urum táwi watá áwáng me wa naránin ingga málám kang áwálák tángga kik hánám wa áturáng. <sup>2</sup> Wáina árát Jesu málám hálangga kápuk ku bot yará wu umi tangtang sán káin wa árán, iná ámna káut iháhá wawu bot yápmang hang kep káin átang umben yáni wa yawondang árát. <sup>3</sup> Wáina kápangga málám bot káman dá ketnán árangga kuk, iná bot wawu Saimon dán. Árang wata ketnán átang gu Saimon inuk, “Upme sim tátá sán sangga sim kuik,” ing inán wáina tán kun du wata ketnán putung átang Ánutu yan me wa ámna náráwa yánangg toliuk.

<sup>4</sup> Me wa yánang hálingga ku Saimon inuk, “Kulá pul tángga hásak káin kungga ku umben wa hirarát umi kinan hat tu káut ihineráng.”

<sup>5</sup> Wáina inán Saimon dá inuk, “Táwina, yáungán yáup hálang hánám táemán, wawu káut kámá ma ihámán, enendu álo ko há melák wata ku álo umben hirarátne háineráng.”

<sup>6</sup> Wáina tángga káuráng gu káut watá umben kinan rina kámá hánám hang árát umben dá tiktkák rákitang áturáng. <sup>7</sup> Wáina kangga ku nuknuk yáni bot nukngá káin áturáng wa ket tárak táng yámát áwáng hálang yámát tu káut wa iháng bot yará hára wa molát tuwatang márawingga bot tá hála umi pátum kinan hang sungga átumálák.

<sup>8</sup> Kulá Saimon Pita yá tárak wa káuk hára wu Jesu hárammá hulá káin tulá hára imángga inuk, “Táwi, nepmangga háka kung, náuta náK ku ámna mukmuro!” <sup>9</sup> Wáina inuk náuta málám bu yanuknukngá yot káut ihuráng wa kangga nangnga yáni han pikpito naruráng wata. <sup>10</sup> Iná Saimon nukngá Sebedi nanggená yará Jeims káling Jon wawu Saimon dá naruk wáinanyon narumálák.

Kulá wahára wu Jesu yá Saimon inuk, “Ma pitáindalák. Rám kula hulátingga áruinek wahára wu ámna nangge iháhayan háleinelák.” <sup>11</sup> Wáina inángga sangga yáni wu bot yáni wa pul tát sán káin áwán kutná kutná wa wahára erek yápmang hálingga ku Jesu isutang kuráng.

*Ámna káman ilalák lepra pálak*

*(Mat 8.1-4; Mak 1.40-45)*

<sup>12</sup> Rám káman Jesu wu it káman hára átnarán ámna káman watán káin áwuk wawu sutná wu ilalák lepra watá táng wáik hánám táená watá áwáng Jesu kangga tulá hára imángga kurákmáta táng káwak káin tungga inuk, “Táwi, ko narátá álo hálendu neháng tolitá no Ánutu rahalá hára rongrongngá hálin.”

<sup>13</sup> Wáina inán Jesu yá ketná kálan kung tángganga inuk, “Álo, no hálang kame rongrong-ing!” Wáina inán wahára re hánám ilalák lepra watá álo hálang mán sutná yá rongrongiuk.

<sup>14</sup> Kulá wahára wu Jesu yá me káto inángga oletná mangga ing inuk, “Kungga ni kámá káman ma inindalák, ináku kung sutya wa pris elengga ku ilalák ká álo hálen Ánutu ya towet sing māmáya Moses yá rina tátáya miuk wáina tátá ku kámá yá kahángga ku ilalákná yá álo hálek ingga kahineráng.”

<sup>15</sup> Wáina inuk, enendu Jesu yá rina táuk wata pingnganá yá erek ingmen kung hilák tán ámna náráwa káwan táwi hánám watá me men naránin ingga áwánggiuráng, iná waháranan kámá yá ku ilalák náni tán álo hálenin ingga wata áwánggiuráng. <sup>16</sup> Rám ore kámá hára wu Jesu málám yolopon ingmen hangga ále nángnángngá káin sáponga tátáya kunggiuk.

\* 5:1 Umi pátum Genesaret wawu umi pátum Galili wanyon.

*Jesu yá ámna ket hárammá wáik táng toliuk  
(Mat 9.1-8; Mak 2.1-12)*

<sup>17</sup> Rám káman Jesu wu Táwi yan me wa ámna náráwa yánáng tolingga átnárán, ále Galili káin it waháranan waháranan me Judia nan me Jerusalem nan Farisi me lo yan tiksa yá áwuráng ngáyá wahára putung áturáng. Rám wahára wu Táwi yan káinnan ilalák mara iháng totoliyan hálang watá hang Jesu yot átuk. <sup>18</sup> Kulá ámna urum káman dá nuk yáni káman tángga áwuráng wawu ket hárammá kámut háléná wa táng kangkang ketnán tit árán tángga áwáng it kinan hang Jesu kondolá hára tinin ingga áwuráng. <sup>19</sup> Enendu pahán tingga áwuráng wa isutang tátáyan du káluná muná, náuta ámna náráwa yá kik hánám árát kápángga ku son tánggatang it ketnán árángga it hungnganá yalingga páup pá kangkang hára putingga sat wakálu it kinan hangga Jesu kondolá hánám hára háuk.

<sup>20</sup> Wáina tát tu Jesu yá naráng hákhátik yáni wa kangga ku miuk, “Nukna, no mukmuroka wa yawondat.”

<sup>21</sup> Kulá Farisi yot lo yan tiksa watá kangga ku ing narángga átkiuráng, “Ámna náwu niyá ku Ánutu yá menggim ina wu watá menggoek? Ámna káman dá mukmuro yanyawon dán tárák kámá muná, Ánutu yá rewe ku wáina tátáyan.”

<sup>22</sup> Jesu wu wáina narángga átaráng ingga há narángga ku yánuk, “Náuta ku nanará sáni káin wáina naráng háteráng? <sup>23</sup> Me rina ku tiyap hánám meinet? ‘Mukmuroka ku yawondat,’ me ‘Tárutang kung?’ <sup>24</sup> Enendu ing narineráng, Ámna Nanggená watá káwak náta ketnán mukmuro yanyawon watán háláng tángga átak.” Wáina yánángga son ilalák mara wa inuk, “No kanin, tárutang kangkangga tángga itya ya kung.” <sup>25</sup> Wáina inán waháranon orek yáni hára málám tárutang kangkangngá tángga átang Ánutu kutná meng tárut tángtáng hangga itná ya kuk. <sup>26</sup> Kulá ámna náráwa kámuk watá wa kangga háramutang Ánutu kutná meng tárut táuráng. Yáni wu “Kula wu hulá kámá káman wáina káemán,” ingga mengga nangnga yáni háuk.

*Jesu yá Liwai ya mantáng muk  
(Mat 9.9-13; Mak 2.13-17)*

<sup>27</sup> Wata máríná káin du Jesu yá kungga káuk ku takis iháhá ámna káman kutná ku Liwai wawu takis iháhá itná hára putung átnárán kangga ku inuk, “Áwángga nák nasulák.” <sup>28</sup> Wáina inán Liwai málám tárutang kutná kutná wa erek yápmang hálingga Jesu isutang kuk.

<sup>29</sup> Kulá Liwai málám Jesu ya sinak táwi táng māmáya itná káin sungi tiyawing san árán, takis iháhá nuknukngá táup hánám bot ámna kámá yot men áwat sungi wa náuráng. <sup>30</sup> Kulá tombong Farisi kinan nan lo yan tiksa kámá yot Farisi kámá watá áwáng Jesu yan disaepel ing me táng yámuráng, “Náuta ku sándá takis iháhá ámna yot me mukmuro táená yot umi sungi nana tánggoeráng?”

<sup>31</sup> Wáina met tu Jesu yá yánuk, “Ámna káman ilalákná muná yá dokta yan káin ma kungngátak, ináku ilalákná pálak watá ku dokta yan káin kungngátak. <sup>32</sup> No áwut wawu ámna náráwa kándáng árená wa mantáng yámámáya ma áwut, ináku mukmuro pálak wa mantáng yáme pahán yáni hurik tángga áwáwáya áwut.”

*Jesu yá sungi sangga sáponga tátá wata yánuk  
(Mat 9.14-17; Mak 2.18-22)*

<sup>33</sup> Ámna yá Jesu inuráng, “Jon dán disaepel yá sungi sangga sáponga tángngátaráng, me Farisi yan disaepel wu wáinanon tángngátaráng, iná kákkán disaepel wu raták hánám átningga umi sungi wa tángga nangga átninggoeráng.”

<sup>34</sup> Wáina inát Jesu yá yánuk, “Ámna káman dá náráwa tátáya átang nuknukngá men áwánggalát watá watyot árát, sándá yánát rám ámna watá yáni yot há átgim wahára álo sungi sanggalát me? Wáina kámá ma árak. <sup>35</sup> Iná rám káman áwinek wahára wu ámna náráwa tátáya táinek wa áwáng há tángga kuineráng, wahára ku wáina nuknukngá yá sungi sanggalát.”

<sup>36</sup> Hang me tárákná káman ing yánuk, “Lap kakngá káman dá ráráhangga hinangngá yá árán ámna káman dá lap mirak káman ráráhangga kátu táng kakngá wata hinangngá ma rákarenggim. Wáina tánggim wawu lap mirak wa táng lem tánggim, me kátu mirak wawu kakngá inanyon muná. <sup>37</sup> Hang káman dá wáin mirak wa táng meme kepmá kakngá hára ma kulinggim. Wáina tánggim wawu wáin mirak wata mulá yá meme kepmá wa ráráhan wáin dá sunggulingga hanggim. <sup>38</sup> Kulá wáina wata ku wáin mirak wa táng gu meme kepmá mirak háranon kukuliyán. <sup>39</sup> Iná káman dá wáin kakngá wa há nanggim wawu torong hára mirak nanaya ku ma naránggim, ináku ing menggim, ‘Kakngá wawu kikngá álosim hánám.’”

## 6

*Jesu yá Sabat hára yáup ma táená wata miuk  
(Mat 12.1-14; Mak 2.23—3.6)*

<sup>1</sup> Rám káman Sabat hára Jesu yá disaepelná yot yáni wa ku wit hái orek yáni kálu kungga átang disaepel yá wit páliná wa iháng ket yáni yá husit kepmá watá sohit tu páliná wa há yáni náuráng. <sup>2</sup> Wáina tát kápánga Farisi kámá yá miuráng, “Náuta ku sándá Sabat hára kálu wáina ma tátáya mená wa táeráng?”

<sup>3</sup> Wáina met naránga Jesu yá yánuk, “Sán kámá Dewit yot tombongngá yá háing yámán táuráng wata pingnga yáni wa sáingnga naráingngátaráng me muná? <sup>4</sup> Dewit málám kung Ánutu yan it kinan hang másáng horengga Ánutu yan pingnga tit káungá hálená wa kálu hitik tángga pris káman inán másáng wa táng imán náuk, másáng wawu pris yá re nanaya mená. Wáina nangga kámá iháng tombongngá yámán náuráng.” <sup>5</sup> Wahárayon Jesu yá ing yánuk, “Ámna Nanggená wawu Sabat tán Táwi.”

<sup>6</sup> Sabat káman hára wu Jesu málám kungga miti itná kinan kung hangga ku Táwi yan me yánang tolingga átuk, wahára wu ámna káman ketná álák kálu kámurená watá wahára hányon átuk. <sup>7</sup> Rám wahára wu Farisi me lo yan tiksa wu hulá rehára kungga Jesu táng me hára tinin ingga áturáng hálendu Sabat hára ámna nangge kámá iháng tárut táinek me rina ingga kangga átkiuráng. <sup>8</sup> Iná Jesu yá ku wáina naránga átaráng ingga há kápánga ku ámna ketná kámurená wa inuk, “Tárutang kondon yáni hára wa hetang álák.” Wáina inán du ámna wawu tárutnárang inuk wáina kondon yáni hára hetang átuk.

<sup>9</sup> Kulá wáina árán du Jesu yá yánuk, “Retá ku Sabat hára kálu kándang hálek: álosim táinemán me wáik táinemán? Háláng yáminemán me ráháng kátkámut táinemán?”

<sup>10</sup> Jesu málám hálang sulingga erek ingmen kápang háling san árán du ámna ketná kámurená wa inuk, “Ketya wa uying ráng táng.” Ámna wawu Jesu yan me naránga rina inuk wa isutang wáina tángga wahára re ketná watá álosim háliuk. <sup>11</sup> Kulá Farisi yot lo yan tiksa watá wa káuráng hára wu pahán káráp hánám wa tángga ku Jesu náwu rina táng minemán ingga yáni inán kanán táuráng.

*Jesu yan aposel 12 wata kut yáni  
(Mat 10.1-4; Mak 3.13-19)*

<sup>12</sup> Wáina tángga sangga rám káman Jesu málám sáponga tátáya kuk watá kungga ále yáilá káman káin áráng átang Ánutu yan káin sáponga tángga árán kungga it tá háliuk. <sup>13</sup> Kulá it tá háin du disaepelná mantáng yámán málámbán káin áwát tu 12 iháng tunggap tángga kut aposel wa yámuk. <sup>14</sup> Kut yáni wu Saimon, Jesu málámbá kut Pita imuk wa, hang Endru Pita kulaná, Jeims, Jon, Filip, Batolomiu, <sup>15</sup> Matyu, Tomas, Jeims Alfius nanggená, Saimon tombong Selot háranan, <sup>16</sup> Judas Jeims nanggená, hang Judas Iskariot máriya Jesu táng káyam ket yáni hára tiuk wa.

*Jesu yá ámna náráwa táup hánám iháng tárut táuk  
(Mat 4.23-25)*

<sup>17</sup> Jesu málám kung hangga ále pahálá káman káin hetang átuk, wakáin du disaepelná káwan táwi yot ámna náráwa Judia kinan nan, Jerusalem kinan nan me táp kurat káin it táwi Tair káinnan hang it táwi Saidon nan watá áwáng áturáng. <sup>18</sup> Wa áwáng áturáng wawu Jesu yan káinnan me nanaráya me ilalák yáni tán álo háhále wata ingga áwuráng. Hang iruk wáik ká ámna náráwa kámá ep ihená wa iruk wáik wa yásut yámuk. <sup>19</sup> Kulá wahára wu hálang wawu watán káinnan dá áwáng gu kámuk iháng tárut tánggiuk wáina hálendu ámna náráwa yá ku tángggaya re tánggiuráng.

*Jesu yá sambe me márapmá yá tunggafeineráng ga yánuk  
(Mat 5.1-12)*

<sup>20</sup> Kulá Jesu málám disaepelná kápánga ku ing yánuk, “Sán niyá ukuro átaráng watá heronge táineráng, náuta Ánutu yan átkuku wawu sándán.

<sup>21</sup> Sán niyá inggálu háing sámán átaráng watá heronge táineráng, náutá máriya wu nangga kawin sáni yá hahatin átnéráng.

Sán niyá inggálu kut hára átaráng watá heronge táineráng, náuta máriya wu yut hára átnéráng.

<sup>22</sup> Ámna yá sáháng káyam táineráng, sásutang kep tineráng, meng sámíneráng me kut sáni mengga sáháng wáik táineráng wata sándá heronge naríneráng, náuta Ámna Nanggená yan yáup hára átnéráng wata ku sáháng wáina táineráng.

<sup>23</sup> “Wáina táng sámát tu ráw wahára heronge tángga ku hiring árángga háineráng, náuta yumnakngá táwi hánám alek káin hálang sámángga átak. Uláp táwi yáni yá profet wawu iháng wáinanyon tánggiuráng.

<sup>24</sup> Iná sán niyá sup me kutná kutná álo ingga átaráng sándu káwak káin heronge há tángga átaráng,

wata ku máriya mápápmá yá sáhinek.

<sup>25</sup> Iná sán niyá inggálu nangga kawin sáni hahatin átaráng

sándu máriya mápápmá yá sáhán háing sáminek.

Iná sán niyá inggálu yutang heronge tángga átaráng

sándu máriya mápápmá yá sáhán kutkáyawát hára átnéráng.

<sup>26</sup> Iná sán nini meng toling sámánggoeráng sándu máriya mápápmá yá sáhinek,

náuta uláp tátáwi yáni yá profet kusák wawu wáinanyon meng toling yámánggiuráng.

*Káyam sáni wa kikiná kápineráng*

*(Mat 5.38-48; 7.12)*

<sup>27</sup> “Sán niyá nákkán me ná narángga átaráng sán sáninet: Káyam sáni wa kikiná kápineráng, me niyá sándá taktak yámán wawu sándá iháng nuk táineráng. <sup>28</sup> Niyá tará me sánát tu sándá kuram me yáneráng, me rendá sáháng lem tát tu sáponga wata táng yámineráng. <sup>29</sup> Káman niyá kingkila numkálu kátin du hurik tángga numkálu hányon sang mátá kátinek, iná káman niyá saketya tán du siotya álo yon sang mátá táinek ma táng marindalák. <sup>30</sup> Káman niyá kutná kutná yámámáya kanát tu álo yáminelák, iná káman niyá náut kámá káman kákkán hára tán du son tátáya ma inindalák. <sup>31</sup> Sándá kámá yá rina táng sámámáya narángngataráng, sándá wáinanyon kámá yá táng yámineráng.

<sup>32</sup> “Iná rendá sán kikiná sáhát wáinanyon wa kikiná kápineráng wawu Ánutu yá wáina tát sáhángga wata álosim sáhánggim me? Wa muná rewe. Mukmuro mara wawu wáinanyon niyá kikiná kápek wanyon kikiná kangngataráng. <sup>33</sup> Iná sán rendá sáháng álo lo tát wáinanyon wa iháng álo lo táineráng wawu Ánutu yá wáina tát sáhángga wata álosim sáhánggim me? Wa muná rewe. Mukmuro mara wawu wáinanyon niyá iháng álo lo tán wanyon iháng álo lo tángngataráng. <sup>34</sup> Iná sándá topmá iháhaya nangnaráng náut kámá yámineráng wawu Ánutu yá wáina tát sáhángga wata álosim sáhánggim me? Wa muná rewe. Mukmuro mara wawu wáinanyon topmá ihinemán ingga nangnaráng gu náut kámá iháng nuknuk yáni yáni inanyon wa yámángngataráng. <sup>35</sup> Káyam sáni wa kikiná kápángga iháng álo lo táineráng, hang náut kámá topmá iháhaya nangnaráng ma yámindaráng. Wáina táineráng watá ku máriya yumnakngá táwi hánám ihineráng, hang Ánutu Árená Hánám wata nángánangge háleineráng, náuta Ánutu ya heronge ma táng mángngataráng me kandák tángngataráng, enendu watá ku ket tarák álosim re táng yámángngatak. <sup>36</sup> Nan sáni yá ukuro kápángngatak wáinanyon sándá ukuro kápineráng.”

*Watá wáina táeráng ingga ma meng yámindaráng.*

*(Mat 7.1-5)*

<sup>37</sup> Jesu yá ing miuk, “Kámá yan ket tarák wa kangga wawu wáina ingga ma meng yámindaráng, náuta watá sándán ket tarák wata wáinanyon meng sámánirot. Kámá ya kandák táeráng ingga ma yámindaráng, máriya sáni kandák táeráng ingga wáinanyon sánánirot. Kámá yan kátu wa sat tu kátu sáni sasa yá tunggafeinek. <sup>38</sup> Sándá yámát tu sásámáyan dá tunggafeinek. Ánutu yá horengga táng tolingga kándáng hánám tinek wawu mondang áran tuwatang máta hándáp hálen isut hang tiktik tán sunggulingga hangga áran sáminek. Kámá tarák rina yámineráng wawu Ánutu yá tarák wáinanyon sáminek.”

<sup>39</sup> Kulá Jesu yá me taráknngá káman ing yánu, “Ámna rahálá kunángngá káman dá rahálá kunángngá yon da álo engotang kunggim me? Wa muná, yayará kungga áram hára hanggalán. <sup>40</sup> Skul nangge káman dá tiksaná torong káin ma átgim, ináku skul ya kándáng hangga kungga ku tiksaná ina hálanggim.

<sup>41</sup> “Rina ta ku nange nukka ya rahálá káin sinsin káhumá isikimo wa rewe kangga ku kaya rahála káin palang táwi wata ma naráng kulák? <sup>42</sup> Náuta ku nangge nukka inánggim, ‘Nukna, satá no sinsin rahála káin wa táng se kuik,’ wáina inángga ku kaya rahála káin palang táwi wawu ma kanggulák? Kák ku ámna kusáknngá, ko hulátangga kaya rahála káin palang táwi wa táng satá kun du hálangga kándáng kangga ku nukka ya rahála káin sinsin káhumá isikimo wa táng satá kuinek.

*Káráp wáik ká páliná wáik tingngatak*

*(Mat 7.17-20; 12.34-35)*

<sup>43</sup> “Káráp álosim watá páliná wáik kámá ma tindák, wáinanyon káráp wáik watá páliná álosim kámá ma tindák. <sup>44</sup> Káráp erek hánám bu páliná hára kápángga ku káráp wáik me álosim

ingga naráנגgátaráng. Káman dá kung páup káנגgárángngá hára fik páliná ma iháנגgim, me kung wáin páliná káráp káráנגngá pálak hára ma iháנגgim. <sup>45</sup> Ámna álosim káman dá nanará álosim watá pahálá káin árán wawu ket tárák álosim wa tángga átkuinek. Iná ámna wáik káman dá nanará wáik watá pahálá káin árán wawu ket tárák wáik wa tángga átkuinek. Ámna pahán káin nanará rina átak wawu milun dá ku wa hiták meng tunggap tángngátak.

*It tátáyan káluná yará*

*(Mat 7.24-27)*

<sup>46</sup> “Náuta ku ‘Táwi, Táwi,’ ing mantáng namángoeráng ngáyá ku no me sánángoet wawu ma isutkuráng? <sup>47</sup> No ing sánin, káman dá nákkán káin áwáng nákkán me naráנגga táng ket tárák hára tángga isutang átkuinek wawu ing, <sup>48</sup> ámna káman dá itná tátáya ku áram hásak pingga kumam mangga sup pot kikkik topmangga ku itná wata ketnán tánggim wáina. Kulá umi sip pá áwángim watá áwáng kátinggim, enendu it wa ma káting hulát tánggim, náuta kumam hulá há káto táena wata. <sup>49</sup> Iná káman nákkán me ná naráנגga ma isutnándák wawu ing, ámna káman dá itná wa kumam hulá kándáng ma káto tánggim wáina. Kulá umi sip pá áwángim watá áwáng há káting hulát tán han du táng wáik tánggim.”

## 7

*Jesu yá tewe ámna yáin yáni yan yáup nangge táng tárut táuk*

*(Mat 8.5-13)*

<sup>1</sup> Kulá Jesu málám me wa yánán ámna náráwa yá erek ingmen naráng hálit tu málám kung it Kapaneam kinan kungga kung háuk. <sup>2</sup> Wakáin du tewe ámna 100 wata yáin yáni watán yáup nangge káman málámá álosim kangngátak watá ilalák tángga hála hánám kámutang árán. <sup>3</sup> Kulá ámna kámá yá Jesu wu wáina wáina tángngátak ingga met tewe ámna yáin yáni watá naráנגga sangga árong Juda yan ámna yáilá wahára kámá suring yámán kung Jesu inát áwáng ilalák ámna wa táng totoliya kuráng. <sup>4</sup> Rám ámna yáilá watá Jesu yan káin kung hengga sat warán du inuráng, “Ámna wawu ámna álosim hánám wata ku ko kung rina hánám tátáya narek wa wáina táng minelák. <sup>5</sup> Ámna wawu Juda nánda kikiná hánám naráנגgátak, hang nándán miti itná wawu watá táuk.” <sup>6</sup> Wáina ináנגga ku Jesu yá tárurán hangga káman yáni kuráng.

Málám it tangtang kung hálingga árán du tewe ámna yáin yáni watá nuknukngá kámá suring yámán kung inuráng, “Táwi, ko yáup hálang ma táindalák. Nák ku ámna álosim muná, kák ina tá nákkán it kinan áwáwayan tárák muná. <sup>7</sup> Nák ku ámna álosim muná wata ku rupyá káin ma kuindát, ináku me rewe metá ku nákkán yáup nangge watá álo hálek. <sup>8</sup> No wáina met wawu náuta nák enendu kámá ya tárang yáni káin árená, hang tewe ámna urum káman dá nák tárang káin átaráng, iná no káman ‘ko kung’ ingga inángngátat wawu kungngátak, iná nukngá ‘ko áwáng’ ingga inángngátat wawu áwángngátak, hang yáup nangge ‘yáup wáina táng’ ingga inángngátat wawu wáina tángngátak.”

<sup>9</sup> Rám ámna watá me wa miuk wahára wu Jesu yá naráנגga hárámutang málám hurik tángga ámna náráwa káwan táwi isutang kungga áturáng wa yánu, “No ing sánin, Israel kinan ámna naráng hákhátik ngá táwi ing kámá ma káut,” ingga wáina yánu. <sup>10</sup> Kulá ámna tewe ámna yáin yáni yá suring yámán áwuráng watá son hurik tángga it káin kungga yáup nangge wawu ilalákná yá há sálíknin álo hálingga árán káuráng.

*Jesu yá náráwa kawát nanggená táng tárut táuk*

<sup>11</sup> Átang árongga Jesu málám it kutná Nain wakáin kun disaepelná yot ámna náráwa tombong hásak táwi watá watyot kuráng. <sup>12</sup> Rám Jesu yá it watán kumbi wata kálu mungganá hára áwáng hiuk waháranon du ámna kámurená tambun káman tángga áwáng kep káin háuráng. Ámna kámurená wawu náráwa kawát káman da nanggená ámnaná káman wa hánám rewe. Ámna náráwa urum táwi hánám watá ku náráwa kawát watyot áwángaturáng. <sup>13</sup> Táwi yá náráwa wa kangga urákná táwi hánám wa naráנגga ku inuk, “Ma kutnándalák.”

<sup>14</sup> Wáina ináנגga Jesu málám enanggon kung kámurená palang pálak tángga kuráng wa tánggan kangga ámna tángga kuráng watá tareng kátit tu kámurená wa inuk, “Nangge máto, no kanet, tárulák!” <sup>15</sup> Wáina inán ámna kámurená watá tárutnárang putung átang meme tángga árán Jesu yá táng maming imuk.

<sup>16</sup> Ámna náráwa urum táwi watá wa kangga nangnga yáni han Ánutu kutná meng tárut tángga ing miuráng, “Náwu profet táwi káman orek náni hára tunggafek. Ánutu yá ámna náráwaná hálang yámamáya suring mán áwek,” ingga miuráng. <sup>17</sup> Kulá ámna náráwa yá Judia ále kinan me it kámá kámá káin wa kungga Jesu yan me pingnga wa meng isurát kuk.

*Jesu káling Jon Umi Kuháng Yámamá  
(Mat 11.2-19)*

<sup>18</sup> Jon dán disaepel yá Jesu yá wáina tánggoek ingga inát naránga ku málám disaepelná yará mantáng yámán áwán du <sup>19</sup> Táwi ing inánáya suring yámuk, “Kák ku ámma Ánutu yá suring mán áwáwáya miuk wa, me nukngá yá áwinek ka háleinemán?”

<sup>20</sup> Kulá rám ámma Jon dá suring yámuk watá Jesu yan káin kung hengga ku ináng suliumálák, “Jon Umi Kuháng Yámamá yá suring námánga ku kák ing kakanáya mek, ‘Kák ka Ánutu yá ámma suring mán áwáwáya miuk wa, me ku nukngá yá áwinek ka háleinemán?’ ”

<sup>21</sup> Wáina ináng suliumálák wata topmá Jesu yá ma yánená átang ámma náráwa táup táwi ilalák hulá hulá yá ihená wa iháng tolingga, iruk waík ká ep ihená táup táwi wa yásut yámánga ku rahán yáni kunánga táup táwi wa hányon iháng toliuk. <sup>22</sup> Kulá Jesu yá wáina táng hálingga sangga ku Jon dán disaepel yará wa yánuk, “Son kungga ku rina káemálák me naremálák wa Jon ininemálák: Rahán yáni waík ká kándáng hálet, háram yáni waík ká kándáng taret, ilalák lepra pálak ká sut yáni rongrongit, káraman yáni tungngá yá kándáng narát, kámurená yá son tárurát, ukuro árená yá me pingnga álosim wa nareráng. <sup>23</sup> Niyá nák nahánga naráng hákhátik yáni yá ma hak watá heronge narineráng.”

<sup>24</sup> Wáina yánán Jon dán disaepel yará watá hangga há kun du Jesu yá ámma náráwa urum táwi wa Jon dá yánuk, “Sándu rám ále komkomá ámalum re káin wa kuráng wawu náut kakaya? Iruk ká pálalong hásin kakaya há? <sup>25</sup> Muná hálendu náut kakaya hánám kuráng? Ámma káman kutná kutná álosim tánggánengga árená kakaya me? Wa muná, ámma kutná kutná álosim tánggánená me káwak kán kutná kutná álosimmá pálak wawu king gán it káin átnándaráng. <sup>26</sup> Ináku náut kakaya kuráng? Profet káman me? Wawu pálipuk, profet, enendu ing sánin, profet watá profet kátu wa erek hánám iháng hátek. <sup>27</sup> Ámma wata hánám bu Ánutu yan papia káin ing uyená:

‘Naráng. No ámma niyá me tángga kung áwáng tátá wa kálak suring me kuinek,

watá kálu tiyawing kaminek.’\*

<sup>28</sup> No ing sánin, káwak ketnán ámma átaráng waháranan káman dá Jon ma táng hátik. Ináku niyá Ánutu yan átkuku kinan nange kimo yá ina átnek watá ku Jon táng hátinek,” ingga yánuk.

<sup>29</sup> Ámma náráwa erek hánám me takis iháhá watá Jon dán me naránga ku ing miuráng, “Ánutu yan nanará wu álosim hánám,” wata ku yáni wu Jon ketná hára umi kuhuráng. <sup>30</sup> Iná Farisi yot lo yan hulá nanará wawu Ánutu yá kálu álosim rina yáliuk wawu sárum imuráng, wata ku Jon dá umi ma kuháng yámuk.

<sup>31</sup> Kulá son Jesu yá ing miuk, “Náut hára mengga tárak tinet, rám nátán ámma náráwa wu wáina ingga wu? Wawu náut ina ingga menggem? <sup>32</sup> Rám nátán ámma náráwa wu nange kikimo yá kapme hára átang yáni inán kanán tángngátaráng ina,

‘Sándá kap utniráng ingga nánda pilut hásiután,

enendu kap ma uturáng.

Sándá kutniráng ingga kap ukuro mantáumán,

enendu ma kuturáng.’

<sup>33</sup> Rám nátán ámma náráwa wawu wáina, náuta Jon Umi Kuháng Yámamá yá áwuk ngáyá áwáng másáng ma nan me wáin ma nan, kangga ku sándá ku miuráng, ‘Iruk waík ká watyot átak,’ ing miuráng. <sup>34</sup> Iná Ámma Nanggená yá áwáng umi sungi nangga áran du menggoeráng, ‘Kaniráng, ámma wawu sungi táup hánám nanggoek me wáin táup hánám nanggoek, wawu takis iháhá me “mukmuro mara” nuk yáni.’ <sup>35</sup> Sándá ku wáina menggoeráng, enendu niyá tirik tárak álosim wa kangga ku kálu kándáng waháranan dá áwek ingga narineráng,” ingga yánuk.

*Náráwa káman dá Jesu hárammá káin oel mungnganá kikiná kuliuk*

<sup>36</sup> Farisi káman dá Jesu pin ting mán sungi nanaya itná káin kuk. <sup>37</sup> Kung wakáin átnarán náráwa káman it ále waháranan wawu ket táránga wu kandák watá Jesu wu Farisi yan it káin átak ingga naránga ku botol káman sup álosim hánám kutná alabasta wata nan dá táng tolená wata kinan oel mungnganá kikiná wa tánggatang kuk <sup>38</sup> ngáyá kung Jesu sárummá káin hárammá tangtang hetang átang gu kutang átkiuk. Kulá rahála uminá yá hang gu Jesu hárammá sárummá táng pumpum tán du málamba yáilá rommá yá ránángtang tángga ku hárammá sárummá káin kang kumengga árong oel wa kulin hárammá sárummá ketnán káin wa háuk.

<sup>39</sup> Wáina tán kangga Farisi niyá Jesu pin ting mán kuk watá ku ing naruk, “Ámma náwu profet ináku náwu niyá nehángganggoek me náráwa náwu mukmuro mara ingga naránggim,” ingga naruk.

\* 7:27: Mal 3.1



<sup>40</sup> Kulá Jesu yá ku ámna wata nanaráná káin há kangga ku inuk, “Saimon, no me káman kanindet.”

Ing inán du ámna watá inuk, “Tiksa, nanáng.”

<sup>41</sup> Ing men Jesu yá inuk, “Ámna yará yá ámna káman dán káin dinao táumálák, káman dá 5,000 kina hang káman dá 500 kina. <sup>42</sup> Kulá yará waháranan káman dá topmá titiyan tárak ku muná hárendu ámna dinao iháng mumálák watá miuk, ‘Wáinaná topmá ma tindamálák,’ ing yánuK. Kulá resim bá ku ámna wata álo kámá hánám naráng muk?”

<sup>43</sup> Wáina men Saimon dá miuk, “No naret tu sup táwi ihuk ngá ku topmá ma titiya inuk watá.”

Ing men Jesu yá miuk, “Kándáng hánám melák.”

<sup>44</sup> Wáina inánnga málám hurik tǎngga náráwa wa kangga Saimon son inuk, “Ko náráwa ná kangga naráng. No itya kina áwet enendu háramna yanyawon da umi kámá ma namálák, iná náráwa nátá ku háramna rahálá uminá yá tǎng pumpung tǎngga yáilá rommá yá ránǎngtang táek. <sup>45</sup> Ko ma naháng kumelák, iná náráwa náwu hulǎtingga it kina áwet hára átang áwǎngga inggálu wu emá rewe háramna hára naháng kumengga átak. <sup>46</sup> Ko oel kámá yáinna káin ma kulilák, iná náráwa nátá ku háramna káin oel mungnganá kikiná wa kulek. <sup>47</sup> Wáina wata ku, no ing kanin, náráwa watán mukmuro táwi hánám Ánutu yá yawondak. Wáina tán watá ku náka kikiná táwi hánám narek. Iná káman niyá mukmuro isikimo tán Ánutu yá mukmuroná wa yawonek wawu watá Ánutu yá kikiná isikimo narinek.”

<sup>48</sup> Wáina inánnga sangga ku náráwa wa inuk, “Kákkán mukmuro wawu há yawondak.”

<sup>49</sup> Wáina inán kátu wahára áturáng watá wa naránnga ku yáni meme táuráng, “Ámna náwu ni hárendu mukmuro yawongok?”

<sup>50</sup> Wáina mengga árát tu Jesu yá ku náráwa wa inuk, “Naráng hákhátikka yá keháng tolek. Pahán lǎláp hára kuinelák.”

## 8

*Jesu yá ámna káman dá irit táulá hái káin haliuk ka me tárakngá yánuK*

*(Mat 13.1-23; Mak 4.1-20)*

<sup>1</sup> Wata máriná káin Jesu málám disaepelná 12 watyot it kámá hára kungkung tǎngga Jesu yá Ánutu yan átkuku watán me pingnga álosim wa yánánnga átkuk. <sup>2</sup> Hang náráwa huphuráp Jesu yá iruk wáik yásut yámuk me ilálák háranan iháng toliuk watyot átkuráng, wata kut yáni ku Maria it Makdala háranan Jesu yá iruk wáik 7 yásut muk wa; <sup>3</sup> Herot tán it pinná tátá wata táwi yáni ámna kutná Kusa wata áwáná Joana; hang Susana watyot tu kámá nukngá hányon. Jesu yot disaepelná wawu náráwa urum watá ku kutná kutná yánin háranan hálang yámánnga átninggiuráng.

<sup>4</sup> Kulá it waháranan waháranan ámna náráwa urum táwi hánám watá áwáng áturáng wahára wu Jesu yá me tárakngá ing yánuK, <sup>5</sup> “Ámna káman dá iritná táulá haliliya kuk. Málám halingga kun kámá yá kálu hára hat ámna nangge yá kung áwáng tǎngga taret, kámá ku iráp pá kahet hang erek nang háliuráng. <sup>6</sup> Kámá yá káwak sup kárak hára hangga áráng hiuráng, enendu umi muná hárendu erek hánám kumkumiuráng. <sup>7</sup> Kulá kámá yá ku páup kǎnggǎrángngá kina hangga áráng hiuráng, enendu páup kǎnggǎrángngá watá árángga iháng usán muná kuráng. <sup>8</sup> Iná kámá yá ku káwak álosim hára háuráng hárendu álo kámá hánám áráng hengga pálin yáni táup hánám tiuráng.”

Jesu málám me wa meng hálingga sangga ku mantáuk, “Káman ni kárámanná pálak hárendu watá me ná narinek.”

<sup>9</sup> Wáina meng hǎlin naránnga ku disaepelná yá wata hulá wu rina ingga ináng suliuuráng.

<sup>10</sup> Inát tu yánuK, “Ánutu yan átkuku watán nanará kilakngá wawu málámbá sán há sáliuk, iná kátu wawu me tárakngá kálu re yánánggátat, wáina hárendu

‘kámá yá rahán yáni hálangga átnéráng enendu ma káindáráng, me

kámá yá narineráng enendu wata hulá hánám bu wáina ingga ma naráng ruwat táindáráng.’\*

<sup>11</sup> “Me tárakngá wata hulá wu ing, irit táulá wawu Ánutu yan me. <sup>12</sup> Iná kálu hára háuráng ga tárakngá wawu kámá yá há narineráng, enendu Satan dá áwáng pahán yáni káin me wa tǎng hirarǎn kung yáminek, náuta me wa naránnga káto tǎngga isutang átkut Ánutu yá son ihiwon wata. <sup>13</sup> Iná káwak sup kárak hára háuráng ga tárakngá wawu kámá yá me wa naránnga heronge hánám táineráng, enendu wawu irit ráhun yáni watá káwak kina ma koená wáina. Álo kámá há táineráng, enendu ráh hátetná kimo átang ingirunggi yá áwinek wahára wu naráng hákhátik yáni wa sáineráng. <sup>14</sup> Iná páup kǎnggǎrángngá kina háuráng

\* 8:10: Aisaia 6.9

ga táráknká wawu kámá yá me wa há narineráang, enendu kálu hára kungga átang rina átnát tán naráangpak, sup hang káwak kán kutná álosim átak watá nanará yáni táng yawák tán naráang hákhátik yáni yá maming tái ma háleindák. <sup>15</sup>Iná irit táulá káwak álosim hára háuráang ga táráknká wawu kámá yá me wa naráangga káto tángga pahán yáni yá kándáng áran káto hálangga átang watá ku pálin yáni kándáng tingga átneráang.

*Lam kasingga táng kilak ma tingngátaráang  
(Mak 4.21-25)*

<sup>16</sup>“Ámna káman dá lam kasingga táng baket kinan me tebol tárang káin ma tinggim, ináku táng tutuháná hára tuháang san áran du káman niyá it kinan áwáng hanggim wata yamá kanggim. <sup>17</sup>Me kámá kilak átaráang wawu máriya erek hánám hiták háleineráang, me me kámá rina támotang tená wawu máriya tumá yalit hiták hálet ámna náráwa yá wáina ingga narineráang. <sup>18</sup>Wáina wata ku nákkán me wa kándáng naráang kuineráang. Káman niyá náut kámá káman átmek hálendu wahárayon Ánutu yá táup hánám wa iminek. Iná káman niyá ma átmák wawu rina átnemek ingga narek wa imáang hutang ihinek,” ingga wáina yánu.

*Jesu maming got tu yakukula yá Jesu káinán áwuráang  
(Mat 12.46-50; Mak 3.31-35)*

<sup>19</sup>Jesu maming got tu yakukula watá kanin ingga áwuráang, enendu rupmá káin kungga ma kakayan, náuta ámna náráwa watá kik hánám wa áturáang. <sup>20</sup>Wáina hálendu ámna káman dá inuk, “Mamya yot yakukulaka yá kák kakaháya áweráang ngá kep káin hálang kamáangga átaráang.”

<sup>21</sup>Ingga inán Jesu yá miuk, “Nák mamna me yakukulana wawu ni Ánutu yan me naráangga táng tárák hára tingga isutneráang wa.”

*Jesu yá iruk táwi wa me táng mán sáuk  
(Mat 8.23-27; Mak 4.35-41)*

<sup>22</sup>Rám káman Jesu yá disaepelná yánu, “Umi pátum numkálu kunin.” Ing yánáangga ku bot ketnán árangga ku kuráang. <sup>23</sup>Kungga átang gu bot ketnán Jesu wu rapmung gá sán du árong háná ruhuk. Wahára wu iruk táwi hánám watá áwáng umi táng hirarán bot ketnán hanghang tángga bot tá hála tuwarán há hánám yakyawinin ingga tángga áturáang.

<sup>24</sup>Kulá disaepel yáni wu wáina kangga ku Jesu táng mirak tángga inuráang, “Táwi, Táwi, hang suwindemán!”

Wáina inát Jesu málám tárutang san warán árong iruk me umi punggilá tátáwi wa me táng yámán iruk ká san umi yá láláwingga hánám wa átuk. <sup>25</sup>Wáina tángga Jesu yá árong disaepelná yánu, “Naráang hákhátik sáni wa muná me?”

Kulá disaepel yáni wu wa kangga háramutang pitáangga nangnga yáni han du yáni meme táuráang, “Náwu ni hálendu iruk me umi wa me táng yámán naráangga watán milun suwemálák?”

*Ámna káman hára Jesu yá iruk wáik isutuk  
(Mat 8.28-34; Mak 5.1-20)*

<sup>26</sup>Jesu yá disaepelná yot yáni wa ku Galili umi pátum wa pana háng kungga it Gerasen dán ále káin kung hiuráang. <sup>27</sup>Kulá Jesu yá sán káin sung hang tarengga átnarán ámna káman it waháranan iruk wáik ká ep táená watyot kankan táumálák. Rám hásak hánám ámna wawu sutná ma pop táená átang áwánggiuk, me it kinan kámá ma átkiuk, ináku tanggán káin átkiuk. <sup>28-29</sup>Rám táuppon iruk wáik ká ep tánggiuk, wata ku ámna kámá yá pinná tángga ket hárammá sen dá putingga sat átkiuk, enendu sen wa uying rákrákit tángga iruk wáik watán nanará isutang kung ále ámna nangge muná káin wa átkiuk. Ámna watá Jesu káuk wahára wu mantáangga táng hang hárammá hulá hára kátiuk. Wáina tán Jesu yá iruk wáik wa ing inuk, “Ámna wa sangga hang!”

Ingga wáina inán ámna watá hahatingga hánám mantáuk, “Jesu, Ánutu Árená Hánám wata Nanggená, rina táng namindelák? No ing kanin, neháng lem ma táindalák!”

<sup>30</sup>Wáina mantáangga inán Jesu yá iruk wáik wa inuk, “Kutya ku ni?”

Ing inán watá inuk, “Nák kutna ku Tombong Hásak,” ingga inuk, náuta iruk wáik táup hánám watá kung hang ámna wata pahálá kinan káin átnándaráang. <sup>31</sup>Rám wahárayon iruk wáik watá Jesu inuráang, “Násurátá kungga áram yuwitná muná† káin wa ma háindamán,” ingga inuráang.

<sup>32</sup>Iná put urum táwi káman du ále yáilá isikimo wata álatná kálu sungi nangga árát tu iruk wáik watá Jesu inuráang, “Násurátá kungga wata kinan hanin,” ingga inát tu álo ingga yánu.

† 8:31: ‘Áram yuwitná muná’ wata hulá ku ing, káwak náta ketnán áram yuwitná muná kámá ma árak, wawu iruk kán kálu ya mek. Wata tángga ku iruk wáik ká Jesu yá náháng kalabus it kinan tiwon ingga ku me wa inuráang.

<sup>33</sup> Kulá iruk waík watá ámna wa sangga háuráng ngáyá ku kung put wata kinan háuráng. Kulá put watá wahára átang hururung ingmen ámuta re hangga umi máta porá isikimo hára hitangga kung umi pátum kinan hangga umi nangga kámuturáng.

<sup>34</sup> Wáina tát ámna kámá put wa pin yáni táená watá wa kangga pitánga kungga pingnga wa it kinan me ále wata kátu káin yánánga kuráng. <sup>35</sup> Iná ámna náráwa yá pingnga wa naránga kanin ingga kungga ku ámna iruk waík ká ep táená táng toliuk wawu nanaráná yá kándang hálen sutná kándang tánggánengga Jesu hárammá hulá hára putung árán kangga pitáuráng. <sup>36</sup> Kulá ámna niyá wahára há átang kauráng watá ku áwuráng ngá wa Jesu yá ámna iruk waík ká ep táená wa wáina táng tolek ingga pingnga yáuráng. <sup>37</sup> Wáina kangga naránga ámna náráwa Gerasen ále háranan watá pikpito hánám naránga ále ná sangga kung ingga Jesu inuráng, wáina hálendu Jesu wu bot ketnán áranga son há yáni kuráng.

<sup>38</sup> Ámna iruk waík ká sangga kuráng watá ku Jesu yá kuin ingga táuk wahára isutang káman kukuya inuk, enendu Jesu yá suring mánga inuk, <sup>39</sup> “Itya káin kungga ku Ánutu yá rina háláng kamek wata pingnga yáinelák.” Wáina inán du ámna wawu kung it kinan Jesu yá rina táng mán álo háliuk wata yánánga kuk.

*Náráwa máto kámurená yot náráwa ilalák mara iháng tárut táuk  
(Mat 9.18-26; Mak 5.21-43)*

<sup>40</sup> Kulá Jesu yá son umi pátum numkálu kung hengngarán du ámna náráwa urum táwi watá heronge hánám naráng muráng, náuta málamba hánám hálangga átnárát kung hiuk wata. <sup>41</sup> Waháranon ámna kutná Jairus wawu miti itná watán ámna yáilá watá áwáng Jesu hárammá hulá hára hangga Jesu yá itná káin kukuya inuk, <sup>42</sup> náuta uriwa káman re hánám yaraná 12 hám watá hála hánám kámutang árán.

Kulá Jesu wu wakáin káin ingga kuk wahára wu ámna náráwa yá pánpásin hánám árát kuráng. <sup>43</sup> Kulá náráwa káman wahára átuk wawu yara 12 wata kinan yipitná yá ramá ramá kungga rewe átnándak. Káman dá táng totoliyan tárak ku muná. <sup>44</sup> Málám Jesu sárummá kálu áwuk ngáyá áwáng lapmá hásak wata ilungngá káin tánggáuk wahára re sip hangga átuk watá sálikngiuk.

<sup>45</sup> Wáina tán Jesu yá ing yánang suliuk, “Niyá nehángaék?”

Wáina yánuk, enendu watá kámuk nák muná nák muná ingga inát tu Pita yá ku miuk, “Táwi, ámna náráwa wu kik hánám hálendu áwáng kák hára rosingga koeráng.”

<sup>46</sup> Wáina inán Jesu yá miuk, “Ni kámá káman dá nehángaék, náuta hálángna kátu yá sutna hára sohingga kun naret.”

<sup>47</sup> Wáina men du náráwa wawu kilak átnát tán tárak muná hálendu yángyáng pálak áwáng rahán yáni hára Jesu hárammá hulá hára hangga ku inuk, “Ilalákna wáina wata ku áwáng kehángganga ku wahára re wáina álo hálet,” ingga men du <sup>48</sup> Jesu yá inuk, “Uriwana, naráng hákhátikka yá háláng kamek. Wata ku pahán láláp hára kung.”

<sup>49</sup> Jesu yá wa inánga emá me tánga átnarán ámna káman dá miti itná yan ámna yáilá kutná Jairus watán it káin wa átang áwuk watá áwáng Jairus inuk, “Uriwaka wu há kámutak. Márápmá wa tiksa ma imindamán.”

<sup>50</sup> Wáina inán naránga Jesu yá Jairus inuk, “Ma pitáindalák, ináku naráng hákhátik hára káto arátá ku álo háleinek,” ingga inuk.

<sup>51</sup> Kulá Jesu málám Jairus yan it káin áwáng hiuk hára wu kátu wa erek káto táng yámánga ku Pita, Jon hang Jeims watyot nangge wata naning maming wa rewe ihánga ku kung it kinan háuráng. <sup>52</sup> It kinan kung hangga kápuk ku ámna náráwa it kinan áturáng wawu nangge wata urákná naránga kutkáyawat tánga arát tu Jesu yá yánuk, “Ukuro ma tánráng, náuta wawu ma kámurak ináku ruhánga átak.”

<sup>53</sup> Jesu yá wáina yánán naránga yut muráng, náuta náráwa kimo wawu pálipuk há kámutang átak ingga naruráng. <sup>54</sup> Enendu Jesu yá árong nangge kámurená wata ketná hára tánga inuk, “Nanggena, táruláki!” <sup>55</sup> Wáina inán du kámurená wata irukngá yá son áwan waháranon tárurán du Jesu yá yánuk, “Naut kámá nanayan kámá imát náik.” <sup>56</sup> Iná nangge wata naning maming gá wa kangga nangnga yándi han átumalák, enendu Jesu yá olet yándi mangga, “Ni kámá káman wáina tunggafek ingga ma inindamálák,” ingga yánuk.

## 9

*Jesu yá disaepelná yáup yámánga suring yámuk  
(Mat 10.5-15; 14.1-12; Mak 6.7-29)*

<sup>1</sup> Jesu málám disaepelná 12 wa kámuk hánám mantáng yámán áwat iruk waík yásusut tán me ilalák hulá hulá wa iháng totoliyan háláng káto wa yámuk. <sup>2</sup> Wáina tánga ku kung Ánutu yan átkuku wata yánánga ilalák mara wa iháng totoliya suring yámuk. <sup>3</sup> Jesu málám ing yánuk, “Kálu wa kuineráng hára náut kámá káman ma táindaráng, to me yák me másáng me

sup ma ihindaráng, hang sut tátámot tán nukngá kámá hánámá ma ihindaráng. <sup>4</sup> It reta kinan ruhineráng watá wahára re átang kungga it kapme wa sangga it kámá káin kuineráng. <sup>5</sup> Iná it kapme káman hára kung het ma sáháng tolit wawu háram sáni káin káwak káhumá wa kátang hakhalik tát wahára hat tu it kapme wa sangga kuineráng, watá ku watyot me yá átak háleinek.” <sup>6</sup> Kulá wahára átang gu disaepel yá itná itná wa kungga me pingnga álosim wa yánangga ilalák mara iháng tarút títangga kuráng.

<sup>7-8</sup> Rám wahára kapman táwi átuk kutná Herot watá Jesu yá wáina wáina tánggoek ingga pingnganá naréngga árán kámá yá ku menggiuráng, “Jon kámutuk watá son tarutang áwek,” iná kámá yá ku menggiuráng, “Elaija yá son tunggafek,” iná kámá yá ku menggiuráng, “Uláp profet áturáng waháranan káman dá son tarutang áwek,” ingga mengga árát tu, Herot tá wata naréngpak táwi hánám wa tángga átang gu <sup>9</sup> ing miuk, “Jon wawu no yáne salá há maruráng, Iná náwu ni hánám bá ku tarák hulá hulá wa tán met narénggoet?” Wáina mengga ku málámbáyón Jesu kakaya naruk.

*Jesu yá ámna 5,000 wa sungi sing yámuk  
(Mat 14.13-21; Mak 6.30-44; Jon 6.1-14)*

<sup>10</sup> Kulá aposel yá son áwáng hengga ku wáina wáina tángga átningga áwemán ingga Jesu inuráng. Inát Jesu málám aposelná ihánga ámna náráwa kámuk yápmangga yáni kámuk hánám it kutná Betsaida wakáin kuráng. <sup>11</sup> Enendu ámna náráwa urum táwi watá wáina koek ingga há naréngga isutang wakáin kuráng. Kung het kápánga álo áwániráng ingga yánangga árong Ánutu yan átkuku wata yánangga kámá ilalák yáni pálak áwuráng wa iháng toliuk.

<sup>12</sup> Yonyon kálu hánám bu disaepelná 12 watá Jesu yan káin áwánga inuráng, “Ámna náráwa wa suring yámátá há yáni kungga it enanggon enanggon káin wa kungga ku it me sungi yáni wa suliniráng, náuta náwu ále páliná muná káin átamán.”

<sup>13</sup> Wáina inát tu Jesu yá yánuk, “Sáni sungi yámániráng.”

Ing yánán watá inuráng, “Nándu másáng tum 5 bot tu káut yará yá re átaráng. Kulá nándá kung ámna náráwa káwan táwi nátán sungi yuwáwáyan tarák ku muná,” ingga inuráng. <sup>14</sup> Iná urum táwi wa áturáng waháranan ámna wu 5,000 wáina tá áturáng.\*

Wáina árát Jesu yá disaepelná yánuk, “Kulá ámna náráwa wa iháng 50 ina yá urum káman káman erek tit putung átniráng.” <sup>15</sup> Kulá disaepel yá Jesu yá rina yánuk wáina tát erek hánám wa putung áturáng.

<sup>16</sup> Wáina árát tu Jesu málám másáng tum 5 watyot káut yará wa ihánggatang alek kálu hálangga Táwi ya heronge me inánga sungi wa ketná yá hikhuk tángga iháng disaepelná yámán ámna náráwa ya ting yámánga kuráng. <sup>17</sup> Wa yámát nangga kámuk hánám kawin yáni hahatin du disaepel yá sungi káhumá áturáng wa iháng rápmám 12 wa tuwat hánám monduráng.

*Pita yá Jesu wawu wa ingga meng tunggap táuk  
(Mat 16.13-28; Mak 8.27—9.1)*

<sup>18</sup> Rám káman Jesu yá disaepelná yot yáni wu ále káman káin yáni re átang Jesu yá sáponga tángga sangga ku yánuk, “Ámna náráwa yá náka ku ni ingga menggoeráng?”

<sup>19</sup> Wáina yánán du watá inuráng, “Kámá yá ku Jon Umi Kuháng Yámámá ing met, kámá yá ku Elaija ing met, kámá yá ku uláp profet áturáng waháranan káman dá son tarutang áwek ing menggoeráng.”

<sup>20</sup> “Iná sáni wu náka ni ing menggoeráng?”

Wáina yánán Pita yá miuk, “Kák ku Ánutu yá suring mán hangga ámna náráwaná son iháhaya miuk wa.”

<sup>21</sup> Ing inán du ni kámá kámá ma yánindaráng ingga Jesu yá olet yáni máuk. <sup>22</sup> Kulá Jesu yá ing yánuk, “Ámna Nanggená wawu sut láwit táwi hánám narinek. Ámna yáilá me pris tátáwi yáni me lo yan tiksa yá táng kep tit utkámuk táineráng ngáya rám kaláhu átang gu Ánutu yá son táng tarút táinek.”

<sup>23</sup> Hang ámna náráwa kámuk hánám ing yánuk, “Káman dá nák natnasut ta ku málámbán pahán wa sang hálingga ráma ráma málámbán maripong wa sungga tánggatang gu nák nasutnek. <sup>24</sup> Iná niyá málámbán átnát wata naréngpak táinek wawu átkukuná watá muná kuinek. Iná káman dá náka naréngga átnát ná wa sáinek wawu átkukuná watá ma muná kuindák. <sup>25</sup> Kulá ámna káman káwak nátán kutná kutná álosim wa erek átmánggim hára átkukuná yá muná kunggim, wahára wu kutná kutná átmánggim watá ku rina hálang imánggim? <sup>26</sup> Iná ámna káman dá nák me nákkán me wata reprepmá tánggim wawu máriya rám kálu Ámna Nanggená yá málámba yamá me Naning ga yamá me angelo káungá ya yam

\* 9:14: 5,000 wawu ámna rewe, iná nange náráwa wa wahára hányon áturáng. Matyu 14.21 hára hányon káineráng.

yáni kinan áwánggim wahára wu reprepmá yon kanggim. <sup>27</sup> No pálipuk hánám ing sánin, kámá sán nahára átaráng wawu ma kámurená átang Ánutu yan átkuku wa káineráng.”

*Jesu sutná yá hulá kámá háliuk  
(Mat 17.1-8; Mak 9.2-8)*

<sup>28</sup> Jesu yá wa mengga sangga hang rám 8 náut wáina átang gu Pita, Jon hang Jeims wa ihánga ále yáilá káin sáponga tátáya áránga kuráng. <sup>29</sup> Málám sáponga tánga átuk wahára wu kurákmáta watá hulá kámá hálen kutná kutná sutná tánggániuk watá hakokowak hánám háliuráng. <sup>30</sup> Rám wahára wu ámna yará Moses káling Elaija yá tunggafengga Jesu yot áturáng. <sup>31</sup> Yánda wu yamá táwi watyot tunggafengga átang Jerusalem káin Jesu yá rina táinek ka Ánutu yá miuk wa táng hálingga sangga torong káin du káwak sangga alek káin kuinek wata mená me tánga áturáng. <sup>32</sup> Wahára wu Pita yot disaepel nukngá yará wawu rapmung ga yángen ránáng táriuráng ga son rahán yáni rong hánám hálingga ku Jesu yan yamá táwi watá yamá mangga áran du ámna yará watá Jesu yot árat kápuráng. <sup>33</sup> Kulá ámna yará watá Jesu sangga kukuya tánga áran du Pita yá Jesu inuk, “Táwi, nánda nahára há átamán wawu álosim. Kulá sima kaláhu usinemán wawu káman kákkán, káman Moses yan hang káman Elaija yan.” Pita yá wáina meinet ingga ma narená hánám miuk.

<sup>34</sup> Pita yá me wa mengga átnárán waháranon du mukam bá áwáng iháng támorán disaepel yáni wu pikpito hánám wa naruráng. <sup>35</sup> Kulá mukam kinan du me káman dá ing áwuk, “Náwu nák Nanggena. Na nakán yáup tátáya táng tunggap táut. Watán me narineráng.” <sup>36</sup> Me wa meng hálín hálingga káuráng gu Jesu yá málám re áran. Kulá ále yáilá káin átang háuráng rám wahára wu tárak wáina káemán ingga nukngá kámá ma yánuráng, ináku yáni hára re átuk.

*Jesu yá nangge káman hára iruk wáik isutuk  
(Mat 17.14-23; Mak 9.14-32)*

<sup>37</sup> Ále yáilá káin áturáng wata tembátnáya hangngárát ámna náráwa urum táwi hánám watá Jesu yan káin áwuráng. <sup>38</sup> Ámna náráwa urum táwi áturáng wata orek yáni káin du ámna káman dá mantáuk, “Táwi, no ing kanindet, ko nák nanggena ya káinelák. Ná kú nanggena wu káman ná rewe. <sup>39</sup> Rám iruk wáik ká ep tángngátak hára ku huhu tánga mantánga átnándak. Watá wáina tán du yángyáng tánga alupmá yá máta kálu num ángaráng tánga átnándak. Iruk watá ma sangga koená átang sutná wa táng wáik hánám tángngátak. <sup>40</sup> Iruk wáik ná isutniráng ingga disaepelka há yánut, enendu wata isutsut tán tárak muná.”

<sup>41</sup> Wáina inán Jesu yá miuk, “Ámna náráwa sándu naráng hákhátik sáni wu muná. Rám rina sányot áre sándá márappmá namineráng? Nanggeka wa tánga ná káin áwáng.”

<sup>42</sup> Kulá nangge watá Jesu yan káin áwánga átuk, wahára wu iruk wáik watá nangge wa táng san káwak hára wa hang yángyáng tánga áran du Jesu yá iruk wáik wa me táng mangga nangge wa táng tolingga táng nanging imuk.

<sup>43</sup> Ánutu yá ket tárak táwi wa tán kangga ámna náráwa urum táwi watá nangnga yáni han árat tu Jesu yá disaepelná yánuk, <sup>44</sup> “Karámatingga kándáng hánám narineráng. Ámna Nanggená wawu táng káyam ket yáni hára tineráng.” <sup>45</sup> Wáina yánuk, enendu disaepelná yá hulá wáina ta nánek ingga ma hánám naráng rákit táuráng. Me wata hulá wu kilak átuk hálendu disaepel yá ma naráng ruwat táuráng. Kulá me wata hulá wa naránin ingga ináng susuliya wu hányon pitáng muráng.

*Niyá ku máta hánám átnék?  
(Mat 18.1-5; Mak 9.33-40)*

<sup>46</sup> Rám káman disaepel yáni wu niyá ku máta hánám átgim ingga wata menmen táuráng. <sup>47</sup> Jesu málám pahán yáni káin wáina átak ingga há naránga sangga málám nangge kimo káman táng áwáng rupmá hára ting san áran du <sup>48</sup> yánuk, “Káman niyá ná ká naránga nangge kimo ná táng tolinek wawu nák neháng tolinek, hang káman niyá nák neháng tolinek wawu Nanna niyá nák suring namuk wa táng tolinek. Sán wa átaráng wata rahán sáni hára niyá isikimo hánám átak watá ku Táwi rahála hára ku táwi hánám átak.”

<sup>49</sup> Wáina men naránga ku Jon dá miuk, “Táwi, nánda káumán du ámna káman dá kák kutya hára iruk wáik yásutang áran kangga wáina ma táindalák ingga káto táng mumán, náuta wawu nándán tombong muná.”

<sup>50</sup> Wáina men du Jesu yá ing inuk, “Ma káto táng mindaráng. Ámna niyá káyam ma sáhindák wawu nuk sáni ku wa.”

*Samaria ámna náráwa yá Jesu yá watán ále káin áwáwáya taktak yámuk*

<sup>51</sup> Ánutu yá Jesu tánga alek káin kukuyan rám watá hátewin du Jesu yá pahála me nanaráná watá Jerusalem káin há kuin ingga pahán tiuk. <sup>52</sup> Wáina hálendu ámna kámá suring yámán watá kálak kung Samaria ále káin it káman hára kutná kutná tiyawing mámáya kuráng. <sup>53</sup> Enendu it waháranan ámna yá Jesu wu Jerusalem kukuya áwek ingga há naruráng,

wata ku watá áwáng watán it hára átnát ta taktak yámuk. <sup>54</sup> Wáina ingga há naránga disaepel yará Jeims káling Jon watá Jesu inumálák, “Táwi, ko rina narelák, alek káinnan káráp lánggop metne hang iháng lem táik me rina?” <sup>55</sup> Wáina inán Jesu yá hurik tángga me táng yámán du <sup>56</sup> it wa sangga it nukngá káin kuráng.

*Jesu yá málám isusut wata yánuk  
(Mat 8.19-22)*

<sup>57</sup> Kulá kálu hára kungga áturáng wahára wu ámna káman dá Jesu inuk, “Nák ku ko rehára rehára kuinelák wawu kákkot káman re átkuinemát.”

<sup>58</sup> Wáina inán Jesu yá inuk, “Ang páyom bu káwak káin hinang yáni átaráng, hang iráp pu it yáni pálak, iná Ámna Nanggená wawu ruruháyan komená kámá ma árak.”

<sup>59</sup> Kulá Jesu yá ámna káman inuk, “Nák nasulák.”

Wáina inán ámna watá inuk, “Táwi, hulátingga ku satá no kung nanna yot áre watá kámurán wa usánga ku wáina kák kasutnet.”

<sup>60</sup> Wáina men Jesu yá inuk, “Wáinaná satá kámurená yá ku nuk yáni kámurená wa iháng usángguineráng, iná kák ku kungga Ánutu yan átkuku wata meng tunggap tángga yánánga kuinelák.”

<sup>61</sup> Kulá ámna nukngá yá ku Jesu inuk, “Táwi, nák ku kák kasutnet, enendu hulátingga ku satá no kung nanna mamna wáina ingga yánánga sangga ku áwáng kák kasutng kuinet.”

<sup>62</sup> Wáina inán Jesu yá inuk, “Káman dá Táwi yan yáup táin ingga ku hurik tángga sárummá kálu ma háleindak, ámna wáinaná watá Ánutu yan átkuku watán yáup tátáyan tárák ku muná.”

## 10

*Jesu yá málámbán yáup tátáya ámna 72 suring yámuk*

<sup>1</sup> Átang árongga ku Táwi yá ámna 72 nukngá iháng tunggap tángga yará yará suring yámán watá kálak it tátáwi me it isikikimo rehára kukuya naruk wakáin kukuya yánuk. <sup>2</sup> Kulá ámna watá kuinán tát tu ing yánuk, “Hái káin sungi tánang kukuyan du táup hánám, iná yáup ámna wa tánang kukuyan du táup muná, wata ku Táwi, hái márúmá, watán káin sáponga tát tu yáup ámna suring yámán háina káin kungga sungi álikngéná wa tánang kuineráng. <sup>3</sup> Kulá ing naránga ku kuineráng, no wa suring sáme kuineráng wawu sipsip nángánangge yá ina ang páyom orek yáni káin kuineráng. <sup>4</sup> Sup tumá me yák me sendol ma ihindaráng me ni kámá káman kálu hára kangga ma kangmeindaráng.

<sup>5</sup> “Kung it káman hára árángga ku hulátingga ku ing meineráng, ‘Pahán láláp pá it náta kinan átnek.’ <sup>6</sup> Ámna káman pahán láláp pán dá it wata kinan átnek háleendu sándán pahán láláp me watá hang wahára ep táinek, iná muná háleendu son hurik tángga sánin káin áwinek. <sup>7</sup> It wata kinan átang sungi me umi sámát tu álo náineráng. Ámna niyá yáup táinek watá ku yumnakngá ihinek wawu álo kámá. It kámá hára árángga kungkung ma táindaráng.

<sup>8</sup> “Rám kámá it káman hára kut watá heronge tángga sáhánga ku sungi ihángngáwáng sámineráng wa álo náineráng. <sup>9</sup> Hang ilalák mara waháranan wa iháng tolingga ku yánineráng, ‘Ánutu yan átkuku wu sáni ya tangtang átak,’ ingga yánineráng. <sup>10</sup> Iná it káman hára kut ma sáhát tu kung it wata kálná hára átang gu ing meineráng, <sup>11</sup> ‘It nátán káwak ká nán háram náni káin tápingga átaráng wa son nándá káting hiratne háek wawu sándá kangga ku ing narineráng, sándá ma náharáng wawu kandák táeráng. Hang kándáng hánám ing narineráng, Ánutu yan átkuku wawu enanggon átak,’ ingga yánineráng. <sup>12</sup> No ing sánin, máriya rám kálu it Sodom bá mápamá suwinek wawu maming táwi yon, enendu it watá mápamá suwinek wawu wa táng hátimek.

<sup>13</sup> “Ukuro táwi, ámna náráwa it Korasin me it Betsaida nan! No ket tárák sándán káin há táut, enendu sándá pahán hurik ma táuráng. Iná no ket tárák sándán káin táut wáinanyon Tair me Saidon dán ámna náráwa káin táe ináku uláppon pahán hurik há tángga ukuro yan lap wáik wa tánggánengga kuhi kuhánga átgálat. <sup>14</sup> Rám Ánutu yá narek ngá wahára, ámna náráwa yá me hára átneráng wawu Tair me Saidon dá mápamá suwinemálák wawu maming táwi yon, enendu sándá mápamá suwineráng wawu wa táng hátimek. <sup>15</sup> Iná it Kapaneam bu Ánutu yá iháng áráng alek káin tinek me? Wa muná yon, wawu iháng hang káráp lánggop káin tinek.

<sup>16</sup> “Niyá sándán me narinek wawu nákkán me narinek, iná niyá sándá taktak minek wawu náka taktak minek, hang náka taktak minek wawu niyá nák suring namuk wata taktak minek.”

<sup>17</sup> Wáina yánán ámna 72 Jesu yá suring yámuk watá kuráng ngáyá son heronge hánám áwánga miuráng, “Táwi, kák kutya hára yánátne iruk wáik ká nándán me naránga isutkiuráng.”

<sup>18</sup> Wáina inát Jesu yá yánuK, “No kangngáre Satan dá alek káin átnárán Ánutu yá isurán pikpirik ká sokmuná hánám hangngátak wáinanyon rákitang háuk. <sup>19</sup> No háláng wa há sámut wawu sándá kunap me utni yan kálung wa álo yáreng kátkámút táineráng, káman dá ma sángeindák. Iná háláng nukngá sámút wawu káyam sáni Satan dán háláng wa táng hang tineráng, me náut kámá káman dá sáháng lem ma táindák ka. <sup>20</sup> Kulá sándá ku iruk wáik ká nándán milun suweráng ingga heronge ma táindaráng, ináku Ánutu yá kut sáni alek káin papianá káin uyiuk wata heronge narineráng.”

<sup>21</sup> Rám wahára Iruk Káungá watá Jesu táwi hánám imáng rosingga árán málám pahálá heronge naránga ku ing miuk, “Nan, alek me káwak kán Táwi, no kutya meng tárut táin, náuta ko me álo kámá ná ámna álosim nanará pálak átaráng wata kilak ting yámánga ku niyá nange kimo yá ina átaráng wa yálenggoelák. Nan, pálipuk ko kangán nanará isutang wáina tánggoelák.”

<sup>22</sup> Jesu yá wáina inánga ku ing miuk, “Nanna yá nanará me háláng wawu kámuk hánám iháng nák ketna hára tiuk. Ni kámá káman dá Nange wawu wa ingga ma naráng mák, ináku Nan dá ku naráng mek, hang ni kámá káman dá Nan wawu ma naráng mák, ináku Nanggená watá ku naráng mek me ámna náráwa nini Nanggená yá yáliuk watá ku naráng meráng.”

<sup>23</sup> Kulá son hurik tángga disaepelná yáni re yánuK, “Sándá náut kanggoeráng wa ámna náráwa kámá yá káineráng wahára wu watá heronge narineráng. <sup>24</sup> No ing sánin, uláp profet me king áturáng watá sándá náut kanggoeráng wa kanin ingga naránggiuráng, enendu ma kanggiuráng, hang sándá me rina narángoeráng wa naránin ingga tánggiuráng, enendu ma naránggiuráng.”

*Samaria nan ámna álosim káman da me táráknká yánuK*

<sup>25</sup> Rám káman lo yan nanará ámna káman dá Jesu ingirunggin ingga tárutang inuk, “Tiksa, no rina tángga ku átkuku álosim sásáliná muná wa táinet?”

<sup>26</sup> Wáina inán Jesu yá inuk, “Meng rákit mená káin rina uyená yá átak? Rina sángingga naránggátalák?”

<sup>27</sup> Jesu yá wáina inán du lo ámna watá miuk, “Táwi Ánutu wata pahála yot, irukka yot, hálánga yot me nanaráka yot kikiná hánám wa narinelák.\* Hang ‘kaya kikiná naránggátalák wáinanyon nange nukka yá kikiná narinelák.’†”

<sup>28</sup> Wáina men Jesu yá inuk, “Kándáng hánám wa melák. Wáina tángga ku átkuku álosim wa táinelák.”

<sup>29</sup> Jesu yá wáina inán du lo yan nanará ámna watá Jesu yá nanaráná kandák ingga nahiwon ingga ku son inuk, “Meng rákit mená yá nukna yá mek wawu nukna ku ni?”

<sup>30</sup> Wáina inán du Jesu yá inuk, “Ámna káman dá Jerusalem káin átang gu Jeriko káin kung háin ingga kungngarán manek mara yá ket táuráng. Wáina tángga táup utang lap tánggániuk wa yaling mánga kutná kutná ná erek iháng mánga yáni wu sangga kut kálu hára wa hála kámutang átkiuk. <sup>31</sup> Wáina árán pris káman du kálu wanyon isutang kung háuk ngáyá hang wáina kangga málám kálu tákto numkálu kang yálingga háná kuk. <sup>32</sup> Kang yálingga kun son tombong Liwai‡ waháranan káman dá kálu wanyon kungga wáinanyon árán káuk, enendu kang yálingga kálu tákto numkálu kungga háná kuk. <sup>33</sup> Kulá Samaria nan ámna káman dá áwánga ámna watá átuk wahára áwáng hengga kangga uráknká naránga <sup>34</sup> rupmá tangtang kungga ámna wata putulá káin oel yot wáin§ kuling mánga ku putulá wa hárot muk. Wáina tángga ku málám ámna wa táng hip tángga táng málámbán donki ketnán tingga táng kung lumbu it káman hára tingga ku kándáng hánám pinná táuk. <sup>35</sup> Kulá tembátnáya ku sup silva táulá yará iháng lumbu it wata márúmá wa imánga ku inuk, ‘Ámna ná kándáng pinná tángga átnelák. No son áwánga ku sup kátu rina kakán hára ámna ná háláng mámáya sáinelák wa topmá kaminet.’”

<sup>36</sup> Wáina meng hálingga ku Jesu yá nanará ámna wa inuk, “Ámna kaláhu waháranan du retá ku ámna manek mara yá uturáng wa kangga nuk táng muk?”

<sup>37</sup> Wáina inán nanará ámna watá miuk, “Ámna retá uráknká naránga háláng muk wa.”

Ing men du Jesu yá inuk, “Ko kungga ku tárak wáinanyon táinelák.”

*Jesu yá Mata káling Maria yan it káin kuk*

<sup>38</sup> Jesu yá disaepelná yot kungga it káman hára kung het tu it waháranan náráwa káman kutná Mata watá Jesu engotang itná káin kuk. <sup>39</sup> Náráwa wata yitná kutná Maria watá ku áwáng Táwi hárammá hulá hára putung átang me rina menggatuk wa káramatingga átuk. <sup>40</sup> Kulá Mata wu sungi tiktiyawik tánggatang káuk ku yáup pá táwi hálen wata naránpak

\* 10:27: Lo 6.5 † 10:27: Pris 19.18 ‡ 10:32: Tombong Liwai wawu Táwi yan it káungá hánám watán yáup ámna, hang pris hányon háláng yámánga yáup tángngátaráng. § 10:34: Kuram yáni ya ku oel yot wáin wa wáina kuling yámánggiuráng.

tánga ku kung Jesu inuk, “Táwi, yitna yá nepman na rewe sungi tiktiyawik wa tánga átát, kák ka wawa kanggoelák me? Ko inátá kámá háláng namik!”

<sup>41</sup> Wáina inán du Táwi yá inuk, “Mata, Mata, kák ku kutná kutná táup hánám wata naránpak tánga pahán maráp táelák. <sup>42</sup> Ináku káman da re narinelák. Maria yá náut tátáya átak wawu álo kámá hánám, wawu táng sat kukuyan du muná.”

## 11

*Jesu yá sáponga tátáya yánuk  
(Mat 6.9-15; 7.7-11)*

<sup>1</sup> Rám káman Jesu málám ále ore káman káin átang sáponga táng hálín du disaepelná káman dá inuk, “Táwi, sáponga tátáyan káluná kámá nánáng toling, Jon dá disaepelná yánáng toliuk wáinanyon.”

<sup>2</sup> Wáina inán du Jesu yá yánuk, “Rám sándá sáponga tánga ku ing mengguineráng:

‘Nan, kutya yá káungá hánám wa átkuinek,

kákkán átkuku watá nándán káin áwinek.

<sup>3</sup> Rám káman káman dán sungi wa málámbán málámbán námángguinelák.

<sup>4</sup> Ko nándán kandák wa kátu náni sáinelák,

náuta nándá kámá yá kandák rina táng námená wa kátu yáni sangngátaman wáinanyon.

Ko metá ingirungngingi yá nándán káin ma tunggafeindak.’ ”

<sup>5</sup> Wáina mengga ku ing yánuk, “Sán háranan káman dá yáung táitná hánám kung nukngá káman inánggim, ‘Nukna, másáng kaláhu namáng, <sup>6</sup> náuta ámma nukna káman dá kálu mulangán áwánga nákkán káin áwek, enendu no sungi káman táng wa imómayan du muná.’

<sup>7</sup> “Kulá wáina inán du nukngá it kinan káin átgim watá ku inánggim, ‘Ko nák yáup ma namindalák. Kálu káto tánga nángánanggena yot kome káin há ruruháya tánga átamán. No tárutang náut kámá káman ma kamindát,’ ingga inánggim. <sup>8</sup> No ing sánin, it márurá watá tárutgim ngáyá ku kutná kutná nukngá yá náuta naránpak wa erek ingmen imónggim. Watá nukna háláng imin ingga ma imónggim, ináku nukngá watá áwáng sonson mantáng mángga átnát wata taktak mán du wáina tánggim.

<sup>9</sup> “Wata ku no ing sánin, Táwi inát tu sáminek, sulingga ku káineráng, károk károk kátit tu kálu yaling sáminek. <sup>10</sup> Ámma niyá Ánutu inángngátaráng watá ku páliná kangngátaráng, ámma niyá sulingngátaráng watá ku kang tunggap tángngátaráng, hang ámma niyá kálu hára kátíngngátaráng watá ku Ánutu yá kálu yaling yámángngátak.

<sup>11</sup> “Ámma káman dá ku nanggená yá káut ta inán da kunap pa álo imónggim? <sup>12</sup> Me nanggená yá hurák tunggulá ya inán da naning gá utni yan kálung ga álo imónggim? <sup>13</sup> Kulá nangge nanan yáni sándu kandák táwi hánám tángngátaráng, enendu nángánangge sáni yá náut álosim ba sánát tu há yámángngátaráng. Iná Nan sáni alek káin átak wawu álosim hánám, niyá inán Iruk Káungá wa imómayá wu heronge hánám naránpak.”

*Jesu yá Belsebul yot yáup táek ingga meng muráng  
(Mat 12.22-30; 12.43-45; Mak 3.20-27)*

<sup>14</sup> Kulá ámma káman iruk wáik ká tán mená ma me tángngátak watá átnarán, iruk wáik wa Jesu yá isurán du ámma wa sangga kun du ámma watá kándang hánám meme tánga árán kangga ámma náráwa yá háramuturáng. <sup>15</sup> Iná kámá yá ku miuráng, “Iruk wáik táwi yáni Belsebul watán háláng hára iruk wáik wa yásutkoek.” <sup>16</sup> Hang kámá yá ku ingirungngingga ináng sulitne tárák kámá tán kangga wawu alek káinnan me muná ingga kakaya wahára átang ináng suliuráng.

<sup>17</sup> Jesu málám pahán yáni káin wáina átak ingga há naránga ku yánuk, “Káwak káman hára árená yá yáni yon honhoren tánggalát wawu káwak watá wáik hálénggim. Hang amba káman hára árená yá yáni yon honhoren tánggalát wawu amba watá kándang ma átgim. <sup>18</sup> Hang Satan dán tombong gá yáni yon honhoren tánggalát wawu rina tánga ku kutná kutná yáni watá kándang átgálát? No ná met wawu náuta sándá no Belsebul yan háláng hára ku iruk wáik yásutkoet ing meráng wata. <sup>19</sup> No Belsebul yan háláng hára iruk wáik wa yásutkoet hálendu sándán tombong gá ku niyan háláng hára iruk wáik yásutkoeráng? Sánin tombong watá yon du hulá sáni yalineráng sánin me wawu kandák ingga. <sup>20</sup> Iná no iruk wáik wa Ánutu yan háláng hára yásutkoet hálén wawu Ánutu yan átkuku watá sándán káin há áwek.

<sup>21</sup> “Ámma hánghálángngá káman dá kutná kutná máta ángarángngá ihánga itná pinná tánga kandingga átgim wawu kutná kutná itná pahálá kinan watá kándang re átgim. <sup>22</sup> Iná ámma káman hánghálángngá hánám watá áwáng it márurá watyot erawánga watá re hahatinggim hára wu náut máta ángarángngá háláng imómayá ihánga átgim wa iháng mángga itná kinan kutná kutná ná wa horengga iháng mánggalát.



<sup>23</sup> “Káman ni nák nukna muná wawu nák neháng káyam tángngátak, iná káman niyá nák háláng namánnga ámna náráwa iháng urum ma tingngátak wawu yásurán hangga káman káman kungngátaráng.

<sup>24</sup> “Rám iruk wáik ká ámna nangge sangga kungngátak wahára wu kungga ále manmanná káin rehára átnet ingga kome ya sulingngátak. Sulingnga átkun men du, ‘Satá son kungga it sangga áwut wakáin yon árin,’ ing mengngátak. <sup>25</sup> Wáina mengga málám áwánnga kangngátak ku ámna sangga kuk wata pahála wawu it pahála ina sinsin hiratang kutná kutná it kinan wa iháng tolingga kándáng tená wáina. <sup>26</sup> Wáina hálendu málám kuinek ngáyá kung iruk wáik 7 watá mukmuro táwi hánám tángngátaráng wa kápánnga yángotnáváng gu kung hang átnéráng. Kulá wahára ámna watán átnát wa káinelák ku huphuráp átkiuk wa táng hátingga wáik hánám háleinek.”

<sup>27</sup> Jesu yá me wa menggatuk wahárayon du ámna náráwa urum táwi orek yáni kinan káin náráwa káman dá mantáuk, “Náráwa niyá kák keháng tiuk me muk kamuk watá heronge hánám átang átkuinek.”

<sup>28</sup> Wáina mantán Jesu yá miuk, “Wáina muná, ináku ámna náráwa niyá Ánutu yan me wa naránnga isutang átang átkuineráng watá heronge hánám átang átkuineráng.”

*Ámna yá tárák kámá tátá kanin ingga Jesu inuráng*

*(Mat 12.38-42; Mak 8.12)*

<sup>29</sup> Ámna náráwa yá uyingga Jesu yan káin emá re áwánnga árát tu Jesu yá yánu, “Rám nátán ámna náráwa wawu wáik hánám, watá ku tárák ká tunggafen kakaya re menggoeráng, enendu kámá ma káindaráng, iná tárák káineráng wawu profet Jona yan wa. <sup>30</sup> Uláp Ánutu yá tárák Jona hára Niniwe ámna náráwa yáliuk, wáinanyon du Ámna Nanggená hára Ánutu yá rám nátán ámna náráwa wa yáleinek. <sup>31</sup> Rám Ánutu yá ámna náráwa iháng me hára titiyan rám bá áwinek wahára wu Kuin káwak ámuta káinnan watá tárutang rám nátán ámna náráwa yan ket tárák wáik wata meng tunggap táinek. Kuin wawu it mulangán hánám káinnan Solomon dá nanaráná álosim wa men narín ingga áwuk, enendu ámna káman Solomon torong káin átak wawu nahára há átak, watán me wawu ma narángguráng. <sup>32</sup> Ánutu yá ámna náráwa iháng me hára titiyan rám hára wu Niniwe ámna yá tárutang rám nátán ámna náráwa watán ket tárák wáik wata meng tunggap táineráng, náuta Niniwe yá ku me Jona yá meng tunggap táuk wa naránnga pahán hurik há táuráng, enendu ámna káman Jona torong káin átak wawu nahára há átak, watán me wawu ma narángguráng.”

*Sut náni yan lam*

*(Mat 5.15; 6.22-23)*

<sup>33</sup> Jesu yá ing miuk, “Ámna káman dá lam kasingga táng susuná káin ma tingngátak, me táng baket kinan káin ma tingngátak. Ináku táng tutuhána hára tuhánnga san árán du niyá it kinan áwinek watá ku yamá wa káinek. <sup>34</sup> Rahála wawu sutya watán lam, rahála watá álosim átnek wahára wu sutya kámuk hánám wawu yamá yá átnek, iná rahála yá wáik háleinek wahára wu sutya kámuk hánám páyung tingga átnek. <sup>35</sup> Wata ku kándáng hánám átnelák, ko páyung watá kaya kinan árán yamá yá naya kinan átak ingga narilon. <sup>36</sup> Iná yamá yá sutya kámuk hánám wata kinan átnek wahára wu sutya kátu káin páyung gá ma átnándák, ináku lam yamá yá ka hára yamá mangga átnándak wáinanyon átnelák.”

*Jesu yá Farisi yot lo yan nanará ámna wa me táng yámuk*

*(Mat 23.1-36; Mak 12.38-40; Luk 20.45-47)*

<sup>37</sup> Kulá Jesu yá me wa erek meng hálín du Farisi káman dá nákkán it káin sungi nandin ing inánnga kumálák watá kung Jesu yá tebol hára putung átuk. <sup>38</sup> Wáina átang gu Jesu yá ketná kálak ma yawolená sungi nangga árán kangga Farisi watá háramutuk.

<sup>39</sup> Wáina háramurán kangga Táwi yá inuk, “Farisi sándán ket tárak wawu kap me tera sutná káin re yawolát, pahán yáni káin konep pá ku há átnándaráng wáina. Sáni wu sut sáni káin re yawonándaráng, iná pahán sáni kinan du kápáng naknarák me wáik wáina watá táwi hánám átnándak. <sup>40</sup> Sán du hohoná! Ánutu yá kep káin sáháng tolingga ku kinan kálu ma hám sáháng toliuk? <sup>41</sup> Náutá tera kinan átarang wa iháng niyá ukuro átarang wa yámát tu kutná kutná yá Ánutu rahála hára rongrongngá re átsámineráng.

<sup>42</sup> “Farisi sán du ukuro táwi narineráng, náuta hái káinnan tának me sungi táng kikik tátáyan wawu horet 10 hálén urum káman táng Ánutu ya ting mángngátaráng, enendu nangge nuk sáni háláng yámamá yot Ánutu ya pahán káin kikiná nanará wawu sangngátaráng. Ket tárák ná ma sáindaráng, ináku wa há tángga átang gu kutná kutná hohoreyan mek wa hányon isutneráng.

<sup>43</sup> “Farisi sán du ukuro táwi narineráng, náuta miti itná káin du tongtong máta káin átnát ta naránggátaráng, me urum komená káin du ámna kámá yá sáhángga heronge táng sásámá wata naránggátaráng.

<sup>44</sup> “Ukuro táwi narineráng, náuta sán du tanggán hára keho ma hená ina árát ámna yá wata ketnán ma kápená kung áwáng tánggátaráng.”

<sup>45</sup> Jesu yá me wa yánan lo yan hulá nanará káman dá Jesu ing inuk, “Tiksa, ko Farisi me wa yánángga ku nánda yanyawon hányon táng námángoelák.”

<sup>46</sup> Wáina men Jesu yá miuk, “Iná sán lo yan hulá nanará, ukuro táwi narineráng, náuta márappmá táwi ma susuwayan wa ámna náráwa yámángga ku ket sáni táng hip tángga kimo ma háláng yámánggátaráng.

<sup>47</sup> “Sán du ukuro táwi narineráng, náuta táwi ilom sáni yá profet ráháng kátkámut táuráng watán tanggán wa tánggáneng sat álosim hánám árán du <sup>48</sup> kálu wahára wu ámna rahán yáni hára táwi ilom sáni yá profet ráháng kátkámut táuráng wawu álosim ingga naránggoeráng, wata ku watán tanggán wa tánggánenggoeráng. <sup>49</sup> Wata ku Ánutu yá málámbán nanará me kálu kándáng wahára kungga ku ing miuk, ‘No profet yot aposel suring yáme sándán káin kut tu kámá ráháng kátkámut tángga ku kámá iháng lemlem táineráng.’ <sup>50</sup> Wáina wata ku hulátangga Ánutu yá káwak táng tunggap táuk hára átang áwáng rám nahára ámna yá profet ráháng kátkámut táuráng watán márappmá wu rám nátán ámna náráwa sányot átnék. <sup>51</sup> Uláp profet ráháng kátkámut táuráng, wawu hulátangga Abel hára átang áwáng Sekaraia ni Táwi yan it káungá hánám bot tingnaknak orek yándi hára utkámut táuráng†. Kulá watán márappmá táwi wawu rám nátán ámna náráwa sányot átnék.

<sup>52</sup> “Lo yan nanará ámna sán du ukuro táwi narineráng, náuta kálu mungnga hutang kung hang nanará álosim tátá watán ki wawu sándá há táng sat kuk. Sáni kung ma háená átkoeráng ngáyá ámna náráwa kámá yá kung hanin ingga tángngárát tu sándá kálu susuwá táng yámángoeráng.”

<sup>53-54</sup> Kulá Jesu yá wáina yánáng hálíngga ku it wa sangga kuk. Wahára átang hulátangga ku Farisi yot lo yan hulá nanará ámna watá Jesu ya pahán káráp táng mángga ingirungngitne me kandák kámá men kangga ku táng me hára tinin ingga sonson ináng suksulik tángga átang áuráng.

## 12

*Háleng rákit tángga átnát ta Jesu yá yánuk  
(Mat 10.19-20,28-33; 12.32)*

<sup>1</sup> Rám ore waháranyon ámna náráwa táup hánám rina kámá tausen watá áwáng kik hánám átang kámá yá kámá ya háram yáni ketnán tandaren tángga árát tu Jesu yá disaepelná kálak ing yánuk, “Farisi yan yis wata kándáng hánám háleng rákit tángga átkuineráng. Táwi ya naráng háting memán ing mengngátaráng, enendu pálipuk hánám bu Táwi ya ma naráng háting mánggátaráng. <sup>2</sup> Me kámá tum táená wawu hiták háleineráng, hang me kámá kilak átaráng wawu hiták narineráng. <sup>3</sup> Iná me rina kilak sándá menggoeráng wawu ámna náráwa kámuk ká hiták narineráng, hang me rina me kotkot kálu káráman hára re it kinan met naránggoeráng wawu it kapme hára átang hahatingga meng tunggap tát ámna náráwa yá narineráng.

<sup>4</sup> “Yanuknukna, no ing sánin, káman niyá káwak sut re utkámut tángga máríná káin rina kámá kámá ma táindák wata ma pitáindaráng. <sup>5</sup> No niya pitáng minéráng wa hiták sánin, wawu niyá káwak sut utkámut tátá me sáháng sup pora káin hিরán hahayan háláng watá watyot átak. Wata ku pálipuk hánám ing sánin, wata pitáng minéráng. <sup>6</sup> Ámna yá iráp isikikimo 5 wawu supmá háená hánám bá yungngátaráng, enendu Ánutu yá iráp waháranan káman da ma kalot mángngáatak. <sup>7</sup> Iná sándu iráp isikikimo wa iháng háteráng. Hang yáin sáni rommá wawu salená wáina ingga Ánutu yá há narek, wata ku ma pitáindaráng.

<sup>8</sup> “No ing sánin, káman niyá málám ba Jesu yan tombong hára átat ingga ámna náráwa yánáng kuinek wawu Ámna Nanggená yá wáinanyon Ánutu yan angelo rahán yáni hára wawu nákkán tombong ingga meng tunggap táinek. <sup>9</sup> Iná ámna káman dá málám ba Jesu yan tombong hára ma árát ingga ámna náráwa yánáng kuinek wawu no wáinanyon wawu nákkán tombong muná ingga Ánutu yan angelo rahán yáni hára meng tunggap táinet. <sup>10</sup> Hang ámna káman dá Ámna Nanggená ya sárum meme táinek wawu Ánutu yá watán kátu wa sáinek, iná káman niyá Iruk Káungá ya sárum meme táinek wawu Ánutu yá watán kátu wa ma sáindák.

\* **11:44:** Juda yan kálu wawu ámna káman dá tanggán ketnán yárengga kung áwáng táinek wawu Táwi rahálá hára wu rongrongngá muná. † **11:51:** Profet tán rám kálu hulátangga ku Abel utkámut táuk náyá áwángga áwáng Sekaraia wawu pukon da utkámut táuráng. Sekaraia yan pingnga wawu papia 2 Pingnga 24.20-22.

<sup>11</sup> “Iná ket sáhanga miti itná káin me kapman dán káin me ámna yáilá yan káin kung rahán yáni hára sáháng me hára tit tu me rina meinemán ingga naránpak ma táindaráng, <sup>12</sup> náuta Iruk Káungá watá rina meineráng wawu ráw wahárayon sáinnek.”

*Jesu yá ámna supmá pálak ká kálu kandák táuk ka me tárakngá yánuk*

<sup>13</sup> Wáina yánán urum táwi áturáng wata kinan káin ámna káman dá Jesu inuk, “Tiksa, nanna wu há kámutuk, wata ku tatna inátá ku nan dá kámutang kutná kutná yápmáuk ngá wa kátu horengga nák naminek.”

<sup>14</sup> Wáina inán Jesu yá inuk, “Nukna, niyá ku sándán me nanará ya nák neháng tunggap táuk ka ku no ore hára átang sándán kutná kutná wa horeng sámínet?” <sup>15</sup> Wáina mengga ku ámna náráwa ing yánuk, “Kándáng háleng rákit tángga átneráng. Kutná kutná wa kápánga kápáng naknarák tánirot. Kutná kutná ka táup hánám enendu kutná kutná watá háláng kamát kung átkuku wa ma táindálák.”

<sup>16</sup> Hang me tárakngá ing mengga yánuk, “Ámna supmá pálak káman dán hái yá pálná táwi hánám wa tingga árán ingga <sup>17</sup> málám ing naruk, ‘Rina táinet? Kome kámá sungi wa iháng titiyan kámá ma árak.’

<sup>18</sup> “Wáina naránga átang gu ing naruk, ‘Wata ku ing táinet, sungi itná isikikimo átaráng wa erek yalingga ku son sungi itná maming tátáwi táinet. Tángga ku sungi me ále kutná kutná na wa iháng wata kinan tinet. <sup>19</sup> Wáina tángga ku nayon na ing ininet, ‘Kák ku kutná kutná ka álosim táup hánám átyameráng watá háláng kamán yara táup hánám wáina átnélák. Kula wu sek naránga átang ráwá ráwá sungi tátáwi sinangga heronge torong hára átnélák.’”

<sup>20</sup> “Wáina naruk enendu Ánutu yá inuk, ‘Kák ku ámna hohoná! Kula yáungán nahára ku há kámutnelák. Iná wáina tátá ku kutná kutná táwi tiyawingga satá nakán ingga átak wawu niyá ihinek?’”

<sup>21</sup> Wáina mengga ku Jesu yá ing yánuk, “Káman niyá kutná kutná me supmá táwi hánám iháng urum ting san átmínek, enendu Táwi yan kálu ma naráng hátingngátak, wata ku Ánutu rahálá hára ku kutná kutná ná muná hánám, ámna sup mara yá hohiuk wáinanyon hohinek.”

*Naránpak ma tátáya Jesu yá miuk*

*(Mat 6.25-34)*

<sup>22</sup> Wáina yánánga Jesu yá disaepelná ing yánuk, “Wata ku átnát sáni álosim ba ma naránpak táindaráng, me sungi náut náinémán me sut náni káin náut tánggáinémán ingga ma naránpak táindaráng. <sup>23</sup> Átkuku álosim wawu sungi natne háláng námán átnándamán wáina muná, hang káwak sut watá ku kutná kutná sut tánggáene wa táng hátek. <sup>24</sup> Iráp otot wata narániráng. Sungi kámá ma hingngátaráng me sungi kámondang titiyan it yáni kámá ma árak, enendu Ánutu yá sing yámángngátak, iná ámna náráwa sándu Ánutu rahálá hára wu kutná táwi hánám iráp wa iháng háteráng. <sup>25</sup> Iná sán háranan káman dá rina tángga ku kándáng átnet ingga naránpak tánggim wawa naránpak ngá watá háláng imán átnát ná wa ráw kimo sengsáráp tán hásák áronggim me rina? Wawu muná hánám. <sup>26</sup> Wata ku sándá isikimo wa mek wáina wa ma tátáyan wawu náuta ku sándá kutná kutná kátu wata naránpak tánggoeráng?

<sup>27</sup> “Sándá álesak yuminá wata narániráng. Yáup kámá ma tángngátaráng, me lap kámá ma iháng tolingngátaráng, enendu, no ing sánin, uláp King Solomon dá lap álolosim hulá hulá hánám iháng sutná tánggánenggiuk wawu álesak watán kolema watá wu Solomon dá tánggánenggiuk wa táng hátek. <sup>28</sup> Ále kánang wa átaráng wawu tembát ámna yá maránga káráp sineráng. Ále kánang hánámá, enendu Ánutu yá iháng tánggáneng yámángngátak, iná sándu pálipuk hánám Ánutu yá hányon sáháng tánggáneng sámínek. Náuta tángga ku naráng hákhátik sáni wawu isikimo? <sup>29</sup> Iná sándu sungi náut náinémán me umi náut náinémán ingga naránpak me nanará yáup táup ma táindaráng. <sup>30</sup> Káwak ketnán ámna náráwa Ánutu ma naráng maráng watá ku kutná kutná wáina kápáng tunggap tátáya naránpak tángngátaráng. Iná sándu Nan sáni yá ku náuta kesák táeráng wawu há sáhanga narángngátak. <sup>31</sup> Wata ku sándá Ánutu yan átkuku wata sulineráng ngáya ku kutná kutná wata kátu hányon sámínek.

<sup>32</sup> “Sándu sipsip tombong isikimo, Nan sáni yá málámbán átkuku wa sásámáya heronge narek, wata ku ma pitáindaráng. <sup>33</sup> Kutná kutná sáni wa yánát yuwát tu supmá wa iháng niyá watá kesák táeráng wa yáminéráng. Sándá ku sup tumá ma wáik hálengngátak” wata nan ihineráng, me alek kán kutná kutná álosim wa kánkámon tángga átkuineráng. Alek káin du kutná kutná yá ma wáik hálengngátaráng, me manek mara yá manek ma ihindaráng me

\* **12:33:** Sup tumá ma wáik hálengngátak wata hulá wu ámna káman dá málámbán sup wa Ánutu yan nanará isutang kálu kándáng hára yáup imánga átnek wawu alek kán sup tumá ina átnek.

yákárum bá ma iháng wáik táindárang. <sup>34</sup> Kutná kutná sáni kikiná rekáin átak wakáinyon pahán sáni yá wakáin átnék.

*Tiyawingga átang hákhálek tátáya mená  
(Mat 24.45-51)*

<sup>35-36</sup> “Sándu tiyawingga átang hákhálek tángga átkuineráng. Me tárakngá káman ing sánin, rám káman ket tántán tángga wata sinakngá tát ámna yáilá káman dá wakáin kunggim. Wáina kun yáup nanggená yá átang kup yáni kasingga lap yáni kándang tawánga yáup tátáya tiyawingga táwi yáni ya hálang mángga átgálat. Kulá táwi yáni watá son áwáng kálu káin károk károk kátinggim wahárayon du sokmuná ingmen árong kálu yaling mánggalát. <sup>37</sup> Rám táwi yáni watá áwáng hengga kápán yáup nanggená yá ma ruhená átgálat, wahára wu heronge naráng yámánggim. No pálipuk hánám ing sánin, táwi yáni watá lapmá kándang tawánga áwáng yáup nanggená wa yángotnáwáng tebol hára tingga málmábá sungi sing yámánggim. <sup>38</sup> Yáup nangge niyá ma ruhená tiyawingga átgálat wawu táwi yáni yá álosim naráng yámánggim. Árát táwi yáni yá yáung táitná me it háiháiya tángga átgim kálu áwánga há tiyawingga árát kápánggim wawu heronge tánggim. <sup>39</sup> Ing narániráng, it káman da márumá yá manek mara wa rám wahára áwínek ingga há naránggim, wahára wu rám márumá watá manek mara wa san áwáng itná káting márak tángga kung kinan ma hanggim. <sup>40</sup> Wáina wata ku sándá ku rámá rámá tiyawingga hálang rákit tángga átkuineráng, náuta Ámna Nanggená wu rám wahára áwínek ingga sán dá rám ma narená átnéráng rám wahára áwínek.”

<sup>41</sup> Wáina men Pita yá inuk, “Táwi, me tárakngá náwu nándán da re nánángoelák, me ámna kámuk kán da?”

<sup>42</sup> Wáina inán Táwi yá miuk, “Yáup pinná tátá niyá nanarána álosim tingga yáupmá kándang hánám tánggim, wawu yáup márumá yá yáup pinná tátá wa táng yáup nangge pin yáni tátáya tin yáup márumá yá rám tinggim wa re isutang sungi iháng yáup nangge yámánggim. <sup>43</sup> Yáup ámna wawu rám táwiná yá áwánga kan kándang hálanggim, wahára wu heronge tánggim. <sup>44</sup> Kulá no pálipuk hánám ing sánin, táwiná yá táng tin kutná kutná ná kámuk ingmen táng yáup ámna wata ketná hára tin watá pin yáni tánggim. <sup>45</sup> Iná yáup ámna watá málmábáyon du ing naránggim, ‘Táwina wu sokmuná ma áwindák,’ wáina naránga ku yáup ámna náráwa wa ráhángga árong sungi nangga umi káto nangga ku hohingim. <sup>46</sup> Wáina tánggim wawu táwiná watá rám káman yáup ámna watá ma tiyawená átgim me ma narená átgim wahára áwáng táup hánám utang táng ámna milun yayali táená watyot tinggim.

<sup>47</sup> “Kulá yáup nangge káman dá táwiná yan nanará káin du wáina ingga há naránggim watá kutná kutná ma tiyawinggim me táwiná yan nanará ma isutgim wawu táwiná yá táup hánám wa utgim. <sup>48</sup> Iná yáup nangge káman dá táwiná yan nanará wu wáina ingga ma narená ku márapmá susuwayan kálu wa isutgim wawu táwiná yá isikimo utgim. Káman niyá kutná kutná táup ihínek watá ku topmá táuppon tinek, iná Táwi yá kutná kutná táup hánám iháng káman da ketná hára tiuk hálendu inán kutná kutná táup hánám bon topmá imínek.

*Jesu yá áwuk wawu ámna náráwa yá honhoren tátáya  
(Mat 10.34-36)*

<sup>49</sup> “No háut wawu káwak káin káráp tángga háut. No káráp watá sokmuná rang háháleya naret. <sup>50</sup> Iná umi nukngá káman no kukuháyan átak wawu sut láwit nanará wa, wata pahánna yá márawingga árán átang kungga umi wa pukon kuhe sálikngínek. <sup>51</sup> No káwak káin háut wawu sándá ámna náráwa yá pahán káman átnát ta háuk ingga narángoeráng hám? Wawu muná. No ing sánin, nák ku ámna náráwa yá honhoren táineráng ga háut. <sup>52</sup> Rám kula átang áruínek hára wu it káman dá kinan 5 bá átang hálendu horengga yará háleínek. Kaláhu yá yará ya káyam táng yámát, yará yá kaláhu ya káyam táng yáminemálák. <sup>53</sup> Hang naning urim bá kámkáyam táineráng, maming urim bá kámkáyam táineráng, hang neng nambán dá kámkáyam táineráng.”

*Kutná kutná yá tunggafeineráng wata tárakngá ámna yá ma kang rákit táuráng  
(Mat 5.25-26; 16.1-4)*

<sup>54</sup> Jesu yá ámna náráwa urum táwi wa yánuk, “Sándá kanggarát káe yá kung haha kálu mukam bá tán du ing mengngátaráng, ‘Ále yá taindek,’ wáina mengngárát tu pálipuk ále yá há tangngátak. <sup>55</sup> Iná iruk ká ámuta kálu áwán du ing mengngátaráng ‘Ále yá álo kámá átnánde,’ wáina mengngárát tu pálipuk álo kámá átnándak. <sup>56</sup> Sándu ámna kusákgál! Kutná kutná káwak káin me alek káin tunggafenggoeráng gu há kang rákit tánggoeráng. Kulá rina tángga ku rám ore nahára áwánga tárak hulá hulá yá tunggafenggoeráng wawu ma kang rákit tángguráng?

<sup>57</sup> “Sándu rina tángga ku sáni yon kálu kándang gu resim ingga ma kang rákit tángguráng? <sup>58</sup> Iná ko ámna káman yot kámkáyam sim tángga keháng me hára tinán kálu hára kunggang gu, neháng me hára tiwon ingga sokmuná me táng tolinemálák. Me ma táng tolená kungngará keháng ámna me nanará wata ketná hára tiwon. Wáina tin watá keháng kalabus

pinná táená ketná hára tin son watá keháng kalabus it kinan tiwon. <sup>59</sup>No ing kanin, kák ku kalabus it kinan átang árongga sup rina titiya kanená wa erek ting háleinelák.”

## 13

*Ámna káman dá pahán hurik ma táindák wawu muná kuinek*

<sup>1</sup>Jesu yá me wa meng hálin du ámna kámá áwáng wahára áturáng watá Jesu ing inuráng, “Ánutu ya towet sing mámá ráma hára Pailat tá tewe ámna yánán Galili nan ámna kámá ráháng kátkámut tát sip yáni yá Ánutu ya towet sisiyan songgo sipmá ketnán yon háuráng.” <sup>2</sup>Wáina inát Jesu yá ing yánuk, “Sándá ku rina nareráng, Galili ámna wa ráhuráng watá mukmuro tángngátaráng, watá ku Galili ámna kátu yá mukmuro tángngátaráng wa iháng hátek ngáya ku marápmá watán káin wáina tunggafiuk hámm? <sup>3</sup>No ing sánin, wawu muná hánám! Iná sán niyá pahán hurik ma táindárang wawu tárak wáina watá yon sándán káin tunggafeinek. <sup>4</sup>Hang ámna 18 it háasák ká it yáilá Jerusalem kinan Siloam hára táwatang yáni ya ketnán hangga iháng usáng kátkámut táuk, wata sándá rina nareráng? Watán mukmuro watá ámna kátu Jerusalem káin áturáng wa iháng hátek me rina? <sup>5</sup>No ing sánin, wawu muná hánám! Iná sán niyá pahán hurik ma táindárang wawu tárak wáina watá yon sándán káin tunggafeinek.”

<sup>6</sup>Wáina yánangga ku me tárakngá káman ing yánuk, “Ámna káman dá wáin hái ore kinan káin káráp fik káman hinggim ba rám kámá ku páliná kámá átak me muná ingga kung áwáng tángga kanggim bu páliná kámá muná re. <sup>7</sup>Kulá rám káman du hái marumá watá kung hái pinná tángga átgim wa inánggim, ‘Yara kaláhu wata kinan káráp fik náta páliná kámá káin ingga kang hákhálek táe men sanggoet. Káráp ná hoseng satá háik! Náuta ku satne hánámá átang káwak karo nang hálingga átnék?”

<sup>8</sup>“Wáina men hái pinná tángga átgim watá inánggim, ‘Ámna hulána, satá yara káman nátyot son árán no hulá wa káwak pingga usáng pálák táinet. <sup>9</sup>Wáina táe yara nukngá ya páliná tin hálendu álo kámá! Iná muná hálendu wawu hoseng satne háinek.’”

*Jesu yá Sabat hára náráwa káman táng toliuk*

<sup>10</sup>Rám káman Sabat hára Jesu wu miti itná káman da kinan ámna náráwa me yánang tolingga átkiuk. <sup>11</sup>Kulá wahára náráwa káman iruk wáik ká táng lem tángga árán yara 18 háliuk watá hányon átuk. Iruk wáik watá táng lem tán turingga re átkiuk, kándáng átnát tán tárak ku muná. <sup>12</sup>Jesu málám wáina kangga ku mantán áwán inuk, “Náráwa, no keháng tole ilalákka yá álo háleindek.” <sup>13</sup>Wáina inángga ketná kálandang sutná hára tánggan wahára re ilalákngá watá pukon álo hálen áráng kándáng átang Ánutu kutná mengga heronge táng muk.

<sup>14</sup>Jesu yá wáina tán kangga miti itná yan ámna yáilá watá Sabat hára wáina táek ingga kuk táwi tángga ámna náráwa wa yánuk, “Yáup tátáyan rám bu 6 rewe Táwi yá iháng tunggap táuk, wahára áwát tu wáina sáháng tolingguinek, iná Sabat hára wu muná.”

<sup>15</sup>Wáina yánán Táwi yá ámna yáilá wa inuk, “Sándu ámna kusáknngá! Sabat hára kumbi sáni káin kung bulmakau me donki sáni páup yáni yaling yámangga yángot kung umi yámát nangngátaráng. <sup>16</sup>Iná náráwa náwu Abraham uriwa. Satan dán hálang gá káto táng san yara 18 átuk. Kulá no iruk wáik ká wa káto tángga árená wa Sabat hára yaling mámá wawu muná me rina?”

<sup>17</sup>Jesu yá wáina yánuk hára wu káyammá ingga wawu rep yáni wáin áturáng, iná ámna náráwa táwi watá ku náut álosim tángngátak wata heronge tángga áturáng.

*Jesu yá mastet táulá yot yis wahára me tárakngá tingga yánuk*

*(Mat 13.31-33; Mak 4.30-32)*

<sup>18</sup>Jesu yá ing miuk, “Ánutu yan átkuku wawu náut ina? Náut hára mengga tárak te ku kándáng háleinek? <sup>19</sup>Ánutu yan átkuku wawu mastet táulá ina. Mastet táulá wawu isikimo hánám. Ámna káman dá táng kung háiná káin halin árángga kungga maming táwi hálengga árán du iráp pá áwáng ketná palá hára ep tángga átnándaráng.”

<sup>20</sup>Hang son yánuk, “Ánutu yan átkuku wawu náut hára tárak tingga me ku kándáng háleinek? <sup>21</sup>Wawu yis ina, náráwa yá yis táng flaua táwi hánám watyot iháng yakyawák tángga árát kungga flaua watá tihangngátak.”

*Kálu mungga isikimo*

*(Mat 7.13-14,21-23)*

<sup>22</sup>Jesu yá Jerusalem kuin ingga it tátáwi me it isikikimo kálu hára árená wakáin Táwi yan me pingga wa yángyánang gu Jerusalem ba kuk. <sup>23</sup>Wa kunggatuk wahára wu ámna káman dá ináng suluiuk, “Táwi, Ánutu yá ámna káman káman re wu son ihinek hámm?”

Wáina inán Jesu yá yánuk, <sup>24</sup>“Sándu hánghálangngingga hánám bon du kung kálu isikimo hára wa kung háineráng. No ing sánin, táup hánám watá kung hahaya táineráng enendu ma kung háindárang. <sup>25</sup>Rám it marumá yá tárutang kálu káto táinek wahára wu sándu áwáng

kep káin átang kálu káin károk károk kángkáting kikilik ing táng mineráng, ‘Táwi, kálu yaling námáng.’

“Enendu watá ing sáinek, ‘Nák ma naráng sámát. Sándu rekáinnan?’

<sup>26</sup> “Wáina sánán du inineráng, ‘Nándu kákkot umi sungiangga áwánggiunmán, hang kák ku nádán it kapme hára me pingnga nánáng tolingga áwánggiulák.’

<sup>27</sup> “Wáina inineráng, enendu watá ing sáinek, ‘Nák ma naráng sámát. Sándu rekáinnan? Nepmangga há sáni kuniráng! Sándu mukmuro táup hánám tángngátaráng,’ ingga sáinek.

<sup>28</sup> “Kulá hálangga káineráng gu Abraham, Aisak hang Jekop pot profet kámuk hánám bu Ánutu yan it kapme álosim káin wa árát. Iná sáni wu sáháng hirarán kung kep káin átang kutang mátap sáni kirikkárak tángga átneráng. <sup>29</sup> Ámna náráwa yá káe yá áráng hehe kálu, me káe yá kung haha kálu, me ánuta kálu, me ánuta kálu áwineráng ngáyá áwáng Ánutu yan átnát káin umi sinak táwi hára wa áwáng kome yáni ihánga átneráng. <sup>30</sup> Kulá me ná kándang narineráng, ámna kámá pukon káin átaráng watá máta káin átneráng, iná máta káin átaráng watá ku pukon káin átneráng.”

*Jesu yá Jerusalem ba uránga naruk*

*(Mat 23.37-39)*

<sup>31</sup> Rám wahára Farisi kámá yá áwurang ngáyá ku Jesu inurang, “Ále ná sangga ku ále kámá káin kuinelák, náuta Herot tá kák kutkámú tátaya mek.”

<sup>32</sup> Wáina ingga inát tu Jesu yá yánu, “Sándá kungga ku ang páyom wa ing inineráng, nák ku kula me tembát tu iruk wáik yásutang hang ilalák mara kámá iháng tolinet. Iná rám kaláhu átang gu yáupna wa táe sáliknginek. <sup>33</sup> Kula me tembát árongga wu há kuinet, náuta profet wawu it kámá káin árán ma utkámú táindaráng, ináku Jerusalem káin árán du wáina utkámú táineráng.

<sup>34</sup> “O Jerusalem, Jerusalem, ko profet ráháng kátkámú tángngátalák, hang Ánutu yá ámna suring yámán kákkán káin áwángngátaráng wawu ráháng kátkámú táin ingga sup iháng yáni ya mangngátalák. Rámá rámá nángánanggeka wa hurák ká nángánange yáni iháng urum tingngátaráng wáina tin ingga tánggoet, enendu watá ku taktak yámángoek. <sup>35</sup> Kaniráng, it sáni wu wáik hálangga hánamá átnék. No ing sánin, sándu son nák ma nahená átang kungga ing meineráng, ‘Ánutu yá ámna ni málámba kutná hára áwáng átak wa táng álolo táinek.’”

## 14

*Jesu yá Farisi káman dán it káin kung átuk*

<sup>1</sup> Rám káman Sabat hára Jesu yá Farisi yan ámna yáilá káman dán it káin kung watyot sungi nangga áturáng. Wa kung átuk hára ámna yá kandá kámá rina tán kanin ingga kangga áturáng. <sup>2</sup> Iná rám wahára wu ámna káman du ilalák sut tiháená wata nan pálak watá Jesu kondolá hára átkiuk. <sup>3</sup> Kulá Jesu málám Farisi me lo yan hulá nanará wahára áturáng wa ing yánáng suliu, “Sabat hára wa ilalák mara álo iháng totoliyon me muná?” <sup>4</sup> Wáina yánu, enendu watá mátan ma táená nángánanggeka árát tu Jesu málám ámna wa tángganga táng tolingga ku ámna wa inán háná kuk.

<sup>5</sup> Wáina tángga ku yánáng suliu, “Sán háranan káman dá kanggim bu nanggená ámnaná me bulmakauná yá Sabat hára hang umi árámmá pená kinan árán da rina tánggim? Rám waháranyan da álo táng satá áráng henggim me muná? Pálipuk hánám wáina wu há tánggim.”

<sup>6</sup> Wáina yánu, enendu watá topmá kámá ma inánáyan.

<sup>7</sup> Son hang Jesu málám ámna yá sinak hára sungi nanaya áwurang wa kápuk ku áwáng kome máta káin re átnát ta táup tát kápangga ku me táránga ing yánu, <sup>8</sup> “Rám káman ámna káman dá náráwa tátáyan sinak rámá hára mantáng kamán kungga ku kome máta káin du ma putung átkuindalák. Kome wa kámá ámna káman kák keháng hátingga átak kutná pálak wa mantáng mán áwinek watán há meng san áriwon. <sup>9</sup> Wáina árátá kahánga ku ámna sán yayará mantáng sámánggim watá áwáng kanánggim, ‘Kome wa ámna náta sang máng,’ ing kanán kák ku reprepmá táwi naránga kung kome mári pukon káin putung átgim. <sup>10</sup> Wáina wata ku rám wáina hára mantáng kamát wawu kung kome mári pukon káin putung átkuinelák. Wáina árátá ku sinak márúmá yá áwáng kahánga ku kanánggim, ‘Nukna, áwáng kome álo kámá káin ná álák,’ ing kanán du ámna náráwa káman átgálat watá kahát kutya pálak hálanggim. <sup>11</sup> Káman niyá málámba kutná tángga árinek wawu Ánutu yá kutná tángga háinek, iná niyá málámba kutná tángga háinek wawu Ánutu yá kutná tángga árinek.”

<sup>12</sup> Wáina yánángga ku ámna niyá sungi nanaya mantáng mán áwuk wa inuk, “Ko sinak tángga ku nukukka me tat kulakka me sipya kátu me kaya tangtang árená sup yáni pálak wa ma mantáng yámátá áwindaráng. Wáina táinelák wawu máriya watá son topmá mantáng kamát tu topmán topmán háleinek. <sup>13</sup> Ináku sinak tángga ku ukuro mara me sut yáni

wáik hálená me háram yáni wáik hálená me rahán yáni kotná, wa mantáng yámángguinelák. <sup>14</sup> Wáina tátá ku watá wata topmá ma kamindárang ga ku kuram bá kákkán káin áwinek. Wata topmá ku Ánutu yá máriya ámna kándang átang kámuturáng watá tanggán káin átang tárutneráng rám wakáin du kaminek.”

*Sinak maming táwi hánám ba me táráknká yánuk  
(Mat 22.1-10)*

<sup>15</sup> Wáina yánán naránga ámna káman tebol hára kámuk átang sungi nangga áturáng watá Jesu inuk, “Ámna náráwa niyá Ánutu yan átnát álosim kinan átang sungi náineráng watá ku heronge narineráng!”

<sup>16</sup> Wáina inán du Jesu yá ing inuk, “Ámna káman dá sinak táwi tátáya naránga ku ámna táup hánám bá áwáng sungi nanaya mantáng yámuk. <sup>17</sup> Kulá sinak ráma hánám wahára wu ámna watá yáup nanggená káman suring mán ámna yánang sáuk ngá watán káin kungga sungi wu há tiyawingga átak ingga yáinánuk kuk.

<sup>18</sup> “Kung yánánga kuk, enendu ámna watá erek hánám meng pilingga ‘nándu ma kuindámán’ ing mengga kuráng. Káman dá ku inuk, ‘Nák ku káwak kátu káman yuwát, wata ku kungga wa káinet. Wáina wata ku ukuro táwi, nák ku ma áwindát.’

<sup>19</sup> “Iná nukngá yá ku inuk, ‘Nák ku bulmakau 10 dá yáupna táng namineráng ga yuwát, wata ku kung wa iháng tárák tánga káinet. Wáina wata ku ukuro táwi, nák ku ma áwindát.’

<sup>20</sup> “Hang káman dá ku inuk, ‘Nák ku náráwa emá tánga átat, wáina hárendu ma áwindát.’

<sup>21</sup> “Wáina inát naránga ku yáup nangge watá son kuk watá kung táwiná sinak márumá wa wáina meráng ingga inán du kuk naránga yáup nanggená wa inuk, ‘Sokmuná ingmen it nátán kálu isikikimo me maming tátáwi káin kungga ukuro mara me sut yáni wáik hálená me rahán yáni kotná me háram yáni wáik hálená wa yángotang áwáng.’

<sup>22</sup> “Wáina inán yáup nangge watá kung rina inuk wáina há táng hálingga ku son áwánga inuk, ‘Ámna hulána, melák wáina há táet, enendu it pahálá wu ma tuwarak, kome wu along re átak.’

<sup>23</sup> “Wáina inán du sinak márumá watá inuk, ‘Kungga it kapme sangga kálu káin wa ni ámna me náráwa kápánga ku há hánám áwániráng ingga yánang pákpálák hánám tátá áwát nákkán it pahálá yá tuwarik. <sup>24</sup> No ing sánin, ámna huphuráp mantáng yámut waháranan káman dá nákkán sungi kátu káman ma hánám náindák.’”

*Kándang háting márák tánga naránga ku Jesu isutneráng*

<sup>25</sup> Ámna náráwa táup hánám watá Jesu isutang kungga árát tu málám hurik tánga ing yánuk, <sup>26</sup> “Káman niyá nákkán káin áwinek watá naning, maming, málámba áwá nanggená, tatning kulaná, málám ilommá me málámbán átnát ná wata ma taktak mindák, wáina watá nákkán disaepel ma háleindák. <sup>27</sup> Hang káman niyá málámbán maripong wa sungga tángatang nák ma nasutnándák, wáina watá nákkán disaepel ma háleindák.

<sup>28</sup> “Iná ámna káman dá it maming táwi tátáya wu wa táng háliyan sup pa álo átak me rina ingga kándang kangga san árán du it wa tánggim. <sup>29</sup> Iná wáina ma táená kumam kálak hiharán han tánga kungga kutná kutná kátu ya kesák tánga san átgim wawu kámá niyá áwáng wáina kanggalát watá ku ináng kekkek tánga <sup>30</sup> ing menggalát, ‘Ámna náwu it álo táng hálinet ingga táuk, enendu ma táng háliuk.’

<sup>31</sup> “Iná king káman dá king nukngá yot erawáwáya wu málám kándang hánám naránga málámbáyon ing menggim, ‘Nákkán tewe ámna wu 10,000 rewe, iná nukngá watán tewe ámna wu 20,000. Wawa álo erawánga táng hátnet me rina?’ ingga menggim. <sup>32</sup> Iná málám narán hálangngá muná hárendu wawu king nukngá watá mulangan yon árán pahán káman háháleya me san kunggim. <sup>33</sup> Kálu wáinanyon, sán háranan káman dá kutná kutná ná kámuk hánám wa ma sárum yámindák wawu nákkán disaepel ma átnándák.

<sup>34</sup> “Sol wawu álo kámá, iná kikngá watá sálikngin du son rina táng mátne ku kikngá pálak hálenggim? <sup>35</sup> Sol wáinaná watá hái káin sungi ma hálang yámán árang henggalát, me wa táng bulmakau kámulá yot táng hái káin ma tinggalát. Ináku susut káin táng hiharát kunggim.

“Káman niyá káramanná pálak hárendu watá me ná narinek.”

## 15

*Sipsip komená kangga márumá yá suling kung káuk ka me táráknká yánuk  
(Mat 18.10-14)*

<sup>1</sup> Kulá ámna takis iháhá yot mukmuro táená watá Jesu yá me men naránin ingga áwáng Jesu rupmá áwálák áturáng. <sup>2</sup> Wa kápánga Farisi yot lo yan tiksa watá pahán yáni wáik hálen ing miuráng, “Ámna náwu mukmuro táená wa iháng nuk tánga watyot sungi nanggoeráng.”

<sup>3</sup> Wáina met tu Jesu yá me tárakngá ing yánuK, <sup>4</sup> “Sán háranan káman sipsipmá 100 tá átmán máriya kanggim bu káman du komená. Wáina kangga málám 99 wa san ále rákit káman káin árat málám kung káman komená átgim wata suling kung suling kung kang tunggap tánggim. <sup>5</sup> Há kang tunggap tángga ku heronge nangnaráng táng pátángngán sungga tánggatang itná káin kunggim. <sup>6</sup> Kulá itná káin kung nuknukngá mantán áwát tu yánánggim, ‘Sipsipna káman komená káut wawu suling kung há kang tunggap táet, wata ku nákkot heronge tánin,’ ingga yánánggim. <sup>7</sup> No ing sánin, alek káin wáinanyon heronge táwi tunggafeinek wawu ráM mukmuro táená káman dá pahálá hurik táinek wahára. Pálipuk ámna 99 kándáng átang pahán hurik tátáyan tárak ká ma áraráng wata heronge táng yámámá wawu isikimo hánám, enendu mukmuro táená káman dá pahán hurik táinek wata herongená wawu maming táwi hánám.

*Sup táulá komená kangga suling kung káuk ka me tárakngá yánuK*

<sup>8</sup> “Náráwa káman dá supmá táwi hánám 10 waháranan káman komená kangga ku rina tánggim? Málám kup kasingga tánggatang it kinan sinsin híthirat tángga kahát hánám suling kung suling kung kang tunggap tánggim. <sup>9</sup> Há kangga sangga ku nuknukngá mantán áwát tu yánánggim, ‘No supna táulá káman komená káut wawu suling kung há kang tunggap táet, wata ku nákkot heronge tánin,’ ingga yánánggim. <sup>10</sup> No ing sánin, wáinanyon ráM ámna mukmuro táená káman dá pahálá hurik táinek wahára wu Ánutu yá angeloná yot heronge maming táwi táineráng.”

*Jesu yá nangge ámnaná yará ya me tárakngá yánuK*

<sup>11</sup> Hang Jesu yá waháranan sengsáráp tángga ing yánuK, “Ámna káman du nanggená ámnaná yará. <sup>12</sup> Kulá nanggená táwi ya kondolá háranan watá ku naning inuk, ‘Nan, náK ku ing naret, ko tatna yot nák nakán hára kutná kutná horengga námámáyan wa horengga nákkán pingnga wa namáng.’ Wáina inán du nan yándi yá kutná kutná wa horengga ting yámuk.

<sup>13</sup> “Rám kimo átang sangga kulaná yá kutná kutná málámbán pingnga ihuk wa yánán erek yung hálit tu supmá wa ihángga átang it táwi káman mulangán káin kuk watá kung ket tárak kandák hára wa supmá wa erek hánám sang háliuk. <sup>14</sup> Málám wáina tán supmá watá erek sálíkngin átang gu ráM ore wakáin sungi kesák táwi watá ále wakáin tunggafen kutná kutná ná ya kesák tángga málám niyá háláng namánggim ingga naránpak tángga átuk. <sup>15</sup> Átang kuk ngáya kung it márúM káman dán káin yáup nangge átnát ta inán ámna watá yáup káman imuk wawu put pin yáni tátáya suring mán put kumbiná káin kuk.\* <sup>16</sup> Kung átang kápuk ku put tá sayo kepMá wa nat kápángga málám táup hánám háing mán wáinanyon nanggem ingga naruk, enendu káman dá sungi kimo káman ma imuk.

<sup>17</sup> “Wáina átang málám nanará álosim bá tán du naráng hátiuk, ‘Nanna yan yáup nangge yá enendu sungi yáni táup hánám árán nangga átaráng, iná náK ku nákáin átat wawu sungi ya háing namán kámutnándet. <sup>18</sup> Satá son na kuinet watá kung nanna ku ing ininet, ‘Nan, no Ánutu rahálá hára me kák rahála hára kandák táut. <sup>19</sup> Kulá wata ku náK ku ámna álosim muná, wáina wata ku ko náK ka nanggena ingga memeyan tárak muná. Wáina wata ku kula wu satá yáup nanggeka káman hálengga átnet.’” <sup>20</sup> Málám nanará wáina naráng hátingga ku tárutang hangga naning gán káin kuk.

“Kulá málám mulangán káin emá yon kungga átuk wahára naning gá kangga uráKngá táwi hánám narángga hururung kung poláng mángga kang kukumek táuk.

<sup>21</sup> “Wáina tán nanggená yá inuk, ‘Nan, no Ánutu rahálá hára me kák rahála hára kandák táut. Wata ku náK ku ámna álosim muná, wáina wata ku ko náK ka nanggena ing memeyan tárak muná.’

<sup>22</sup> “Wáina inán naning gá yáup nanggená yánuK, ‘Sokmuná yon kung lap háSák álosim wa táng áwáng táwáng mángga ring táng áwáng ketná kálongngá káin ting mángga, hang sendol táng áwáng hárammá káin mon mániráng. <sup>23</sup> Wáina tángga ku kung bulmakau nanggená tutuwatná wa táng áwáng utang sit sinak tángga heronge tánin. <sup>24</sup> Náuta nanggena áwú há kámurená háranan dá kula son áwek. Há yakyawiuk, enendu kula son áwán káemán.’

“Kulá wata ingga ku sinak táwi tángga ku heronge tángga átnárát <sup>25</sup> nanggená táwi wawu hái káin átuk ngáya ráM waháranan it tangtang áwángga naruk ku kap mantángga heronge tángga árat. <sup>26</sup> Málám yáup nangge káman mantáng mán áwán du ináng suliuK, ‘Wawu rina tángga átkoeráng?’” <sup>27</sup> Wáina inán watá inuk, ‘Kulakka sutná yá kándáng re árán son áwán wata nanya yá kangga heronge pálak kulakka tángga ku bulmakau nanggená tutuwatná wa utang sek.’

<sup>28</sup> “Wáina inán nanggená táwi watá wa narángga kuk tángga it kinan ma árángga kun kangga naning gá kep káin hangga pahán láláp mená inuk, <sup>29</sup> enendu nanggená yá ing

\* **15:15:** Juda yan nanará wu put wawu Ánutu rahálá hára wu rongrongngá muná, wata ku put pin yáni tátáya takta naránggátaráng.



inuk, 'Kang, yara máro hánám bon du no yáup nangge yá ina kákkán yáup tángga áwut, hang me nanátá milunya kámá ma yaliut. Wata ingga rám káman meme nanggená káman kámá namátá no nuknukna yot heronge kámá ma táumán. <sup>30</sup> Iná nanggeka náráwa kálu háranan yot átingga kutná kutná ka raták raták tán sálin son áwek wata ingga ku bulmakau nanggená tutuwatná wa utang sing melák!'

<sup>31</sup> "Wáina inán naning gá inuk, 'Nanggena, kák ku rámá rámá nayot átnándalák, wata ku kutná kutná nákkán átak wawu kákkán. <sup>32</sup> Ináku kula wu heronge tángga pahán álosim narinemán, náuta kulakka wawu kámurená háranan dá kula son áwek. Há yakyawiuk, enendu son áwán káemán.'"

## 16

*Ámna káman supmá táwi watán yáup ámna ya me tárákná yánuk*

<sup>1</sup> Jesu yá disaepelná ing yánuk, "Ámna káman supmá táwi hánám átmángngátak watán yáup ámna káman átnándak. Kulá ámna kámá yá áwángga ku ámna supmá táwi wa inuráng, 'Yáup ámna ka wawu kákkán kutná kutná wa iháng yakyawák táng kamánggoek.' <sup>2</sup> Wáina inát tu supmá táwi watá yáup ámnáná wa mantáng mán áwán du inuk, 'Kák ka me wáina wáina met naret, wata ku kungga nákkán kutná kutná kák ketya hára átak watán hulá rina rina wa kándáng táng tolingga táng áwáng namáng. Kák ku nákkán yáup ámna son ma átnándalák.'

<sup>3</sup> "Wáina inán du yáup ámna watá málám meme ing táuk, 'Kulá rina táinet? Táwina yá yáup hára nasutnándek. No káman dán yáup nangge hálangga káwak pipi wata nare hálángna muná hálek, me sup pa kesák tángga kámá yánáng sulingga átkuku wata reprepma naret. <sup>4</sup> Kulá kula wu kálu káman naret, wáina táe ku máriya táwina yá yáup nahára nasurán du ámna watá ku nangotang it yáni káin kut átnemán.'

<sup>5</sup> "Nanárá wa tingga sangga ku málám ámna nini yá táwiná yan káin kutná kutná ihená ya topmá titiyan átuk wa mantáng yámán áwát tu hulátingga áwuk wa inuk, 'Kák ku táwina yan káin topmá ku rina titiyan átak?'

<sup>6</sup> "Ing inán watá inuk, 'Nákkán du olif karo kárang maming tátáwi 100,' wáina inán yáup ámna watá inuk, 'Sokmuná ingmen putung átang gu papia wa táng toloti nahára wawu 50 rewe uying.'

<sup>7</sup> "Wáina inán uyin du son kámá áwuk wa inuk, 'Iná kák ku topmá rina titiyan átak?'

"Wáina inán watá inuk, 'Nákkán du wit bek maming tátáwi 100,' ingga ámna watá inán du yáup ámna watá inuk, 'Papia wa táng toloti nahára wawu 80 bek rewe uying.'

<sup>8</sup> "Wáina inán uyin átang máriya táwiná watá wáina táek ingga naruk hára wu yáup ámna wáik wata kutná meng tárut táuk, náuta ámna nanaráná pálak hálen du wáina táuk. Káwak nátán ámna wu nanará kándáng tingga ket tárák álosim wa kámá ya táng yámángngátaráng, watá ku ámna yamá hára átaráng wa iháng háteráng. <sup>9</sup> No ing sálin, káwak kán kutná kutná álosim wa iháng nuk iháng tunggap táineráng, wata ku rám kálu kutná kutná watá sáliknginek hára wu watá yon sángot kung it álosim kinan tit rámá rámá álosim átang kuineráng.

<sup>10</sup> "Iná káman niyá náut kámá káman isikimo wa kándáng hánám pinná tánggim, wawu náut kámá maming táwi wa wáinanyon kándáng pinná tánggim. Hang káman dá náut kámá káman isikimo wa kálu kandák hára pinná tánggim, wawu wáinanyon náut kámá maming táwi wa kálu kandák hára pinná tánggim. <sup>11</sup> Kulá sándá káwak nátán kutná kutná kikiná wa kándáng ma pin yáni tánggalát, wawu niyá sáhángga ku iruk kán kutná kutná wa sang sámán pin yáni tánggalát? <sup>12</sup> Hang kámá yan kutná kutná wa kándáng ma pin yáni tánggalát wawu niyá ku kutná kutná sálin hánám sámánggim?'

<sup>13</sup> "Yáup nangge káman dá ámna huláná yará ya tárang káin ma átgim. Wáina átgim wawu káman álo kámá kangga ku káman du takta kanggim. Hang káman da ku milun susuwa táng mángga káman da ku milun yayali táng mánggim. Ko rám káman hára re moneng got Ánutu yan yáup nangge ma átgim."

<sup>14</sup> Wáina men narángga Farisi kámá wahára áturáng wawu sup pa kikiná hánám narángngátaráng wata tángga ku Jesu ya yanyawon táwi táng muráng. <sup>15</sup> Wáina tát Jesu yá ing yánuk, "Sáni wu ing naránggoeráng, 'Ámna wawu kálu kándáng re isutnándaráng ingga náhániráng,' ingga naránggoeráng, enendu Ánutu yá ku pahán sáni káin wáina ingga há sáhek. Náut kámá ámna yá álosim hánám ingga naránggoeráng wawu Ánutu rahálá hára wu wáik hánám.

*Nanárá kámá yánáng toliuk*

<sup>16</sup> "Lo yot profet tán me wawu átang áwángga Jon dán rám hára sálikngiuk. Kulá wahára átang áwek wakáin du Ánutu yan átkuku watán me pingnga álosim wa met naránggoeráng, wáina hálendu ámna táup táwi yá hahatingga kung wata kinan hanin ingga tánggoeráng.

17 Enendu lo wawu ále hánám ingga ma narindaráng. Alek káling káwak wawu muná kuinek, iná Ánutu yan lo wata kátu kimo káman du ma hánám muná kuindák.

18 “Hang ámna káman dá áwáná isutang náráwa nukngá táinek wawu márámamák há táinek, hang náulá yá áwáná isurán málám re hánámá árán ámna káman niyá wa táinek wawu márámamák há táinek.

*Ámna supmá táwi yot tu Lasarus*

19 “Ámna káman supmá táwi hánám árán lap yányáhán sipmá\* álolosim wa ihánggánengga átang ráma ráma sungi kikiná nangga átnát ná yá álosim hánám wahára átkiuk. 20 Itná kapme yan kumbi kálu mungganá hára wu ukuro ámna káman kutná Lasarus wa táng áwáng ráma ráma tingting tát átkiuk. Lasarus wawu sutná kámuk hánám putulá re. 21 Wáina átang gu málám supmá pálak watán sungi káhumá tebol tárang káin háená wa há hánám nanggem ingga naránga átnándak. Kulá ang gá áwáng gu putulá wa elowatnándaráng.

22 “Rám káman du ukuro ámna watá kámurán angelo yá irukngá wa táng kung Abraham bot tit átumálák. Iná ámna supmá táwi wawu hányon kámurán ámna kámá yá táng kung árám pingga usuráng. 23 Kulá ámna málám káráp lánggop kinan sut láwit maming táwi hánám hára átang hálangga káuk ku Abraham bá mulangán hánám káin Lasarus yot árán. 24 Wáina kangga ku mantáng muk, ‘Nan Abraham, ko urákna naránga Lasarus inát kung ketná mángok ilungngá táng umi utang táng áwáng elákna káin tin elákna yá láláwik, náuta náku ku káráp lánggop náta kinan láwit maming táwi hánám hára átat.’

25 “Wáina inán Abraham bá inuk, ‘Nanggena, naráng, ko káwak sut pálak átulák wahára wu kutná kutná ka álosim wa há ihángga átulák. Iná Lasarus yá ku wáik hánám átuk, wata ku nákáin du watá álosim árán du ko sut láwit hára átalák. 26 Hang nukngá ku ing, sán me nán orek náni hára ku kániráp maming táwi hánám Ánutu yá tiuk. Wáina háendu nákáinnan da wakáin kuku wawu muná, me wakáinnan da nákáin áwáwá wawu muná.’

27 “Abraham bá wáina inán du supmá táwi watá miuk, ‘Wáina háendu ko Lasarus inátá náku nanna yan it káin kungga 28 wakáin yakukulana faip pá átaráng wa wáina ingga yáineku ngáya ku waháranan káman dá sut láwit nanaráyan ále káin ná ma áwindak.’

29 “Wáina inán du Abraham bá inuk, ‘Moses yan me hang profet tán me wawu há átyámek, wata ku watá wa narineráng.’

30 “Wáina inán du supmá táwi watá miuk, ‘Nan Abraham, wáina muná. Kámurená káman dá watán káin kungga yánán du pahán yáni hurik táineráng.’

31 “Wáina inán Abraham bá inuk, ‘Moses me profet tán me ma narángngátaráng wawu há kámurená káman dá son tárutang kungga yánánggim enendu wa naránga pahán hurik ku manyon tánggalát.’”

## 17

*Ket tarák wáik watá ku naráng hákhátik wa táng wáik tángngátak  
(Mat 18.6-7,21-22; Mak 9.42)*

1 Jesu yá disaepelná ing yánu, “Kálu kandák hulá hulá tunggafengga áwinek wa kangga ámna náráwa yá yáni táng kung kandák kálu wa tineráng. Iná niyá narán kálu kandák hulá hulá watá tunggafeinek watá wu márappá táwi hánám suwinek. 2 Sup maming táwi táng kák sala hára putingga sat kung táp kinan hangga há kámutgim enendu kákkán márappá wawu isikimo. Iná ko tátá nangge kikimo waháranan káman dá kung mukmuro tánggim wawu kákkán márappá wu maming táwi. 3 Wata ku kák ku kándang gon átnelák.

“Nukka káman dá mukmuro tán du inátá ku son átkukuná wa táng tolinek. Watá pálipuk ing mengga pahála hurik tán du ko watán kátu wa sáinelák. 4 Káman dá kákkán káin mukmuro tángga sangga áwáng ‘pálipuk kandák táet’ ingga kanáng tunggap tángtáng tán káe káman hára rám 7 háendu ko watán kátu wa sáinelák.”

5 Táwi yá me wa yánán aposelná yá inuráng, “Naráng hákhátik náni wa tátá maming táwi háleik!”

6 Wáina inát Táwi yá yánu, “Sándá naráng hákhátik sáni isikimo mastet táulá ina watá káráp ná inánggalát, ‘Ko ráhula yot kámuk utang kung táp kinan hená yá ina álák,’ ingga inát sándán me wa isutang wáina álo tánggim.

7 “Kulá sán háranan káman dá yáup nanggená káman inán hái káin káwak pingga me sipsip pin yáni tángga átang it káin áwán du ing hám inánggim, ‘Áwáng putung hangga sungi nang?’ Wa muná. 8 Ináku ing inánggim, ‘Nákkán sungi kálak tiyawingga lapyá kándang tánggánengga pinna tángga árátá no umi sungi na nang hále ku ko umi sungi ka náinelák.’ 9 Pahála káin náuta naránga inánggim wawu yáupmá nangge yá há táng mánggim, wata ku ámna watá yáup

\* 16:19: Lap kalaná wawu pálipuk ku ‘purple’, enendu Nukka me kálu kala watanan muná, wata ku ‘sipmá’ ingga uyená.

nanngéná wa heronge mená inánggim hámb? Wa muná. <sup>10</sup> Wata ku sán du hányon náut rina tátáya Táwi yá miuk wa erek táng hálingga ku meineráng, ‘Nánu hánámá yáup nangge rewe, nánu yáup náni tátáyan wa há táemán.’”

*Ámna 10 ilalák lepra pálak wa Jesu yá iháng toliuk*

<sup>11</sup> Jesu yá Jerusalem kuin ingga málám ále Samaria yot ále Galili orek yánu kálu wa kuk. <sup>12</sup> Málám it káman káin kung hiuk wahára ámna 10 ilalák lepra yáni pálak watá áwáng kangga mulangán káin hetang átang <sup>13</sup> hahatingga hánám ing mantáuráng, “Jesu, Ámna Hulá, urák náni narinelák!”

<sup>14</sup> Wáina inát Jesu málám wa kápánga ku ing yánuk, “Pris yan káin kut tu watá sáhineráng.” Wáina yánán pris yan káin kunggaturáng wahára re sut yáni yá rongrongngá háliuk.

<sup>15</sup> Kulá orek yáni hára ámna káman dá káuk ku ilalákngá yá álo hálen kangga ku hahatingga Ánutu kutná mengga heronge tángtáng son áwuk ngáyá <sup>16</sup> áwáng Jesu hárammá hulá káin tulá hára imánga turingga hangga kurákmáta táng hang káwak káin tingga heronge mená inuk. Iná ámna málám wawu Samaria nan.

<sup>17</sup> Wáina tán Jesu yá ámna wa kangga ku miuk, “Ámna 10 dá rongrongeráng, iná ámna 9 du rekáin átaráng? <sup>18</sup> Kámuk áwánga Ánutu kutná meng tárut tátáyan du muná hámb, enendu ále kámá káinnan nátá re áwek?” <sup>19</sup> Wáina mengga ku inuk, “Tárutang kung. Naráng hákhátikka yá tán álo hálelák.”

*Ámna Nanggená yá hiták áwáng heinek*

*(Mat 24.23-28,36-41)*

<sup>20</sup> Rám káman Farisi yá Jesu ing ináng suliuráng, “Rina hára ku Ánutu yan átkuku watá áwínek?”

Wáina inát tu Jesu yá yánuk, “Ánutu yan átkuku watá áwínek wawu ámna náráwa yá wáina ingga ma káindaráng. <sup>21</sup> Hang ámna náráwa yá ‘Wawu nákáin,’ me ‘Wawu áring káin átak ka kaniráng,’ ingga ma meindaráng. Kaniráng, Ánutu yan átkuku wawu sáni ya orek sáni hára há átak.”

<sup>22</sup> Wáina yánánga sangga ku hang disaepelná yánuk, “Máriya rám káman áwínek wahára Ámna Nanggená yá son áwínek wawu kakaya kikiná hánám narineráng, enendu ma káindaráng. <sup>23</sup> Kulá ámna yá ku sánineráng, ‘Kungga kaniráng, árongga káin átak!’ me ‘Kaniráng, nákáin átak!’ ingga sánát tu watán me wa ma isutnándaráng. <sup>24</sup> Iná Ámna Nanggená yá áwínek hára wu pikpirik ká pák táng san alek numkálu átang kung numkálu sálíkingngátak wáinanyon táinek. <sup>25</sup> Enendu hulátangga málám bá ku sut láwit táwi narinek, hang rám nátán ámna watá ku wata taktak yámínek.

<sup>26</sup> “Noa yan rám hára ámna náráwa yá kálu rina táuráng wáinanyon du Ámna Nanggená yá áwinán táinek hára tunggafeinek. <sup>27</sup> Noa yan rám hára wu umi sungi nangga ámna yá náráwa yot ket tántán tángga átnárát tu Noa yá kungga kilang kinan háuk. Kung há han du umi sip pá áwáng ámna náráwa erek hánám ráháng kátkámut táng háliuk.

<sup>28</sup> “Hang Lot tán rám hára wu wáinanyon ámna yá umi sungi nangga kutná kutná yumnak tángga ále hái hinga it tátá tángga átnárát <sup>29</sup> Lot tá it Sodom sangga kuk rám wahárananyon káráp lánggop pá sup hára rangga árená yá alek kálu ále yá ina hangga ámna náráwa iháng rang kátkámut táng háliuk.

<sup>30</sup> “Iná Ámna Nanggená yá hiták áwáng heinek rám wahára wu wáinanyon tunggafeinek. <sup>31</sup> Rám wahára káman dá itná hungnganá ketnán átnek watá hang itná kinan kutná kutná ná ma ihindak, me káman dá hái káin átnek watá kung it káin kutná kutná ná manyon ihindak. <sup>32</sup> Lot áwáná hára tárák tunggafitni wa narineráng. <sup>33</sup> Niyá málámbán átnát náya naránpak táinek wawu átkukuná watá muná kuinek. Iná káman dá átnát náya naránpak ma táindák wawu átkukuná watá ma muná kuindak. <sup>34</sup> No ing sánin, yáung wahára Ámna Nanggená yá áwínek hára wu yará yá kome káman hára re ruhánga átnemálák wawu Ánutu yá káman sangga káman táinek. <sup>35-36</sup> Náráwa yará yá másáng táng totoliya wit táulá husing mánmán tángga átnemálák wawu káman sangga káman táinek.”\*

<sup>37</sup> Me wa yánán naránga disaepel yá Jesu ináng suliuráng, “Táwi, ále rekáin du wáina tunggafeinek?” ing inát tu Jesu yá yánuk, “Ále rekáin káwak sut tá kámutang hásingga átnándaráng wakáin du tále katkat tá áwáng urum tángngátaráng.”

## 18

*Náráwa káman dá jas yá háláng imómbáyo káto háliuk ka me tárákná yánuk*

\* **17:35-36:** Nanará ámna kámá yá ku me kámá tombong 36 nahára ing átak ingga narángngátaráng. Me wawu ing, “Ámna yará yá hái káin átnemálák wawu Ánutu yá káman sangga káman táinek.”

<sup>1</sup> Kulá Jesu yá ráma ráma sáponga tátaya háláng haha ma táindaráng ingga me tárákná disaepelná ing yánu, <sup>2</sup> “It káman hára jas káman átkiuk wawu Ánutu ya ma pitáng mánggiuk, me áma nuknukngá wawu kápán ále hánám ina hálenggiuráng. <sup>3</sup> It waháranyon náráwa kawát káman átkiuk watá ku ráma ráma jas watán káin áwáng gu ing inánggiuk, ‘Káyam bá neháng lem tátaya tánggoeráng, wata ku ko me kot hára háláng naminelák.’

<sup>4</sup> “Wáina inán du huláttingga ku háláng imámaya takta naruk, enendu máriya ku málám átang gu ing naruk, ‘Ánutu ya ma pitáng mángngátat me áma nuknukna wawu kápe ále hánám ina hálengngátaráng. <sup>5</sup> Enendu ráma ráma wu náráwa kawát nátá yámbáne tang namánga áwánggoek. Wáina wata ku me kot hára háláng me ku son nákkán káin áwángga yámbáne ma táng namindak,’ wáina naruk.”

<sup>6</sup> Wáina mengga ku Táwi yá son disaepelná yánu, “Sándá jas waík watá me miuk wa narániráng. <sup>7</sup> Kulá rina? Ánutu yá áma náráwa nakán ingga iháng tunggap tán ráma ráma káen yáungán málámbán káin pahán yot inángga átnándaráng wa sokmuná ma háláng yámánggim me? Wa muná. <sup>8</sup> No ing sánin, wawu sokmuná ingmen háláng yáminek. Enendu ráma Áma Nanggená yá áwinek wahára áma náráwa káwak ketnán átaráng wa málámba naráng háting mánga átaráng me muná ingga kápinek.”

*Áma yará yá Ánutu yan káin sáponga táumálák ka me tárákná yánu*

<sup>9</sup> Áma káma yá náni wu kándáng rewe hánám átang átningngátamán ingga narángga káma wu kápát háená hálengngátaráng wata tángga Jesu yá me tárák hára tingga ing yánu, <sup>10</sup> “Áma yará yá Táwi yan it káungá hánám káin sáponga tátaya árumálák. Káman du Farisi iná káman du takis iháhá. <sup>11</sup> Kulá Farisi watá hetang átang málámba sáponga táuk, ‘Ánutu, no heronge mená meng se kákkán káin koek, náuta náku ku áma kátu ina muná - manek tángngátaráng, nanará kandák isutnándaráng, márámamák tángngátaráng me enang takis iháhá ná ina muná. <sup>12</sup> Náku ku sungi sangga sáponga yáup hára sonda káman da ore hára ráma yará átnándat, me kutná kutná ihángngátat wawu hore 10 hálen urum káman kákkán pingnga tingngátat.’

<sup>13</sup> “Iná takis iháhá watá ku mulangán sim hetang átang alek kálu ma háliuk, ináku pahán márámá narángga muyipmá kátingga turingga hangga ku miuk, ‘Ánutu, náku ku mukmuro áma. Ko nákkán kátu sáinelák,’ ingga wáina sáponga táuk.

<sup>14</sup> “Áma niyá málám tángga árinek wawu Ánutu yá táng hang tinek, iná niyá málám tángga háinek wawu Ánutu yá táng áráng tinek, wáina wata ku no ing sánin, ráma takis iháhá watá itná káin kuk wahára wu áma watá re ku Ánutu rahálá hára áma kándáng háliuk, iná Farisi wawu muná.”

*Nangge kikimo ihángga Jesu yan káin áwuráng  
(Mat 19.13-15; Mak 10.13-16)*

<sup>15</sup> Áma náráwa yá nángánangge yáni isikikimo wa Jesu yá há ihánggáping ingga Jesu yan káin ihángga áwángga árat disaepel yá wa kápánga me táng yámuráng. <sup>16</sup> Wáina tát kápánga Jesu yá nangge kikimo wa mantán málámbán káin áwát tu disaepelná yánu, “Sat nangge kikimo watá nákkán káin áwániráng, ma kung hákhátik táng yámindaráng, náuta Ánutu yan átkuku kinan kung haha wawu áma náráwa niyan pahán dá nangge kikimo ná ina átnek watán. <sup>17</sup> No pálipuk ing sánin, áma káman dá Ánutu yan átkuku wa nangge kikimo yá tángngátaráng wáina ma táindák wawu kung átkuku wata kinan ma háindák.”

*Áma yáila káman kutná kutná ná táup hánám watá Jesu yot me inán kanán táumálák  
(Mat 19.16-30; Mak 10.17-31)*

<sup>18</sup> Kulá áma yáila káman dá Jesu inuk, “Tiksa álo káma, rina tángga ku ráma ráma átkuku álosim wa táinet?”

<sup>19</sup> Wáina inán Jesu yá inuk, “Náuta ku náku ku álo káma ingga nanelák? Ánutu káman re ku álo káma. <sup>20</sup> Meng rákit mená wu há narelák wa: ‘áma ma utnándalák, márámamák ma táindalák, manek ma táindalák, nangge nukka ya me kusák ma meindalák, hang nanya me mamya ya tárang káin re átnelák.’”

<sup>21</sup> Wáina inán áma watá inuk, “Nangge kimo áttut hára átang áwáng ná áttut hára wu meng rákit mená wawu erek hánám há isutnándat.”

<sup>22</sup> Wáina inán narángga ku Jesu yá inuk, “Kák ku náut káma káman da re kesák táelák, wawu kungga kutná kutná átyamek wa erek iháng tingga yánátá yuwát sup wa iháng ukuro átaráng wa yámánga ku náku nasutnelák. Wáina tángga ku alek kán átkuku álosim wa táinelák.”

<sup>23</sup> Ráma Jesu yá wáina inuk wahára wu áma watá kutná kutná ná táup táwi wata narámpak tángga pahálá yá márawiuk. <sup>24</sup> Wáina tán kangga Jesu yá áma wa inuk, “Áma ni kutná

\* 18:20: Son Ihuk 20.12-16; Lo 5.16-20

kutná ná táup hánám watá kungga Ánutu yan átkuku kinan haha wawu yáupmá hálang hánám. <sup>25</sup> Samap hinangngá hára kamel yá huruk kuku watán márapmá wawu maming táwi, enendu ámna kutná kutná ná pálak ká kung Ánutu yan átkuku kinan haha watán márapmá watá wa táng hátek.”

<sup>26</sup> Wáina inán ámna niyá me wa naruráng watá ku Jesu inuráng, “Kulá wáina wata ku niyá hánám bu ráma ráma átkuku álosim wa táinek?”

<sup>27</sup> Wáina inát tu Jesu yá yánuk, “Náut káma káman ámna nangge yá ma tátáyan wawu Ánutu yá álo tánggim.”

<sup>28</sup> Wáina yánán Pita yá ing inuk, “Naráng, nándu kutná kutná náni erek hánám yápmang hálingga ku kák kasutumán!”

<sup>29</sup> Wáina inán Jesu yá yánuk, “No pálipuk hánám ing sánin, ámna niyá Ánutu yan átkuku wata narángga itná, áwáná, tatning me kulaná, maming naning me nángánangge yápmáinek <sup>30</sup> wawu náut rina rina yápmáinek wa táng hátingga Ánutu yá káwak ketnán naháranyon nukngá táuppon imínek. Hang máriya rám kálu ku átkuku álosim wa táinek.”

*Jesu yá málámbá kámutang son tárutnek wata mená son yánuk*

*(Mat 20.17-19; Mak 10.32-34)*

<sup>31</sup> Jesu yá urum táwi wa yápmangga disaepelná 12 wa yángot kung kep sim átang yánuk, “Narániráng, náwu Jerusalem káin árángga kunggatkoemán, iná rina rina Ámna Nanggená hára tunggafefeya profet tá uyiuráng wawu wáina hánám há tunggafeinek. <sup>32</sup> Ámna Nanggená wawu táng ámna ále káma káinnan da ket yáni hára tit ináng kekkek tángga ket tarák wáik elengga alup yáni málámba ketnán uráhineráng. <sup>33</sup> Wáina tángga ku honggem bá lahot mángga táng kung utkámut táineráng. Kulá rám kaláhu átang gu son tárutnek.”

<sup>34</sup> Jesu yá me wa yánuk, enendu me wata hulá watá kilak árán disaepelná yá ku hulá wáina ta nánek ingga káma ma naráng rákit táuráng.

*Jesu yá rahálá wáik táng toliuk*

*(Mat 20.29-34; Mak 10.46-52)*

<sup>35</sup> Kulá rám Jesu yá Jeriko itá hára áwáng hein ingga tángga átuk wahára wu ámna rahálá kunángngá káman dá kálu tákto káin putung átang ámna náráwa sup pa mantáng yámángga átkiuk. <sup>36</sup> Átang naruk ku táup hánám watá áwáng tát narángga ku yánáng sulíuk, “Rina tánggoeráng?” <sup>37</sup> Wáina yánán du inuráng, “Jesu Nasaret nan watá áwángga átak.”

<sup>38</sup> Ingga inát tu málám mantáuk, “Jesu, Dewit Nanggená, náka urákna naráng!”

<sup>39</sup> Wáina mantán narángga ámna watá kálak áwángga áturáng watá me táng mángga ing inuráng, “Yolop álák!” ingga inuráng, enendu málám hahatingga hánám mantángga Jesu inuk, “Dewit Nanggená, náka urákna naráng!”

<sup>40</sup> Wáina mantán narángga Jesu málám tareng kátingga átang ámna wa engotang rupmá káin áwáwáya yánán engotang áwát tu ámna wa inuk, <sup>41</sup> “No rina táng kaminet ta narelák?”

Ingga inán du watá inuk, “Táwi, rahánna háháleya naret.”

<sup>42</sup> Wáina inán du Jesu yá inuk, “Nák ka naráng háting namelák watá tán du rahála yá álo háleik.” <sup>43</sup> Wáina inán rám waháranyon hánám bu rahálá yá háleingga kangkang gu Ánutu kutná mengga meng tárut tángtáng Jesu isutang kuk. Iná ámna náráwa kámu hánám wa káuráng hára wu wáinanyon Ánutu kutná mengga meng tárut táuráng.

## 19

*Jesu yá Sakias yan it káin kuk*

<sup>1</sup> Jesu málám Jeriko it kinan hangga ku kálu isutang it sangga kuin ingga kungga árán, <sup>2</sup> ámna káman wahára átkiuk wata kutná wu Sakias. Ámna wawu takis ihángngátaráng wata táwi yáni, hang málám bu supmá wu táwi hánám wáina átmánggiuk. <sup>3</sup> Sakias málám Jesu wu ni ingga kakaya naruk, enendu málám wawu ámna hátetná wáina hálendu ámna náráwa watá kik hánám átang ting sangga árát tu Jesu ma káuk. <sup>4</sup> Wáina hálendu Jesu wu kálu wa isutang áwínek ingga há narángga sangga watá kálak hururung ingmen kuk ngáyá kung káráp fik káman da ketnán árángga kuk.

<sup>5</sup> Kulá Jesu málám kálu wa isutang káráp hulá hára kung hengga ku háleing san káráp ketnán árán du inuk, “Sakias, sokmuná hánám hang. Nák ku kula kákkán it káin átnet.”

<sup>6</sup> Wáina inán málám sokmuná hánám hangga heronge hánám kang mengga itná káin engotang kuk.

<sup>7</sup> Wáina tán kangga ámna náráwa yá kuk narángga Jesu ya ing meng muráng, “Ámna mukmuro mara yan it káin koek.”

<sup>8</sup> Kulá Sakias málám tárutnárang Táwi ing inuk, “Táwi, kang, no kutná kutná na wa pana huk tángga numkálu wa iháng ukuro mara wa yáminet, hang káman ni ingirungngingga sup

rina tená wa táng hátingga iháng mut wawu son wata ketnán nukngá te 4 hálen iminet. Wáina pálipuk hánám táinet.”

<sup>9</sup> Wáina inán Jesu yá inuk, “Rám kula Ánutu yá ámna náráwa it náta kinan nan wa son ihek. Ámna náwu Abraham nanggená yon. <sup>10</sup> Ámna Nanggená yá áwuk wawu niyá yakyawená wa sulingga son iháhaya áwuk.”

*Yáup nangge 10 watán me tárákná yánuk*

<sup>11</sup> Kulá Jesu málám bu Jerusalem tangtang kung hálingga árán du ámna náráwa Jesu yan me naránga áturáng watá Ánutu yan átkuku wawu kula há hiták háleindek ingga naránga áturáng. Wáina naránga árát tu Jesu yá me tárákná káman ing yánuk, <sup>12</sup> “Ámna hulá káman dá málamba ing naruk, ‘Itna sangga ále kámá mulángán káin koe ku king táwi yáni ya árená watá ále káwak na yan king neháng tunggap tán du itna káin son áwánga ámna náráwana pin yáni táinet.’ <sup>13</sup> Wáina naránga ku yáup nanggená 10 wa mantán áwat tu supmá kátu horengga káman káman yámánga ku yánuk, ‘Sup ná iháng kung tambáng ma tená ku yáupmá tát táwi tái hálangga kungga árán du no son áwinet.’

<sup>14</sup> “Kulá ámna hulá watá itná sangga há kun du itná hulá watá ámna kámá suring yámát kungga king táwi yáni wa ing inuráng, ‘Nándu ámna hulá watá nándán king háháleya taktak námek.’

<sup>15</sup> “Wáina ingga inuráng, enendu king táwi yáni watá ámna hulá wa kut king há imán du son itná káin áwáng átang gu yáup nangge watá áwat sup yámuk wata ketnán rina hánám táng tunggap táuráng ingga kápápaya me san kun áwuráng.

<sup>16</sup> “Áwánga ku ámna hulátingga áwuk watá áwáng inuk, ‘Ámna hulá, nák ku sup táwi namulák watá yáupmá táe sup 10 dá tunggafen wa iháng wata ketnán tiut.’

<sup>17</sup> “Wáina inán ámna huláná watá inuk, ‘Álo kámá táulák! Kák ku yáup nanggena álosim. Ko isikimo wa kándáng hánám pinná táulák wata ku it táwi 10 wa pin yáni táinelák,’ ingga inuk.

<sup>18</sup> “Kulá son ámna nukngá káman dá áwáng inuk, ‘Ámna hulá, nák ku sup táwi namulák watá yáupmá táe sup 5 bá tunggafen wa iháng wata ketnán tiut.’

<sup>19</sup> “Wáina inán du ámna huláná watá inuk, ‘Kák ku it táwi 5 wata pin yáni táinelák.’

<sup>20-21</sup> “Kulá ámna nukngá káman dá áwáng gu inuk, ‘Ámna hulána, kák ku ámna ángarángngá hánám. Náut kámá káman kámá yan hára ihángngátalák, me kámá yá irit hená wata páliná hányon ihángngátalák. Wáina wata ku pitáng kamánga ku supya wawu lap kátu yá támotang se átnándak. Kang, supya namulák wawu ná.’

<sup>22</sup> “Wáina inán táwiná yá inuk, ‘Kák ku yáup nangge wáik! Kangán me wanyon isutang keháng me hára tinet. Ka há narelák wa, nák ku ámna ángarángngá hánám. Náut kámá káman kámá yan hára ihángngátat, me kámá yá irit hená wata páliná hányon ihángngátat. <sup>23</sup> Náku ku ámna wáina ná ingga há naráng namelák, watá ku rina tánga ku nákkán sup ná táng sup itná káin ma tiulák? Wáina tinggim watá ku son áwánggem wahára ku sup kámá wata torong hára tit watyot ihánggem.’

<sup>24</sup> “Wáina inánga ku kámá wahára áturáng wa yánuk, ‘Sup wa táng ámna niyá sup 10 ihuk wa imániráng.’

<sup>25</sup> “Wáina yánán watá ing inuráng, ‘Ámna hulá, ámna wawu sup 10 wa há átmek!’

<sup>26</sup> “Wáina inát tu watá yánuk, ‘No ing sánin, káman niyá táup há ihánga átnek wawu no kutná kutná kámá yot iminet, iná káman niyá náut kámá ma ihánga átnándák wawu no náut isikimo tánga átnek wa imáng hutang ihinet. <sup>27</sup> Kulá nák káyamna no watán king háháleya ma naruráng wa iháng áwáng nahára nák rahánna hára ráháng kátkámut táiniráng.’”

*Jesu yá Jerusalem káin king gá ina kung háuk  
(Mat 21.1-11; Mak 11.1-11; Jon 12.12-19)*

<sup>28</sup> Jesu yá me wa yánáng hálingga sangga ku son kálu hulátingga áranga Jerusalem ba kuk. <sup>29</sup> Málám bu kung ále yáilá Olif káin átuk, it Betfage yot it Betani tangtang. Wahára átang gu disaepelná yará suring yámánga yánuk, <sup>30</sup> “Kungga it áning hára kung henga waharanyon káinemálák ku donki máto káman wahára puting sat átak wawu ni kámá káman dá wata ketnán putung átang ma kung áwáng táená wa páupmá yaling mánga ku engotang áwinemálák. <sup>31</sup> Iná káman dá sáhanga sáninek, ‘Náuta ku donki páupmá yaling mángoemálák?’ ingga sánán du ing ininemálák, ‘Táwi yá wata narek.’”

<sup>32</sup> Wáina yánán du disaepelná yará yá kungga káumálák ku rina yánuk wáina hánám re há árán. <sup>33</sup> Kulá yándi wu donki wa páupmá yaling mánga átnárán du márumá yá áwáng yánáng suliuráng, “Náuta ku donki páupmá wa yaling mángoemálák?”

<sup>34</sup> Wáina yánáng sulit tu yánumálák, “Táwi yá wata narek.”

<sup>35</sup> Wáina yánánga donki wa engotang Jesu yan káin áwánga lap yándi hákhásák sut yándi háranan wa yalingga iháng donki ketnán tin du Jesu yá árang wata ketnán putung átuk.

<sup>36</sup> Kulá Jesu yá donki wata ketnán kungga átuk wahára wu ámna náráwa yá lap yáni hákhásák wa yalingga iháng kálu hára elengga kut tu wata ketnán yángyáreng kuk.

<sup>37</sup> Jesu yá kálu isutang Jerusalem tangtang áwánga ále yáilá Olif kálu háená wahára kungga átuk hára wu ket tárák hulá hulá tán kanggátarang wata disaepelná urum táwi watá hulátangga heronge táwi tálaga hahatingga Ánutu kutná meng tárut tálaga kuráng.

<sup>38</sup> Ing mantánga kuráng,

“King nátá Táwi kutná hára áwek wawu Ánutu yá há tálaga álolo táená watá áwek!”\*

“Ánutu kutná meng tárut tátne irawa káin árik! Ánutu yá ámna náráwaná yot orek yáni hára pahán káman dá átkoek!”

<sup>39</sup> Wáina mantánga árát urum táwi wata kinan du Farisi kámá yá ku Jesu inuráng, “Tiksa, ko disaepelka wáina ma táindarang ingga me tálaga yámáng!”

<sup>40</sup> Wáina inát tu Jesu yá yánuK, “No ing sánin, watá sangga nángnángingga átgálat wawu sup watá álo menman yáni tálagaát.”

<sup>41</sup> Kulá Jesu yá Jerusalem tangtang áwánga hengga ku it yáilá wata kangga kut mángga <sup>42</sup> ing miuk, “Jerusalem, káe kula rina tálaga ku álosim me heronge átnelák ingga naret, enendu náuta tán wáina átnát tán wawu kilak átak, ko ma kakayan. <sup>43</sup> Rám káman tunggafeinek wahára wu káyam bá áwánga keháng áwálák tálaga káwak iháng áwánga kumbika hulá áwálák tálaga áránga kut hátewin kung hangga ámna náráwa ka ráháng kátkámut táineráng. <sup>44</sup> Rám wahára keháng kátang mánmán tálaga sat hatá ka yot nángánanggeka kák kinan átaráng wa sáháng lem hánám táineráng. Hang kákkán sup káman sat nukngá ya ketnán ma átnándák, náuta ko rám Ánutu yá kákkán káin áwuk wa ma kang rákit táulák wata.”

*Táwi yan it káungá hánám káin Jesu yá átuk*

*(Mat 21.12-17; Mak 11.15-19; Jon 2.13-22)*

<sup>45</sup> Kulá Jesu málam Táwi yan it káungá hánám wata kumbiná kinan kung hangga wata kinan ámna sup yáupmá tálaga áturáng wa yásutuk. <sup>46</sup> Wáina tálaga málam ing yánuK, “Ánutu yan me ing uyená yá átak, ‘Táwi yan it wawu sáponga tátáyan it’†, enendu sándá tát tu ‘manek mara yan ále kilakngá ina’‡ hálanggoek.”

<sup>47</sup> Kulá málam bu rámá rámá Táwi yan it káungá hánám wahára ámna náráwa me pingnga álosim wa yánang tolingga átkiuk. Iná pris tátáwi yáni me lo yan tiksa me ámna náráwa yan ámna yáilá hulá hulá watá ku kálu rekálu kungga utkámút tánin ingga kálu ya sulinggiuráng. <sup>48</sup> Enendu wata wáina tátáyan kálu kámá ma káuráng, náuta ámna náráwa urum táwi watá watán me wa naránin ingga káto hánám hálangga áturáng wata.

## 20

*Jesu háláng wa niyá kamuk ingga ináng suliuráng*

*(Mat 21.23-27; Mak 11.27-33)*

<sup>1</sup> Rám káman Jesu málam Táwi yan it káungá hánám kapmená káin wa átang ámna náráwa me yánang tolingga ku Ánutu yan me pingnga álosim wa yánangga átnarán du pris tátáwi yáni, lo yan tiksa me ámna hulá hulá watá watán káin áwuráng <sup>2</sup> ngáyá ku ináng suliuráng, “Kulá nánang, kák ku háláng wawu rekáinnan tálaga gu ket tárák tálagaolák? Háláng wawu niyá kamuk?”

<sup>3</sup> Wáina inát tu yánuK, “No me káman hányon sánang sulindet ta ku topmá nanineráng. <sup>4</sup> Jon dá umi kuháng yámánggiuk wawu alek kálu nan me ámna yan káinnan?”

<sup>5</sup> Wáina yánán yáni yon inán kanán tálaga ku miuráng, “Nándá ‘Alek kálu nan,’ ingga ininemán wawu náninek, ‘Náuta ku Jon dán me wa pálipuk ingga ma naráng háting kuráng?’ ingga náninek. <sup>6</sup> Iná nándá ‘Ámna yan káinnan,’ ingga ininemán wawu ámna náráwa táwi nátá sup mangga naráháng kátkámut táineráng, náuta Jon wawu profet káman ingga há nareráng wata.”

<sup>7</sup> Wáina mengga ku Jesu inuráng, “Wakáinnan ingga nán ma narámán.”

<sup>8</sup> Wáina inát tu Jesu yá yánuK, “Nák ku wáinanyon ma sánindát, háláng wawu niyá namán du ket tárák wa tálagaet ingga.”

*Ámna wáik ká wáin hái pinná táuráng ga me táráknngá yánuK*

*(Mat 21.33-46; Mak 12.1-11)*

<sup>9</sup> Kulá wahára átang gu me táráknngá káman Jesu yá ámna náráwa yánuK, “Ámna káman dá wáin hái káman hingga ku málam hái wa tálaga ámna kámá yá wahára sup yáupmá tátáya ket yáni hára tálaga sangga ku kung it mulangán káin rám hásák átuk. <sup>10</sup> Kulá rám wáin dá páliná tená kálu ku málam yáup nange káman suring mángga ing inuk, ‘Kungga wáin hái pinná

\* 19:38: Kap Papia 118.26 † 19:46: Aisaia 56.7 ‡ 19:46: Jeremaia 7.11

tángngátaráng ámna wa yánatá ku wáin páliná kámá kamát ihánga áwáng\*,' ingga inán kuk, enendu ámna hái pinná tángga áturáng watá utang sonson tángga isurát hánámá ketná páliná muná son kuk. <sup>11</sup> Wáina kangga yáup nangge nukngá suring mán son kuk, enendu wa wáinanyon utang sonson tángga táng wáik tát reprepmá narán isurát hánámá ketná páliná muná son kuk. <sup>12</sup> Wáina kangga málm yáup nangge nukngá suring mán son kun du rám kaláhu háliuk, enendu wawu wáinanyon táup hánám sip pálak utang sonson tángga táng sat kep káin háuk.

<sup>13</sup> "Wáina tát kangga ku hái márúma watá miuk, 'Rina táinet? Satá nanggena na kikiná hánám naránga átnándat wa suring me kuinek. Kámá watá kun du watán me álo há m narineráng.'

<sup>14</sup> "Kulá nanggená yá kung hen kangga ámna hái káin yáup tángga áturáng watá yáni meme táuráng, 'Ámna wa áwek watá ku máriya naning gán kutná kutná ihinek. Satá wa utkámút tángga ku hái náwu nánin háleinek.' <sup>15</sup> Wáina mengga ku táng mangga sat hái kep káin han du utkámút táuráng.

"Kulá ámna hái márúma watá ku rina táng yáminek? <sup>16</sup> Málm áwinek watá áwáng ámna hái káin yáup tángga átnérang wa erek ingmen ráháng kátkámút tángga ku hái wa táng ámna nukngá ya ket yáni hára tinek." Jesu yá wáina yánán ámna náráwa yá me wa naránga, "Wáina ma tunggafeindak!" ingga miuráng.

<sup>17</sup> Wáina met Jesu yá kárek hánám kápánga átang miuk, "Me ing uyená wata hulá ku rina? 'Ámna it tátá yá sup wáik ingga kangga táng sat kuk,

watá inggálu it hálángngá ya káto hánám átkoek.'†

<sup>18</sup> Káman dá sup wata ketnán iháng hang kátinek wawu málmábáyon káting mákmárak tángga kimo kimo háleinek, iná sup watá káman da ketnán háinek wawu káting pákpálak táinek."

<sup>19</sup> Wáina yánán me tárakngá náwu náni ya mek ingga há naránga ku lo yan tiksa me pris tátáwi yáni watá rina tángga Jesu ket tánin ingga kálu ya suliuuráng, enendu ámna náráwa ya pitáng yámuráng.

*Takis Sisa imóma me muná?*

*(Mat 22.15-22; Mak 12.13-17)*

<sup>20</sup> Kulá pris tátáwi yáni me lo yan tiksa watá Jesu wawu kándang hánám kang tantan tánggiuráng. Wáina tángga ku ámna kámá suring yámát kilak átang watán me wa naránin ingga kusák pilengga átningga ku me kámá rina kandák men naránga ku táng kapman táwi ya ketná hára tit tu watá táng me hára titiya. <sup>21</sup> Wáina tángga ku ámna kilak kang tantan táuráng watá inuráng, "Tiksa, nánda kák ku me kándang rewe mengga ku kálu kándang wa rewe nánáng tolinggoelák ingga há naremán. Ámna háená me árená wawu tárak káman re yánángoelák, iná me páliná wahára re ku Ánutu yá tárak rina átnát ta narek wa nálinggoelák. <sup>22</sup> Wata ku rina narelák? Takis Sisa álo iminemán me muná?"

<sup>23</sup> Wáina inát tu Jesu yá nangnarunggeráng ingga há naránga ku yánuk, <sup>24</sup> "Sup táulá káman namát no káin. Wahára ni utniná me ni kutná yá átak?"

<sup>25</sup> Wáina yánán du inuráng, "Sisa yan," ingga inát tu Jesu yá yánuk, "Wáina wawu náut Sisa yan wa Sisa imónga náut Ánutu yan wa Ánutu imineráng."

<sup>26</sup> Kulá káuráng gu watá me ámna náráwa rahán yáni hára wa miuk wata ingga táng me hára titiyan du káluná muná. Yáni wu hurikngá rina yánuk wa naránga háramutang gu nángnángingga áturáng.

*Tátárut ráma ya Sadyusi yá Jesu ináng suliuuráng*

*(Mat 22.23-33; Mak 12.18-27)*

<sup>27</sup> Kulá ámna urum káman kut yáni wu Sadyusi watá ámna náráwa kámurená wawu ma tárutnándaráng ingga narángngátaráng waháranan kámá yá Jesu ináng sulinin ingga Jesu yan káin áwuráng. Áwáng átang ing ináng suliuuráng, <sup>28</sup> "Tiksa, Moses yá me ing uyingga ting námuk, ámna káman dá kámutang áwáná nanggená muná sáinek wawu kulaná yá náráwa wa tángga tatning gán da nangge táng tinek. <sup>29</sup> Rám káman tatning kukulak 7 dá átkiuráng. Átang tát yáni táwi watá áwáná káman táuk enendu tát yáni watá nanggená muná átang kámutuk.

<sup>30</sup> Wáina hálendu son kulaná wata hangga hára watá náráwa kawát wa táuk wa wáinanyon kámurán, <sup>31</sup> son wata hangga hára watá táuk wa wáinanyon kámutuk. Wáina re táng kung táng kung tatning kukulak 7 wa nangge yáni muná re átang kámút háliuráng, <sup>32</sup> hang pukon da ku náráwa kawát yáni watá hányon kámutuk. <sup>33</sup> Kulá wáina wawu máriya tátárut kálu ku ni hánám ba áwáná ku wa háleinek, náuta tatning kukulak 7 wata áwá yáni há háliuk wata?"

\* **20:10:** Israel yan kálu ku wáina: Háí kámá iháng kámá ya ket yáni hára tit pin yáni tángngátaráng wawu háí watá páliná tin páliná kátu ku márúma yá ihán páliná kátu ku hái pinná tátá watá ihángngátak. † **20:17:** Kap Papiá 118.22



<sup>34</sup> Wáina inát tu Jesu yá yánuK, “Káwak ketnán du náun áwán háleNGga átnándaráng.  
<sup>35</sup> Iná ámna náráwa ni Ánutu yá álo son tárutang átkuku sásáliná muná táineráng ingga narek watá wu alek káin du náun áwán háleNGga ma átnándaráng. <sup>36</sup> Náuta wawu son ma kámutnándaráng, ináku angelo yá ina átneráng. Ánutu yá kámurená yan ále káinnan há iháng tárut tán du málámba nángánangge háleNGga átneráng. <sup>37</sup> Hang ámna kámurená wu hányon tárutneráng ingga Moses yá me wa uyingga táng hiták ting námuk. Káráp isikimo hára káráp yá ranggatuk watán pingnga hára wu ing uyiuk, ‘Táwi wawu Abraham, Aisak me Jekop watán Ánutu.’<sup>†</sup> <sup>38</sup> Watá ku ing nánek, Ánutu wawu kámurená yan Ánutu muná, ináku ámna átkuku yáni pálak watán Ánutu. Iná Ánutu rahálá hára wu ámna náráwa kámuk ku ma kámurená há átaráng.”  
<sup>39</sup> Wáina yánán naráNGga lo yan tiksa kámá yá Jesu inuráNG, “Tiksa, kákkán me wawu kándáng hánám.” <sup>40</sup> Wáina háleNDu ámna yá Jesu ináNG susuliya hányon pitáuráNG.

*Ámna náráwa son iháhá wawu ni nanggená?  
 (Mat 22.41-46; 23.1-36; Mak 12.35-40)*

<sup>41</sup> Kulá Jesu yá ámna náráwa yánáNG suliuK, “Rina táNGga ku ámna náráwa yá ing menggoeráNG, ‘Ámna ni Ánutu yá ámna náráwaná son iháháya miuk wawu Dewit nanggená?’  
<sup>42</sup> Dewit málámbá Kap Papia hára ku ing miuk,  
 ‘Táwi Ánutu yá Táwina ing inuk,  
 “Ketna áláK kálu putung árátá kungga  
<sup>43</sup> no káyamyá wa ráháNGga iháng hang ting se árát  
 ko wa iháng háting áráng átnelák.”’<sup>§</sup>

<sup>44</sup> Dewit tá ku Táwina ingga miuk, rina táNGga ku son du nanggená?”

<sup>45</sup> Wáina yánán ámna náráwa yá káramatingga árát tu Jesu yá disaepelná yánuK, <sup>46</sup> “Lo yan tiksa wa kándáng káNGgápáNG átneráNG. Lap hákhásák táNGgáneNGga sengsulingga átningngátaráng, hang náháNGga kut náni meng tárut táng námániráNG ingga maket álele wa átningngátaráng, hang umi sinak táená káin me miti itná káin kome máta káin átnin ingga naráNGngátaráng. <sup>47</sup> Hang yáni wu náráwa kawát wa yáNGyáruNGngingga it yáni náut wa yáni ya iháNGngátaráng, hang náhániráNG ingga sáponga wawu háSák hánám wa táNGngátaráng. Máriya ráM kálu ámna wáinaná wawu márapmá táwi hánám wa ihineráNG.”

## 21

*Náráwa kawát tá tahaná Táwi ya ting muk  
 (Mak 12.41-44)*

<sup>1</sup> Jesu málám háleNGga átang kápuk ku ámna náráwa sup yáni pálak watá áwáNG taha yáni Táwi yan it káungá hánám watán sup titi komená hára wa tingga árát. <sup>2</sup> Málám káuk ku ukuro kawát káman dá áwáNG sup isikimo yará wa iháNGngáwáNG tin, <sup>3</sup> wa kangga ku Jesu yá yánuK, “No pálipuk hánám ing sánin, náráwa kawát ukuro watá áwáNG gu sup táwi hánám wa kátu iháng hátingga Ánutu yan pingnga tek. <sup>4</sup> Ámna náráwa watá ku táwi átyámek háranan kátu re iháNGngáwáNG teráNG, iná náráwa wawu kesák hánám táek enendu kimo átmek wa kámuk hánám tek. Máriya málám háleNGga mámáyan da ku ma narák.”

*Táwi yan it káungá hánám bá wáik háleleya Jesu yá yánuK  
 (Mat 24.1-2; Mak 13.1-2)*

<sup>5</sup> Disaepel kámá yá ku Táwi yan it káungá hánám wa kangga ku ing miuráNG, “Náwu sup álolosim hánám me kutná kutná áloSim Ánutu ya ting mená wa iháng gu itná táNGgáneNá.” Wáina met tu Jesu yá yánuK, <sup>6</sup> “Náhára náut káeráNG wata sánindet, wawu ráM káman tunggafeinek wahára wu sup káman dá nukngá ya ketnán ma átnándák, ináku erek hánám káting mákmárák táNGga táng hiráráT háineráNG.”

*Márapmá táup hánám bá tunggafeineráNG ga Jesu yá yánuK  
 (Mat 24.3-14; Mak 13.3-13)*

<sup>7</sup> Wáina yánán du inuráNG, “Tiksa, ráM bu rina hára ku watá tunggafeinek? Me tárák ku rina tunggafen kangga ku wáina táindek ingga narinemán?”

<sup>8</sup> Wáina inát tu Jesu yá yánuK, “Kándáng hánám háleNG rákit táNGga átneráNG, sáNGsáruNGnginirot ta ku. Náuta ámna máro yá yon du náK kutna hára áwáNGga ‘náK ku wa’ ingga sánineráNG me ‘ráM bu háteWek’ ingga sánineráNG, enendu sándá watán me wa ma narindaráNG. <sup>9</sup> Kun erawák ká tunggafen met narineráNG, enendu wata ma pitáindaráNG. Wáina wawu watá kálak há tunggafeinek, enendu ráM wawu sokmuná ma tunggafeindák.”

<sup>10</sup> Wáina yánangga ku yánuk, “It kámá yá it kámá yot erawineráng, me king tombong kámá yá king tombong kámá yot erawineráng. <sup>11</sup> Hang itná itná káin kánggáning maming tátáwi yá táineráng me sungi kesák me ilalák káto yá tunggafeineráng, hang alek káin du tárak hulá hulá watá tunggafengga sáháng piták táineráng.

<sup>12</sup> “Iná ále watá ma tunggafená árán du ket sáhángga sáháng lemlem táineráng. Miti itná kinan sáháng me hára tineráng ngáyá ku sáháng hিরarát kalabus káin kuineráng, me sáháng kung king me kapman rahán yáni hára tineráng. Wáina táineráng wawu nákkán tombong ingga átneráng wata. <sup>13</sup> Sáháng wáina táineráng watá ku sándá me pingnga álosim wa yánánáyan kálu álosim táng tolineráng. <sup>14</sup> Enendu sándá naránpak tángga me wa rina meinemán ingga ma narindaráng, <sup>15</sup> náuta nayon nanará álosim sámángga me wáina meineráng ingga sanáng tole met káyam bá sándán me wa káting hang titiyan tárak ma háleindák. <sup>16</sup> Hang nan mam sáni me tat kulak sáni me sip sáni kátu me nuknuk sáni yá yon sáháng káyam ket yáni hára tit kámá sán háranan ráháng kátkámú táineráng. <sup>17</sup> Náka tángga ámma kámuk hánám watá sándá taktak yáminek, <sup>18</sup> enendu yáin sáni romm kámuk dá ma yakyawindák. <sup>19</sup> Sáni káto hánám hálangga átneráng watá ku átkuku wa tángga álosim hánám átneráng.

*Jerusalem bá wáik háleinek ingga Jesu yá yánuk  
(Mat 24.15-21; Mak 13.14-19)*

<sup>20</sup> “Sándá kat tewe ámma yá áwáng Jerusalem pondang átneráng wahára wu it yáilá yá wáik háhályan rámbu wa ingga narineráng. <sup>21</sup> Rám wahára ku ámma náráwa Judia kinan átaráng watá pitángga árángga ále yáilá káin kuineráng, hang ámma náráwa it yáilá kinan átaráng watá sangga kep káin há háineráng. Iná ámma náráwa kep káin átaráng watá ku kung it yáilá kinan ma háindaráng. <sup>22</sup> Rám wawu mukmuro táená wata Ánutu yá mrapmá yáminek ka ku Ánutu yan papia káin me rina mek watá pálipuk re tunggafeinek. <sup>23</sup> Náráwa kawin pálak me nangge kongakngá muk yámángga átneráng wawu ukuro káin hánám táineráng! Rám wahára wu Ánutu yá pahán káráp tángga mrapmá táwi hánám káwak káin ná ámma náráwa yáminek. <sup>24</sup> Káyam bá áwáng kámá kápik ká ráháng kátkámú tángga kámá ihángga káwakngá káwakngá káin kalabus it kinan ting sat átnát ta hirarát kuineráng. Iná Jerusalem bu ále kámá káinnan ámma yá áwáng kome tángga átang háram yáni yá tareng pákpálak tángga árat kungga Ánutu yá ále kámá káinnan ámma yá Jerusalem pinná tátáya miuk watá sálíknginek.

*Ámma Nanggená wu máriya áwinek  
(Mat 24.29-31; Mak 13.24-27)*

<sup>25</sup> “Rám wahára wu tárak hulá hulá yá káe, yap me hitung hára tunggafeinek. Iná káwak káin du táp pá wáik hálangga punggilá maming tátáwi yá hiláksingga átneráng wa narángga ámma yan nanará watá yakyawin naránpak tángga pikpiták táwi hánám táineráng. <sup>26</sup> Ámma náráwa táup hánám watá káwak káin rina tunggafeinek wata pikpito narángga naránpak táwi tángga hálet komkole sin iháng hang kátineráng, náuta alek kán kutná kutná watá yángyáng táineráng wata. <sup>27</sup> Rám wahára káineráng gu Ámma Nanggená yá mukam kinan hálangngá táwi watyot yamá pálak áwinek. <sup>28</sup> Ále wáina watá tunggafeinek wahára wu káto átang ma pitáindaráng, náuta Ánutu yá son sásáhayan rámbu wawu enanggon há áwinek.”

*Káráp kápángga ku wahára nanará táineráng  
(Mat 24.32-35; Mak 13.28-31)*

<sup>29</sup> Kulá Jesu yá me tárakngá ing yánuk, “Kulá káráp fik watyot tu káráp kámuk kápineráng. <sup>30</sup> Káráp pá ilángá nukngá tit tu káe yá álosim átnándek ingga naránggataráng. <sup>31</sup> Wáinanyon ále wa kat tunggafen du Ánutu yan átkuku wawu enanggon áwáng hálek ingga narineráng.

<sup>32</sup> “No pálipuk hánám ing sánin, rámbu nátán ámma náráwa wu há árat tu ále watá tunggafeinek. <sup>33</sup> Alek me káwak ku sálíknginek, iná nákkán me náwu ma sálíkngindák.

*Háleng rákit tángga átneráng*

<sup>34</sup> “Kándáng átneráng. Umi nangga hohingga ráma ráma ket tárak wáik wa tángga átning kuniroto, me sut tán kutná kutná ya narát pálná háleiwon. Iná wáina watá sáháng hang tángga átnek, wawu Táwi yan rámbu watá punggip pá ina sokmuná ingmen tunggafengga sáháng wáik táinek. <sup>35</sup> Rám wa tunggafeinek wawu ámma náráwa kámuk hánám káwak ketnán átaráng watán káin tunggafeinek. <sup>36</sup> Rámá ráma hálang rákit tángga sáponga tángga árat tu Ánutu yá hálang sámán rina rina tunggafefeya tángga átak wa táng hátingga ku Ámma Nanggená wata kondolá hára hetang átneráng.”

<sup>37</sup> Kulá Jesu málám rámbu ore wahára wu ráma ráma Táwi yan it káungá káin me wa yánang tolingga sangga ku it tá páyung tinán tánggiuk kálu ku ále yáilá kutná Olif wakáin ruruháya

kunggiuk. <sup>38</sup> Kulá hilápmá hánám bu ámna náráwa táup hánám watá it káungá káin Jesu yan me nanaráya áwánggiuráng.

## 22

*Judas yá Jesu álo táng ket sáni hára tinet ingga ámna yáilá yánuk  
(Mat 26.1-5,14-16; Mak 14.1-2,10-11; Jon 11.45-53)*

<sup>1</sup> Israel yá Másáng Yisná Muná Nana\* yot Angelo yá Iháng Hátiuk watán rám káungá wata naráng hátingga umi sinak tátá watán rám watá enanggon áwáng hálingga árán du <sup>2</sup> pris tátáwi yáni me lo yan tiksa watá kálu rekálu kungga Jesu utkámút tánin ingga suliuuráng, enendu rahán táwi hára tángátne kun erawák ká tunggafeiwon ingga ámna náráwa ya hányon pitáuráng.

<sup>3</sup> Kulá rám waháranon du Satan dá Jesu yan disaepel 12 waháranan káman da pahálán háuk. Ámna wawu Judas, Iskariot ing menggiuráng wa. <sup>4</sup> Wáina hálendu Judas málám kuk watá kung pris tátáwi yáni yot tu Táwi yan it káungá hánám pinná tátá wa kápángga Jesu wu wáina tángga ku táng sán ket sáni hára tinet ingga yánángga me hároturáng. <sup>5</sup> Wáina yánán ámna urum watá heronge hánám narángga ku sup kaminemán ingga Judas inuráng. <sup>6</sup> Kulá wáina inát tu Judas málám ámna urum watyot pahán káman hálendu hangga kuk. Rám káman no káe ámna náráwa táup pá Jesu yot ma átnándáráng, wahára wu táng yáminet ingga narángga átkuk.

*Disaepel yá Jesu yot sungi pukon náuráng  
(Mat 26.17-35; Mak 14.12-31; Jon 13.21-30,36-38; 1 Ko 11.23-26)*

<sup>7</sup> Kulá rám Másáng Yisná Muná Nana watá áwáng hen du sipsip nanggená utang singga Angelo yá Iháng Hátiuk wata naráng hátingga sinak tátá watán rám háliuk. <sup>8</sup> Wáina wata ku Jesu yá Pita káling Jon suring yámángga ing yánuk, “Sándá kungga ku rám táwi watán sungi náni wa tiyawindimálák.”

<sup>9</sup> Wáina yánán du watá inumálák, “Sungi wawu rehára rina tiyawinemát ta narelák?”

<sup>10</sup> Wáina inán du Jesu yá yánuk, “Sándi wu kung it yáilá wata kinan háinemálák wahára wu ámna káman umi kátang tánggatang áwáng kálu hára sáháng tunggap táinek. Wáina tán du ámna wa isutang kungga watá it reta kinan han du wata kinan yon hangga ku <sup>11</sup> it márúma wa ing ininemálák, ‘No disaepelna yot sungi nangga rám Angelo yá Iháng Hátiuk wata naráng hátinemán wawu it pahálá ku rehára?’ ingga Tiksa yá wáina mek.’ <sup>12</sup> Wáina inán du it pahálá táwi káman torong káin átak wakáin du kutná kutná erek tiyawená wa sálen du sungi wa wahára tiyawinemálák.”

<sup>13</sup> Wáina yánán du yándi wu kungga káumálák ku kutná kutná wu Jesu yá yánuk wáina hánám re tunggafeng yámán du sungi nangga átnát wa tiyawiumálák.

<sup>14</sup> Kulá sungi nanayan rám hálendu Jesu wu aposelná yot tebol hára putung áturáng. <sup>15</sup> Átang gu Jesu yá yánuk, “Nák ku sányot rám Angelo yá Iháng Hátiuk nahára sungi nanaya kikiná hánám naránggátat. Wa nangga sangga máriya ku wáina sut láwit narinet. <sup>16</sup> Kulá no ing sánin, nák ku sányot rám táwi nátán sungi son ing ma náená áre kungga Ánutu yan átkuku kinan káin rám nátán hulá hánám wa málámbá tán hiták háleinek.”

<sup>17</sup> Wáina yánángga málám árong wáin kap tángga átang sáponga tángga sangga ku ing miuk, “Wáin kap ná táng sándá erek naniráng. <sup>18</sup> No ing sánin, nák ku son wáin ma náená áre kungga Ánutu yan átkuku watá tunggafeinek.”

<sup>19</sup> Wáina yánángga málám másáng káman táng sáponga tángga ulánga yámángga yánuk, “Náwu naya yánunma, sán hálang sásámáya sámindet. Sándá inggon tángga nangga ku náka naráng hátingguineráng.”

<sup>20</sup> Kulá sungi nang hálingga sangga málám kap wáin pálak wa táng wáinanyon tángga ku ing miuk, “Wáin kap náwu Ánutu yá ámna náráwa yot pahán káman háleineráng wata tarákgá. Pahán káman náwu Ánutu yá uláp ámna náráwa yot pahán káman háliuráng wáina muná. Iná nák sipna yá ku pahán káman wa táng tunggap táinek. Nák sipna yá sunggulingga háinek watá ku sán hálang sáminek. <sup>21</sup> Kulá narineráng, káman niyá nák neháng káyam ket yáni hára tinek wawu nákkot nahára tebol hára átamán. <sup>22</sup> Ámna Nanggená wawu uláp Ánutu yá kálu isusut ta miuk wa isutang há kuinek. Iná ámna niyá wa táng káyam ket yáni hára tinek wawu ukuro táwi hánám.” <sup>23</sup> Wáina yánán disaepelná yá yáni inán kanán táuráng, “Niyá hánám bu kálu wáina táinek?”

<sup>24</sup> Kulá disaepel yáni wu niyá hánám bu orek yáni hára kutná árená hánám átak ingga yáni yon menmen táuráng. <sup>25</sup> Wáina tángga árát tu Jesu yá yánuk, “Ále kámá káinnan king

\* **22:1:** Rám wawu Ánutu yá Isip káinnan Israel ámna náráwa yángotang kun kálu hára másáng yisná muná náuráng wata naráng hátinggátaráng.

ingga átnándaráng watá ku yáni ya narát kut yáni árená hálen yáin yáni hánám átnándaráng. Hang meng toling námániráng ingga ket tárák álosim tángngátaráng. <sup>26</sup> Iná sándá ku wáina ma háleindaráng, ináku káman dá kutna árená hálein ingga wawu nangge kimo yá ina átnek. Hang káman kutná árená átnek wawu sándán yáup nangge háleinek. <sup>27</sup> Kulá ni wu kutná árená yá átnek, káman tebol hára átnek wa, me káman ni yáup nangge ya átang tiriktárák tángga átnek wa? Káman ni kutná árená átnek wawu tebol hára átnek wa, iná nákwawu orek sáni káin yáup nangge watá ina átkoet. <sup>28</sup> Sán du ingirungngi rina rina nákkán káin áwángga átuk wahára wu nákkot ronrosin áturáng. <sup>29</sup> Nan dá háláng táwi nákwawu, wáinanyon no háláng táwi wa sán sáminet. <sup>30</sup> Wáina sáminet ta ku nákkán átkuku wata kinan nákkán tebol hára átang umi surúngga kome álosim hára king gá ina átang Israel yan tombong 12 wa pin yáni tángga átnéráng.”

<sup>31</sup> Wáina yánánga ku miuk, “Saimon, Saimon, Satan dá áwáng sán sángsárungnginán miuk, wit páliná yá haniráng ingga wit seng hip tángga hirarát árángngátaráng wáinanyon. <sup>32</sup> Wáina háendu no káka sáponga há táng kamángoet, naráng hákhátikka yá ma háindák. Rám ko hurik tángga son áwinelák wahára wu yanuknukka wa iháng káto tángga átnelák.”

<sup>33</sup> Jesu yá wáina inán du Saimon dá inuk, “Táwi, nákwawu ku kákkot kungga kalabus kinan hahaya me kákkot kungga kátkámut ta tiyawingga átat.” <sup>34</sup> Wáina inán Jesu yá inuk, “Pita, no ing kanin, kula hurák ká ma mantáená átnek wahára wu rákwawu nákwawu nákwawu nákwawu nákwawu mátkungga méinelák.”

<sup>35</sup> Wáina inánga ku son kámu yánu, “No nákwawu yáup tátáya suring sámut wahára wu sup tumá me yá me sendol káma ma ihánga kuráng, wahára kutná kutná ya káma kesák táuráng me muná?” ingga yánán watá muná ingga inuráng.

<sup>36</sup> Wáina inát tu Jesu yá yánu, “Kulá nahára ku niyá supmá tumá yá átmán wawu táinek, me yákwawu yá átmán wawu hányon táinek. Iná káman ni kápiKWawu muná hálen wawu lapmá hárákwawu táng tin yuwáng mátkungga tu sup wanyon táng kápiKWawu káman yuwinek. <sup>37</sup> Náuta Ánutu yan papia káin ing uyená, ‘Ámna náráwa yá ámna wáik ingga káuráng.’† Wáina mená watá nákwawu hára pálipuk tunggafeindek. Ánutu yan papia káin nákwawu rina uyená watá pálipuk tunggafeindek.”

<sup>38</sup> Wáina yánán disaepel yá Jesu inuráng, “Táwi, kang, kápiKWawu yará ná,” ing inát tu Jesu yá yánu, “Wa rewe álo.”

*Jesu yá ále yáilá Olif káin sáponga táuk  
(Mat 26.36-46; Mak 14.32-42)*

<sup>39</sup> Jesu málam hangga ále yáilá Olif káin rákwawu nukngá kungngátak wáinanyon kun disaepelná yá isutang kuráng. <sup>40</sup> Kung hangga ku disaepelná yánu, “‘Ingirungngi yá nándán káin tunggafen wahára ma pálingga háindámán,’ ingga wata sáponga tángga átnéráng.” <sup>41</sup> Wáina yánánga málam yápmangga kung sup káman matne kungga rehára hanggim, ále mulangan ná tárák wáina hára kung tulá hára ímánga átang sáponga táuk, <sup>42</sup> “Nan, ka nárángga márapmá ná namáng hutang táin ingga wawu álo, enendu ko nákkán pahán ma isutnándalák, ináku kakán pahán isutnelák.” <sup>43</sup> Wáina sáponga tángga áran alek káinman angelo káman dá hang háláng imuk. <sup>44</sup> Kulá málam sutná wa narán márapmá hánám hálen du sáponga hánghálángngá tángga áran nunggup káto watá rina káma ingmen utang sip pá ina sárorok kákwawu káin hangga átuk.

<sup>45</sup> Kulá sáponga táng hálingga sangga kungga kápu ku disaepelná wu pahán márap táwi hánám tángga átkurang háendu háláng yáni han há yáni ruhánga árat. <sup>46</sup> Wáina kápánga Jesu yá yánu, “Náuta ku ruhánga átkoeráng? Tárutang ‘ingirungngi yá nándán káin tunggafen wahára ma pálingga háindámán,’ ingga sáponga tángga átniráng.”

*Káyam bá áwáng Jesu ket táuráng  
(Mat 26.47-56; Mak 14.43-50; Jon 18.2-11)*

<sup>47</sup> Jesu yá disaepelná yánánga emá me tángga átnarán du ámna urum táwi watá áwáng hiuráng. Judas Jesu málabán disaepel 12 waháranan watá máta yárengga yángotang áwáng hangga ku Jesu kang kumein ingga rupmá káin áwuk. <sup>48</sup> Wáina áwán du Jesu yá inuk, “Judas, kákwawu ku Ámna Nanggená táng káyam ket yáni hára titiya ku kang kumindelák hákwawu?”

<sup>49</sup> Kulá Jesu yan disaepel yá wáina tunggafeindek ingga kangga ku inuráng, “Táwi, nándá kápiKWawu ká álo ráhinemán ingga narelák me?” <sup>50</sup> Wáina inánga ku káman dá kápiKWawu táng pris yáin yáni yan yáup nangge wata káramanná álák kálu sating san hákwawu.

<sup>51</sup> Wáina tán kangga Jesu yá inuk, “Wáina ma táindalák!” ingga inánga yáup nangge káramanná wa táng son komenon ting muk.

<sup>52</sup> Wáina tángga ku Jesu málam árong pris tátáwi yáni me Táwi yan it káungá hánám pinná tátáyan yáup ámna me ámna hulá ingga málam ket tátáya áwuráng wa yánu, “Nákwawu ku tewe

† 22:37: Aisaia 53.12

ámna tombong káman da máta yáreng yámamá há, wáina hárendu sándá kápik kot honggen bot ihánga áwerá? <sup>53</sup>Rámá rámá ná, kú sáni yot Táwi yan it káungá hánám kumbiná kinan átnándat wahára wu ket ma nehángngátaráng. Iná kula wu sándán rám, páyung gán háláng gá tunggafek.”

*Pita yá Jesu ma naráng má, ingga miuk*

*(Mat 26.57-58,69-75; Mak 14.53-54,66-72; Jon 18.12-18,25-27)*

<sup>54</sup>Wáina yánán du káyam áwuréng watá Jesu ket tánggatang pris yáin yáni yan it káin kuráng. Iná Pita wu yásutang kuk, enendu kimo mulángán sim kungga átkiuk. <sup>55</sup>Pris yáin yáni yan it kumbiná kinan kapme táitná hánám hára wu ámma kámá yá káráp sit ran du wa elengga árát Pita wu kung wahára kámuk yáni putung átkiuráng. <sup>56</sup>Wáina árán káráp yamá yá Pita hára man du yáup náráwa káman wahára áturáng watá kárek hánám kangga átang miuk, “Ámma náwu Jesu yan tombong waháranan.”

<sup>57</sup>Wáina men Pita yá olangga inuk, “Náráwa, ámma wa melák wawu ná, ma naráng má.”

<sup>58</sup>Wáina inánga átang sim bu son ámma káman dá kangga miuk, “Kák ku ámma watán tombong háranan.”

*Inga inán Pita yá miuk, “Nák muná!”*

<sup>59</sup>Wáina inánga kimo átang sangga ku ámma káman dá áwáng kangga miuk, “Pálipuk hánám, ámma náwu watyot átningngátak, náuta ámma náwu Galili nan yon.”

<sup>60</sup>Wáina men Pita yá miuk, “Ko náuta melák wawu ná, ma narát.” Wáina inánga árán du waháranon hurák ká mantáuk. <sup>61</sup>Kulá wahára re ku Táwi Jesu yá hurik tángga kárek hánám Pita kan du Pita yá Jesu kangga me ing inuk wa naráng hátiuk: “Kula hurák ká ma mantáená átnek hára rám kaláhu ná, Jesu ma naráng má, ingga meinelák.” <sup>62</sup>Málám Jesu yan me wa naráng hátingga ku kep káin kung hangga kandák rina táuk wata naránga kutkáyawat táuk.

*Jesu ináng kekkek tángtáng uturáng*

*(Mat 26.67-68; Mak 14.65)*

<sup>63</sup>Kulá ámma Jesu pinná tángga áturáng watá ináng kekkek tángtáng uturáng. <sup>64</sup>Yáni wa ku lap táng rahálá pop táng sat árán du ut táng ut táng gu inánggiuráng, “Kulá niyá nutak ingga profet me meng.” <sup>65</sup>Wáina inánga ku me keke hulá hulá táwi inuráng.

*Jesu yá ámma hulá rahán yáni hára hetang átuk*

*(Mat 26.59-66; Mak 14.55-64; Jon 18.19-24)*

<sup>66</sup>Hilápmá it tá háing hang átuk wahára wu ámma hulá hulá watá kámuk ingmen káman hálengga urum táuráng. Urum kinan wahára wu lo yan tiksa me pris tátáwi yáni watá árát tu Jesu engotang urum wahára áwuréng. <sup>67</sup>Wáina engot áwáng sat árán du Jesu ináng suliuuráng, “Kulá nánáng, kák ku ámma náráwa son iháhá wa me?”

Wáina inát tu Jesu yá yánuk, “Iná no sáninet wawu sándá nákkán me wa narát kusák háleinek. <sup>68</sup>Iná no sánáng sulinet wawu sándá wata topmá ma nanindárang. <sup>69</sup>Rám kula átang hulátingga ároinek wakáin du Ámma Nanggená wawu Ánutu Hálángngá Pálak wata ketná álak kálu putung átnek.”

<sup>70</sup>Wáina yánán du inuráng, “Wáina wata ku, kák ku Ánutu Nanggená há, me?”

Wáina inát tu Jesu yá yánuk, “Wawu pálipuk hánám meráng.”

<sup>71</sup>Wáina men du ámma hulá hulá watá yáni meme táuráng, “Náuta ku me hulá nukngá me naránin ingga sulinemán? Me wu málámba milunná hánám háranon há men naremán wa rewe.”

## 23

*Pailat rahálá hára Jesu yá me hára átuk*

*(Mat 27.1-2,11-14; Mak 15.1-5; Jon 18.28-38)*

<sup>1</sup>Ámma hulá urum táuráng watá kámuk tárutang Jesu engotang Pailat tán káin kuráng ngáyá <sup>2</sup>kung táng me hára tinin ingga ing miuráng, “Ámma náwu Israel ámma náráwa yángotang kálu kandák kálu kukuya tángga ing menggoek, ‘Takis Sisa ma imindaráng,’ hang ‘Nák ku king, Ánutu yá ámma náráwaná son iháháya miuk wawu ná,’ ingga menggoek.”

<sup>3</sup>Wáina met tu Pailat tá Jesu inuk, “Kák ka Juda yan king me?”

Inga inán du inuk, “Wawu pálipuk wa melák wáina.”

<sup>4</sup>Wáina inán du Pailat tá pris tátáwi yáni me ámma náráwa urum táwi wa yánuk, “No ámma ná táng me hára titiyan káluná kámá ma kat.”

<sup>5</sup>Wáina yánuk, enendu watá árang hákhátik tángga miuráng, “Watá Judia ále káwak kámuk káin wa ámma náráwa me hulá hulá yánánga pahán yáni seng tárut tán wáik tánin ingga tánggoeráng. Wa hulátiuk wawu Galili ále káin átang áwánga nákkán.”

<sup>6</sup> Wáina inát naránga Pailat tá yánang suliuk, “Ámna ná wa Galili nan me?” wáina yánang sulin du ing inuráng, “Wawu pálipuk.” <sup>7</sup> Wáina ingga inát tu Pailat tá naruk ku ámna wawu ále káwak Herot tá pinná táená káinnan hálen du suring yámán Herot tán káin engotang kuráng. Rám wahára wu Herot tu Jerusalem káin wanyon átuk.

<sup>8</sup> Herot tá Jesu yá rina rina tán met narángngátak, wata ku rám háasák simbon wa kakaya naránga áwángngátak, enendu ma kangngátak. Wáina hálen du Jesu yá áwáng hiuk hára wu kangga heronge naruk. Watá ket tárak kámá tán kakaya naránga wata hálangngátak. <sup>9</sup> Wáina áwáng hen du Herot tá táup hánám ináng suksulik táuk, enendu Jesu yá wata topmá kámá ma inuk. <sup>10</sup> Pris tátáwi yáni yot lo yan tiksa wawu wahára kámuk átang hahatingga átang Jesu táng me hára tiuráng. <sup>11</sup> Wáina tángga sat tu Herot tá tewe ámnaná yot yáni wa ku ináng kekkek tángga lap álosim tawáng mángga son suring yámán engotang Pailat tán káin kuráng. <sup>12</sup> Uláp pu Herot káling Pailat wawu kámkýam átkiumálák, iná rám wahára re átang gu nuknuk tángga átang ároumálák.

*Pailat tá Jesu táng maripong hára kákátiya miuk*

*(Mat 27.15-26; Mak 15.6-15; Jon 18.39—19.16)*

<sup>13</sup> Pailat tá pris tátáwi yáni kámá yot ámna hulá hulá me ámna náráwa mantán áwát tu yánuk, <sup>14</sup> “Sándá ámna ná engotang nákkán káin áwángga ku ing miuráng, ámna náráwa yángotang kálu kandák kálu kukuya tánggoek ingga miuráng, enendu no sáni yot há átang ináng sulingga káet tu me rina meráng wawu watá wáina kámá ma táuk hálek. <sup>15</sup> Iná Herot tu wáinanyon kangga ku suring mán nándán káin áwek. Ing narineráng, kandák kámá táuk ka no utkámut tátáya álo ing ma meindát. <sup>16-17</sup> Wáina wata ku yáne hánámá lahot mát tu se hangga háná kuinek.”\*

<sup>18</sup> Wáina yánán du kámuk hánám milun yáni káman hálen ing mantáuráng, “Ámna wa utkámut tánelák, iná Barabas wu satá nándán káin áwik!” <sup>19</sup> (Barabas wawu ámna káman kapman tárang káin átnát ta takta narángngátak, wata ku málámbot ámna kátu yá it yáilá kinan káin kun táng hilák tángga ámna káman utkámut tán du wata táng kalabus it kinan tiuráng.)

<sup>20</sup> Kulá Pailat tá son, “Jesu sáe kukuya naret,” ingga yánuk, <sup>21</sup> enendu kámuk hánám watá ing mantánga áturáng, “Maripong hára kátiti! Maripong hára kátiti!”

<sup>22</sup> Wáina mantánga árát tu rám kaláhuná hára ku ing yánuk, “Náuta? Ámna nátá mrapmá kámá rina táuk? No ámna nátá mrapmá kámá táuk wahára kungga utkámut tátá ingga memeyan káluná kámá ma kat. Wáina wata ku hánámá lahot mángga satne hangga háná kuinek.”

<sup>23</sup> Wáina miuk enendu áráng hákhátik tángga ing mantáuráng, “Maripong hára kátiti!” ingga sonson hahatingga mantánga árát watán man watá re Pailat tán me wa hálangngá tángga háuk. <sup>24</sup> Wáina tángga árát tu Pailat tá watán milun isutang gu Jesu yá kámutnek ing miuk. <sup>25</sup> Wáina mengga ámna huphuráp kun táng hilák tángga ámna utkámut tán táng kalabus it kinan tená wa yaling mán kep káin hahaya inuráng wata met wa yaling mán kep káin háuk. Iná Jesu wu watán milun isutang táng tewe ámna ket yáni hára tiuk.

*Jesu táng maripong hára kátiuráng*

*(Mat 27.32-44; Mak 15.21-32; Jon 19.17-27)*

<sup>26</sup> Kulá tewe ámna yá Jesu engotang kungga átnárát tu ámna káman it yáilá Sairini nan kutná Saimon watá it yáilá Jerusalem kinan kung háin ingga áwángngárán kangga maripong ná tángga kung ingga inánga ku imát sungga tánggatang Jesu sárummá ya isutang kuk. <sup>27</sup> Wahára wu ámna náráwa táup hánám watá isutang kuráng wata kinan náráwa kámá yá ukuro narángga kutkáyawát pálak isutang kunggarát tu <sup>28</sup> Jesu yá hurik tángga náráwa kut pálak kuráng wa yánuk, “Jerusalem yáuriwa, náka ma kut namindaráng, ináku sáni ya kutkut sáni kutneráng, me nángánange sáni ya kut yámineráng. <sup>29</sup> Rám káman áwinek wahára ku meineráng, ‘Náráwa nange ma iháhayan me ma ihená watyot nange muk ma yámená watá ku heronge táineráng!’ <sup>30</sup> Rám wahára ku ‘ále yáilá yámineráng, “Hulátang nán ketnán haniráng!”

iná ále kandángngá wu yámineráng, “Náháng usáng hang tiniráng!” †

<sup>31</sup> Kulá ámna yá káráp mirak árená hára wáina tángga ku káráp kunkumená hára wu rina tánggalát?”

<sup>32</sup> Kulá ámna yará kandák táená wawu Jesu yot ráháng kátkámut tátáya ihánga kuráng. <sup>33</sup> Jesu wu engotang kungga ále káman kutná Yáin Kuratná wahára kung hengga ku táng

\* **23:16-17:** Nanará ámna kámá yá ku ing narángngátaráng, me kámá tombong nahára hányon átak. Me wawu ing, “Kálu káman ing isutnándaráng, yara kámuk wata kinan rám táwi wahára Pailat tá ing tángngátak, ámna káman kalabus it kinan árená wa san along kungga yáni ya ket yáni káin kungngátak.” Mak 15.6 wahára káineráng. † **23:30:** Hosea 10.8

maripong hára tingga kátiuráng. Ámna yará kandák táená watyot iháng wáinanyon kátiuráng, káman táng ket álák kálu, káman táng ket kandák kálu. <sup>34</sup> Wáina átang gu Jesu yá miuk, “Nan, ko watán kátu wa sáinelák. Rina táeráng wawu ma naráráng.” Iná tewe ámna yá ku lap Jesu yá sutná tánggánená wa horengga iháháya ting sat árán niyá ku resim ihinek ingga kakarák satu táuráng.

<sup>35</sup> Iná ámna náráwa yá ku hetang átang kápánga arát ámna yáilá yá ku me keke hulá hulá mengga átkiuráng, “Kámá háláng yámángoek wáinanyon du sat málámbáyón málám háláng iminek. Pálipuk hánám ámna Ánutu yá ámna náráwa son iháháya táng tunggap táuk hálendu málámbáyón málám háláng iminek.”

<sup>36</sup> Iná tewe ámna yá áwuráng ngáyá ku ináng kekkek tángga wáin ingirángngá imuráng. <sup>37</sup> Wáina tángga ku inuráng, “Pálipuk kák ku Juda yan king hálendu kayon ka háláng iminelák.”

<sup>38</sup> Kulá ámna kámá yá me káman uyiuráng wa táng Jesu yáilá torong hára káting sat átuk wawu ing:

#### NÁWU JUDA YAN KING.

<sup>39</sup> Ámna kandák táená yará iháng káting sat átumálák waháranan káman dá Jesu ináng kekkek tángga ku ing ináng sengga átkiuk, “Kák ku Ánutu yá ámna náráwaná son iháháya miuk wa hám, wata ku ko kayon ka háláng imángga ku nátyot háláng námáng!”

<sup>40</sup> Wáina inán du nukngá watá me táng mángga ku ing inuk, “Kák ku ámna watá mápámpá suwek wáinanyon suwelák, enendu kák ku Ánutu ya ma hám pitáng málák? <sup>41</sup> Nát náráháng kátkámut táinderáng wawu kándáng re há hálek, náuta náta mápámpá suwemát wawu kandák táumát wata táráknngá hára álo. Iná ámna náwu kandák kámá ma táuk.”

<sup>42</sup> Wáina mengga ku ing miuk, “Jesu, ko átnát ya káin kung king hálengga átang gu nákka narinelák.”

<sup>43</sup> Wáina inán Jesu yá inuk, “No pálipuk hánám ing kanin, kula wu kák ku nákkot átnát álosim káin átnemát.”

#### *Jesu yá kámutuk*

*(Mat 27.45-56; Mak 15.33-41; Jon 19.28-30)*

<sup>44-45</sup> Rám bá 12 kilok hálengga árán káe yamá watá sálikngin du ále watá páyung tingga káwak usánga árán kungga 3 kilok háliuk. Iná Táwi yan it káungá hánám kinan lap hásak táwi watá ku táitná háng raráhángga yará háliuk. <sup>46</sup> Kulá wahára ku Jesu yá hahatingga ingmen mantángga ing miuk, “Nan, no irukna táng kák ketya hára tet.” Wáina mengga ku pukon árong sun háuk.

<sup>47</sup> Wáina tán kangga tewe ámna yáin yáni watá Ánutu kutná meng tárut tángga ing miuk, “Pálipuk hánám ámna náwu ámna kándáng.” <sup>48</sup> Wáina kangga ámna náráwa rahán da kákápáya áwuráng watá rina tunggafuuk wa kangga pahán yáni yá káto hálén tungturing há yáni kuráng. <sup>49</sup> Iná náráwa nini yá Galili kálu Jesu isutang áwuráng watyot kámá ni Jesu naráng meráng watá ku kung mulángán káin átang rina tunggafuuk wa kangga áturáng.

#### *Jesu táng kung tanggán káin tiuráng*

*(Mat 27.57-61; Mak 15.42-47; Jon 19.38-42)*

<sup>50-51</sup> Kulá ámna káman Judia yan it kutná Arimatea wakáinnan kutná Josep wawu ámna álo kámá kándáng re átkungngátak. Ámna wawu Ánutu yan átkuku wata hálengga átnándak. Iná málám wawu kaunsol. Ámna watá ku kaunsol nuknukngá watá Jesu utkámut tátáya nanará tiuráng wata narán kándáng ma háliuk. <sup>52</sup> Ámna watá Pailat tán káin kuk watá kung “Jesu yan káwak sut wa álo tángga kuinet me?” ingga inuk. Wáina inán álo ing men du <sup>53</sup> málám wa táng hang lap álosim bá pondang táng kung tanggán sup hinangngá káling tolená káman uláp káwak sut káman táng wahára ma tiuráng wahára táng tiuk. <sup>54</sup> Iná Sabat tu há áwáng hálengga átuk, wata ku rám wawu Sabat ta tiktiyawik tátá rama<sup>†</sup>.

<sup>55</sup> Kulá náráwa Jesu yot Galili kálu áwuráng watá ku Josep isutang kungga sup hinangngá rehára káwak sut wa táng tiuk wa káuráng. <sup>56</sup> Yáni wu rina rina wa kangga sangga ku it yáni ya kuráng ngáyá kung oel me kuram mungngan yáni kikiná wa tiyawiuuráng. Iná Sabat hára wu meng rákit mená yá rina rina ma tátáya mek wáina wata ku sek naruráng.

## 24

#### *Jesu yá son tárutuk*

*(Mat 28.1-10; Mak 16.1-8; Jon 20.1-10)*

<sup>1</sup> Sonda ore nukngá ya hulátitiná hára ku hilápmá hánám náráwa watá yon kuram mungngan yáni kikiná tiyawingga tiuráng wa ihángga tanggán káin kuráng. <sup>2</sup> Yáni wu

<sup>†</sup> 23:54: Juda yan kálu wu Sabat hára yáup ma tátáya mená, wata ku Josep pá sokmuná Jesu yan káwak sut táng kung tanggán káin tin ingga táuk.

kungga kaurang gu sup tawi sup hinangngá pop táená wawu ni kámá yá kiwulan kung kep káin árán. <sup>3</sup> Wáina hálendu kurang watá re kungga kinan hangga kaurang gu Tawi Jesu yan káwak sut wawu wakáin ma árán. <sup>4</sup> Wáina kangga wata narangpak tangga átnarát tu ámna yará sut yánda tánggáená wawu hakokowak hánám bá ku sireretná pálak watá kandang yáni kálu hetang átumálák. <sup>5</sup> Wáina árán kápangga yáni wu pikpito hánám wa narangga tun yáni hára ímangga kurák mátap yáni íhang hang káwak káin tit ámna yará watá yánumálák, “Náuta ku sándá ámna átkukuná pálak wata kámurená orek yáni káin ná sulingga átinggoerang?” <sup>6</sup> Wawu nahára ma árak, ináku há tárutak! Málámbá sáni yot Galili káin áturang wahára me ing sánuk wa narang hátinerang, <sup>7</sup> Ámna Nanggená wawu tang kung ámna mukmuro táená wata ket yáni hára tit, watá tang maripong hára kátinerang, enendu rám kaláhu átang gu son tárutnek.” <sup>8</sup> Wáina yánán du me rina Jesu yá yánuk wa narang hátiurang.

<sup>9</sup> Kulá náráwa yáni wu tanggán wa sangga kurang watá kung disaepel 11 watyot nini yá áturang wa yánurang. <sup>10</sup> Náráwa wawu Maria it Makedala nan wa, Joana, hang Maria Jeims maming watyot tu náráwa kámá watá áwáng gu aposel yánurang. <sup>11</sup> Áwáng pingnga wa yánurang, enendu watá watán me wawu kusák hánámá iruk me ingga narurang. <sup>12</sup> Iná Pita yá ku tárutang málám hururung ingmen tanggán káin wa kung turingga hangga kápuk ku lap kuliná watá re árat kápangga ku rina ingga narangpak tangtang hangga háná kuk.

*Emeus káluná káin ámna yará yá Jesu káumálák  
(Mak 16.12-13)*

<sup>13</sup> Káe waháरणon du disaepel yará yánda wu it kutná Emeus wakáin kundin ingga kumálák, iná it wawu Jerusalem sangga 11 kilomita wáina kungngátarang. <sup>14</sup> Yánda wu kálu wa kungga átkiumálák wawu Jerusalem káin rina tunggafuk wata mená tangga yánda inán kanán tangga kungga átkiumálák. <sup>15</sup> Wáina tangga kungga árán du Jesu málámbá wahára áwán káman yáni kurang, <sup>16</sup> enendu yánda wu náut kámá yá rahán yánda wa ting suwán wawu Jesu ingga ma káumálák.

<sup>17</sup> Wáina áwán kámuk yáni kungga átang gu yánang suliuk, “Sánda náut mená tangga áwángga átkoemálák?”

Wáina yánán du yánda wu tareng kátangga kurák mátap yánda yá ukuro hálen átumálák. <sup>18</sup> Wáina átang gu káman kutná Kliopas watá inuk, “Jerusalem káin lombu táwi hánám áwáng átarang. Waháरणan du ko káman dá re ku rám nahára rina tunggafengga átak wawu ma hám narálák?”

<sup>19</sup> Wáina inán du Jesu yá yánuk, “Náuta rina tunggafengga átak?” ing men du watá inumálák, “Jesu Nasaret nan wawu profet káman Anutu rahálá hára me ámna náráwa rahán yáni hára mená menggoek me ket tarák tánggoek wawu hálangngá pálak, nát tu wata menggoemát. <sup>20</sup> Pris tátáwi yáni me nánda ámna hulá ingga átarang watá tang kapman ketná hára tit, watá kámutnek ingga men du tang maripong hára kátit kámutuk. <sup>21</sup> Huphuráp pu nánda watá ku Israel ámna náráwa son ihinek ingga narangngiumán. Iná káman du ing, Jesu wa uturang wawu káe kula áratne ku rám kaláhu hálek. <sup>22</sup> Kulá waháरणon du náni háरणan náráwa kámá hilápmá hánám tanggán káin kungga sangga áwáng gu náhang háramut táerang wawu ing, <sup>23</sup> tanggán káin wa káerang gu Jesu yan káwak sut wawu ma árán. Wakáin du angelo yá re árán kápangngarát tu Jesu wu há tárutnárang mirak átak ingga yánemálák ka nánerang. <sup>24</sup> Wáina narangga náni háरणan yará yá tanggán káin kungga káemálák ku pálipuk náráwa yá merang wáina, iná Jesu málám bu kámá ma kamálák.”

<sup>25</sup> Wáina men du Jesu yá yánuk, “Nanárá sándi muná, profet tán me wa há narangngátamálák, enendu narang hákhátik sándi wu isikimo. <sup>26</sup> Ámna náráwa son iháháya háuk wawu márapmá wa suwinek ka ku Anutu yá kut táwi hánám iminek wáina wa naremálák me muná?” <sup>27</sup> Kulá wáina yánangga ku Moses hára átang hulátangga árongga profet kámuk kán káin málámba rina mená miti papia káin átak wa erek yánang tolingga kuk.

<sup>28</sup> Wa yángyánang kungga ku it átnát ta kumálák wata tangtang kung hengga ku Jesu yá it wa tang hátingga kuin ingga táuk. <sup>29</sup> Wáina tán ámna yará watá ma kuindalák ingga oletná mangga inumálák, “It tá yonyon hálangga páyung tindek, wata ku nátyot átang tembát tu wáina kuinelák,” ingga inán du watyot it kinan háurang.

<sup>30</sup> Hang tebol hára putung átang másang tang sáponga tangga ulangga yámuk. <sup>31</sup> Wáina tán du narang hátingga rahán yánda yá ruwarán du wahára re pikpiliuk. <sup>32</sup> Wáina kun du yánda meme táumálák, “Pálipuk hánám kálu káin Anutu yan me wa hulá yot mengga nánang tolingga áwek hára pahán náti yá táwi hánám tárutak.”

<sup>33</sup> Wáina tangga ku yánda wu tárutang Jerusalem káin son kumálák. Kung disaepel 11 wa kápangga kámá watyot áturang watyot káman átang gu <sup>34</sup> ámna yará wa ing yánurang, “Wawu pálipuk hánám! Táwi wu há tárutang kungga Saimon dán káin tunggafek.” <sup>35</sup> Wáina yánát tu



ámna yará watá ku kálu káin tunggafeng yámuk me másáng ulángga yámán kangga naráng hátiumálák wata yánumálák.

*Jesu yá disaepelná yan káin tunggafeng yámuk*

*(Mat 28.16-20; Mak 16.14-18; Jon 20.19-23)*

<sup>36</sup> Wáina yánánga wata mená tánga átnárát tu Jesu málámbá orek yáni hára wa hetang átang yánuk, “Pahán láláp pá sányot átnek.”

<sup>37</sup> Wáina yánuk, enendu disaepel urum áturáng watá kangga háramutang náwu utni káemán ingga pikpito naruráng. <sup>38</sup> Wáina kápánga ku yánuk, “Náuta háramutang gu nanará sáni káin wa nangnaráng táeráng? <sup>39</sup> Ketna me háramna ná kaniráng. Pálipuk náwu na! Nehángganga narániráng. Utni wu yánum yáni me kurat yáni nák hára átak wáina muná.”

<sup>40</sup> Jesu málám wáina yánánga ku ket hárammá káin párángga wa yáliuk. <sup>41</sup> Wáina yálen kangga heronge táuráng, enendu wa narát kándáng ma hálen naránpak yáni watá emá re há átuk. Wáina kápánga ku yánuk, “Sán náut kámá kámá nanayan nahára teráng ngá kámá átak me muná?” <sup>42</sup> Ingga yánán du yáni wu káut kátu singga tená wa táng imát tu <sup>43</sup> rahán yáni hára náuk.

<sup>44</sup> Wa nangga ku yánuk, “Náwu no sáni yot átang rina tunggafeinek ka há sánut wáina. Me rina nákka Moses yan meng rákit me káin, profet tán papia káin me Kap Papia káin uyená wata páliná yá tunggafek.”

<sup>45</sup> Wáina yánánga ku nanará yáni yan káluná wa yalin du Ánutu yan me rina uyená wa naráng hátiuráng. <sup>46</sup> Wáina tánga ku ing yánuk, “Náwu ing uyená wa: Ámna náráwa son iháhá wawu márappmá sungga kámutang rám kaláhu átang gu son tárutnek. <sup>47</sup> Wata ku pahán hurik tánga watán káin kut tu Táwi yá mukmuro sáni yawonek ingga Jerusalem hára átang hulátingga wata kutná hára mengga meng isurát kungga káwakngá káwakngá kámuk kuinek. <sup>48</sup> Iná sándu sáni rahán sáni yá há káeráng, wata ku wa meng isurát kuinek. <sup>49</sup> No ku náut Nanna yá sásámáya miuk wa se áwáng sáminek, iná sándu it yáilá hára ná re árát kungga ku alek káinnan hálang watá hang sáháng támotnek.”

*Ánutu yá Jesu son tánga alek káin kuk*

*(Mak 16.19-20)*

<sup>50</sup> Kulá Jesu málám disaepelná yángot kung it Betani tangtang káin átang gu ketná iháng hip tánga átang disaepelná kuram táng yámuk. <sup>51</sup> Kuram táng yámánga átnárán waháranyon du Ánutu yá tánga alek káin árángga kuk. <sup>52</sup> Jesu yá yápmangga kun du yáni wu ináng sákngingga sangga ku heronge pálak Jerusalem káin son kuráng. <sup>53</sup> Kung rámá rámá Táwi yan it káungá hánám wata kapmená hára átang Ánutu kutná meng tárut tánga átkiuráng.

## Aposel yá yáup táurang wata pingnga yáni

*Jesu yá alek káin kuk*

<sup>1</sup> Tiofilas, no papia huphuráp uying kamut wawu Jesu yá hulátingga yáup rina rina táuk me rina yánang toliuk wahára átang áwánga áwáng <sup>2</sup> rám Ánutu yá tángga alek káin kuk watán me pingnga wa erek hánám uyiut. Jesu yá alek káin manyon koená átang aposel iháng tunggap táuk wa yáup wáina wáina há táineráng ingga Iruk Káungá yan háláng hára yánuk. <sup>3</sup> Málámbá sut láwit naruk wata torong káin du rina táe ku aposelna yá pálipuk son tárutut ingga nahániráng ingga watán káin tunggafengga rám táup pon tárak hulá hulá tángga málám yálenggiuk. Wáina tángga rám 40 wata kinan du aposelna yan káin tunggafengga Ánutu yan átkuku wata yánanggiuk. <sup>4</sup> Rám káman aposelna yot átang gu yánuk, “Jerusalem sangga ma kuindaráng, ináku nahára átang hálengga árongga árát Nanna yá náut há hánám sásámáya miuk wata no sáne naruráng wa sáminek. <sup>5</sup> Jon dá ku umi yá kuháng yámanggiuk, iná rám hátetná kimo átang gu Ánutu yá ku Iruk Káungá yá kuháng sáminek.”

<sup>6</sup> Kulá Jesu yá aposelna yot háwuru tángga átang gu inuráng, “Táwi, uláp Israel yá kutná pálak átang káto hánám hálengga átkiuk wáinanyon rám nahára ko tátá wáinanyon son álo átgim me?”

<sup>7</sup> Wáina inát tu watá yánuk, “Rám wáina wa, wawu Nanna yá málámbán háláng wahára kungga tiuk, wata ku sándá nanaráyan tárak ku muná. <sup>8</sup> Iná sándu Iruk Káungá watá áwáng ep sáhán watán háláng há táineráng, wata ku sándá Jerusalem hára ná, me ále Judia kámuk, me ále Samaria hang káwakngá káwakngá káin erek hánám rina kanggoeráng me narángoeráng wa yánang tolingga kuineráng.”

<sup>9</sup> Jesu yá me wa yánang hálín du rahán yáni hára Ánutu yá tán du árángga mukam kinan kungga alek káin kun ma kauráng.

<sup>10</sup> Arángga kun yáni wu alek kálu re kárek hánám hálengga átnárát tu ámma yará lap yándi haknga re tánggánená watá tunggafengga káman yáni wahára átang gu <sup>11</sup> yánumálák, “Galili ámma, náuta ku nahára átang alek kálu re hálengga átkoeráng? Jesu wa, wawu Ánutu yá kula tán du alek kinan káin sápmangga kun káeráng wawu son áwinek. Alek kinan káin rina árángga kun káeráng tárak wáinanyon son áwinek.”

*Judas yan kome tátáya aposel yá Matias táng tunggap táurang*

<sup>12</sup> Wáina yánán du aposel yáni wu ále yáilá Olif wa sangga Jerusalem káin kuráng. Jerusalem wawu mulanganá muná ináku enanggon. <sup>13</sup> It yáilá káin kung hengga ku árang it pahálá torong káin yáni átnándaráng wakáin áturáng. Ámma wahára árang áturáng wawu Pita, Jon, Jeims, Endru, Filip, Tomas, Batolomiu, Matyu, Jeims Alfius nanggená, Saimon tombong Selot háranan, hang Judas Jeims nanggená. <sup>14</sup> Ámma urum watá ku rámá rámá pahán káman hálén urum átang sáponga tángga átkiuráng. Rám wahára wu náráwa kámá hányon áturáng, hang Maria Jesu maming me Jesu yakukula watoyt kámuk átkiuráng.

<sup>15</sup> Rám ore wahára ku ámma náráwa ni Jesu ya naráng háting mená wata sale yáni wu ále 120 náut wáina watá árát tu orek yáni hára Pita yá tárutang gu ing miuk, <sup>16</sup> “Yanuknuk, uláp Iruk Káungá watá Dewit milunná hára me meng tunggap táuk. Kulá me wawu Táwi yan papia hára ing uyená átnándak, wawu Judas ya miuk. Ámma watá ku kálu yálen Jesu táng káyam ket yáni hára tineráng ingga miuk. Kulá me wata páliná ya ku há tunggafituk. <sup>17</sup> Huphuráp Judas wawu nánin tombong gon átkiuk, iná yáupmá ku náni tánggoemán wáinanyon tánggiuk,” ingga yánuk.

<sup>18</sup> Judas wawu kálu kandák táuk wata yumnakngá sup ihuk watá ku káwak káman yuwuk. Rám kámá átang gu málám káwak wahára táng hang kátingga kawilá yá hiláksin du kámun pahálá yá kámuk ingmen sunggulingga áwáng kep káin háuráng. <sup>19</sup> Wáina tán du Jerusalem kinan ámma náráwa áturáng watá pingnganá wa naránga ku káwak wata kutná ku yánin me kálu Akeldama ing miuráng. Kut wata hulá ku Káwak Sip Pálak.

<sup>20</sup> Pita yá ing hányon miuk, “Kap Papia hára Dewit tá Judas ya ing mengga uyiuk, ‘Watán tum kome watá hánámá átnek,

káman dá watán tum kome hára ma átnándak,\*

hang wata kátu yon ing uyená yá átak,

‘Nukngá yá watán yáup komená wa álo táinek.†

<sup>21-22</sup> Wáina wata ku álo kámá ku ámma káman orek náni háranan táng tunggap táinemán. Ámma wawu ing táená kangga, hulátingga Jon dá umi kuháng yámuk wahára átang árongga Jesu

\* 1:20: Kap Papia 69.25 † 1:20: Kap Papia 109.8

yá alek káin kuk wahára Táwi Jesu yot átninggimán waháranan káman. Ámna wáina watá ku rahálá yá há káuk, wata ku nán háláng námánnga Jesu yá tárutuk wata meng isurán kungguinek.”

<sup>23</sup> Pita yá wáina men du ámna yará ná háranan káman dá átgim ingga miuráng, ámna káman du Josep kutná nukngá Barsabas hang kutná nukngá Jastus, hang ámna káman du Matias. <sup>24-25</sup> Wáina tángga ku sáponga tángga Táwi ing inuráng, “Táwi, ko ámna kámuk ka pahán yáni wa há káelák, wata ku ko ámna yará ná háranan du ni ámna yá ku Judas yan kome tángga aposel yáup wa táinek ka táng tunggap táet ingga álo nálengim me? Judas yá yáupmá wa sangga márappmá táuk wata tárakngá isutang átnát ná rekáin átak wakáin há kuk.” <sup>26</sup> Wáina inánnga ku Ánutu yá ni táng tunggap táinek ingga sup hirarát kun du Matias yan sup watá kung kándáng átuk, wata ku Matias táng aposel 11 watyot tiuráng.

## 2

### *Iruk Káungá yá háuk*

<sup>1</sup> Kulá Juda yan rám táwi kutná Pentikos watá tunggafiuk hára wu ámna náráwa Jesu ya naráng háting mená watá kámuk hánám káman hára re urum arát, <sup>2</sup> waháranan du naráungarát iruk yatná yá iruk táwi tángga hásingngátak wáinanon alek kálu hangga wata timtáummá watá re it pahálá putung áturáng wata kinan táwi hánám tángga átuk. <sup>3</sup> Wáina tán naráungga kanggarát tu káráp lánggon iná watá tunggafengga ku ámna nangge elák yáni iná watá ku horengga kung káman káman yáin yáni ketnán áturáng. <sup>4</sup> Wáina tát tu yáni wu Iruk Káungá watá kámuk ep ihán du watán háláng hára me hulá hulá metánga áturáng.

<sup>5</sup> Kulá rám wahára wu Juda kámá Ánutu ya naráng háting mángngataráng, wawu káwakngá káwakngá káin arená watá áwáng Jerusalem káin áturáng. <sup>6</sup> Iruk maming táí yatná iná wa naráungga ku ámna náráwa táup táwi watá áwáng urum tángga átang naruráng gu yáin me káman káman kálu metát naráungga ku háramutang wa nangnaráng tángga <sup>7</sup> nangnga yáni han du miuráng, “Ámna náráwa náwu Galili nan rewe, <sup>8</sup> enendu rina tángga ku nán átamán watá ku náni káman káman dá nánin me kálu hánám me metát naráunggoemán? <sup>9</sup> Nán du káwak wakáinnan wakáinnan dá áwená. Nán du káwak Patia, Midia, me Elam, me Mesopotemia ále, me Judia ále, me provins Kapadosia, Pontus me Esia káinnan dá áwumán. <sup>10-11</sup> Me nán du distrik Frigia me Pamfilia, me káwak Isip, me ále Libia kátu it yáilá Sairini tangtang wakáinnan dá áwumán. Me nán Juda me kámá káinnan Juda yan naráng hákhátik isurená Rom káwak káin arená, me ailan Krit me ále Arebia wakáinnan dá áwumán. Nán du káwak wakáinnan wakáinnan dá áwená, enendu watá me metát naremán wawu Ánutu yá yáup maming táwi hánám táuk wata náni káman káman dá nánin me kálu hánám met naremán!” <sup>12</sup> Wáina met tu kámuk háramutang wa nangnaráng tángga ku yáni inán kanán ing táuráng, “Náwu rina hánám tunggafenggoek?” <sup>13</sup> Iná kámá yá ku wata mengga táng suksuk tángga ku ing miuráng, “Wawa wáin táwi hánám hám náeráng hálendu watá ku wáina tángga átaráng.”

### *Pita yá Táwi yan me yánuK*

<sup>14</sup> Wáina met tu Pita yá ku aposel 11 watyot tárutang gu san táng hip tángga hahatingga urum táwi áturáng wa me ing yánuK, “Yanuknukna Juda me ámna náráwa kámuk Jerusalem hára átaráng sándu, kándáng káramatingga nákkán me ná naráungga ku náut nahára káeráng wata hulá ya narineráng. <sup>15</sup> Sándá ámna náráwa náwu umi káto nangga hohingga wáina táeráng ingga meráng, enendu wáina muná. Inggálu ku emá hilápmá 9 kilok hálek. Rám wáina hára ámna yá sipak ma tángngataráng. <sup>16</sup> Wa meráng wáina muná, ináku ná tunggafek náwu huphuráp profet Joel yá ing miuk wa,

<sup>17</sup> Ánutu yá ing mek, “Rám bá sálikngingga arán du no Irukna wa suring me ámna náráwa kámuk kán káin han nángánangge sáni me yáuriwa sáni yá nákkán me wawu profet tá ina mengguineráng.

Ámna máto sáni yá tárak ára ina kápát tu ámna tátáwi sáni yá ára kangguineráng.

<sup>18</sup> Yáup nangge me yáup náráwa na hánámá yáup táená, enendu rám wahára wu no Irukna wa hányon suring me watán káin han nákkán me wa profet tá ina mengguineráng.

<sup>19</sup> No me hulá kámá watá alek káin ánu tunggafen, káwak káin ámu wu tárak hulá kámá yá tunggafen du rám bu wa ingga narineráng. Sip me káráp lánggop me towet maming táí watá tunggafeineráng.

<sup>20</sup> Káe yá hurik tángga páyung tin du yap pá hurik tángga sip ina háleinek. Wáina tát sálikngin du Táwi yan rám háleinek, wahára wu Táwi yá yamá me hálángngá watyot áwinek.

<sup>21</sup> Kulá nini Táwi yá háláng yámamáya inineráng

watá ku son há ihán álo átneráng.”<sup>\*</sup>

Joel yá profet me wáina miuk.

<sup>22</sup> “Israel ámna náráwa, kárámatingga nákkán me ná narineráng. Sáni há nareráng wa, Jesu Nasaret nan wawu Ánutu málámbá háláng imán ket tárak hulá hulá hálángngá pálak sáni yot átang tánggiuk wawu wáina tán du sándá kangga Ánutu málámbá suring mán áwuk ingga kangga nanaráya tánggiuk. <sup>23</sup> Kulá Ánutu yá yon du táng sán ket sáni hára tiuk wawu uláp wáina táinet ingga há naruk wa isutang wáina táuk. Wáina tán ámna wáik watá háláng sámát tu maripong hára tingga piring gá kátit tu kámuk. <sup>24</sup> Enendu Ánutu yá ámna wa kátkámut tán háláng waháranan imáng hutang tángga táng tárut táuk, náuta kátkámut tán háláng watá wa káto tángga átnát tán tárak muná. <sup>25</sup> King Dewit tá wata ing miuk, ‘No káet tu Táwi yá rámá rámá nák tangtang hánám átkoek.

Watá háláng nanamáya naya tangtang hánám átkoek  
wata ku náut kámá yá neháng kongkong tán ma háindát.

<sup>26</sup> Wáina wata ku pahánna yá álosim hálen milunna yá heronge táet.

Táwi yá káwak sutna táng álolo táinek wata hálangga átkoet,

<sup>27</sup> wawu satá no kámurená yan ále káin ma átnándát,

hang ko ámna rongrongngá hánám nangán ingga narelák wa satá ma pálikngindat.

<sup>28</sup> Ko kálu kungga átkuku tátáyan wa há naliulák.

Ko rámá rámá nákkot áráta no heronge hánám átnet.<sup>†</sup>

Dewit tá me wáina miuk.

<sup>29</sup> “Yanuknukna, no pálipuk hánám há naret wa, ing sánin, pem náni Dewit wawu há kámurán usuráng, hang tanggálá wawu Jerusalem hára ná há átak. <sup>30</sup> Iná Dewit wawu profet hálen du há narek Ánutu yá pálipuk hánám ing inuk, ‘Máriya ku kák kinan nan káman dá king kák inanyon átnek.’ <sup>31</sup> Dewit tá máriya rina tunggafeinek wa kangga ku Jesu Son Iháhá yá tárutnek wata ing miuk, ‘Kámurená yan ále káin ma átnándák me ma pálikngindák.’ <sup>32</sup> Ánutu yá Jesu wawu há táng tárut tán mirak átak. Nánu náni rahán náni yá há kangga ku wata menggoemán. <sup>33</sup> Iná Jesu wawu há árángga kungga Ánutu ketná álák kálu átak. Wáina átang gu Nan dá Iruk Káungá imámáya miuk wa ketná hára há tángga ku suring mán háek ngá ku há kangga nareráng wa. <sup>34</sup> Kulá Dewit tá alek káin kuk wawu Jesu yá kuk wáinanyon muná, wata ku nánda ing narángguinémán, Dewit tá me ing miuk wawu málámba ma miuk, ináku nukngá ya miuk,

‘Táwi Ánutu yá Táwina ing inuk,

“Ketna álák kálu putung áráta kungga

<sup>35</sup> no káyamya wa ráhángga iháng hang ting se áráta

ko wa iháng hátingga átnelák.”<sup>‡</sup>

<sup>36</sup> “Dewit tá wáina miuk, wata ku Israel sándá ku náwu pálipuk hánám ing narineráng, ámna Jesu sándá táng maripong hára kátiráng wawu Ánutu yá táng Táwi átnát ta táng tunggap táuk, hang táng málámbán ámna náráwa son iháháyan ting san átak.”

<sup>37</sup> Pita yá me wa men narángga ku ámna náráwa yá pahán yáni yángen du Pita yot aposel kátu wa yánuráng, “Yanuknuk, rina táinemán?”

<sup>38</sup> Wáina yánát tu Pita yá yánuk, “Sán kámuk hánám pahán sáni hurik tángga ku Jesu ámna náráwa son iháhá kutná hára umi kuhát tu Ánutu yá mukmuro sáni yawondang gu Iruk Káungá wa sáminek. <sup>39</sup> Ánutu yá Iruk Káungá sásámáya miuk wawu sán me nángánangge sáni me kámá ni mulangan átarang wa kámuk sáminek. Táwi Ánutu náni yá ni ámna náráwa mantáng yáminek, wawu uláp Iruk Káungá yámamáya miuk wa kámuk yáminek.”

<sup>40</sup> Wáina yánánga ku me kámá táup pon pahálá yot yánánga ing yánuk, “Kándang hánám hálang rákit tángga átneráng, rám nátán ámna mukmuro watyot mápapá ihánirot.” <sup>41</sup> Kulá Pita yá me wa yánán watán me watá ámna náráwa táup hánám wa ihánggápán du áwáng umi kuhuráng. Rám wahára ámna náráwa sale yáni 3,000 náut wáina tá pahán hurik tángga áwáng Jesu yan tombong háliuráng.

*Ámna náráwa yá pahán káman hánám áturáng*

<sup>42</sup> Ámna náráwa yá káman háhále, me aposel yan me wa nanará, me áwáng urum tángga sungi nana, hang sáponga tátá wata káto hálangga átkiuráng. <sup>43</sup> Wáina tángga áráta Ánutu yá aposel ket yáni hára tárak táup hánám wáina tán ámna náráwa niyá wa kápuráng watá háramutang pitáuráng. <sup>44</sup> Ámna náráwa Jesu ya narang háting mená watá pahán káman re hánám átang kutná kutná yáni wa kat kámuk yáni yan háliuk. <sup>45</sup> Yáni wu káwak me kutná kutná yáni kámá wa iháng yumnak tángga sup ihánga ku iháng káman niyá náuta kesák tán

\* 2:21: Joel 2.28-32 † 2:28: Kap Papiá 16.8-11 ‡ 2:35: Kap Papiá 110.1

wa imánggiuráng. <sup>46</sup> Rámá rámá wu Táwi yan it káungá hánám wata kumbiná kinan urum tánggiuráng. Pahán yáni wu álosim hánám árán heronge hára kámá yan it káin kungkung tángga sungi nangnang tángga átninggiuráng. <sup>47</sup> Táwi kutná meng tárut tángga átkut tu árna náráwa kámá yá ku kápánga pahán álosim naráng yámánggiuráng. Rámá rámá wu Táwi yá árna náráwa kámá yot ihán du Jesu ya naráng háting mená wata sale yáni yá wu táwi hánám hálenggiuk.

### 3

#### *Árna káman hárammá wáik ká álo háliuk*

<sup>1</sup> 3 kilok wawu sáponga tátáyan rám, wata ku rám káman yonyon kálu 3 kilok hálengga árán du Pita káling Jon dá sáponga tátáya Táwi yan it káungá hánám káin árángga kumálák. <sup>2</sup> Kungga káumálák ku wahárayon árna káman mam kinan átang hárammá wu wáik hálená tunggafiuk wa tángga it káungá kumbi kálu mungnganá kutná ku Álosim Hánám wahára áwuráng. Rámá rámá wawu wáina re táng áwáng wahára sat átang árna náráwa yá it káungá kumbiná kinan hangngátaráng hára sup pa yánánga re átnándak. <sup>3</sup> Málám kápu ku Pita káling Jon dá kung háinán tán du kápánga ku sup kámá namándimálák ingga sonson yánu. <sup>4</sup> Wáina yánán du yándi wu kárek hánám hálengga kangga ku Pita yá inuk, “Nát náháng!” <sup>5</sup> Wáina inán du árna watá kápánga ku sup kámá há hám namindemálák ingga naruk. <sup>6</sup> Wáina naránga kápánggárán Pita yá inuk, “Sup silva me gol wawu nákkán káin ma árak, ináku náut nákkán káin átak wa kamindet. Jesu Nasaret nan árna náráwa son iháhá wata kutná hára ing kanin, tárutang tarengga kung.” <sup>7</sup> Wáina inánga ku ketná álák kálu tángga hálang imán tárurán du wahárayon kándumá yot hárammá sárumá watá álo háliumálák. <sup>8</sup> Wáina tán du málám hiring árángga hangga ku tarengga kung áwáng táuk. Wáina tángga ku málám káman yáni kung it káungá kumbiná wata kinan hangga ku kung áwáng tángga hiring hiring tángga Ánutu kutná meng tárut tángga átuk. <sup>9-10</sup> Wáina tán kangga árna náráwa yá árna wawu it káungá kumbiná kálu mungnganá kutná ku Álosim Hánám wahára átang sup pa nánánga átnándak wa ingga kangga há naráng hátiuráng. Wáina háleudu yáni wu rina tángga álo hálek ingga ikik hárámutang nangnga yáni háuk.

#### *Pita yá it káungá kumbiná wata kinan Táwi yan me yánu*

<sup>11</sup> Árna náráwa yá árna wa kangga hárámutang hururung áwánga káuráng gu árna wawu Táwi yan it káungá kumbiná kinan wata parandaná kutná Solomon dán paranda hára Pita káling Jon pengga ihánga árán. <sup>12</sup> Wáina tát kápánga ku Pita yá yánu, “Israel árna náráwa, náuta ku tárák wa kangga hárámutaráng? Me náuta ku káto náhánggoeráng? Tárák ná kangga yándin hálang hára wáina táemálák, me Ánutu rahálá hára kándáng átnándamálák wata ku árna ná táng tárut tán tarengga kung áwáng táek ingga ma narindaráng. <sup>13</sup> Abraham, Aisak, Jekop hang táwi ilom náni yan Ánutu watá yáup nanggená Jesu wa kut táwi imuk, enendu sándá árna wa táng káyam ket yáni hára tiuráng. Pailat tá san háná kukuya miuk, enendu sándá Pailat rahálá hára nándán king muná ingga mengga utkámut tátáya miuráng. <sup>14</sup> Árna wawu rongrongngá kándáng hánám, enendu sándá wa sárum imánga ku Pailat ing inuráng, ‘Árna ráháng kátkámut táena wa satá háná kuik,’ ingga inuráng. <sup>15</sup> Árna nángot kung átkuku nánámá wawu utkámut táuráng wa, enendu Ánutu yá son táng tárut táuk ngá ku nát tu rahán náti yá há káumát háleudu wata sán sánángoemát. <sup>16</sup> Árna náwu huphuráp pu hárammá wáik átkiuk ngá sáni há naráng meráng wa, enendu nán du Jesu ya naráng háting mángngátamán wata ku Jesu kutná hárayon du náta táte wa álo hálek. Jesu málámá yon naráng hákhátik náni wa táng káto táng námán du naráng hákhátik watá yon du árna ná pukon hánám táng tolin álo hálengga wa árán káeráng wa.

<sup>17</sup> “Yanuknukna, no pálipuk ing há naret, sán me árna hulá hulá sáni yot wa táuráng wawu wáina ingga ma narená táuráng. <sup>18</sup> Enendu wawu Ánutu yá uláp wáina há tunggafeinek ingga miuk wata ku sándá wa táuráng. Profet tá ing miuráng, árna náráwa son iháhá wawu láwit táwi narinek ing miuráng wata ku wa tunggafiuk. <sup>19</sup> Wata ku nanará sáni kandák wa táng tolingga ku pahán sáni hurik tát tu Ánutu yá mukmuro sáni wa yawon sáminek. Wáina tát tu Ánutu yá hálang sámánga sáháng káto tángga <sup>20</sup> árna náráwa son iháháya táng tunggap táuk, Jesu wa suring mán sándán káin son áwinek. <sup>21</sup> Jesu wawu alek káin árán kungga Ánutu yá kutná kutná kámuk hánám iháng tolin son kándáng hálet tu wahára ku Jesu yá son áwinek. Wawu Ánutu yá uláp profet káungá milun yáni hára wáina táinet ingga miuk wa isutang táinek. <sup>22</sup> Moses yá ing miuk, ‘Táwi Ánutu sáni watá profet káman sáni háranan yon táng tunggap tángga tán nák ina profet háleinek. Wata ku watá rina meinek wa kándáng naránga

isutneráng, <sup>23</sup> Káman niyá watán me wa naránga ma isutnándák wawu málámbán tombong háranan Ánutu yá pukon hánám isurán kungga kámutnek,\* Moses yá wáina ingga miuk.

<sup>24</sup> “Hang uláp profet hulátingga Samuél hára átang áwek watá Ánutu yan me mengga rám náta miuráng, wawu rám bu ná tunggafek ná. <sup>25</sup> Sándu profet wata nángánangge yáni, wata ku profet tá me rina miuráng wata páliná wawu sándá táineráng. Hang uláp Ánutu yá táwi ilom sáni yot pahán káman háliuk wawu sándá ku páliná táineráng. Ánutu yá Abraham ing inuk, “Kák ráula háranan káman hára kungga ámna náráwa kámuk hánám káwak ketnán watán káin sambe yá tunggafengga kuinek.”† <sup>26</sup> Kulá rám Ánutu yá yáup nanggená wa káwak káin suring mán háuk wahára wu suring mán sándán káin kálak áwánga ku sáháng álolo tán du sándá ket tárak sáni kandák wa sasaya suring muk.”

## 4

### *Ámna hulá yá Pita káling Jon iháng kalabus káin tiuráng*

<sup>1</sup> Kulá Pita káling Jon yándi wu ámna náráwa me emá yánangga átnárán du pris yan tombong háranan kámá, me Sadyusi yan tombong háranan kámá, me it káungá pinná tátáyan táwi yáni watá áwuráng. <sup>2</sup> Áwáng átnárát tu aposel yá Jesu wu há tárutuk wata ku kámurená wawu wáinanon há tárutneráng ingga ámna náráwa yánangga áran áwuráng watá kuk hánám naránga ku <sup>3</sup> Pita káling Jon ket ihángga ku há yonyon tiuk hálendu iháng kalabus it kinan ting sat áran kungga tembátnáya háliuk. <sup>4</sup> Wáina táuráng enendu ámna náráwa táup hánám bá yon me wa há naruráng hálendu Jesu ya há naráng háting muráng watyot sale yáni yá kungga 5,000 náut wáina háliuk.

### *Pita káling Jon iháng kaunsol rahán yáni hára me hára tiuráng*

<sup>5</sup> Kulá tembátnáya ku Juda yan pris tátáwi yáni, ámna yáilá me lo yan tiksa watá Jerusalem hára urum táuráng. <sup>6</sup> Waháranyon du pris yáin yáni Anas watyot Kaiafas, hang Jon káling Aleksenda watyot tu pris yáin yáni wata sip yáni kátu kámá yot watá kámuk hánám áwáng wahára áturáng. <sup>7</sup> Wáina áwáng átang gu ámna kámá yanát Pita káling Jon iháng áwáng sat urum tángga áturáng wata rahán yáni hára hetang áran du ing yánáng suliuuráng, “Sándu náut háláng hára me náut kutná hára ku kuip tárak wa támálák?”

<sup>8</sup> Wáina yanát tu Pita málám Iruk Káungá watá ep táwi tángga háláng imángga áran du ing yánuK, “Juda ámna náráwa yan pris tátáwi yáni me ámna yáilá, <sup>9</sup> sándu nát tá ámna hárammá wáik wawu kálu rina kálu kungga táng tolin álo hálek ingga wata há m nanaráya nánáng sulinggoeráng? <sup>10</sup> Wáina hálendu sán me Israél ámna náráwa kámuk sáni hánám ing narineráng, Jesu Nasaret nan, ámna náráwa son iháhá wata kutná hára ku ámna rahán sáni hára ná hetang átak wawu kuip álo hálek wa. Jesu wawu sándá maripong hára kátit tu há kámutuk, enendu Ánutu yá son táng tárut táuk. <sup>11</sup> Jesu wawu sup ina, ‘ámna it tátá sándá sup wáik ingga kangga táng sat kuk

watá ku inggálu it hálángngá ya káto hánám átkoek.\*”

<sup>12</sup> Ni kámá nukngá káman dá ámna náráwa son iháháyan tárak ku muná. Káwak náta ketnán kut nukngá kámá ma árak, ináku Ánutu yá kut káman námuk, wawu Jesu. Kut watá re ku ámna náráwa son ihinek.”

<sup>13</sup> Pita yá wáina yánán ámna hulá watá kápánga ing naruráng, Pita káling Jon wawu hánámá árená, me nanará itná káin kámá ma koená, enendu ma pitáená kándáng hánám wa memálák. Wáina kápánga ku háramutang gu ámna yará náwu uláp Jesu yot káman átningguráng ingga naruráng. <sup>14</sup> Kulá káuráng gu ámna táng toliumálák watá yándi yot wahára hetang áran du watá me kámá topmá yánánáyan kaluná ma tunggafiuK. <sup>15</sup> Wáina tángga ku yanát kaunsol yan urum itná wa sangga kep káin hat tu yáni ing inán kanán táuráng, <sup>16</sup> “Ámna yará náwu rina táng yámánggatnem? Watá tárak káman maming tái hánám há tán Jerusalem kinan ámna náráwa watá wáina ingga há nareráng wawu nánda táng kilak titiyan muná. <sup>17</sup> Kulá nánda ku me watá emá re kungga áriwon, wata ku yanátne ámna yará watá kut wahára ámna náráwa ma yáinendamálák.”

<sup>18</sup> Wáina mengga ku yáni wu son mantáng yámát it kinan áwán du Jesu kutná hára me wáina ámna náráwa ma yánáng toliindamálák ingga yánuráng. <sup>19</sup> Wáina yanát tu Pita káling Jon dá ku ing yánumálák, “Kulá sándá ku rina nareráng, Ánutu yan me isusut watá kándáng hálek, me sándán me isusut watá kándáng hálek? <sup>20</sup> Náta milun náti pop tátáyan tárak ku muná. Nát tu náti rina káumát me rina narumát wa há mengga yánangga átkuinemat.”

<sup>21</sup> Wáina yánán kápánga ku ámna yáilá yá olet yándi mangga wáina son ma meindamálák ingga yánáng piták tángga ku yápmat hangga kumálák. Kulá ket tárak rina tán ámna náráwa

\* 3:23: Meng Rákit 18.15,18,19 † 3:25: Hulátitiná 22.18 \* 4:11: Kap Papia 118.22

yá káuráng wata ingga Ánutu kutná há meng tárut tángga áturáng, wata ku ámna yáilá yá márapmá yámamáyan kálnú kámá ma kang tunggap táuráng. <sup>22</sup> Iná ámna táng toliumálák wawu yaraná 40 táng hátingga árán du yarán dá ket tárák wa tán álo háliuk.

*Táwi yan me wa meng isurát kukuyan hálinggá tátáya Jesu yan tombong gá sáponga táuráng*

<sup>23</sup> Kulá Pita káling Jon yápmat hangga kumálák watá kungga ku nuknuk yánda kápángga ku pris tátáwi yáni me tombong Juda yan ámna hulá yá me rina yánuráng wa yánumálák.

<sup>24</sup> Me rina wa yánán naráng hálingga ku kámuk pahán káman hálen Ánutu yan káin sáponga ing táuráng. “Táwi, ko alek káwak me táp hang wata kinan kutná kutná metá tunggafiuráng.

<sup>25</sup> Uláp Iruk Káungá watá nan náni Dewit, kákkán yáup nangge, wata milunná hára ing miulák,

‘Náuta ku káwakngá káwakngá watá pahán káráp táup tánggoeráng?

Náuta ku ámna náráwa náta ket tárák wáik tátáya hánámá me hárotkoeráng?

<sup>26</sup> Káwakngá káwakngá king me ámna yáilá átaráng watá káman hálingga tiktíyawik tánggoeráng.

Wáina tángga ku erawángga

Táwi Ánutu yot tu ámna náráwa son iháháya mená

wa iháng hang titiya tánggoeráng.’†

<sup>27</sup> Dewit tán me ánu watá pálipuk hánám tunggafiuk wawu ing, it yáilá nahára Herot káling Pontius Pailat tá ále kámá káinnan ámna me Israel ámna náráwa yot káman hálingga Jesu, kangán yáup nangge káungá hánám, wa táng hang titiya me hároturáng, wawu ka uláp nangán yáup wa táinek ingga há miulák wa. <sup>28</sup> Watá wáina táuráng wawu kangán nanará me pahán rina táineráng ingga narulák wa táuráng. <sup>29</sup> Kulá Táwi, kula wu ko me rina mengga nán náháng piták tátáya táeráng wa kangga ku yáup nángánangge ka nán hálang námátá ku nánda ma pitáená hánghálángningga kangán me wa mengga kuinemán. <sup>30</sup> Ko yáup nangeka káungá Jesu wata kutná hára ketya kálandang ilalák mara iháng tárut tángga ket tárák hulá hulá wa tángguinelák.”

<sup>31</sup> Kulá Jesu yan tombong gá yáni wu sáponga táng hálingga árát tu waháranon it áturáng watá muwalán Iruk Káungá watá hang ep ihán du Ánutu yan me memeya ma pitáená átninggiuráng.

*Ámna náráwa yá kámá hálang yámuráng*

<sup>32</sup> Ámna náráwa Jesu ya naráng háting mená watá kámuk hánám pahán me nanará yáni káman tiuráng. Ámna káman dá kutná kutná ná kan málámbán hánám re ma háliuk, ináku kámuk kán háliuk. <sup>33</sup> Kulá aposel yáni wu Táwi Jesu yá son tárutuk wata hángghálángngá hánám yánángga kut Ánutu yá pahán álosim naráng yámángga táwi hánám hálang yámuk. <sup>34</sup> Orek yáni hára wu káman dá náut kámá ya kesák ma tánggiuk. Káman niyá káwak me itná yá átmánggiuk wawu men yuwát tu sup wa iháng áwáng <sup>35</sup> aposel ket yáni hára tit tu watá horengga rendá kesák irená wa yámánggiuráng.

<sup>36</sup> Kulá ámna káman átuk wata kutná wu Josep, iná aposel yá kut imuráng gu Banabas. Kut Banabas wata hulá wu pahán táng káto tátá. Wawu tombong Liwai háranan, itná hulá ku ailan Saiprus. <sup>37</sup> Ámna watá ku káwak káman men yuwát tu sup ihuk wa táng áwáng aposel ket yáni hára tiuk.

## 5

*Ananiais káling Safaira yá Ánutu ingirungngindin ingga táumálák*

<sup>1</sup> Kulá ámna káman kutná Ananiais watá áwáná Safaira watyot káwak yánda kátu káman hányon yuyuwáya men ámna káman dá yuwuk. <sup>2</sup> Káwak wa wáina yuwán yánda wu pahán káman tingga ku sup kátu táng ting san árán du Ananiais yá sup kátu rewe táng kung aposel ket yáni hára tingga yángyárunngingga sup pu kámuk ná iháng áwáng ná tet ingga yánu.

<sup>3</sup> Wáina tán du Pita yá inuk, “Ananiais, rina tángga ku satá Satan dá pahálan han du Iruk Káungá wa ingirungngingiya tángga káwak yuwená sup kátu wa táng kangán da tingga ku kátu rewe tángga áwelák? <sup>4</sup> Ko káwak wa metá yuwuk wawu kakán pahán isutang táulák. Sup ihulák wa ka rina tátáya wu álo tánggim. Rina tángga ku nanará kandák wa táulák? Ko ámna nange yángyárunngnet ingga narelák, enendu ámna nange muná, ináku Ánutu málám ingirungngingiya táelák.”

<sup>5-6</sup> Wáina inán Ananiais málám wa narángga waháranon pukon kámutang táng hang kátingga árán du tambun wawu ámna máto kámá yá áwáng lap pá pondang táng kung usuráng. Kulá kámá niyá wáina táek ingga pingganá narángga ku pikpito hánám naruráng.

† 4:26: Kap Papiia 2.1-2

<sup>7</sup> Kulá 3 aua náut wáina átang sangga ku áwáná yá nálulá yan káin rina tunggafiuk wawu ma narená wahára áwáng hiuk. <sup>8</sup> Wáina áwáng hen du Pita yá ináng suliuik, “Ko nanáng, Ananaias yot sándá káwak men yuwuk wata supmá wa ná rewe me?”

Ingga inán watá miuk, “O, wa rewe.”

<sup>9</sup> Wáina inán du Pita yá inuk, “Náuta ku sándá Táwi yan Iruk ingirungngingiya pahán káman hálemálák? Kang! Náula useráng wawu kálu mungnga hára átaráng watá ku kák hányon kehángga kuineráng.”

<sup>10</sup> Wáina inán wahárayon pukon kámutang hárammá hulá hára táng hang kátingga árán du ámma máto yáni wu it kinan áwángga wáina kangga ku tambun wa táng kung nálulá tangtang usuráng. <sup>11</sup> Kulá náunáwán yará watán káin wáina tunggafek ingga narángga ku Jesu yan tombong me ámma náráwa kátu watá pikpiták táwi hánám wa táuráng.

*Aposel yá ket tárák hulá hulá táuppon táuráng*

<sup>12</sup> Aposel yáni wu ket tárák hulá hulá ámma náráwa orek yáni kinan táup hánám táuráng. Ámma náráwa Táwi ya naráng háting mená yáni wu pahán káman hálen du it káungá kumbiná kinan hangga kung paranda kutná Solomon dán paranda hára urum tánggiuráng. <sup>13</sup> Ámma náráwa niyá Jesu ya ma naráng háting mená watá ku Jesu yan tombong wata kut yáni meng tárut tánggiuráng, enendu yáni áwáng watyot átnát ta ku pitánggiuráng. <sup>14</sup> Wáina tánggiuráng, enendu ámma náráwa táup pá yon watá Táwi ya naráng háting mángga ku áwáng watán tombong hára sengsaráp tángtáng tánggiuráng. <sup>15</sup> Ket tárák wáina tánggiuráng wa kangga ku ámma náráwa yá ilalák mara wa iháng áwáng kálu hára káwam iháng áwáng elengga wata ketnán tánggiuráng. Wáina titne ku Pita yá kun yongganá yá re ihánggápán álo háleniráng ingga wáina iháng kung tánggiuráng. <sup>16</sup> It yáilá Jerusalem tangtang it átaráng waháranan táup hánám watá ilalák mara me iruk wáik ká iháng lem táená wa hányon ihángga áwánggiuráng wawu kámuk álo hálenggiuráng.

*Aposel yá kalabus it kinan árát tu angelo yá háláng yámuk*

<sup>17</sup> Kulá wáina tángga árát kápángga ku pris yáin yáni yot tombong Sadyusi háranan kámá yáup káman tánggiuráng watá aposel wa kápángga pahán suksuk hánám naráng yámánggiuráng. <sup>18</sup> Wáina narángga ku aposel wa ket ihángga kalabus itná kinan ámma wáik ká árená wakáin tiuráng. <sup>19</sup> enendu yáungán Táwi yan angelo káman dá kalabus it watán kálu mungnga wa yaling yámángga yángotang kep káin hangga ku <sup>20</sup> yánuik, “Kungga it káungá watán kumbi kinan káin átang gu Táwi yan átkuku watán me pingnga wa kámuk hánám ámma náráwa yánineráng.”

<sup>21</sup> Wáina yánán yáni wu hilápmá hánám bu angelo yá rina yánuik wa isutang kung it káungá kumbiná kinan átang ámma náráwa me wa yánáng tolingga áturáng.

Kulá pris yáin yáni watá ámma yáup káman tánggiuráng watyot áwángga ku kaunsol kinan nan Israel yan ámma yáilá wa kámuk hánám met áwuráng. Áwáng káman hálengga ku ámma kámá suring yámát kalabus itná káin aposel yángotang áwáwáya kuráng. <sup>22</sup> Wáina kuráng enendu aposel wu ma árát kápángga ku son áwángga ámma yáilá ing yánuuráng, <sup>23</sup> “Kalabus itná wawu kálu kámuk káto sung sat árát ámma kálu pin yáni tátá watá pin yáni tángga átaráng. Wáina árát kálu yalemán enendu ni kámá káman it kinan ma árán kamán.” <sup>24</sup> Wáina yánát narángga ku it káungá pinná tátá wata táwi yáni me pris tátáwi yáni watá narángpak tángga son du náutá tunggafeinek ingga naruráng.

<sup>25</sup> Wáina narángga átnárát ámma káman dá áwángga yánuik, “Sándá narániráng! Ámma iháng kalabus itná kinan tiuráng wawu it káungá kumbiná kinan hetang átang ámma náráwa me yánáng tolingga átaráng.” <sup>26</sup> Wáina yánán du it káungá pinná tátá wata yáin yáni watá tewé ámma ná watyot kung aposel wa yángotang áwuráng. Yáni wu kung táng hángháláng tángga ma yángotang áwuráng, ináku yolopon yángotang áwuráng, náuta ámma náráwa yá sup mangga naráháng kámuk tánirot ingga narángga ku wáina táuráng.

*Aposel yá kaunsol rahán yáni hára me metátáya ma pitáuráng*

<sup>27</sup> Kulá aposel yángotang áwángga ku iháng sat kaunsol rahán yáni hára árát tu pris yáin yáni yá yánuik, <sup>28</sup> “Nándá ámma wata kutná mengga ámma náráwa me pingnga yánáng toli wata há káto táng sámumán, enendu sándá emá re yánáng tolingga árát tu ámma náráwa táup hánám Jerusalem kinan átaráng watá há narángga átaráng. Iná ámma wa utkámút táuráng watán márápmá wu nányot átak ingga hánámá sáni menggoeráng.”

<sup>29</sup> Wáina yánán du Pita yot aposel nukngá watá inuráng, “Nándu Ánutu yan me wawu há isutnemán, iná káwak ámma yan me wawu ma isutnándámán. <sup>30</sup> Sándá Jesu maripong hára kátingga utkámút táuráng, enendu táwi ilom náni yan Ánutu watá há kámútuk háranan son táng tárut táuk. <sup>31</sup> Wáina tángga táng áráng ting san ketná álák kálu átangguinek. Kulá Ánutu málámbá yon Jesu kut táng hip tán watá Táwi náni me Son Iháhá wáina átangguinek. Watá



ku háláng námán Israel nándá pahán hurik tátne nándán mukmuro yawonek. <sup>32</sup> Kulá nándu Ánutu yá wa táuk wawu há káumán wata ku meng isurátne kuinek, iná Iruk Káungá yá ku wata hányon meng isurán kuinek. Niyá me wa naránga isutnek wawu Ánutu yá Iruk Káungá wa iminek.”

<sup>33</sup> Pita yá wáina yánán naruráng hára wu ámna yáilá watá kuk hánám naránga aposel wa ráháng kátkámut tátáya naruráng. <sup>34</sup> Wáina naránga árát tu tombong Farisi háranan ámna káman kutná Gamaliel wawu ámna náráwa kámu k hánám bá meng toling mángngátaráng hang ámna wawu lo yan tiksa, watá kaunsol rahán yáni hára tárutang gu ámna kámá yánán aposel wa ihánga kep káin hang rám kimo átniráng ingga yánu k. <sup>35</sup> Wáina yánán du ámna kámá yá aposel wa yángot hang kep káin árát tu Gamaliel yá ámna yáilá wa yánu k, “Israel ámna, sándu ámna ná rina kámá táng yáminán du hulátingga kándáng nangnaráng táineráng. <sup>36</sup> Sándu ing há nareráng, rám há sák ma hálek ámna káman kutná Teudas yá tárutang náku ámna hulá kutna pálak ingga men ámna 400 náut wáina tá kung watyot áturáng, enendu kapman dá utkámut tán watán tombong wawu hárátingga káman káman kuráng. Wáina tát tu yáup yáni wawu hánámá háliuk. <sup>37</sup> Wata máriná káin du ámna náráwa kut yáni erek hánám wa uying háháli ráma hára ámna káman kutná Judas Galili nan watá tárutuk. Wáina tárutang gu ámna kámá ihánga ku kapman isusut ta kun erawák táuráng, enendu kapman dá ámna wa hányon utkámut tán watán tombong wawu hárátingga káman káman kuráng. <sup>38</sup> Wáina wata ku kula wu ing sánin, sándá ámna ná rina kámá ma táng yámindaráng, ináku yápmat há yáni kuineráng. Yáup yáni wa tánggoeráng wawu ámna yan nanará re hálén wawu tát kungga yáup yáni watá pana háine k. <sup>39</sup> Iná pálipuk yáup yáni náwu Ánutu yan yáup hálén wawu sándá káto táng yámamá yan tárak muná. Ánutu yot erawánirot.”

<sup>40</sup> Gamaliel yá wáina yánán narát pálipuk hálendu aposel ya met áwát tu yánát hánámá lahot yámát Jesu kutná hára son ma yánáng tolindaráng ingga yánánga ku yápmat há yáni kuráng.

<sup>41</sup> Wa yápmangga kungga aposel yáni wu Ánutu yá naráng hákhátik yáni táráknká kangga ku Jesu yan yáup tát wata ingga ámna kámá yá iháng lem tát tu reprep má álo táineráng ingga naránga yánu k wata heronge nangnaráng kuráng. <sup>42</sup> Yáni wu kung átang gu ráma ráma wu Táwi yan it káungá hánám kumbiná kinan me it wahára wahára kungga Jesu wawu ámna náráwa son iháha ingga mengga me pingnga álosim wa yánáng tolingga átninggiuráng.

## 6

### *Jesu yan tombong gá aposel háláng yámamáya ámna 7 iháng tunggap táuráng*

<sup>1</sup> Kulá rám wahára Juda nan ni Jesu naráng háting mená sale yáni yá táwi hánám wáina hále ngga árán du waháranan kámá Grik me metáená watá ku kámá Aram me metáená wata kuk táng yámánga ing yánuráng, “Sándu ráma ráma sánin kálu rewe náráwa kawát niyá sungi ya kesák tánggoeráng wa háláng yámángoeráng, iná nándán kálu náráwa kawát wawu ma háláng yámángguráng.” <sup>2</sup> Wáina yánát tu aposel 12 watá disaepel kámu k me met áwát tu ing yánuráng, “Kulá nándá Ánutu yan me wa mengga ámna náráwa yánána wa sangga ku sungi silip tátá hára átnemán wawu kándáng ma háleindák. <sup>3</sup> Wáina wata ku, yanuknu k, sándá ámna 7 ni Iruk Káungá yan háláng hára re árená me nanará yáni álosim hára árená me ore k sáni hára kut yáni álosim átnándaráng, wáina wa kápánga iháng tunggap tát nándá wa iháng yáup wahára titne ku watá yáup wa pinná tángga átneráng. <sup>4</sup> Iná náni wu ráma ráma sáponga tángga Ánutu yan me rewe yánánga átningguinemán.”

<sup>5</sup> Wáina met ámna náráwa kámu k watá me wa narát álosim hálendu Stiwen wawu ámna ni Jesu ya pahán yot naráng háting mángngátak me Iruk Káungá watá ep táwi hánám tán átnándak wa táng tunggap táuráng. Hang Filip, Prokorus, Nikanor, Timon, Pamenas hang Nikolas wawu hányon iháng tunggap táuráng. Iná Nikolas wawu it yáilá Antioch nan Juda ámna muná, enendu Juda yan miti kinan átnándak.

<sup>6</sup> Kulá yáni wu ámna 7 wa yángot áwáng aposel rahán yáni hára tit tu aposel yá yáup yáni wahára iháng káto táng yámamáya sáponga táng yámánga ket yáni yá yáin yáni hára usáng hang tiuráng.

<sup>7</sup> Iná rám wahára ku Ánutu yan me wa meng isurát kun ámna náráwa táup hánám watá Jerusalem hára Jesu yan tombong háliuráng. Pris táup táwi yá yon Jesu yan me pingnga álosim wa naránga naráng hákhátik kálu wahára áturáng.

### *Juda ámna kámá yá Stiwen táng me hára tiuráng*

<sup>8</sup> Kulá Stiwen wawu Ánutu yá pahán imánga málabán háláng wa imán ket tárak hulá hulá tátáwi hánám ámna náráwa ore k yáni káin tángga kuk. <sup>9</sup> Wáina tángga árán du Juda yan miti itná káman kutná Along Koená wahára hangga árená ámna watá watyot menmen

táuráng. Ámna urum wawu it yáilá Sairini, it yáilá Aleksandria hang provins Silisia yot Esia wakáimnan. <sup>10</sup> Wáina menmen táuráng, enendu Stiwen wawu Iruk Káungá watá nanará imángga átuk hálendu ámna urum watá me hára wu ma táng hang tinggiuráng.

<sup>11</sup> Wáina hálendu yáni wu kilak átang ámna kámá pahán yáinin hat tu watá kusák pilengga ing miuráng, “Stiwen dá Ánutu me Moses ya me kandák men narumán,” ingga miuráng.

<sup>12</sup> Kulá wáina tángga kungga ku ámna náráwa, ámna yáilá me lo yan tiksa watá pahán yáni táng tárut tát tu kung Stiwen ket tángga táng áwáng kaunsol ket yáni hára tiuráng. <sup>13</sup> Wáina ting sat árán du ámna kámá yánát tu watá áwáng me kusák ing miuráng, “Ámna nátá Táwi yan it káungá nátyot Ánutu yan meng rákit me wata me kandák menggoek. <sup>14</sup> Rám káman ing men narumán, ‘Jesu Nasaret nan watá Táwi yan it káungá ná yalingga ku kálu rina isusut ta Moses yá námuk wa yawondang gu kálu kámá isusut ta náninek,’ Stiwen dá wáina miuk,” ingga ámna kámá watá miuráng.

<sup>15</sup> Iná ámna náráwa kaunsol it hára áturáng watá kámuk hálengga Stiwen kárek kauráng gu Stiwen kurák máta wawu angelo kurák máta ina.

## 7

### *Stiwen dá kaunsol rahán yáni hára me metáuk*

<sup>1</sup> Kulá wáina meng hálit tu pris yáni yáni watá Stiwen inuk, “Me wa meng sat kákkán káin áwek wa pálipuk me?”

<sup>2</sup> Wáina inán du Stiwen dá miuk, “Yanuknukna me nan ilomna, nákkán me ná kárámatingga narineráng! Sisi náni Abraham watá it táwi Haran káin ma koená Mesopotemia ále káin há árán Ánutu yamá hálangngá pálak watá watán káin tunggafengga inuk, <sup>3</sup> ‘Ko káwukka me sipya kátu wa yápmangga ku no káwak kaleinet káin wa kuinelák.’”

<sup>4</sup> “Wáina inán du Kaldia ámna náráwa yan káwak wa sangga kung gu it táwi Haran káin itná hulá ya átuk. Átang árongga naning gá kámurán du Ánutu yá suring mán áwáng káwak átaman nahára áwuk. <sup>5</sup> Wa áwuk hára Ánutu yá káwak kátu kimo 1 mita ina káman málámbán tombong gá átnát ta kámá ma imuk. Ináku ing inuk, ‘Máriya ku káwak wa kaminet wawu ka me kák ráulaka watán káwak háleinek,’ ingga inuk. Rám wahára wu Abraham bu nanggená muná árán wáina inuk. <sup>6</sup> Iná ‘Kák ráulaka wawu kung ámna kámá yan káwak káin watán yáup nangge hánámá hálet tu iháng wáik táng sat árát kungga yara 400 háleinek. <sup>7</sup> Iná watá rendán yáup nangge hálengga átneráng wawu na mápamá yáme wata máriná káin du ráulaka yá káwak wa sangga áwáng ále nákkán du na nanáng sákngineráng.’” <sup>8</sup> Wáina inángga ku pahán káman mená inángga ku pahán káman dán tárak ku kip mamará watá átnek ingga inuk. Wata torong káin Abraham nanggená Aisak ká tunggafengga rám 8 árán du málám nanggená kimpá maruk. Kulá wata torong káin átang gu Aisak ká Jekop naning hálengga átang árongga torong káin du Jekop pá táwi ilom náni 12 wata nan yáni háliuk.

<sup>9</sup> “Kulá táwi ilom náni watá Josep pa pahán sukses narángga ku táng yáup nangge hánámá ya ámna kámá yánát yungga tángga Isip káin kuráng, enendu Ánutu yá watyot átkiuk. <sup>10</sup> Wáina átang gu mápamá rina watán káin áwánggiuk wa kung rákit tángga nanará álosim imán du Isip pán king Fero yá kan álosim hálen heronge naráng mángga Isip pán ámna hulá yáin yáni ya táng tunggap tángga tin árán du inán málámbán kutná kutná wa pin yáni tángga átkiuk.

<sup>11</sup> “Kulá wata torong káin sungi kesák táwi hánám bá Isip káwak me Kenan ále káin wa kámuk hánám tunggafengga mápamá táwi hánám yámán táwi ilom náni yan káin sungi yá muná kuk. <sup>12</sup> Wáina kangga ku Jekop pá sungi Isip káin átak ingga met narángga ku hulátingga táwi ilom náni wa suring yámán wakáin kuráng. <sup>13</sup> Kungga áwáng átang sangga son suring yámán kuráng wahára ku Josep pá nák ku wa ingga tatning ilomná watyot kulaná wa yánu. Wahára kungga ku Fero yá Josep sipmá kátu wa naráng yámuk. <sup>14</sup> Wáina tángga ku Josep pá naning Jekop me sipmá kátu kámuk hánám wata me san kun Isip káin kuráng, wata sale yáni ku 75. <sup>15</sup> Kulá Jekop málám Isip káin átang kungga ku málám bot táwi ilom náni wawu kámuk wakáin kámuráng. <sup>16</sup> Kámurát tu iháng kung Sekem káin tanggán káman Abraham bá Hamor nángánangge yan hára sup silva yá yuwuk wakáin tiuráng.

<sup>17</sup> “Kulá Isip káin rám hásak átang gu Israel ámna náráwa watá táwi hánám wáina máringga áturáng. Ánutu yá hálang yámámá rámá yá hátewingga átuk, wawu huphuráp Abraham me rina inángga me hárotuk wa isutnán. <sup>18</sup> Rám wahára wu king nukngá Josep ma naráng mák watá Isip pán king háliuk. <sup>19</sup> King watá ku tombong náni wa yángyárunngingga ku ket tárak wáik yálenggiuk. Wata kinan káman du ing, me káto hánám mengga yánán nángánangge yáni kongakngá wa kámutniráng ingga iháng kung ále wahára wahára raták yápmanggiuráng.

\* 7:3: Hulátitiná 12.1 † 7:7: Hulátitiná 15.13-14

<sup>20</sup> “Kulá rám wahára ku Moses maming gá Moses táng tin du Ánutu yá nangge wata álosim naruk. Iná nangge wawu maming gá it kinan kilak pinná tângga áran yap kaláhu háliuk. <sup>21</sup> Torong káin du táng kep káin sat áran du Fero uriwa yá áwáng kangga ku táng kung málamba nanggená ya sing muk. <sup>22</sup> Wáina tán átang gu Moses wawu Isip pán nanará itná káin kungga nanará álosim wa tângga ku me metátá me yáup tátá ná wawu hálángngá pálak háliuk.

<sup>23</sup> “Kulá Moses wu yaraná 40 hálen átang gu sipmá kátu Israel wa kápápáya naráng hátiuk. <sup>24</sup> Wáina naráng hátingga kungga káuk ku Isip ámna káman dá Israel ámna káman táng wáik tán kangga ku málám kung nukngá Israel ámna wa háláng imángga wata topmá tângga Isip ámna wa urán kámutuk. <sup>25</sup> Moses málám wáina táek ku Israel ámna náráwa yá kálu wakálu kungga ku Ánutu yá háláng námán nápmat along kuinán táek ingga káineráng ingga naruk, enendu watá kálu wa ma kang rákit tauráng. <sup>26</sup> Tembátnáya ku Moses málám kungga kápuk ngá ku Israel ámna yará erawánga áran du iháng hore pahán káman hálendimálák ingga ing yánuK, ‘Yarán, sándu sip káman, náuta ku sándi yon erawángoemálák?’

<sup>27</sup> “Wáina yánán ámna márampá márumá watá Moses háting san kun du inuk, ‘Kák ku niyá nándán me nanaráyan ámna yáilá keháng tunggap táuk?’ <sup>28</sup> Kuip Isip ámna utkámút tálák wáinanyon náK nutkámút táin ingga tânggoelák me?’<sup>‡</sup> <sup>29</sup> Wáina inán Moses málám me wa naránga ku piták ngá kungga lombu ya ále Midian káin átuk. Átang kungga áwáná tângga ku nangge yándi ámnaná yará iháng tiumálák.

<sup>30</sup> “Wakáin áran kungga yara 40 yá sálin du ále yáilá Sainai tangtang ále komkomá ámálum re wakáin angelo káman dá káráp isikimo rangga átuk watán lánngop kinan tunggafeng muk. <sup>31</sup> Moses málám wáina kangga nangnganá han rinaná ingga kándáng kakaya rupmá káin kunggatang gu Táwi salá naruk, <sup>32</sup> ‘Nák ku táwi ilomya yan Ánutu, Abraham, Aisak me Jekop watán Ánutu.’<sup>§</sup> Wáina inán naránga Moses yá yángyáng tângga kakaya pikpito hánám naruk.

<sup>33</sup> “Wáina tán du Táwi yá inuk, ‘Ko káwak hetang átalák wawu káungá hánám, wata ku háramya káin sendol wa yaling. <sup>34</sup> No Isip káin nangán ámna náráwa ket tárák kandák rina táng yámánga átaráng wawu há kápánga átkoet. Watá márampá táwi hánám sunggoeráng wa há kápánga ku wa Isip ket yáni hára son iháháya kula háet. Wáina wata ku no suring kame tárutang Isip káin son kuinelák,’<sup>\*\*</sup> ingga inuk.

<sup>35</sup> “Huphuráp Israel yá Moses yá Israel yan ámna yáilá átnát ta takta naránga inuráng, ‘Kák ku niyá nándán me nanaráyan ámna yáilá keháng tunggap táuk?’ ingga inuráng, enendu Ánutu yá ámna wanyon suring mán ámna yáilá hálengga Isip ket yáni hára Israel son iháháya kuk. Káráp isikimo hára angelo tunggafeng muk wata ketná hára Ánutu yá hálángngá wa imuk. <sup>36</sup> Wáina háláng imán du málám Isip káin ket tárák hulá hulá wa tângga Israel yángotang Isip sangga kungga Táp Sipmá káin me ále komkomá ámálum re káin yara 40 wata kinan ket tárák hulá hulá tângga kuk.

<sup>37</sup> “Moses watá yon du Israel ámna náráwa ing yánuK, ‘Ánutu yá sáni háranan yon profet káman náK ina táng tunggap táineK,’<sup>††</sup> ingga yánuK. <sup>38</sup> Moses yá ále komkomá ámálum re káin táwi ilom náni yot átang áráng ále yáilá Sainai káin angelo yá me átkukuná pálak wa imán táng áwáng yámukngá náni yot átkoet.

<sup>39</sup> “Enendu táwi ilom náni yá watán me wa isutnán taktak yámuk, me ámna yáilá yáni átnát ta takta naránga ku pahán yáni káin du son hurik tângga Isip pa kukuya naruráng. <sup>40</sup> Wáina tângga ku Aron inuráng, ‘Ámna Moses watá nángorán Isip sangga áwumán wawu náutá rina táng muk wawu ma narámán, wata ku ko ánutu náni kámá iháng toling námátá ku watá kálu máta yárengga nángotang kuineráng,’<sup>‡‡</sup> <sup>41</sup> Wáina mengga rám wahára ku ánutu yáni káman bulmakau nanggená utniná yáni táng tolingga ku wata heronge tângga taha yáni watán káin ihánga kungga ting muráng. <sup>42</sup> Wáina tát tu Ánutu yá sárum yámán yáin pahán isutang káe, yap me hitung alek káin átaráng wa yánáng sákngingga áturáng. Wa táuráng wawu profet tá me rina papia hára ing uyuk wáinanyon ina: ‘Israel ámna náráwa sándá ále komkomá ámálum re káin yara 40 áturáng wahára taha sáni me towet sisiya kutná kutná wa nákkán da ihánga áwánggiuráng me? Wawu muná hánám.

<sup>43</sup> Miti ya hahayan sel it tângga átninggiuráng wawu nákkán muná, ináku wawu ánutu kusák kutná Molek watán.

Hang ánutu kusák kutná Refan watán hitung utniná wa hányon tângga átkuráng.

Anutu kusák wa yánáng sáknginggiya ku wata utni yáni wa iháng toliuráng,

‡ 7:28: Son Ihuk 2.14 § 7:32: Son Ihuk 3.6 \*\* 7:34: Son Ihuk 3.5,7,8,10 †† 7:37: Meng Rákit 18.15

‡‡ 7:40: Son Ihuk 32.1

wata ku no sásure káwak sáni wa sangga kung Babilon táng háting kung numkálu káwak átak wakáin átneráng. <sup>§§</sup>

Ingga profet tá wáina miuk.

<sup>44</sup> “Táwi ilom náni yá ále komkomá ámálum re káin átnnggiuráng wahára wu Ánutu yan sel it watá átyámán wa kangga ku Ánutu yá nányot átak ingga naránggiuráng. Kulá sel it wa táuráng wawu Ánutu yá Moses wáina táineráng ingga inán wa isutang wáina táuráng. <sup>45</sup> Wa táuráng watá há árán du táwi ilom náni wata nángánangge yáni yá Josua yan rám hára tángga kungga árát Ánutu yá káwak márumá yásurán káwak wa yáni ya táuráng. Wáina tángga ku sel it wa wakáin táng tiuráng watá há árán kungga king Dewit tán rám háliuk. <sup>46</sup> Iná Dewit wawu Ánutu yá táng álolo táng mánggiuk. Watá sáponga tángga it álosim káman Jekop e ilomná watá kung Ánutu ináng sákngingiyán álo tátáyan me rina ingga Dewit tá ináng suliuik. <sup>47</sup> Wáina inuk enendu nangená Solomon dá ku Ánutu yan it wa táuk.

<sup>48</sup> “It wa há táuk, enendu Ánutu Árená Hánám wawu it ámna nangge yá táená wahára wu ma átnándak, ingga profet tá me wáinanyon ing miuk:

<sup>49</sup> “Táwi yá ing mek, “Alek wawu no putung átang pin yáni tátáyan kome,

iná káwak wawu no háramna titíyan kome,

wata ku sándá it rinaná hánám tát tu

no wahára sek narinet? Wawu kálmuná muná.

<sup>50</sup> Naya ketna yá yon du ále kutná kutná kámuk hánám wa iháng toliut.” <sup>\*\*\*</sup>

Ingga Táwi yá wáina miuk.

<sup>51</sup> “Sándu yáin sáni káto hánám, pahán nanará sáni wawu Ánutu ma naráng mená ina. Káráman sáni wu yongurená hálenđu Ánutu yan me wa ma narángngátaráng. Rámá rámá wu Iruk Káungá watán me wa ma isutkuráng, táwi ilom sáni yá tánggiuráng wáinanyon tánggoeráng. <sup>52</sup> Uláp táwi ilom sáni yá profet kámuk hánám iháng wáik táuráng. Ámna Kándáng gá áwinek ingga meng tunggap táuráng wawu táwi ilom sáni yá hányon ráháng kátkámut táuráng, me sándá kálu wanyon isutang ámna áwinek ingga miuráng wawu táng káyam ket yáni hára tingga táng kung utkámút táuráng. <sup>53</sup> Ánutu yan meng rákit me wa angelo yá táwi ilom sáni ket yáni hára há tiuráng, enendu sándá ku ma isutnándaráng,” ingga Stiwen dá yánuk.

*Juda ámna yá sup mangga Stiwen urát kámútk*

<sup>54</sup> Kulá Stiwen dá me wa yánán kaunsol yáni wu kuk hánám narángga mátap yáni kirikkárák táuráng. <sup>55</sup> Iná Stiwen wawu Iruk Káungá watá ep táwi tán alek kálu hálen árán káuk ku Ánutu yamá sireretná pálak wata kinan Jesu wu ketná álák kálu hetang árán. <sup>56</sup> Wáina kangga ku yánuk, “Narániráng, no káet tu alek ká ang tán Ámna Nanggená wawu Ánutu ketná álák kálu hetang árán káet.”

<sup>57</sup> Wáina men narángga ku hahatingga ohok maming tái hánám tángga káráman yáni yongutang kámuk tárutang hururung kung Stiwen usánga táuráng. <sup>58</sup> Wáina tángga ku háráráng táng uyingga it yáilá kumbiná kep káin hangga ku utkámút tátáya sup mangga utang árát, ámna huphuráp Stiwen da me kusák miuráng watá lap yáni hákhásák torong káin molená wa yalingga iháng ámna máto káman wahára átuk wata hárammá hulá hára urum tit watá pin yáni tángga árán yáni sup máuráng. Ámna máto wata kutná wu Sol.

<sup>59</sup> Kulá sup mangga utang árát wata kinan Stiwen dá sáponga ing táuk, “Táwi Jesu, ko irukna táng.” <sup>60</sup> Wáina mengga ku tulá hára imángga hahatingga hánám ing mantáuk, “Táwi, ko watán kandák yáni wata topmá ma táindalák.” Wáina mengga sangga ku há kámútk.

## 8

*Solyá Jesu yan tombong wa iháng wáik tángga átuk*

<sup>1-2</sup> Kulá Stiwen utkámút tát tu ámna kámá Ánutu yan kálu kándáng isutang átnándaráng watá kutkáyawát táwi hánám táng mángga ku táng kung usuráng. Káe waháranon átang hulátingga ku ámna náráwa Jesu yan tombong Jerusalem hára áturáng wa iháng wáik tángga árát tu kámuk hánám pitángga hánghánáng tángga Judia ále kálu me Samaria ále kálu kut, aposel yá re ku Jerusalem káin áturáng.

Stiwen utkámút táuráng wawu Sol yá kápánga ku álo kámá táeráng ingga kápuk. <sup>3</sup> Wáina kápánga Sol yá ku hulátingga Jesu yan tombong iháng lem tae sálikngik ingga it kinan áráng hak tángga ámna náráwa wa raták hánám háráráng iháng uying kung kalabus itná kinan tingting tángga átuk.

*Filip pá me pingnga álosim wa Samaria káin yánuK*

<sup>4</sup> Kulá ámna náráwa pitánga kuránga watá kung it rehára áturánga, wakáin átang Táwi yan me pingnga álosim wa mengga yánánga átkiuránga. <sup>5</sup> Filip pá ku kungga Samaria ále káin hangga it káman hára Jesu wawu ámna náráwa son iháhá ingga yánán du <sup>6</sup> ámna náráwa táup táwi yá yon watán me naránga ket tárák rina tánggiuk wa kangga ku me rina yánánggiuk wa kándánga káramatingga naránga átkiuránga. <sup>7</sup> Filip málám ámna náráwa táup pon iruk wáik ká ep ihená wa yásut yámán iruk wáik watá ohok pálak ámna náráwa yápmangga kunggiuránga. Iná kámá wu kurat yáni kámurená watá álo hálet kámá wu háram yáni wáik hálená watá álo hálenggiuránga. <sup>8</sup> Wáina tunggafengga átuk hálendu it waháranan ámna náráwa watá heronge maming táwi hánám tánga áturánga.

*Saimon dá Ánutu yan hálang wa sup pá yuyuwáya miuk*

<sup>9</sup> Kulá ámna káman sárummá pálak it wahára átnándak wawu kutná wu Saimon, watá huphuráp pon átang me tárák koleM hulá hulá tánga nawu kutná pálak nahániránga ingga tán wa kangga Samaria ámna náráwa yá nangnga yáni hanggiuk. <sup>10</sup> Wáina hálendu ámna náráwa yáilá me ámna náráwa hánámá watá kámuk hánám watán me narát álo kámá hálen du ing menggiuránga. “Ámna náwu Ánutu ina, wata kutná ku Ulihálángngá Pálak.” <sup>11</sup> Rám hásák kon yáni yot átang káwak kán nanará hára ket tárák hulá hulá wa tánga átkun kangga nangnga yáni hanggiuk, wata ku ámna náráwa kámuk ká watán me naránggiuránga. <sup>12</sup> Ámna náráwa watá yon Filip pá Ánutu yan átkuku watán pingnga álosim watyot Jesu Son Iháhá wata mengga yánánga kun naránga wawu pálipuk hánám ing mengga ku umi kuhuránga. <sup>13</sup> Kulá Saimon málám enendu pálipuk hánám ingga naránga umi kuhuk. Wáina tánga ku Filip isutang káman yándi átningga Filip pá tárák hulá hulá táwi wa tán kangga nangganá han átninggiuk.

<sup>14</sup> Kulá aposel Jerusalem káin áturánga watá Samaria ále káin du ámna náráwa yá Ánutu yan me naránga káto tángoeránga ingga met naruránga hára wu Pita káling Jon suring yámát watán káin kumálák. <sup>15-16</sup> Yándi wu watán káin kungga káumálák ku Jesu ya naránga háting mángga umi kuhuránga enendu Iruk Káungá watá ma áwánga ep ihená áran, wata ku Iruk Káungá watá ep ihik ingga sáponga táng yámumálák. <sup>17</sup> Wáina tánga ku Pita káling Jon dá ket yándi yá yáin yáni hára usánga hang tin du wahára ku Iruk Káungá watá Samaria ámna náráwa watán káin áwuk.

<sup>18</sup> Kulá Saimon málám kápuk ku aposel yará watá ket yándi yá ámna náráwa yáin yáni hára usánga hang tin Iruk Káungá watá watán káin áwán kápánga, málám sup pá Iruk Káungá yuyuwáya ing yánuK, <sup>19</sup> “Sándá hálang wa náK namán du no ketna yá wáinanyon táe Iruk Káungá wa hányon táineránga.”

<sup>20</sup> Wáina yánán Pita yá inuk, “Saimon, supya wawu kayot káráp pán pingnga háleinek! Ánutu yá málámbán pahán isutang gu wáina yámángngátak wawu ko ku sup pá álo yunggem ingga narelák? Wáina kámá ma árak. <sup>21</sup> Táwi rahálá hára pahála kinan du kandák átak. Wáina wata ku nánda Ánutu yan yáup tángoemán wata kinan kák ku ma áralák. <sup>22</sup> Wata ku kandákka wa sangga ku pahála hurik tánga ku Táwi ya sáponga táng máta ku nanará kandák pahála káin átak wa yawon yaminek háM. <sup>23</sup> No wáina kanet wawu náuta no kahet tu nánda ket yáup tángoemán wa kang narángoelák, hang mukmuroka watá kehánga kik hárorán átalák.”

<sup>24</sup> Wáina inán du Saimon dá miuk, “Sándá náK ka Táwi yan káin sáponga tán du rina memálák watá nákkán káin ma tunggafeindak,” ingga yánuK.

<sup>25</sup> Kulá yándi wu Táwi yan me wa mengga Jesu yá rina tán káumálák wa ámna náráwa yánánga ku it wa sangga kungga Táwi yan me pingnga álosim wa it máro yon Samaria kinan yánánga yánánga Jerusalem ba kumálák.

*Filip pot káwak Itiopia nan ámna káman*

<sup>26</sup> Kulá Táwi yan angelo yá Filip inuk, “Kák ku tárutang ámuta kálu kungga ku kálu Jerusalem hára átang kungga it Gasa káin kung hená wa isutang kuinelák,” wáina ingga inuk. Kálu wawu ále komkomá páliná muná átak wakálu. <sup>27</sup> Wáina inán du Filip pu wakálu kungatang gu Itiopia káwak káinnan ámna káman káuk. Ámna wawu Kuin kutná Kandasi yan kapman watán ámna yáilá waháranan. Kuin watán sup pinná tángngátak, iná ámna wawu tunggulá ránená. Watá Jerusalem káin miti ya hangga ku <sup>28</sup> son itná ya kukuya ku karis ná ketnán putung átang gu profet Aisaia yan papia wa sángsánging kungga átkiuk. <sup>29</sup> Wáina kungga áran du Iruk Káungá yá Filip inuk, “Kungga karis wata tangtang kungga álak.”

<sup>30</sup> Wáina inán du Filip málám hururung karis wata tangtang kungga naruk ku ámna wawu profet Aisaia yan papia wa sángingga áran. Wáina naránga ku Filip pá inuk, “Kák ka wa sánginggoelák wata hulá wa kámá wáina ingga narelák me?”

<sup>31</sup> Wáina inán ámna watá miuk, “Rina narinet? Káman dá nanáng tolin du álo narángxem.” Wáina mengga ku Filip inán áráng málám bot putung átumálák.

<sup>32</sup> Ámna wawu Táwi yan me ing uyená wa sángxinga átkiuk:  
 “Watá me kámá ma miuk, ináku yolopmá átang  
 sipsip utkámút tátáya tángga koená yá ina,  
 me sipsip nanggená rommá mamaráya tángga koená yá ina átkoek.

<sup>33</sup> Ámna táng me hára tiuráng watá márapmá suwik ingga  
 kusák pilengga táng hang tit reprepmá táwi hánám naruk.

Wawu nángxanngge muná hálendu ámna náráwa yá  
 nángxanngge wata me pingnga yánánáyan tárák ku muná.

Watán átkuku wa káting rákit tát tu  
 watá káwak ketnán ma árak.”\*

<sup>34</sup> Kulá ámna watá me wa sángxinga sangga ku Filip inuk, “Ko nanáng, profet tá ku niya miuk, málámmba miuk me ámna nukngá ya miuk?” <sup>35</sup> Wáina inán du Filip pá hulátingga miti papia ámna watá sángxik wata hulá kálak inángxa ku Jesu yan me pingnga álosim wa inuk.

<sup>36-37</sup> Kulá yándi wu kálu wa kungga átang gu umi káman hára kung hengga ku ámna watá miuk, “Kang, umi ku wa átak. Náutá kálu sung namán du no umi ma kuhángxem?”<sup>†</sup> <sup>38</sup> Wáina mengga ku karis engotang kuku wa inán karis watá tareng kátin Filip pá ámna watyot yayará yándi hangga kung umi kinan hangga ku Filip pá ámna wa umi kuháng muk. <sup>39</sup> Wáina kuháng mángxa sangga ku yándi wu umi sangga kep káin áwumálák waháranon Táwi yan Iruk ká Filip tángga kun pikpilin du ámna watá ma káuk. Iná ámna wawu heronge pálak kálu wa isutang itná ya kuk. <sup>40</sup> Iná Filip pá káuk ku málám bu it táwi Asotus wakáin átuk. Kulá it wahára wahára átingga Jesu yan me pingnga álosim wa ámna náráwa yánángxa kuk. Wáina tángtáng kungga it yáilá Sisaria káin kung hiuk.

## 9

### *Solyá pahán hurik táuk*

<sup>1</sup> Kulá rám wahára wu Sol yá Jesu yan tombong wa iháng lem tángga ráháng kátkámút tátáya mengga átuk. Málám kung pris yáin yáni <sup>2</sup> wa inuk, “Juda yan miti itná yan ámna yáilá kámá yá hálang nanamáya papia álo uyingga namángxim me? Ko álo ingga metá ku táng kung it yáilá Damaskas káin ámna náráwa Jesu yan tombong wa kápángxa ket ihángxatag Jerusalem káin kuinet,” ingga inuk. Wáina inán álo ingga inángxa ku papia uyingga inuk. <sup>3</sup> Sol málám Damaskas tangtang kung hálingga átnárán du waháranon alek kálu yamá máming táwi watá málám hára manggatuk. <sup>4</sup> Wáina tán Sol málám táng hang káwak káin kátingga ku me káman ing mengtán naruk, “Sol, Sol, náuta ku nák neháng waik tánggoelák?”

<sup>5</sup> Wáina narángxa ku Sol yá inuk, “Ámna hulá, kák ku ni?” ingga inán du miuk, “Nák ku Jesu, ni ko táng waik tánggoelák wa. <sup>6</sup> Kulá kula wu tárutang it yáilá kinan kutá ku rina táinelák wawu ámna káman dá wakáin kaninek,” ingga inuk.

<sup>7</sup> Iná ámna Sol yot kungga áturáng wawu wahára hárámutang nángxanngga áturáng. Me wu há naruráng enendu watá niyá metáek ingga wu ma kauráng. <sup>8</sup> Kulá Sol málám tárutang rahálá háliuk enendu náut kámá kámá ma káuk. Wáina hálendu ketná hára tángga ku Damaskas káin kuráng. <sup>9</sup> Kung wakáin du rám kaláhu wu rahálá ma hálená wáina re átuk. Rám wahára sungi me umi kámá ma náuk.

<sup>10</sup> Kulá Damaskas káin du naráng hákhátik ámna káman átuk wata kutná ku Ananias. Ámna watá átnárán du Táwi yá ára hára ina áwáng “Ananias!” ingga mantáng mán du “Táwi, átat,” ingga inuk.

<sup>11</sup> Wáina inán du Táwi yá inuk, “Tárutang kungga kálu kutná Kálu Kándáng wakáin Judas yan it káin ámna káman it yáilá Tasus nan kutná Sol wa káinán áwet ingga yáinelák. Ámna wawu sáponga tángga átak. <sup>12</sup> Sol wu rahálá kunángxá enendu ára hára ina káek ku ámna kutná Ananias watá áwáng ketná yá yáilá káin usángx hang tin du rahálá yá kándáng hálengngarán káek.”

<sup>13</sup> Wáina inán Ananias yá miuk, “Táwi, nák ku kákkán ámna náráwa káungá hánám wa Jerusalem káin rina iháng waik waik tánggoek wata ámna watán pingnga wu há met narángxoet. <sup>14</sup> Iná nákkán áwuk wawu pris tátáwi watá wáina álo táinelák ingga inát tu ámna náráwa kaya narángx háting kamená me sáponga táng kamángxátaráng wa ket iháhaya áwuk.”

\* **8:33:** Aisaia 53.7-8 † **8:36-37:** Nanará ámna kámá yá ku ing narángxátaráng, me náta kátu wu tombong nahára átak. Me wawu ing, ‘Filip pá ing inuk, ‘Pahála yot Jesu pálipuk ingga narángx háting melák hálendu álo umi kuhinelák.’ Wáina inán du topmá ing miuk, ‘Nák ku Jesu Son Iháha wawu Ánutu Nanggená ingga narángx hátet.’”

<sup>15</sup> Wáina men du Táwi yá Ananiais inuk, “Kung! Ámna wawu kula wu nákkán yáup ámna háháleya táng tunggap há táet. Ámna watá wu kungga ámna náráwa ále kámá káinnan me king máro átaráng me Israel ámna náráwa yan káin kungga nangán me pingnga wa yánánga átkuinek. <sup>16</sup> Naya kutna meng tárut tángga kungga márappá rina suwinek me láwit rina narinek wawu na ininet.”

<sup>17</sup> Wáina inán Ananiais málám kungga it kinan árángga kungga ketná yá Sol yáilá káin usáng hang tingga ku ing inuk, “Nukna Sol, Táwi Jesu ni nákkán áwánga átnará tunggafeng kamuk watá suring namán áwet wawu ko rahála kándáng háháleya, me Iruk Káungá watá áwáng kák hára ep táwi hánám kekeháya.” <sup>18</sup> Wáina inán wahárayon du náut kámá purungga ina watá sohingga Sol rahálá sangga han du rahálá kándáng háliuk. Wáina tángga ku tárurán du Ananiais yá umi kuháng muk. <sup>19</sup> Wáina tán du sunginá kámá nangga ku hálángngá tiuk.

*Sol yá Damaskas me Jerusalem káin yáup táuk*

Sol yá rám kámá ku Jesu yan ámna náráwa Damaskas káinnan watyot wakáin áturáng. <sup>20</sup> Rám wahárayon Juda yan miti itná káin kung hanghang tángga ku Jesu wawu Ánutu Nangenán ingga yánánga kuk. <sup>21</sup> Iná Sol yan me naruráng watá ku háramutang gu ing miuráng, “Ámna náta hánám bu ámna náráwa Jesu ya naráng háting mená me sáponga táng mángngátaráng wa iháng lem tángngátak. Jerusalem káin wáina tángngátak watá ku inggálu ku son nákkán wa ket ihángga ku pris tátáwi yáni watán káin ihángga kukuya áwuk,” wáina ingga miuráng. <sup>22</sup> Kulá Sol yá me metátáyan hálángngá watá táwi hánám wáina hálen Juda ámna náráwa it yáilá Damaskas káin áturáng wa kándáng hánám wa Jesu wawu Ánutu yá ámna náráwa son iháháya táng tunggap táuk ingga yánuk. Wáina yánán du Juda yá watán me wa naránga háramutang watán me káting hang titiya me kámá ma miuráng.

<sup>23</sup> Kulá rám máro yon watá há kun átang wata torong káin du Juda yá urum tángga Sol utkámút tátáya me hárotang <sup>24</sup> káen me yáungán it yáilá kumbiná yan kálu mungganá wa erek kandingga áturáng, enendu Sol málám wáina tángga átaráng ingga há naruk. <sup>25</sup> Rám káman yáungán du Jesu yan ámna náráwa yá engotang it yáilá kumbiná wata ketnán árángga kungga ku inát yák wáina tán hára wata kinan putung árán páup putingga wahára tángga átang yolopon sat kumbi kep kálu hangga kuk.

<sup>26</sup> Wata torong káin du Jerusalem káin kungga Jesu yan ámna náráwa watyot sengsáráp tátáya tán kangga watá erek pitáng muráng, náuta watán nanará káin du ámna wa pálipuk Jesu ya naráng háting mánggoek me rina ingga naruráng. <sup>27</sup> Iná Banabas yá ku engotang gu aposel yan káin kuk. Málám kung wakáin du Sol wawu Damaskas kálmá káin Táwi yá wáina tunggafeng mángga wáina wáina inuk, me Damaskas káin ma pitáená Jesu kutná mengga Táwi yan me yánánggiuk ingga aposel yánuk. <sup>28</sup> Wáina tán du Sol yá watyot Jerusalem káin átang átnnggiuráng. Rám wahára wu Sol yá ma pitáená Táwi yan me pingnga álosim wa ámna náráwa yánánga átnnggiuk. <sup>29</sup> Wáina tángga átkun kangga Juda káin má Grik me narená watá Sol yot me metángga wata menmenná táuráng. Wáina tángga ku watá kálu rekálu kungga Sol wa utkámút tánin ingga táuráng. <sup>30</sup> Wáina tát tu nuknukngá yá wáina ingga há naránga ku engotang hangga it yáilá Sisaria káin kungga ku suring mát it yáilá Tasus káin kuk.

<sup>31</sup> Kulá Judia ále kinan, Galili ále kinan me Samaria ále kinan Jesu yan ámna náráwa wa ma iháng wáik tát kándáng álo áturáng. Táwi tarang káin árát tu Iruk Káungá watá pahán yáni táng káto tán ámna náráwa táup hánám watá áwáng Jesu yan tombong hára sengsáráp tángtáng tánggiuráng.

*Pita yá Ainias tán álo háliuk*

<sup>32</sup> Kulá Pita wu miti yáup tángga itná itná átnngga ku kung Táwi yan ámna náráwa it Lida káin wa kápin ingga wakáin háuk. <sup>33</sup> Wakáin du ámna káman kutná Ainias wa káuk wawu kuratná kámurená kome hára re yara 8 wata kinan pándák re átnándak. <sup>34</sup> Wáina kangga ku Pita yá inuk, “Ainias, rám kula wu Jesu ámna náráwa son iháhá watá keháng tolindek. Tárutang komeka táng toling.” Wáina inán wahára re Ainias yá tárutuk. <sup>35</sup> Kulá it Lida nan me ále pahálá Saron nan ámna náráwa kámuk watá Ainias yá álo hálen kangga ku pahán yáni hurik tángga Táwi ya naráng háting muráng.

*Pita yá Tabita son táng tárut táuk*

<sup>36</sup> Kulá it Jopa káin du disapeel náráwa káman kutná Tabita watá átkiuk. Kut Tabita wawu Grik me kálu ku Dokas. Rámá rámá ket tárák álosim tángga ukuro árená wa háláng yámángga átnándak. <sup>37</sup> Rám Pita yá it Lida káin átuk wahára wu Tabita yá ilalák tángga kámurán du tambun wa umi kuháng mángga táng it pahálá torong káin ting sat átuk. <sup>38</sup> It Lida wawu it Jopa tangtang gon wáina hálendu Jesu yan ámna náráwa yá Pita wawu it Lida káin átak ingga met naránga ku ámna yará suring yámát kungga Pita inumálák, “Ámna hulá, ko it Jopa káin sopmuná hánám áwáwáya naremán.”

<sup>39</sup> Wáina inán du Pita yá watyot kuráng ngáyá kung het tu engotang it pahálá torong káin áuráng. Kulá náráwa kawát watá kámuk áwáng Pita rupmá áwálák átang kut káyawát pálak lap hákhásák kot lap kámá yot Tabita yá yáni yot átang iháng toliuk ngá wa iháng áwáng Pita yá kápápáya engeleng táuráng.

<sup>40</sup> Pita málám ámna náráwa kámuk yánán kep káin kut tu málám tulá hára imánga sáponga tánga ku hurik tánga náráwa kámurená watán kálu kungga ku miuk, “Tabita, tárulák.” Wáina men du náráwa watá rahálá hálengga Pita kangkang gu tárutnárang putung átuk. <sup>41</sup> Wáina tán du Pita yá háláng imánga ketná hára tán du tárutang hetang átuk. Wáina árán du málám náráwa kawát yot Jesu naráng háting mená kámá yot wa mantán áwánga ku náráwa kámurená yá son há tárutak ingga káuráng. <sup>42</sup> Kulá pingnga watá it Jopa kinan wa erek hánám kung hálín du ámna náráwa táup hánám watá Táwi pálipuk ingga naráng háting muráng. <sup>43</sup> Iná Pita wu it Jopa káin rám hásák kon ámna kutná Saimon watán it hára átkiumálák. Ámna Saimon wawu bulmakau kepmá wa yáup hulá hulá imámáyan da iháng tolingga tingngátak.

## 10

### *Angelo yá Konilius yan káin tunggafengga me inuk*

<sup>1</sup> Kulá it yáilá Sisaria káin du ámna káman átkiuk wawu kutná wu Konilius. Iná Konilius wawu káwak Rom wakáinnan tewe ámna 100 kutná Itali yan tewe ámna wata yáin yáni.

<sup>2</sup> Ámna málám me ámna náráwa kámuk hánám watán it hára átnándaráng wawu Ánutu yá rina átnát ta narek wa isutang Ánutu tárang káin rewe átnándaráng. Iná málám bu ni ukuro ámna náráwa átnándaráng wa táwi hánám háláng yámánga átnándak, me rámá rámá Ánutu yan káin sáponga tánga átnándak. <sup>3</sup> Rám káman du yonyon kálu 3 kilok náut wáina hálengga árán du ára hára ina kangngarán hiták hánám Ánutu yan angelo yá áwáng mantáng mángga inuk, “Konilius!”

<sup>4</sup> Wáina tán Konilius málám kárek hánám kangga pingpitáng gu miuk, “Ámna hulána, rina?” Wáina inán du angelo yá inuk, “Ánutu yá ko sáponga tángngátalák wawu há narángngátak, me kutná kutná ukuro árená yámángngátalák wawu há kahángngátak. Wáina tángngátalák wawu tahaka ina titá kangga heronge naráng kamángngátak. <sup>5</sup> Kulá rám kula wu ámna kámá suring yámátá kungga it Jopa káin ámna káman kutná Saimon kutná nukngá Pita wa engotang áwineráng. <sup>6</sup> Ámna wawu ámna káman kutná Saimon yon watán it tu táp tangtang káin árán wahára átak. Ámna nukngá Saimon wawu bulmakau kepmá iháng yáup kámá tángngátak.”

<sup>7</sup> Wáina inánga kun du Konilius yá yáup nanggená yará yot tu tewe ámna káman men áwuráng. Tewe ámna wawu Ánutu yá pahálá káin rina isutsut ta narek wáina isutang átnándak, me Konilius málám bot tu rámá rámá átnándamálák. <sup>8</sup> Wáina men ámna kaláhu watá áwát tu tárak wáina káet ingga erek hánám yánánga ku suring yámán it Jopa káin Pita kangga inánga áwáwáya kuráng.

### *Pita yá ára ina káuk*

<sup>9</sup> Wáina kuráng ngáya tembátnáya ku káe táitná hálengga árán du it Jopa hára kung heheya tánga áturáng wahára ku Pita wu it hungnganá káin sáponga tátáya áránga kuk. <sup>10</sup> Áráng sáponga tánga átang gu háing mán sungi kámá nanaya naruk, enendu sungi emá tiyawingga áturáng. Rám wahára wu málám ára ina káman káuk ku <sup>11</sup> alek ká ang tán lap maming táwi ina hahala táwi wa ilungngá 4 hára wa táng kik táená watá yolopon hang árán, <sup>12</sup> songgo háram yáni 4 me ále málisám me kunap náut watanan me iráp kahetang átinggoená watá lap wata kinan árát kápuk. <sup>13</sup> Wáina kápánga átnarán du me káman dá ing inuk, “Pita, tárutang kámá ráhánnga sinang.”

<sup>14</sup> Wáina inán Pita yá miuk, “Táwi, wáina wu muná hánám! Nák ku songgo ma nanaya mená me kák rahála hára rongrongngá muná wawu ma nangngátat.”

<sup>15</sup> Pita yá wáina men me watá ing inuk, “Ko náut kámá káman Ánutu yá rongrongngá ingga mená wa ko rongrongngá muná ma nanayan ingga ma meindalák.”

<sup>16</sup> Kulá me wanyon rám kaláhu pálak men narán du wahárayon lap ina kutná kutná pálak watá alek káin son áránga kuk.

<sup>17</sup> Wáina tánga ku Pita málám ára ina wa káuk wata hulá ya nanará yáup tánga átkiuk. Wáina tánga átnarán du ámna Konilius yá suring yámán kuráng watá yánáng sulit Saimon dán it tu wahára átak ingga yánát há naránga ku kung it kumbiná kálu mungnganá hára hetang áturáng. <sup>18</sup> Wahára hetang átang gu ing miuráng, “Saimon kutná nukngá Pita wa it nahára átak me?” ingga miuráng.

<sup>19</sup> Kulá rám wahárayon du Pita wu ára ina káuk wata emá nanará yáup tánga átnarán du Iruk Káungá yá inuk, “Saimon, ámna kaláhu yá kák ka sulingga áweráng. <sup>20</sup> Wáina wata



ku tárutang hangga kápang. Watyot kukuya naránpak ma táindalák. Wa áweráng wawu na suring yáme áweráng.”

<sup>21</sup> Wáina inán Pita málám tárutang hangga ámma wa yánuk, “Nák ku ámma sándá suling mángga áweráng wa. Náuta suling namángga áweráng?”

<sup>22</sup> Wáina yánang sulin du ámma watá inuráng, “Náudu Konilius tewe ámma yáin yáni watá suring námán áwemán. Ámma wawu kándang re átang Ánutu tárang káin átnándak. Juda kámuk ká ámma wawu ámma álosim ingga mengngátaráng. Ánutu yan angelo káman dá ko kung itná káin me kámá inátá nanaráya inán du wata suring námán kák ka áwemán.” <sup>23</sup> Wáina inát tu Pita yá yángotang it kinan hangga yáungán du wahára watyot ruhuráng. Kulá tembátnáya ku tárutang hangga ámma kaláhu watyot kuráng. Wáina kut tu Jopa nan Jesu ya naráng háting mená watá hangga yásutang watyot káman yáni kuráng.

*Pita yá Konilius yan it káin kuk*

<sup>24</sup> Kulá tembátnáya ku Pita wu Sisaria káin kung hiuk. Konilius wu wáina áwinderáng ingga naránga ku sipmá kátu me yanuknukngá yánán áwát káman átang hálang yámángga áturáng.

<sup>25</sup> Kulá Pita yá Konilius yan it kinan káin kung háuk wahára wu Konilius málám hárammá hulá hára turingga hangga ináng sáknin ingga táuk. <sup>26</sup> Wáina tán Pita yá táng tárut tángtáng inuk, “Tárlulák, ko nák ma nanáng sáknindalák, nák ku ámma nange, ka inanyon.”

<sup>27</sup> Kulá Pita yá watyot me metángtáng kung it kinan hangga kápuk ku ámma náráwa táup hánám watá árát. <sup>28</sup> Wáina árát kápánga ku Pita yá yánuk, “Sáni há nareráng wa, Juda nánda ámma ále kámá káinnan sányot káman háhále me kungga sásáhá wawu meng rákit mená yá wáina ma tátáya káto hánám tená yá átak. Enendu Ánutu yá há naliuk wawu no ámma káman rongrongngá muná ingga ma memeyan. <sup>29</sup> Wáina wata ku nák ka ingga há suring yámeráng wata no rina kámá ma tát ináku há áwet. Wata ku no ing sánin, hulá náuta hánám bu nák ka pin tit no áwet?”

<sup>30</sup> Wáina yánán Konilius yá inuk, “Rám kaláhu átang áwemán wata ámang káin yonyon kálu 3 kilok inggon hálangga átuk hára nawu itna káin sáponga tángga átkiut. Kulá waháranon hánám ámma káman kutná kutná ná hakokowak hánám tánggánená watá tunggafengga rupna hára hetang átuk. <sup>31</sup> Wáina hetang átang gu nanuk, ‘Konilius, Ánutu yá ko sáponga tánggátalák wawu há narángngatak, me kutná kutná ukuro árená yámánggátalák wawu há kahángngatak. <sup>32</sup> Wáina wata ku ámma kámá suring yámátá kungga it Jopa káin ámma káman kutná Saimon kutná nukngá Pita wa engotang áwinderáng. Ámma wawu ámma káman kutná Saimon yon watán it tu táp tangtang káin árán wahára átak. Ámma nukngá Saimon wawu bulmakau kepmá iháng yáup kámá tángngatak.’ <sup>33</sup> Wáina nanán du waháranon du no kák ka pin se kung kamán ko wa naránga há áwátá no kák ka heronge naráng kamet. Kulá kula wu nán kámuk Ánutu rupmá hára há átamán da ku Táwi yá rina nánánáya kanuk wa nánátá narindemán.”

<sup>34</sup> Wáina inán du Pita yá ing yánuk, “Kula wu há naret, pálipuk hánám Ánutu yá tárák káman re it wakáinnan wakáinnan wa nálanggoek. <sup>35</sup> Wakáinnan wakáinnan wawu niyá málamba tárang káin átang kálu kándang wa isutang átnándaráng wata wu heronge naráng yámángga álo ing mengga son ihánggoek. <sup>36</sup> Ánutu yá Israel nán me nánuk wa há naránga átaráng wawu me pingnga álosim ing miuk, Jesu ámma náráwa son iháhá wawu ámma náráwa kámuk ka Táwi yáni. Wahára kungga ku Ánutu yá nányot pahán káman hálek. <sup>37</sup> Judia ále kinan rina tunggafuk wawu sáni há nareráng wa, Galili ále hára átang hulátiuk wawu Jon Umi Kuháng Yámámá watá umi kukuháya mená menggiuk wata torong kálu <sup>38</sup> Ánutu yá Jesu Nasaret nan Iruk Káungá yot hálang táwi hánám wa imángga ku málamba watyot árán du itná itná átingnga ámma náráwa hálang yámángga Satan dá iháng lem táená wa iháng tolingga átinggiuk.

<sup>39</sup> “Kulá nán aposel wawu Juda nánin ále káin me it yáilá Jerusalem káin rina rina tán rahán náni yá há káumán wata meng isurátne kunggoek. Jesu wawu táng maripong hára kátit tu kámutuk, <sup>40</sup> enendu rám kaláhu átang gu Ánutu yá son táng tárut tángga hiták tin ámma náráwa yá rahán yáni yá há káuráng. <sup>41</sup> Wawu kámuk hánám bá ma káuráng, ináku ámma nán uláp Ánutu yá málambán me wa meng isusut tán náháng tunggap táuk, nándán káin tunggafeng námuk. Kulá kámutang tárutuk wata torong káin du nánda watyot sungi me umi há náumán. <sup>42</sup> Wata ku ámma náráwa Ánutu yan me yánánga hiták ing memeya nánuk, Ánutu yá kámurená me ma kámurená watán átkuku yáni tárákná hára re horengga nanará wawu Jesu wa rewe táng tunggap táuk. <sup>43</sup> Uláp profet kámuk hánám bá Jesu ya ing miuráng, Jesu málamba kutná hára re ku ámma niyá Ánutu ya naráng háting beráng watán mukmuro yawon yáminek.”

*Ámma náráwa kámá káinnan dá Iruk Káungá táuráng*

<sup>44</sup> Kulá Pita yá me wa yánangga átuk wahárayon Iruk Káungá watá áwáng ámna náráwa me wa naránnga áturáng wa ep ihuk. <sup>45-46</sup> Wáina ep ihán du watá me hulá kámá kámá metánnga Ánutu kutná meng tárut tánnga áturáng. Wáina tát kangga Juda ámna Jesu ya naráng háting mená yá Pita yot áwuráng watá hárámuráng, náuta Iruk Káungá watá ále kámá káinnan watán káin hányon áwáng ep ihuk wata.

Wáina kangga Pita yá ku miuk, <sup>47</sup> “Ámna náráwa náwu Iruk Káungá wa Juda náni táumán wáinanonyon há táeráng, wata ku ni kámá káman dá umi ma kuhindárang ingga ma menggim.” <sup>48</sup> Wáina mengga umi kuhineráng ingga yánán álo ingga inát tu Jesu Son Iháhá wata kutná hára umi kuháng yámuk. Wáina tánnga sangga ku inát rám kámá wahára watyot átuk.

## 11

*Pita yá Jerusalem káin kungga wáina wáina tunggafuk ingga me pingnga yánuk*

<sup>1</sup> Kulá aposel me Jesu naráng háting mená Judia ále kinan áturáng watá ámna ále kámá káinnan watá Ánutu yan me wa hányon táuráng ingga met naruráng. <sup>2</sup> Wáina hálendu Pita yá árannga Jerusalem káin kuk hára wu Juda ámna Jesu ya naráng háting mená watá áwáng ing me táng muráng, <sup>3</sup> “Pita, ko kungga ámna ále kámá káinnan watán it kinan árannga kápulák me watyot sungi náulák, wawu kandák táulák.”

<sup>4</sup> Wáina inát tu Pita yá rina rina tunggafuk wawu kándang hánám ing yánuk, <sup>5</sup> “Nák ku it Jopa káin sáponga tánnga átang ára ina hára kangngaré ku lap táwi ina káman ilungngá 4 hára wa táng kik táená watá alek kálu hangga ku na átut wahára háuk. <sup>6</sup> Wáina han wawu náut ingga kándang káut tu songgo háram yáni 4 me songgo páyom me ále málisám kunap náut watanan me iráp kahetang átninggoená watá lap ina wata kinan árát káput. <sup>7</sup> Wáina kápánnga átnaré ku me káman dá ing nanuk, ‘Pita, tárutang kámá ráhánnga sinang.’

<sup>8</sup> “Wáina nanán no inut, ‘Táwi, wáina wu muná hánám! Nák ku songgo ma nanaya mená me kák rahála hára rongrongngá muná watá nák pahánna kinan ma hangngátak.’

<sup>9</sup> “Wáina me ku alek kálu nan me watá ing nanuk, ‘Ko náut kámá Ánutu yá rongrongngá ingga mená wa ko rongrongngá muná ma nanayan ingga ma meindalák.’ <sup>10</sup> Kulá me wanyon rám kaláhu pálak men nare ku lap ina kutná kutná pálak wa son uying san alek káin áruk.

<sup>11</sup> “Kulá rám wahárayon du ámna káman dá ámna kaláhu me nananáya suring yámán Sisaria kálu áwuráng watá áwáng it nánda átumán wahára áwáng hiuráng. <sup>12</sup> Iná Iruk Káungá watá ku nanuk, ‘Narángpak ma táená ku watyot kuineráng,’ ingga nanán du há kumán. Iná nuknuk náni ámna 6 náwu nákkot káman kungga ámna watán it kinan kumán. <sup>13</sup> Kutne ku ámna watá ing náuk, ‘No kangngaré angelo yá itna kinan káin tunggafeng namánnga nanuk, ‘Me satá Jopa káin ámna kutná Saimon kutná nukngá Pita wata kuik. <sup>14</sup> Kulá ámna watá ku ka me kákkán it hára ámna náráwa átaráng wa kámuk Ánutu yá son sásáhayan me táng áwáng sáminek,’ ingga nanuk.’

<sup>15</sup> “Ámna watá wáina nanán du no me emá yánangga átnaré wahárayon Iruk Káungá watá hulátangga náni ep náhuk wáinanonyon ep ihuk. <sup>16</sup> Wáina tán du son no Táwi yá rina miuk wa naráng hátiut wawu ing, ‘Jon dá ku umi yá kuháng yámánngátak, iná sándu Iruk Káungá watá kuháng sáminek.’ <sup>17</sup> Wata ku uláp Táwi Jesu Son Iháháya naráng háting mátne ku Ánutu yá Iruk Káungá wa nán námuk wáinanonyon inggálu ku wa yámánngoeok. Wáina wata ku no Ánutu yan nanará wa ma káto táng mánggem. Nák ku ámna nangge rewe.”

<sup>18</sup> Kulá Pita yá me wa yánán naránnga pahán káman hálén kuk táng muráng wa sangga Ánutu ya heronge táng mánga ku ing miuráng, “Kulá Ánutu yá ále kámá káinnan wa tán watá pahán hurik tánnga átkuku tátáyan kálu hára átaráng.”

*Antioik ámna náráwa kátu yá Jesu naráng háting muráng*

<sup>19</sup> Kulá Stiwen utkámút táuráng wahára ku ámna náráwa kámá Jesu naráng háting mená wa hányon iháng lem tát pitánnga hárátingga ále wahára wahára kuráng. Kámá yá ku Fonisia ále káin kuráng, iná kámá yá ku ailan Saiprus káin kuráng, iná kámá yá ku it yáilá Antioik káin kuráng. Ámna náráwa wa kuráng watá ku Jesu yan me pingnga wa yánangga kuráng, enendu ámna ále kámá káinnan muná, ináku Juda nan ámna náráwa wakáin árená watán káin re. <sup>20</sup> Iná ámna kámá orek yáni hára kuráng wawu Saiprus nan me it yáilá Sairini nan watá Antioik káin kungga Táwi Jesu yan me pingnga álosim wa Grik ámna náráwa hányon yánangga kuráng. <sup>21</sup> Wáina tát Táwi yan háláng watá watyot átuk hálendu ámna náráwa táup hánám watá watán me naránnga pahán hurik tánnga Táwi yan tombong háliurang.

<sup>22</sup> Wáina tánnga átaráng ingga pingnga watá miti ámna náráwa Jerusalem káin áturáng wata káráman yáni káin han naruráng hára ku Banabas suring mát Antioik káin kuk. <sup>23-24</sup> Banabas wawu ámna álo kámá, Iruk Káungá watá wahára ep táwi hánám tánnga áran naráng hákhátik

ngá yá káto hánám hálangga átuk. Málám wakáin kungga káuk ku Ánutu yá pahán yámángga hálang yámángga árán kangga heronge hánám naruk. Wáina narángga ku ráma ráma Táwi isutang yátkuineráng ingga kámuk pahán yáni iháng tárut tángga kuk. Wáina tángga ku ámma náráwa táup hánám watá Táwi yan tombong kinan áwáng háuráng.

<sup>25</sup> Kulá wahára átang gu Banabas málám it yáilá Tasus káin Sol ya susuliya kuk. <sup>26</sup> Málám suling kung kang tunggap tángga ku engotang Antiok káin kumálák. Yándi wu kung wakáin yara ore káman kámuk Jesu yan ámma náráwa yot átang Táwi yan me wa ámma náráwa táup hánám yánáng toliumálák. Kut Kristen wawu Antiok hára kálak ámma náráwa Jesu yan tombong wa yámuráng.

<sup>27</sup> Rám ore wahára profet kámá Jerusalem káin átang kung Antiok káin háuráng. <sup>28</sup> Kulá profet waháranan káman da kutná wu Agabus watá hetang átang Iruk Káungá yá pahálán han ing miuk, “Káwakngá káwakngá erek hánám sungi kesák táwi hánám bá tunggafeinek,” wáina ingga miuk. Wata torong káin Rom bán king Klaudius watán ráma hára sungi kesák watá tunggafiuk. <sup>29</sup> Kulá Jesu yan ámma náráwa áturáng watá nuknu k yáni Judia ále káin áturáng wa tárak yáni hára hálang yámámáya me hárotang gu <sup>30</sup> sup iháng Sol káling Banabas yámát tu watá iháng kung Judia káin Jesu yan tombong watán ámma yáilá yámán du watá ámma náráwa yámuráng.

## 12

### *Pita yá kalabus káin árán angelo yá hálang imuk*

<sup>1</sup> Rám ore wahára King Herot\* tá Jesu yan ámma náráwa kámá ket ihángga iháng lem táuk. <sup>2</sup> Herot tá yánán Jon tatning Jeims wawu kápik ká utkámút táuráng. <sup>3</sup> Kulá Herot tá wáina tán kangga Juda yá wata heronge narát kápángga ku Pita hányon ket táuk. Wáina táuk wawu ráma táwi Israel yá Másáng Yisná Muná Náená† ráma wahára. <sup>4</sup> Pita wu Herot tá yánán ket há tángga wata torong káin du táng kung kalabus kinan tewe ámma urum 4 watá pinná tátáya tiuk. Tewe ámma urum 4 wata kinan 4 yá urum káman káman hára átnándaráng, kámuk ku 16. Wáina árán kungga ráma táwi Angelo yá Iháng Hátiuk‡ watá sálíngin du táng áwáng rahán yáni hára me hára titiya naruk.

<sup>5</sup> Wáina hálendu Pita wawu táng ting sat kalabus kinan átuk. Wakáin árán du Jesu yan ámma náráwa yá ku ráma ráma sáponga tángga Ánutu yá Pita hálang imámáya inánggiuráng.

<sup>6</sup> Kulá tembát tu Herot tá Pita táng me hára titi ingga miuk. Iná yáungán du Pita wu sen yará yá táng kik táng sat árená wa pálak táng tewe ámma yará ya orek yándi hára tit tu ruhángga átuk. Iná tewe ámma kámá yá ku kálu mungnga pinná tángga átkiuráng. <sup>7</sup> Wáina átnarát waháranon hánám Táwi yan angelo yá tunggafengga yamá yá kalabus itná kinan wa man angelo watá Pita katná kálu wa kátinggakak tángga táng mirak tángga ing inuk, “Sopmuná tárulák!” ingga inán wahára re sen ketná háranan watá sohingga háumálák.

<sup>8</sup> Wáina sohingga han du angelo watá inuk, “Lapya káto táng kik tángga sendol ka molák,” ingga inán Pita yá wáina tán du angelo yá inuk, “Lapya hásak wa mondang gu ná nasutang áwátá kundin.” <sup>9-10</sup> Wáina inán Pita yá angelo wa isutang káman kungga it pahálá átuk wa sangga kungga tewe ámma kinan áturáng wa iháng hátingga kungga tewe ámma máta káin áturáng wa iháng hátingga kungga ku kalabus itná wa sangga it yáilá kálu koená kálu mungnganá ain da táená wahára kung hen du kálu watá málám re yalingga kun kalabus itná wa sangga kumálák. Iná Pita yá ku angelo yá ále wa tánggiuk wawu pálipuk ingga ma naránggiuk, ináku wawu ára káet ingga naránggiuk. Kulá yándi wu orek káman isikimo sin kungga ku angelo yá waháranon pikpilingga kun du Pita wu málám re átuk.

<sup>11</sup> Kulá Pita yá málám re átang gu nanará ná yá kándáng hálendu ing naruk, “Kulá kula ku pálipuk hánám ing há naret, Táwi yá angelo ná suring mán áwáng Herot ketná hára me Juda yá rina rina táng namámáya tiyaweráng waháranan son nehek.”

<sup>12</sup> Wáina narángga ku Maria Jon maming watán it káin kuk. Jon wata kutná nukngá ku Mak. It wakáin du ámma náráwa táup hánám watá urum tángga sáponga tángga átnarát tu <sup>13</sup> málám kuk watá kung it kapme yan kumbi kálu mungnganá hára károk károk kátin yáup náráwa kutná Roda watá kálu yalin ingga áwuk. <sup>14</sup> Wáina yalin ingga áwán Pita yá metán salá narángga ku málám kálu ma yalená heronge pálak son hururung kung it kinan hangga ku yánuk, “Pita ku áwáng kálu mungnga káin átak!”

\* **12:1:** King Herot náwu Maria yá Jesu nangge táng tiuk wahára King Herot átuk wata ená. † **12:3:** Rám wawu Ánutu yá Isip káinan Israel ámma náráwa yángotang kun kálu hára másáng yisná muná náuráng wata naráng hátingngátaráng.

‡ **12:4:** Rám wawu Ánutu yá Isip káin Israel ámma náráwa son iháháya angelo yá áwáng Israel nángánange yáni iháng hátingga Isip nángánange yáni ráháng kátkámút táuk wata naráng hátingngátaráng.

<sup>15</sup> Wáina yánán watá inuráng, “Kák ku hohelák hám.” Wáina inát watá táng hánghálang tángga yánuK, “Pálipuk hánám málámbá puk áwáng átak,” ingga yánán du ing miuráng, “Wawa angeloná hám.”<sup>S</sup>

<sup>16</sup> Wáina mengga árát Pita málám károk károk wa emá re kátingga árán kung kálu yalingga kangga ku háramuturáng. <sup>17</sup> Wáina tát kápánnga ku kilak átneráng ingga ket tarák táng yámánnga ku Táwi yá wáina wáina tángga kalabus kinan káinnan nangotang áwek ingga yánánnga ku Jeims Táwi kulaná yot yanuknuk náni wa wáina ingga yáneráng ingga yánánnga sangga ku yápmangga it nukngá káin kuk.

<sup>18</sup> Kulá hilápmá ku tewe ámna yá kauráng gu Pita wu ma árán du háramutang naránpak tángga ku yáni ing inán kanán táuráng, “Pita náwa rekálu koek?” <sup>19</sup> Kulá Herot málám Pita ku ma árak ingga met naránnga ku ámna suring yámán kung Pita ya suluráng, enendu ma kauráng. Wáina hárendu málám tewe ámna Pita pinná táuráng wa men áwát tu rina hánám tángngárát Pita yá koek ingga yánáng suliuK, enendu kándáng ma inát tu sándu há kámutneráng ingga miuk. Kulá wata torong káin Herot tu Judia ále wa sangga hang it yáilá Sisaria wakáin átkiuk.

#### *Herot tá kámutuk*

<sup>20</sup> King Herot tá it táwi Tair yot Saidon wata kuk táwi táng yámánnga átuk. Yáni wu ále Herot tá pinná tángga átuk wakáin sungi iháng nangngátaráng, wáina wata ku yáni kámuK áwáng urum káman hálengga ku pahán káman dá tunggafeik ingga Herot kakaya áwuráng. Herot kanin ingga yáni wu Herot tán ámna hulá káman kutná Blastus watyot kálak hálang yámámáya me tát álo hálen du wata torong hára kung king kangga ku pahán láláp tángga ku kuk táelák wa sang ingga inuráng.

<sup>21</sup> Wáina inát Herot tá rám káman me tátá ingga tiuk. Kulá rám wahára ku málám king gán kutná kutná wa tánggánengga ku king gán sia hára putung átang me táwi yánuK. <sup>22</sup> Wáina yánánnga árán du ámna náráwa yá ing mantánnga áturáng, “Me náwu ánutu káman dán me, náwu ámna yan me muná!” <sup>23</sup> Wáina mengga Herot kutná meng tárut tángga árát naránnga, málám Ánutu kutná meng tárut tátáya takta narán waháरणyon hánám Táwi yan angelo yá kangga áwáng urán du ilalák wáik ká tunggafeng mán du umbeng gá pahálá kinan sáng rákrákit tángga árát kungga kámutuk.

<sup>24</sup> Iná Táwi yan me watá ku táwi hánám hálengga kungga it kámá kámá káin kung háliuk.

<sup>25</sup> Kulá Banabas káling Sol yá Jerusalem káin yáup yándi wa táng hálingga ku son Antiok káin kumálák. Wakáin kukuya ku Jon kutná nukngá Mak wa engotang káman yáni kuráng.

## 13

### *Jesu yan tombong gá Banabas káling Sol suring yámát kumálák*

<sup>1</sup> Jesu yan ámna náráwa it yáilá Antiok káin áturáng wata kinan profet kámá me Táwi yan me yánáng tolingngátaráng ámna kámá hányon áturáng wata kut yáni ku Banabas, Simion kutná nukngá Niga (kut Niga wata hulá ku sutná yángomá), Lusius it yáilá Sairini nan, Manain (ámna Manain wawu ámna yáilá Herot yot káman sing yámená) hang Sol. <sup>2</sup> Kulá rám káman sungi sangga Táwi kutná meng tárut tángga átnárát tu Iruk Káungá yá ing yánuK, “Banabas káling Sol wa iháng tunggap tát no náut yáup tátáya mantáng yámut wa tátáya yáandin kámá átnemálák.” <sup>3</sup> Wáina yánuK hárendu sungi sasa táuráng me sáponga táuráng watá sálikngin du ket yáni yá yáin yándi hára usáng hang tingga iháng káto tángga ku suring yámát kumálák.

### *Banabas káling Sol yá Saiprus káin Táwi yan me yánumálák*

<sup>4</sup> Iruk Káungá yá suring yámán kungga ku it táwi Selusia wakáin kung háumálák. Kulá Selusia káin du kilang kinan árángga kun du watá iháng kung ailan Saiprus kálu kungga <sup>5</sup> it yáilá Salamis káin tin du kung Juda yan miti itná kinan hangga Ánutu yan me wa mengga yánánnga kumálák. Ámna Jon kutná nukngá Mak wawu káman yáni átningga ku hálang yámánnga átnninggiuk.

<sup>6</sup> Yándi wu wáina yángyánáng kungga ku ailan numkálu it táwi Pafos káin kung hiúmálák. Pafos káin kung hengga káumálák ku tombong Juda waháरणan ámna sárummá pálak káman wawu profet kusák wata kutná ku Bar-Jesu. <sup>7</sup> Iná ámna wawu kawana kutná Sergius Paulus watyot átnándamálák. Sergius Paulus wawu nanará ná álo kámá hárendu Banabas káling Sol mantáng yámán málámbán káin áwumálák, náuta Ánutu yan me wa há nanaráya naruk wata.

<sup>8</sup> Ámna sárummá pálak wawu GriK me kálu kutná ku Elimas. Kulá ámna watá ku kawana watá Jesu ya naráng háting mámá wata taktak mán du Banabas káling Sol yan yáup wa

<sup>S</sup> 12:15: Juda kátu yá ku ing narángngátaráng, Ánutu yá ámna náráwa káman káman dán angelo iháng tunggap táuk ingga narángngátaráng.

yanyawon táng yámuk. <sup>9</sup> Wáina tán Iruk Káungá yá Sol kutná nukngá Pol wa ep tán kárek hánám Elimas kangga átang inuk, <sup>10</sup> “Kák ku Satan nanggená me tirik tárak álosim wata káyammá! Kák ku me kusák me ket tárak wáik watá ep táwi hánám kehángga árán átalák. Kák ku Táwi yan káinnan kálu kándáng isusut wa táng yakyawák tánggoelák. Kálu wáina wa sasaya wu ma hám naráunggulák? <sup>11</sup> Wata ku ing narinelák, rám nahára wu Táwi ketná yá káyamya hálangga keháng lem tán du rahála yá páyung tin káe yamá ma káená rám háasák sim átnelák.”

Wáina inán wahárayon páyung watá áwáng rahála wa pop tán hangga kungga ámma ketnán tán átning kuku wata sulingga kuk. <sup>12</sup> Iná kawana watá Táwi yan me naráungga tárak wáina kangga ku nangnga ná han Jesu pálipuk ingga naráung hating muk.

*Pol yá distrik Pisidia káin it yáilá Antiok nukngá wakáin Táwi yan me yánuuk*

<sup>13</sup> Kulá Pol yá ámma málámbot kuráng watyot kilang hára árangga ku Papos sangga Pamfilia distrik káin it yáilá Pega wakáin kuráng. Kung wakáin átang gu Jon kutná nukngá Mak ká yápmangga Jerusalem ba son kuk. <sup>14</sup> Kulá Pol káling Banabas watá Pega wa sangga ku kungga Pisidia distrik káin it yáilá Antiok káin wa kumálák. Iná Sabat hára wu kung Juda yan miti itná kinan hangga putung átumálák. <sup>15</sup> Wáina árán miti itná yan ámma yáilá watá Ánutu yan meng rákit mená me profet tán me wa sánging hálingga ku Pol káling Banabas ing yánuráng, “Nuk náni yara, sándá me kámá nánangga náháng káto tátáya naremálák háleudu álo náninemálák.”

<sup>16</sup> Wáina yánát tu Pol yá tárutang yolop átniráng ingga ket tárak tángga yánuuk, “Sán Israel ámma náráwa me kámá káinnan ni Ánutu ináng sáknngingátaráng, káramatingga nákkán me ná narineráng! <sup>17</sup> Tombong Israel nándán Ánutu watá táwi ilom náni ya nangán pingnga hánám átnéráng ingga miuk. Watá ále káwak yáni wa sangga Isip káwak káin kung áturáng wahára wu hálang yámánga árán táwi hánám wa máriuráng. Wata torong káin málámbot hálang táwi hánám wahára kungga ku Isip káinnan yángotang áwuk. <sup>18</sup> Kulá ále komkomá ámalum re káin yara 40 wáina hám áturáng wahára wu Ánutu sárum imánggiuráng, enendu ma yápmanggiuk. <sup>19</sup> Iná Kenan káwak káin du Ánutu yá Israel hálang yámán ámma náráwa tombong 7 wa ráhángga ku káwak yáni wa yáni ya pukon ihuráng. <sup>20</sup> Ále wa tunggafiuk wawu yara 450 wáina hám wata kinan.

“Wata torong hára ku Táwi yá ámma yáilá iháng tunggap tán watá Israel pin yáni tángga árát kungga profet Samuel yan rám háliuk.

<sup>21</sup> “Kulá rám wahára wu ámma náráwa yá king gá pin náni táinek ingga met tu Ánutu yá ámma Sol Kis nanggená tombong Benjamin háranan wa yámán du watá pin yáni tángga árán kungga yara 40 háliuk. <sup>22</sup> Kulá wata torong hára king Sol wa yáupmá hára isutang gu Dewit táng watán king tin watá pin yáni tángga átuk. Ánutu yá ámma wata ing yánuuk, ‘No Jesi nanggená Dewit wa kangga pahána álosim naret. Watá ku nákkán pahán káin rina átak wa álo isutnek.’

<sup>23</sup> “Kulá ámma watán hun hára kungga ku Ánutu yá Israel son iháhaya há miuk wa isutang Jesu san áwuk. <sup>24</sup> Iná Jesu wu yáupmá ma hulátená átuk wahára wu Jon dá pahán hurik tángga umi kuhineráng ingga Israel ámma náráwa yánangga átkuk. <sup>25</sup> Kulá Jon dá yáupmá tángga áwuk watá sálikngingiya tángga átuk wahára ku ing miuk, ‘Nák ku ni ingga naráunggoeráng? Nák ku sándá ámma hálang mángga átkoeráng wa muná, ináku ámma wawu nák sárumna káin emá áwinek. Ámma wawu kutná pálak, iná nák ku ámma hánám re, wata ku no watán sendol páupmá wa yayaliyan tárak muná.’

<sup>26</sup> “Yanuknukna, Abraham e ilommá me kámá káinnan Ánutu naráung hating mángngátaráng, sándu ing narineráng, Ánutu yan me watá ámma náráwa son iháhaya miuk wawu há san nándán káin áwuk. <sup>27</sup> Jerusalem bán ámma náráwa me watán ámma yáilá watá ámma wa kándáng ma naráng muráng, hang profet tá me rina miuráng ga Sabat hára sángingátaráng wa kándáng hánám ma naruráng. Wáina háleudu kámutnek ingga miuráng, wahára kungga ku uláp profet tá me rina miuráng wata páliná yá pálipuk há tunggafiuk. <sup>28</sup> Watán káin kandák kámá ma káuráng, enendu hánámá táng me hára tingga kámutnek ingga Pailat inuráng. <sup>29</sup> Kulá yáni wu rina rina wa erek tát sálikngiuk wahára kungga ku Jesu hára profet tá rina tunggafeinek ka uyená wata páliná yá kándáng re há tunggafiuk. Wáina táng hálingga ku maripong hára táng sat han du táng kung tanggán káin tiuráng. <sup>30</sup> Wáina táuráng, enendu há kámutuk waháranan Ánutu yá son táng tárut táuk. <sup>31</sup> Wáina táng tárut tán du ámma náráwa málámbot huphuráp Galili ále sangga Jerusalem káin káman kuráng watá rám máro hánám son káuráng. Kulá rám nahára wu ámma watá ku wáina kanggiumán ingga Juda ámma náráwa yánanggoeráng.

<sup>32</sup> “Iná nátá me pingnga álosim sánindemát wawu ing, Ánutu yá ámna náráwa son iháhayan ámna wa táwi ilom náni yámámáya uláp miuk. <sup>33</sup> Wáina wata ku málámbá Jesu táng tárut táuk wahára kungga ku mená uláp miuk wa tán wata páliná yá nángánange yáni nándán káin tunggafiuk. Me nányon du Kap Papia sapta 2 hára ing uyená,  
‘Kák ku nák Nanggena,

kula wu no Nanya hálet.’\*<sup>†</sup>

<sup>34</sup> Ánutu yá tanggán káinnan há táng tárut táuk, wata ku son kámutang ma pálikngindák, ingga uláp Ánutu yá ing miuk,

‘Na pálipuk hánám sáháng tolingga háláng sámínet,

ingga uláp king Dewit wáina táinet ingga há inut.†

<sup>35</sup> Kulá me nukngá káman Kap Papia káin uyená ing átak,

‘Ko ámna rongrongngá hánám nangán ingga narelák

wa satá ma pálikngindák.‡

<sup>36</sup> “Kulá há naremán, me náwu Dewit ta ma mek. Dewit tá há átuk wahára wu Ánutu yan pahán wa isutang átuk, enendu máriya kámutuk wahára wu táng kung sisi ilommá watán tanggán káin usát tu káwak sut wawu wakáin pálikngiuk. <sup>37</sup> Iná ámna Ánutu yá tanggán káinnan táng tárut táuk wata sutná wu ma pálikngiuk.

<sup>38</sup> “Wáina wata ku, yanuknukna, nátá me ing sánindemát, Jesu yá áwuk wawu mukmuro náni yanyawon da. <sup>39</sup> Ámna wahára kungga ku káman niyá Ánutu naráng háting minérang wa ámna náráwa kándáng ingga mantáng yámínek, Moses yan meng rákit mená wahára kungga muná. <sup>40</sup> Wáina wata ku kándáng hánám narángga átnérang, uláp profet tá ing miuráng watá sán hára tunggafeiwon:

<sup>41</sup> ‘Ámna me keke nanángngátaráng sán kándáng narínerang,

no hulá kámá táe sán orek sáni hára tunggafeínek.

Wáina táe kangga hárámutang nangnga sáni han du wáik hálangga kámutnerang.

Iná ámna káman dá no wáina táinet wata sánánggim

wawu sándu watán me wawu kusák ingga naránggalát.’§<sup>¶</sup>

<sup>42</sup> Pol yá wáina yánánga sangga ku Banabas yot yándi wu miti itná wa sangga kundin ingga tángngárán ámna náráwa yá ing yánuráng, “Sabat nukngá ánu hára wu me wata kátu son náninemálák.” <sup>43</sup> Wáina yánánga miti itná sangga kungga ku tombong Juda háranan me ále kámá káinnan Juda yan miti wa isurená táup hánám watá Pol káling Banabas yásutang kut tu watá Ánutu yá pahán sámángoek wata naráng hákhátik sáni táng wahára tingga káto hálangga átnérang ingga yánánga iháng káto táumálák.

<sup>44</sup> Kulá Sabat nukngá hára wu hála it yáilá waháranan ámna náráwa watá kámuk ingmen miti itná káin Táwi yan me wa nanaráya áwuráng. <sup>45</sup> Wáina áwáng árát kápánga wata kalán Juda yá pahán yáni wáik hálen du Pol yan me wa táng hang tingga ku me keke miuráng.

<sup>46</sup> Wáina tát kápánga ku Pol káling Banabas yá ma pitáená ing yánumálák, “Ánutu yá ing nánuk, ‘Me wawu Juda kálak yáninemálák,’ wata ku wáina há táumát, enendu sándá ku me wa sárum imánga átkuku sásáliná muná tátáya takta narángoeráng, wata ku nát tu Juda sán sápmangga hurik tánga kámá káinnan watán káin kungga Táwi yan me wa yáninemát. <sup>47</sup> Wáina táinemat wawu náuta Táwi málámbá ing nánuk wata,

‘No táe kák ku ámna náráwa ále kámá káinnan watán yamá ya átnelák.

Wáina árátá ku káwakngá káwakngá yan ámna náráwa yá kangga ku no son iháhayan kálu wa narínerang.’\*\*<sup>††</sup>

<sup>48</sup> Wáina men ámna náráwa kámá káinnan watá me wa naránga pahán yáni álosim hánám hálen Táwi yan me wata heronge hánám naránga áturáng. Wáina naránga átang gu ámna náráwa Ánutu yá átkuku sásáliná muná wa há táinerang ingga iháng tunggap táuk watá ku Táwi ya naráng háting muráng.

<sup>49</sup> Kulá wahára átang gu Táwi yan me watá ále ore wakáin erek ingmen kung háliuk. <sup>50</sup> Wáina kangga ku Juda ámna yá náráwa kut yáni árená Juda yan miti isutang háená, me it yáilá yan ámna yáilá waháranan wa pahán yáni seng tárut tát tu Pol káling Banabas iháng káyam tánga ku ále wahára yásuturáng. <sup>51</sup> Wáina tát kápánga ku ámna náráwa yá me yá nányot átak ingga nanará wata yándi wu háram yándi káin káwak káhumá wa káting halin han du hangga it táwi Aikoniam ba kumálák. <sup>52</sup> Kulá ámna yará wawu hangga kumálák, enendu Iruk Káungá yá Antiok ámna náráwa Jesu ya naráng háting mená wa ep táwi hánám ihán heronge hánám naruráng.

\* 13:33: Kap Papia 2.7 † 13:34: Aisaia 55.3 ‡ 13:35: Kap Papia 16.10 § 13:41: Habakuk 1.5 \*\* 13:47: Aisaia 49.6

## 14

*Pol káling Banabas yá Aikoniam káin Táwi yan me yánumálák*

<sup>1</sup> Pol káling Banabas yá Aikoniam káin du Antiok káin táumálák wáinanyon Juda yan miti itná káin árángga Táwi yan me kándang hánám yánán Juda me Grik ámna náráwa táup hánám watá Jesu ya naráng háting muráng. <sup>2</sup> Kámá yá wáina tát Juda kámá Jesu ya ma naráng háting muráng watá ámna náráwa kámá káinnan wata pahán yáin hat tu watá ni Jesu ya naráng háting muráng watá pahán káráp táng yámuráng. <sup>3</sup> Pol káling Banabas wu Aikoniam káin rám hásak sim átang ma pitáená Táwi yá ámna náráwa pahán yámánggoek wata yánángga árán du Táwi málámbá háláng yámán ket tarák hulá hulá táumálák. Wahára kungga ku Táwi yá ámna yará watán me wu pálipuk ingga ámna náráwa yálenggiuk. <sup>4</sup> Wáina yálenggiuk, enendu it watán ámna náráwa watá ku horengga kámá yá Juda yot arát kámá yá ku aposel yará watyot áturáng. <sup>5</sup> Wáina tángga átang gu Juda yá ámna yáilá yáni yot hang ámna kámá káinnan watá aposel yará wa ket ihángga sup mangga ráháng kátkámut tánin ingga me hároturáng. <sup>6</sup> Wáina tángga arát tu ámna yará wawu wáina ingga met há narángga ku sokmuná hánám it yáilá sangga kungga Likonia distrik kán it táwi yará Listra yot Debe wakáin kumálák. Wakáin du it táwi yará watyot it nukngá wata tangtang káin átaráng <sup>7</sup> wahára me pingnga álosim wa yánángga átkumálák.

*Pol káling Banabas yá it táwi Listra wakáin átumálák*

<sup>8</sup> Kulá Listra káin du ámna káman hárammá kámurená átnándak. Ámna wawu mam kinan átang tunggafiuk ngáyá wáina re átang kung áwáng kámá ma tángngátak. <sup>9</sup> Pol málám Táwi yan me mengga árán ámna watá watán me narángga átnáran Pol yá kárek ingmen káuk ku álo háháleyan naráng hákhátik wahára árán kangga ku <sup>10</sup> mantángga inuk, “Táruálák!” ing inán du wahára re ámna watá hip hánám tárutang kung áwáng táuk.

<sup>11</sup> Kulá ámna náráwa káwan táwi watá Pol yá rina táuk wa kangga ku Likonia me kálu ing mantáuráng, “Ánutu náni yá ámna nangge hálangga alek kálu nándán káin háemálák!” <sup>12</sup> Wáina mengga ku Banabas ya ing miuráng, “Wawu ánutu yáin yáni Sus wa háam.” Iná Pol ya ing miuráng, “Ámna wawu me yan, wata ku ánutu Hermes wa háam.” <sup>13</sup> Ánutu Sus watán miti itná wu it táwi watán kumbi tangtang kep kálu wahára átnándak. Kulá Sus watán pris yot ámna náráwa yá ámna yará wata towet sing yámánin ingga mengga sat árán pris yá kung bulmakau ámnaná kámá yot álesak kámá ihángga it táwi watán kálu mungnga káin áwuk.

<sup>14</sup> Wáina tát aposel yará Banabas káling Pol yá wáina táinderáng ingga narángga hárammutang lap yándi tánggánená wa raráhángga hururung ingmen urum táwi áturáng wata orek yáni káin kungga ing mantángga yánumálák, <sup>15</sup> “Yanuknuk, wa saniráng! Náuta ku wáina tánggoeráng? Nát tu sáni inanyon ámna nangge re. Nát tu me pingnga álosim sánáte ku sándá kutná kutná átkuku yáni muná ále hánám wa yápmangga ku Ánutu átkukuná pálak watán káin kukuya tánggoemát. Watá ku alek, káwak me táp wa men tunggafet wata kinan kutná kutná wa men tunggafiuráng. <sup>16</sup> Uláp ámna náráwa káwakngá káwakngá átaráng wa yápm watá yáin pahán isutang átkuráng. <sup>17</sup> Wáina áturáng enendu málámbá málám táng kilak ma san átuk. Rámá rámá wu ket tarák álosim wa sálenggoek wawu ing, ále yá tángga áwánggoek me sungi tán álosim áráng het tu sungi táup hánám átsámánggoek, wata pahán sáni yá heronge naránggoeráng,” wáina ingga yánumálák. <sup>18</sup> Kulá yándi wu me wa há yánumálák, enendu yándi wa towet sing yámamáya káto hálangga arát tu olet yáni man sasaya wu yáup háláng hánám wa táumálák.

<sup>19</sup> Kulá átang árongga ku Juda kámá it yáilá Antiok me Aikoniam nan áwuráng ngáyá áwáng it táwi Listra nan ámna náráwa wa pahán yáin hat tu Pol táng káyam táuráng. Wáina tángga sup mangga Pol utang sat han há kámutak ingga narángga ku Pol táng uyingga táng kung it kumbiná kep káin tiuráng. <sup>20</sup> Wáina sat árán du ámna náráwa Jesu ya naráng háting mángga áturáng watá áwáng áwálák hetang arát tu Pol yá tárutang kung it táwi wata kinan son kung háuk. Kulá tembátnáwa ku Pol málám Banabas yot it táwi Debe wa kumálák.

*Pol káling Banabas yá Jesu ya naráng háting mená wa iháng káto táumálák*

<sup>21</sup> Kulá Debe káin du me pingnga álosim wa yánán du ámna náráwa táup hánám watá narángga Táwi yan ámna náráwa háliuráng. Wáina tát tu yándi wu son Listra, Aikoniam me Antiok ka kumálák <sup>22</sup> ngáyá kung wakáin Táwi yan ámna náráwa wa iháng káto tángga ku naráng hákhátik hára káto átnéráng ingga mengga ing yángyánáng kumálák, “Ánutu yan átkuku wata kinan hahaya ku márapmá táwi yon kálak sungga ku kung háinémán.” <sup>23</sup> Pol káling Banabas yá ámna yáni hulá miti itná káman káman dán iháng tunggap táng yámumálák. Wáina tángga ku sungi sangga sáponga táumálák wahára kungga ku ámna yáni hulá wa iháng Táwi ketná hára tiumálák. Wáina táumálák, náuta ámna yáni hulá yá Táwi ya naráng háting muráng wata. <sup>24</sup> Yándi wu wáina tángga sangga ku Pisidia distrik wa sangga Pamfilia distrik

káin kumálák <sup>25</sup> ngáyá it yáilá Pega káin Táwi yan me wa yánangga sangga ku kung it táwi Atalia káin háumálák.

<sup>26</sup> Atalia káin átang gu kilang hára árangga Antiok ka kumálák. It waháranan dá ku huphuráp Ánutu yá pahán yámangga háláng yámán yáup tángga átkuku ya yáandi iháng Ánutu ketná hára tiuráng. Iná yáandi wu yáup yáandi táng hálingga ku wakáin yon son áwumálák.

<sup>27</sup> Kulá wahára átang gu ámna náráwa Jesu ya naráng háting mená wa men áwát tu Ánutu yá háláng yámán rina táumálák, me málámba naráng hákhátik kán kálu sareng yámán ámna náráwa kámá káinnan watá álo isusut wata yánumálák. <sup>28</sup> Wáina tángga ku it wahára rám háská kon watyot átumálák.

## 15

### *Urum táwi Jerusalem káin tunggafuik*

<sup>1</sup> Ámna kámá Judia kálu hangga it yáilá Antiok wata kinan Táwi yan ámna náráwa ing yánang tolingga kuráng, “Sándá Moses yan kálu wa isutang kep sáni marineráng wawu álo kámá, iná ma marindaráng wawu Ánutu yá sán son ma sáhindák.” <sup>2</sup> Wáina yánangga kut Pol káling Banabas yá wa kan kándáng ma hálen wata menmen ná táwi táuráng. Wáina tát tu Táwi yan ámna náráwa yá Pol káling Banabas iháng tunggap tát it márumá Táwi yan pingnga áturáng waháranan kámá yot Jerusalem káin aposel yot miti itná yan ámna yáilá kápangga me wa táng totoliya árangga kuráng. <sup>3</sup> Táwi yan ámna náráwa yá ámna yará wa suring yámát Foniaia ále kálu kungga Samaria ále kálu kungkung gu kálu ya Táwi yan ámna náráwa wakáin Ánutu yá ále kámá káinnan pahán yáni iháng hurik táuk ingga yánangga kun narát álosim hánám háliuk. <sup>4</sup> Kungga Jerusalem káin kung hiuráng wahára wu Táwi yan ámna náráwa me aposel me ámna yáilá wakáin áturáng watá heronge me yánangga yángot kung tiuráng. Kulá wahára átang gu Pol káling Banabas yá Ánutu yá háláng yámán tárak rina rina tángngátamálák wa wáina ingga pingnga yánumálák.

<sup>5</sup> Wáina yánán narángga ku Táwi yan ámna kámá tombong Farisi háranan watá tárutang miuráng, “Ále kámá káinnan dá Táwi yan tombong háháleya ku kep yáni maránga ku áwáng nán kinan hangga ku Moses yan meng rákit mená átaráng wa kámuk hánám isutneráng.”

<sup>6</sup> Iná aposel yot ámna yáilá yá ku urum tángga me retá ku kándáng ingga wa táng totoliya táuráng. <sup>7</sup> Ámna urum bá me háská metánga inán kanán táng hálingga sangga wu Pita yá tárutang yánuik, “Yanuknukna, sáni há nareráng wa, huphuráp Ánutu yá tombong nán háranan yáup káman tátáyan neháng tunggap tángga nanuk wawu ing, ‘Kák milunya káinnan du nákkán me pingnga álosim wa ále kámá káinnan dá naránga ku nák ka naráng háting namineráng,’ ingga nanuk. <sup>8</sup> Ánutu wawu ámna náráwa kámuk ka pahán yáni wa kangngátak, wata ku málám ále kámá káinnan da pahán yáni wa kang hálingga ku Iruk Káungá wa yámuk, wawu nán námuk wáinanyon. Tárak watá ku ing hiták hánám náliuk, Táwi yá wata pahálá heronge naráng yámánga ku málámbán pingnga háháleya ihuk. <sup>9</sup> Málám nán me wa orek náni hára tárak nukngá kámá ma táuk, ináku tárak wáina re táuk. Yáni málámba naráng háting muráng wata tángga ku pahán yáni yawolán málámba rahálá hára rongrongngá háliuráng. <sup>10</sup> Wáina wata ku kula wu rina tángga ku kandák ingga há nangnaráng gu Ánutu yá tárak rina tán kanin ingga tánggoeráng? Márapmá táwi uláp táwi ilom náni áturáng watá ma susuwáyan me náni hányon ma susuwáyan wa táng Táwi yan ámna náráwa hit yáni hára ma suwáng yámindaráng. <sup>11</sup> Wáina tátáyan du ma hánám árak! Náni ing há naremán wa, Táwi náni Jesu yá pahán námuk wata tángga ku Ánutu yá son náhuk, wáinanyon ámna náráwa ále kámá káinnan wa son ihuk.”

<sup>12</sup> Pita yá wáina men du Banabas káling Pol yá Ánutu yá háláng yámán tárak rina rina ále kámá káinnan da orek yáni káin táumálák wata urum wa yánumálák. Ámna kaláhu watá me wa yánangga áturáng wahára wu ámna náráwa áturáng watá me yáni ma me táená náng hánám átang naránga áturáng. <sup>13</sup> Kulá watá meng hálín du Jeims Táwi kulaná yá yánuik, “Yanuknukna, kárámatingga narániráng. <sup>14</sup> Ánutu yá hulátingga ále kámá káinnan ámna náráwa kámá urák yáni naránga ihán málámbán pingnga háliuráng ngáyá Saimon dá há sánán nareráng. <sup>15</sup> Hang profet kámuk kán me wu wáinanyon uyená. Profet waháranan káman dá ku ing uyiuk,

<sup>16</sup> ‘Dewit ráula wawu sel it tá ina táwatang háená.

Máriya son áwinet wahára wu

sel it wa son táng tárut tángga táng tolinet.

Kámuk hánám wáik hálengga táwatang háuk

wa son tárakngá wáinanyon hánám táng tolinet.

<sup>17</sup> Wáina táe ku ámna náráwa ále kámá káinnan átaráng,



nini no nangán ingga iháng tunggap táut, watá ku naya suling namineráng.

Me náwu Táwi yan me. Málámbáyón du ále wa tán tunggafenggoeráng,\*  
 18 Uláp hánám bon wáina tunggafeinek ingga há men ámma náráwa yá naruráng.  
 Ingga profet tá wáina miuk.

19 “Wata ku nákkán nanará ku ing, nándá tátne ále kámá káinnan dá hurik tángga Ánutu yan káin áwánga átaráng watán kálu yá susuwá ná ma háleindak. 20 Iná nándá ku me uyingga satne watán káin kun du ing yáinimán, sunggo songgo ánutu kusák ka towet sing mená ma náindaráng, márámamák hára ma kuindaráng, hang songgo san yáni hára iháng kátkámut táená wata yánum yáni me songgo yánumá hára sip pá há árán kangkang wa ma náindaráng. 21 Kálu wáina isutneráng wawu uláp hánám átang áwánga it wakáin wakáin Moses yan meng rákit me há mengga naránggataráng wata, me inggálu rámá rámá Sabat hára miti itná átaráng wata kinan há sángingga narángoeráng wata.”

*Papia sat ále kámá káinnan dá Jesu yan tombong háliuráng watán káin kuk*

22 Kulá aposel yá ámma yáilá yot ámma náráwa Jesu yan tombong háliuráng watyot yáni háranan ámma yará iháng tunggap tát tu watá Pol káling Banabas yot Antiok káin kuráng. Ámma yará iháng tunggap táuráng wawu Judas kutná nukngá Barsabas watyot Sailas. Ámma yará wawu ámma yáilá áturáng waháranan.

23 Papia ku ing uyiuráng:

Nán aposel me ámma yáilá yanuknuk sáni watá papia ná uyingga satne yanuknuk náni ále kámá káinnan Antiok kinan me Siria provins yot Silisia provins káin átaráng sándán káin koek.

Káe álo, yanuknuk náni.

24 Pingnga ing narumán, Juda nán háranan ámma kámá yá kung me sánuráng watá sán nanará sáni táng yakyawák táuk. Wáina táuráng wawu nándá wáina táineráng ingga ma yánumán. 25 Pingnga wa naránga ku nándá pahán káman hálendu ámma yará ná iháng tunggap tángga ku suring yámátne nuk náni yará álosim Banabas káling Pol yot sándán káin koeráng. 26 Banabas káling Pol wawu kátkámut ta ma pitáená Táwi náni Jesu ámma náráwa son iháhá wata kutná meng tárut tátáya átingngátamálák. 27 Wáina wata ku nándá Judas káling Sailas suring yámátne kung yándi ya milun yándi hára hánám me rina uyemán wa pálipuk ingga sáinimémálák. 28 Iruk Káungá watá nándán káin árán du nándá me ing hárotamán, wawu nándá mápápmá táwi wa táng sán ketnán ma tindámán, ináku kálu ing wa reré isutneráng. 29 Sungi songgo ánutu kusák ka towet sing mená ma náindaráng, songgo yánumá hára sip pá há árán kangkang wa ma náindaráng, songgo san yáni hára iháng kátkámut táená wata yánum yáni wa ma náindaráng, hang márámamák hára ma kuindaráng. Kálu wáina wa kápánga iháng hátineráng watá ku álosim.

Nándán me ku wa rewe. Kándáng gon átneráng.

30 Kulá yáni wu ámma wa suring yámát kung Antiok káin hangga ámma náráwa Jesu yan tombong wa iháng urum tángga ku papia wa yámuráng. 31 Yámát ámma náráwa yá papia wa sángingga naruráng wawu yáni iháng káto tátáyan mená hálendu heronge hánám wa táuráng. 32 Judas káling Sailas yándi wu profet hálendu me áლოსim kámá yanuknuk yándi wa yánánga iháng káto táumálák. 33-34 Wahára rám kámá átang sangga ku pahán láláp me watyot yanuknuk yándi watá son suring yámát rendá suring yámát áwumálák wakáin yon kumálák.† 35 Iná Pol káling Banabas wu Antiok káin átang gu ámma táup pot Ánutu yan me ámma náráwa yánáng tolingga me pingnga álosim wa yánánga áturáng.

*Pahán káman dá Pol káling Banabas orek yándi hára ma átuk*

36 Rám kámá átang sangga ku Pol yá Banabas ing inuk, “Náti wu son kungga yanuknuk náti it rehára rehára Ánutu yan me yánánga átkumát wa rina átaráng ingga kápánga átkundin.” 37 Wáina inán Banabas yá ku Jon kutná nukngá Mak wa tángga watyot káman yáni kukuya naránga ku miuk, 38 enendu Pol yá wa narán kándáng ma háliuk, náuta huphuráp Mak kot káman kungga Pamfilia distrik káin kung hiuráng wahára wu Mak ká yáup káman tángga átkunin ingga ma narená ámma yará wa yápmangga hánámá ná hálen há káuk wata. 39 Wáina hálendu yándi wu wata menmen ná tángga sangga ku horengga Banabas yá Mak kot kilang tángga ailan Saiprus ya kumálák, 40 iná Pol yá ku Sailas táng tunggap tángga málámbot káman kukuya tán du Táwi yan ámma náráwa watá yánuráng, “Táwi yan pahán láláp watá sányot átnék,” ingga yánuráng. 41 Yándi wu kungga Pol yá Siria me Silisia provins káin Jesu yan tombong hálengga áturáng wa iháng káto tángga átkuk.

\* 15:17: Amos 9.11-12 † 15:33-34: Nanará ámma kámá yá ing naránggataráng, lain 34 hára me nukngá káman átak, wawu ing, “Iná Sailas yá ku Antiok káin há átnet ing mengga ku wakáin há átuk”.

## 16

*Timoti yá Pol káling Sailas yot kuráng*

<sup>1</sup> Pol málám it yáilá Debe káin kung átang sangga ku kungga it táwi Listra káin kuk. Disaepel káman kutná Timoti wawu Listra wakáin átnándak. Maming gu Juda náráwa Jesu ya hányon naráng háting mángngátak, iná naning gu tombong Grik háranan. <sup>2</sup> Ámna náráwa Táwi yan pingnga hálengga árená Listra nan me Aikoniam nan watá Timoti wawu ámna álosim ingga meng toling mángngátaráng. <sup>3</sup> Pol yá Timoti yot kukuya narángga ku Timoti kimpá maruk, náuta Juda ámna náráwa ále wakáin átaráng wawu há nareráng Timoti naning wawu Grik nan ingga. Wáina maráng mángga átang sangga ku káman yáni átkuráng. <sup>4</sup> Kulá yáni wu it wahára kungkung tángga átkuráng wahára wu aposel me ámna yáilá yá Jerusalem káin Táwi yan ámna náráwa yá me rina isusut ta hároturáng wa yánángga átkuráng. <sup>5</sup> Wáina tángga átkut tu Jesu yan pingnga áturáng wata naráng hákhátik yáni yá káto hálen du ráma ráma ámna náráwa yá áwáng waháranon sengsáráp tit tu tombong hásak hálengga átuk.

*Pol yá ára hára ina Masedonia ámna káuk*

<sup>6</sup> Pol, Sailas, me Timoti watá kungga ále Frigia yot Galesia wata kinan átkuráng, náuta Iruk Káungá watá Esia provins wata kinan Táwi yan me wa ma yánánáya káto táng yámuk. <sup>7</sup> Yáni wu kungga distrik Misia yan tawon hára kung hengga ku kung Bitinia provins kinan kung hanin ingga táuráng, enendu Jesu yan Iruk watá káto táng yámuk. <sup>8</sup> Wáina háleudu Misia kálu kungga it táwi Troas káin kung háuráng. <sup>9</sup> Kulá yáungán du Pol yá ára hára ina káuk ku Masedonia provins ámna káman dá hetang átang ukuro kálu Pol ing inuk, “Táp táng hátingga Masedonia káin ná áwángga ku nán hálang námáng.” <sup>10</sup> Pol yá ára ina wa kan du nándá Ánutu yá málámbán me pingnga álosim wa Masedonia káin yánánáya mantáng námek ingga narángga ku sopmuná ingmen wakáin kukuya tiyawiumán.\*

*Lidia yá Jesu yan tombong háliuk*

<sup>11</sup> Wáina tiyawing hálingga ku kilang kinan árángga kutne ku kilang gá náhángga Troas sangga ailan Samotres káin kándáng hánám kuk ngáya ku tembátnáya ku it táwi Neapolis káin náháng kung nápmáuk. <sup>12</sup> Kulá waháranan dá ku Filipai káin kung hiúmán, it yáilá wawu huphuráp pon Rom ámna náráwa yá áwáng wahára átkiuráng. Iná it yáilá Filipai wawu Masedonia provins yan distrik káman wata kinan du it yáilá táwi hánám. It yáilá wahára ráma máro yon átumán.

<sup>13</sup> Kulá Sabat hára wu kome kámá kangga sáponga tátáya it yáilá yan kumbi kálu mungnganá táwi hára kungga kep káin hangga umi kurat káman káin kumán. Umi káin wa kungga ku náráwa kámá umi kurat tákto káin urum árát kápángga ku watyot putung átang meme tángga átang gu wakáin Táwi yan me pingnga álosim wa yánámán. <sup>14</sup> Me wa yánángga áratne ku wa kárámatingga áturáng waháranan náráwa káman kutná Lidia wawu káman yáni átang me wa narángga átkiuk. Náráwa Lidia wawu it táwi Taiataira nan. Málám lap sipmá† yá sup yáupmá tángngátak. Iná málám bu Ánutu ináng sákngingga átnándak. Rám wahára Táwi yá pahálá yan kálu yalin málám Pol yá me yánuk wa narángga pahálá hurik táuk. <sup>15</sup> Málám me niyá málámbot itná kinan átnándaráng watá kámuk umi kuhángga ku nándá itná káin kukuya nánuk, “Sándá náka pálipuk Táwi ya naráng háting mek ingga narángga ku áwat nákkot nákkán it káin átnemán,” wáina men nándá álo kuinemán ingga inumán.

*Pol káling Sailas iháng kalabus kinan tiuráng*

<sup>16</sup> Rám káman nándá sáponga tátáyan komená káin son kungga átang gu yáup náráwa káman kálu hára káumán. Náráwa wawu iruk káman dá tán máriya kutná kutná rina tunggafeinek wa meng tunggap tángngátak. Ámna ren wa pinná tángngátaráng watá náráwa watá yáup wáina tán du wahára kungga sup táwi hánám ihángngátaráng. <sup>17</sup> Náráwa watá Pol yot nán násutang kunggatang gu ing mantángga kuk, “Ámna náwu Ánutu Árená Hánám watán yáup nangge, watá ku kálu rekálu Ánutu yá son sáhánggim wata menggoeráng.” <sup>18</sup> Kulá náráwa watá ráma máro hánám wáina re tángngarán du Pol yá taktak mán hurik tángga ku iruk wa inuk, “Jesu ámna náráwa son iháhá wata kutná hára ing kanin, ko náráwa wa sangga kung!” Wáina inán ráma waháranon iruk watá náráwa wa sangga kuk.

<sup>19</sup> Wáina kangga náráwa wata márumá hálengga átang yáup náráwa watá yáup tán sup ihángga átnándaráng watá muná hálen kangga ku Pol káling Sailas ket ihángga iháng uyingga átang maket komená káin <sup>20</sup> me nanará ámna yan káin kungga ku ing yánuráng, “Ámna

\* **16:10:** Nanará ámna yá ku ing narángngátaráng, ráma Pol yá Troas káin kung hiuk wahára wu Luk ku wakáin há átnarán. Wáina háleudu Pol yá Masedonia káin kukuya tán du Luk ká káman yáni kukuya tiyawiumán ingga wáina uyiuk. † **16:14:** Lap kalaná wawu pálipuk ku ‘purple’, enendu Nukna me kálu kala watanan muná, wata ku ‘sipmá’ ingga uyená.

yará náwu Juda nan watá áwáng nándán it yáilá náta kinan márappmá hulá hulá wa tán tunggafenggoek. <sup>21</sup> Hang ámna náráwa kámá iháng uying kung kálu kámá Rom ámna náráwa nándá ma tátáya mená wahára tinggoemálák.”

<sup>22</sup> Wáina met ámna náráwa áwáng wahára urum táuráng watá me kusák wa mengga iháng wata ketnán yon tit tu me nanará ámna yá ámna kámá yánát sut yándi tánggánerá wa yaling yámánga ku honggem bá táup hánám ráhuráng. <sup>23</sup> Wáina ráhát tu me nanará ámna yá yánát iháng kalabus kinan tiuráng. Wáina tingga ku me káto hánám kalabus wa pinná tátá ing inuráng, “Ámna yará wa kándáng hánám pin yándi táinelák.” <sup>24</sup> Me nanará ámna yá me wáina inát tu kalabus pinná tátá watá iháng it pahálá kinan hánám káin wa tingga ku háram yándi wa iháng palang got tingga káto hárotuk.

<sup>25</sup> Wáina átang gu Pol káling Sailas yándi wu kap sáponga tán Ánutu yan káin kungga árán kungga yáung táitná hánám hálegga átuk. Wáina tángga árán du ámna kalabus kinan ting sat árená watá wa naránga átkiuráng. <sup>26</sup> Wáina naránga átnárát tu kánggáning maming táwi hánám bá tángga kalabus itná tátáya hulátangga sup hálánggá ya tená wa muwálan it kálu mungnganá yá hung yalingga kut kalabus wata kinan ámna sen dá káto iháng hárorená sen watá sohiuráng. <sup>27</sup> Waháranyon kalabus itná wa pinná tátá málám ruhánga átang tárutang káuk ku it kálu mungnganá yá ang re tángga árát tu ámna wakáinnan du erek hangga kung háleráng ingga naránga ku kápik táng málámbon topmeng kámut táin ingga táuk. <sup>28</sup> Wáina tán kangga Pol yá mantáuk, “Ko kayon sutya ma utnándalák! Nán kámuk há átamán!”

<sup>29</sup> Kalabus it wa pinná tátá málám kup tángga áwániráng ingga ámna kámá mantánga yánánga ku sopmuná ingmen it pahálá Pol káling Sailas yá átumálák wakáin pitánga yáungyáung pálak kung háram yándi hulá hára turingga háuk. <sup>30</sup> Wáina tángga ku kalabus it pinná tátá málám ámna yará wa yángotang kalabus itná sangga kep káin hangga ku yánuK, “Ámna hulá yará, rina táe ku Ánutu yá son nehinek?”

<sup>31</sup> Wáina yánán du watá inumálák, “Táwi Jesu wa naráng háting mátá ku Ánutu yá son kehinek, ka me tombongga itya káin átaráng watyot kámuk sáhinek.” <sup>32</sup> Wáina inánga ku Táwi yan me wa inumálák, me tombongngá itná káin átnándaráng watá áwát wa hányon yánumálák. <sup>33</sup> Yáungán wahára re ku yángot kung putun yándi wa yawon yámáng hálin du Pol káling Sailas yá málám me tombongngá wa kámuk umi kuháng yámumálák. <sup>34</sup> Wáina tángga ku kalabus pinná tátá watá yángotang kungga itná kinan hangga sungi singga yámuk. Málám me tombongngá yot kámuk hánám Ánutu ya naráng háting muráng wata ingga heronge hánám tángga áturáng.

<sup>35</sup> Hilápmá yon du me nanará ámna yá lap yáni hátetná suring yámát áwáng kalabus pinná tátá wa inuráng, “Me nanará ámna yá ing meráng, ‘Ámna yará wa yaling yámátá há yándi kundimálák,’ ” ingga inát tu <sup>36</sup> watá Pol inuk, “Me nanará ámna yá ing meráng, ‘Sailas yot sán du álo há sándi kundimálák,’ ing meráng wata ku pahán láláp hára kundimálák.”

<sup>37</sup> Wáina yánán du Pol yá lap yáni hátetná wa ing yánuK, “Nát tu Rom ámna, † náuta ku ámna me nanará yá hulá wa kándáng ma káená ku rahán hára wa náráhangga náhang kung kalabus kinan tiráng? Kulá kula ku kilak kon nápmat kukuya meráng me? Wa muná hánám! Yáni yon áwánga ku nángotang kep káin háineráng.”

<sup>38</sup> Wáina yánán lap yáni hátetná watá son kung me nanará ámna yánát watá Pol káling Sailas wawu Rom nan ingga naruráng hára wu pitáuráng. <sup>39</sup> Wáina tángga ku me nanará ámna yáni wu kung ukuro me yánánga ku yolopon yángot hang kep káin du it yáilá wa sangga kukuya yánuuráng. <sup>40</sup> Kulá Pol káling Sailas yándi wu kalabus wa sangga hangga ku Lidia yan it káin kung nuknuk yándi Táwi yan ámna náráwa wa kápánga me yánánga iháng káto tángga ku hangga há yándi kumálák.

## 17

### *Pol káling Sailas yá Tesalonaika káin átumálák*

<sup>1</sup> Pol káling Sailas yándi wu kumálák watá kungga it táwi Amfipolis wahára kung hiuMálák ngáyá son sangga kungga it táwi Apolonia káin kung hiuMálák ngáyá wa sangga ku son it yáilá Tesalonaika káin kung hiuMálák, wakáin du Juda yan miti itná káman átnándak. <sup>2</sup> Kulá wahára ku Pol yá málámbá tángngátak wáina ku kung Sabat kaláhu wawu Juda yot miti itná wata kinan hangga Ánutu yan me wa wáina wáina ingga yánánga inán kanán táuráng. <sup>3</sup> Málám Ánutu yan me wata hulá wa yánánga ku miuk, “Ánutu yá ámna náráwa son iháháya miuk ámna wawu márappmá sungga kungga kámutang son tátárut ta mená wa isutang wáina há táuk. Iná Jesu wawu Ánutu yá ámna náráwa son iháháya miuk ngáyá me

† 16:37: Pol yá nát tu Rom ámna ing miuk wawu hulá ing wata tángga, Rom ámna hánámá hánámá ma ráraháya me káto mená wata ingga miuk.

pingnganán sánángoet wa,” ingga yánuk. <sup>4</sup> Wáina yánán du Juda áturáng waháranan kámá yá wa naránnga pahán yáni hurik tángga Pol káling Sailas hára sengsáráp táuráng. Kulá rám waháranon Grik nan ámma náráwa táup táwi yon Ánutu ya naráng háting mená\* watyot náráwa kut yáni árená wáinanyon dá áwáng sengsáráp táuráng.

<sup>5</sup> Iná Juda yáni wu kápuráng gu ámma náráwa táup hánám watá áwáng sengsáráp tát kápánnga ku pahán suksuk naránnga ámma wáik maket komená káin átnándaráng watyot ámma náráwa kámá yot urum tángga yáni kat táup hálendu pahán yáni seng tátárut tángga kungga kun tátáya menman tángga áturáng. Yáni wu Jeson dán it káin kung Pol káling Sailas kápánnga iháng áwáng ámma urum táwi wa yámáin ingga kung it wata kálu mungnganá káting murák táuráng. <sup>6</sup> Yáni wu wáina tángga ma kápánnga ku Jeson yot Jesu yan tombong ámma nukngá wa ket ihángga háting hirat kungkung tángtáng it yáilá watán ámma hulá hulá yan káin kuráng, Kung hengga ku ing mantáuráng, “Ámma yará wawu itná itná káin márampá hulá hulá táwi tángngátamállák watá rám ore nahára ku áwáng it náni yáilá náta kinan átkoemálák. <sup>7</sup> Hulátíngga áwáng hen du Jeson dá yángot kung itná kinan tiuk. Ámma tombong watá ku Sisa† yan meng rákit mená wa yalingga ku king nukngá átak wata kutná ku Jesu ingga menggoeráng.” <sup>8</sup> Wáina yánát it yáilá watán ámma hulá hulá me ámma náráwa urum watá kámuk me wa naruráng hára wu hárámutang menman tángga kuráng. <sup>9</sup> Yáni wu wáina tángga ku Jeson yot nukngá ihángga áwuráng wa yánát sup tit tu yápmat kuráng.

*Pol káling Sailas yá Beria káin átumálák*

<sup>10</sup> Kulá it tá yongin du ámma Táwi yan pingnga áturáng watá Pol káling Sailas suring yámát it táwi Beria káin kumálák. Wakáin kung hengga ku yándi wu Juda yan miti itná káin kumálák. <sup>11</sup> Beria káin Juda ámma náráwa wawu álo kámá hánám wáina hálendu ket tárák yáni wawu Tesalonaika ámma náráwa iháng hátek, wáina hálendu Pol yan me wa pahán yáni yot kikiná hánám naránnga rámá rámá wu Pol yá menggiuk wa pálipuk me rina ingga kakaya Ánutu yan me papia kinan káin sáningga naránggiuráng. <sup>12</sup> Kulá rám ore wahára ku Juda ámma náráwa táup hánám, hang Grik náráwa kut yáni pálak táup pon, me Grik ámma táup pon watá Jesu ya naráng háting muráng.

<sup>13</sup> Juda ámma Tesalonaika káin átnándaráng watá Pol ku Beria káin Ánutu yan me yánáng tolinggoek ingga met naruráng hára wu wakáin hányon kung ámma náráwa pahán yáni iháng yakyawák tát tu Pol ya kuk naráng mángga áturáng. <sup>14</sup> Wáina tát tu Jesu yan tombong wakáin watá Pol suring mát it káman táp tangtang káin kilang tángga kukuya ámma kámá yot kuráng, iná Sailas káling Timoti yá ku Beria káin há átumálák. <sup>15</sup> Ámma kámá Pol engotang kuráng watá ku engot kung kilang káman hára árángga kungga it yáilá Atens káin kung hiuráng. Kung hengga sangga son kuinán tát tu Pol yá Sailas káling Timoti yá sopmuná hánám áwinemálák ingga yánán du Beria káin son kuráng.

*Pol yá Atens káin átuk*

<sup>16</sup> Pol málám Atens káin hálang yámánnga átuk wahára wu pahálá yá táup hánám wáik háliuk, náuta it yáilá wata kinan du ánutu kusak iháng tolená watá táup hánám arát wata. <sup>17</sup> Wáina hálendu málám kung Juda yan miti itná káin Juda me Grik Ánutu ya naráng háting mená wa Táwi yan me wa wáina wáina ingga yánánga inán kanán tánggiuráng, me rámá rámá kung maket káin áwánggiuráng wa wáinanyon yánánga inán kanán tánggiuráng. <sup>18</sup> Nanará ámma urum yará kut yándi Epikurian me Stoik watá áwáng Pol yot menmen tángga ku waháranan kámá yá ing miuráng, “Mená lamlam me táená náwu rina mein ingga me tánggoek?” wáina met waháranan kámá yá ku ing miuráng, “It kámá yan ánutu watán kálu háam átang menggoek,” wáina ingga miuráng wawu náuta Pol yá Jesu yan me pingnga álosim watyot Jesu yá kámutang tárutuk ngáya yánánga átninggiuk wata. <sup>19</sup> Kulá yáni wu Pol engotang kaunsol yan urum kutná Areopagus hára kungga ku ing ináng suliuráng, “Me hurápmá mengga nánáng tolinggoelák wata hulá wa álo nánángim me rina?” <sup>20</sup> Kák ku me hurápmá kámá nán káráman náni káin metá naránggoemán, wata ku me wata hulá ya kándáng nánátá naránin,” ingga wáina ináng suliuráng. <sup>21</sup> Ámma náráwa Atens it márúma me it kámá káinnan áwáng wahára árená watá hánámá yáni átang me hurápmá rina narángngátaráng wata re meme tángga átnándaráng.

<sup>22</sup> Wáina met naránnga Pol málám Areopagus káin urum tángga áturáng hára wa tárutang miuk, “Atens ámma, no sáhet tu kálu hulá hulá kálu tirik tárák sáni wu ánutu kámá kámá yánáng sákngingi wata tárákná yá sándán káin táwi hánám árán kanggoet. <sup>23</sup> No átningga kutná kutná yánáng sákningngátaráng wahára kándáng kápánnga áwánggoet wahára wu

\* **17:4:** Grik ámma náráwa kámá Ánutu ya re naráng háting mángngátaráng, iná Jesu wu ma naráng máráng. Wáina wata ku Pol yá Jesu yan pingnga yánán naránnga pahán hurik tángga Jesu ya naráng háting muráng. † **17:7:** Kut Sisa wawu ámma nange kutná muná, ináku me King wáinanyon du Rom me kálu.

tingnknak káman árán no kolek káman wahára uyená káut tu ing, ‘Tingnknak náwu ánutu ma naráng mángmán watán tingnknak,’ wáina uyená wa sánginega káut. Kulá kula ku no Ánutu ma naráng mená hánám ináng sákngeingngátaráng watán me hiták hánám ing sánindet.

<sup>24</sup> “Ánutu ni alek me káwak me kutná kutná wata ketnán iháng tunggap táuk wawu alek me káwak kán Táwi. Wáina wata ku ánutu yan it káungá ku ámma yá ket tá táená hára ma átnándak. <sup>25</sup> Iná wawu náut kámá káman da kesák tán ámma ket tá hálang imámáyan muná, náuta ámma náráwa átkuku me iruk uyiyi me kutná kutná átaráng wawu málámbáyon námángngátak. <sup>26</sup> Hulátingga ku ámma káman dá re árán waháranan du Táwi yá tán ámma náráwa tombong kámuk hánám watá tunggafuráng. Málámbáyon iháng káwak wakáin wakáin erek ting hálingga ku rám wahára ku hálang yáni tin tárutneráng me hálang yáni han háineráng ingga rám wa ting yámánga ku ále ore wahára wahára átnéráng ingga tawon ting yámámá táuk. <sup>27</sup> Ánutu yá wáina táuk wawu ámma náráwa kámá yá málámá suling kung kang tunggap tátáya táineráng me kálan suling kung tánggagaya táineráng, enendu málám bu nán káman káman nápmang kung mulangán káin ma árak. <sup>28</sup> ‘Ma átnát háranan watá pálipuk há átang iháng kongkong tánga átkoemán watá hulá ku málám re.’ Sánin nanará ámma kámá yá ing há miuráng wáina, ‘Nándu málám háranan tunggafená.’

<sup>29</sup> “Kulá nándu Ánutu háranan tunggafená wata ku nánda málám wawu gol, silva me sup ina ingga ma narindamán, me málám wawu ámma nangge yá náut kámá utniná yánin nanará isutang táng tolená ina ingga ma narindamán. <sup>30</sup> Uláp pu ámma yá Ánutu wáina átak ingga ma naráng mená átang gu ket tarák rina rina tánggiuráng wata mená ma tánggiuk. Iná inggálu wawu itná itná káin ámma náráwa átaráng watá pahán hurik há hánám táineráng ingga menggoek. <sup>31</sup> Málámbá rám káman há táng tunggap táuk wahára ku ámma há táng tunggap táuk watá kálu kándáng wahára re ámma náráwa kámuk hánám iháng horeinek. Ánutu málámbá ámma wa há kámujuk háranan táng tárut tán nánda kangga ku Ánutu yá ámma wawu yáup wa tátáya imuk ingga nanaráya wáina táuk.”

<sup>32</sup> Wáina yánán me kámurená háranan dá tárutuk wa naruráng hára wu kámá yá ináng hikhilek tát kámá yá ku me wata hulá rám nukngá son metá narinemán ingga inuráng. <sup>33</sup> Wáina inát tu Pol yá kaunsol wa yápmangga hangga háná kuk. <sup>34</sup> Urum wahára ku ámma náráwa kámá yá Pol yá me miuk wa naránga Pol hára sengsaráp tánga Jesu yá naráng háting muráng. Ámma káman kutná ku Dionisius ámma wawu kaunsol urum waháranan, hang náráwa káman kutná Damaris watyot ámma náráwa kámá hányon watá Jesu yan tombong háliuráng.

## 18

### *Pol yá Korin káin átuk*

<sup>1</sup> Máriya ku Pol yá Athens sangga it yáilá Korin káin kuk. <sup>2</sup> Pol málám wakáin kung Juda ámma káman kutná Akuila watyot áwáná kutná Prisila wa kápuk. Ámma watán it hulá ku Pontus provins wakáinnan. Huphuráp sim Rom bán king Klaudius yá Juda sán kámuk hánám it yáilá Rom sangga há sáni kung hálineráng ingga yánuk, wata ku Akuila káling Prisila yá káwak Itali sangga áwáng Korin hára átnándamálák. <sup>3</sup> Kulá Pol wu it tátáyan sel rákákare wawu há narek. Ámma náráwa yará wawu wáinanyon wáina hálendu Pol yá kung watyot átang yáup wa tánga átnándaráng. <sup>4</sup> Rámá rámá Sabat hára wu Juda yan miti itná káin kung Juda me Grik pahán yáni seng tárut tán du Jesu ya naráng háting mámáya ingga Táwi yan me yánáng tolinggiuk.

<sup>5</sup> Kulá Sailas káling Timoti yá Masedonia provins káin átang áwán du Pol yá son rámá rámá Táwi yan me wa ámma náráwa yánánga átkiuk. Málám Juda wa ing yánánggiuk, “Jesu wawu Ánutu yá ámma náráwaná son iháháya suring mán áwuk.” <sup>6</sup> Wáina yánánga árán Juda yá watán me wa nanaráya táng taktak tánga táng káyan tánga ináng kekkék tát tu málám lapmá káin sinsin wa irung hirarán han du ing yánuk, “Iná sándá muná kuineráng wawu sáni hára re átak, wata kátu yá nák ma nehindák. Rám kula hulátingga ku sápmangga kungga ámma náráwa tombong kámá káinnan watán káin kuinet.”

<sup>7</sup> Wáina yánánga ku Pol málám miti itná wa sangga ámma káman kutná Titius Jastus watán it tá miti itná tangtang árán du wahára kuk. Ámma wawu Ánutu ináng sákngeingngátak. <sup>8</sup> Ámma káman kutná Krispus wawu Juda yan miti itná watán ámma yáilá. Málám me itná káin ámma náráwa árená watyot Táwi ya naráng háting muráng. Hang Korin nan táup pá yon Pol yan me naránga Táwi ya naráng háting mánga umi kuhuráng.

<sup>9</sup> Rám káman du yáungán ára hára ina Táwi yá Pol ing inuk, “Ma pitáindalák. Táwi yan me há re mengga kungga átnelák, me ma nángnángingga átnándalák. <sup>10</sup> Ná k ku kákkot átat. Káman dá áwáng kák keháng lem ma táindák, náuta nákkán ámma náráwa táup hánám watá it yáilá

nahára átaráng.”<sup>11</sup> Wáina inán du Pol málám wahára yara káman yap 6 wáina átang Ánutu yan me wa yánáng tolingga átuk.

<sup>12</sup> Kulá ámma kutná Galio watá Akaiia provins watán kawana hálengga átuk hára wu Juda yá káman hálengga Pol táng káyam tángga ku táng kung me hára titiya kawana Galio yan káin kuráng. <sup>13</sup> Kung wakáin du ing miuráng, “Ámma nátá ku meng rákit me yá rina mek wa sangga ku Ánutu ya tárak kámá kálu ináng sáknngingiya ámma náráwa yánánggoek.”

<sup>14</sup> Wáina met Pol yá me mein ingga táuk waháranon du Galio yá Juda yánuk, “Juda sándá ámma nátá Rom bán me páilák hitik tán me mápápmá táwi kámá tán wata met hálen wawu no sándán me narinet. <sup>15</sup> Iná ámma ná engotang áweráng wawu ing wata, Juda sánin me, hang kut kámá sánin miti kinan mená, hang sánin meng rákit me wata menmen ná watyot tángngátaráng, wata ku no yáilá átang sándán me ná ma narindát. Sáni re átang gu wa táng tolineráng.” <sup>16</sup> Wáina yánángga ku me nanará komená sangga há sáni kuniráng ingga yánángga yásutnárán, <sup>17</sup> waháranon Korin ámma yá ámma kutná Sostenes Juda yan miti itná yan ámma hulá wa me nanará kapme hára káto tángga uturáng. Wáina tát kápuk enendu Galio yá wata uráknká kámá ma narená yolopmá yon átang kápángga átuk.

### *Prisila, Akuila hang Apolos*

<sup>18</sup> Pol málám rám táwi sim bon Korin káin átang sangga ku Táwi yan ámma náráwa wakáin wa yápmangga kuk. Kulá Siria provins ya kukuya tángga ku Prisila káling Akuila yot kung it táwi Senkria káin kilang hára árángga kunin ingga kuráng. Kung wahára átang gu Pol yá Ánutu yan káin me káto káman miuk ngáya wata ingga yáilá rommá san átnándak wa maruk. Wáina tát tu kilang hára árángga ku kuk. <sup>19</sup> Kulá it yáila Efesus káin kung henga ku Prisila káling Akuila yápmangga málám re kung Juda yan miti itná kinan hangga Táwi yan me yánángga inán kanán táuráng. <sup>20</sup> Wáina tán du watá nányot rám kimo átang kuinelák ingga inuráng, enendu Pol yá muná ingga yánuk. <sup>21</sup> Málám kuin ingga ku yánuk, “Ánutu yá álo ingga men hálendu kungga son áwinet.” Wáina yánángga ku kilang hára árángga Efesus sangga kuk. <sup>22</sup> Málám it yáilá Sisaria káin kung henga ku árángga Jerusalem káin kung Táwi yan ámma náráwa wakáin wa pahán láláp mená yánángga sangga ku Antiok káin kung háuk.

<sup>23</sup> Pol yá kung Antiok káin rám hásak sim átang sangga ku ále Galesia yot Frigia kinan it wahára wahára kungkung tángga Táwi yan ámma náráwa wa iháng káto tángga kuk.

<sup>24</sup> Rám ore waháranon Juda ámma káman kutná Apolos wawu itná hulá ku it yáilá Aleksandria waháranan watá ku Efesus káin kuk. Ámma wawu nanarána álosim hang Ánutu yan me wa kándáng hánám narek. <sup>25</sup> Ámma wawu Táwi yan kálu wa kándáng hánám ináng tolená, iná ámma wawu kámá yánáng totoliya kikiná narángga ku Jesu yá rina táuk wa rewe kándáng hánám yánángngatak, enendu Jon dá umi yá kuháng yámuk wa rewe narek.\* <sup>26</sup> Apolos málám ma pitáená kung Juda yan miti itná káin wáina ingga yánánggiuk. Rám káman Prisila káling Akuila yá wáina men narángga ku mantáng mán it yándi káin kun Ánutu yan kálu ku wáina ingga kátu kánkáman ma narak wa kándáng hánám ináng toliumálák.

<sup>27</sup> Kulá Apolos yá Akaiia provins káin kuin ingga táuk hára wu Táwi yan ámma náráwa watá táng káto tángga Táwi yan ámma náráwa Akaiia káin arená wata koleim ing uyung yámuráng, “Ámma wa heronge mená inángga kándáng pinná táineráng.” Apolos málám wakáin kuk watá kung ámma náráwa Ánutu yá urák yáni narángga háláng yámán málámba naráng háting muráng wa táwi hánám háláng yámánggiuk. <sup>28</sup> Málám hahatingga átang rahán hára Juda yá me kandák rina menggiuráng wa káting hang tingting tánggiuk. Ánutu yan me papia káin uyená wa yánáng tolin me watá pálipuk hánám ámma náráwa son iháhá wawu Jesu ingga hiták yálenggiuk.

## 19

### *Pol yá Efesus káin átuk*

<sup>1</sup> Apolos yá Korin káin átuk hára wu Pol yá ále yáilá kálu háram kálu re átnngan kungga it yáilá Efesus káin kung hiuk. Málám Efesus káin kungga wakáin ámma Ánutu yan pingnga háléná wa kápángga ku <sup>2</sup> ing yánáng suliuik, “Rám sándá Jesu ya naráng háting muráng wahára Iruk Káungá kámá táuráng me muná?”

Wáina yánáng sulin watá inuráng, “Muná, nándu Iruk Káungá wáina átak ingga ma narángngátamán.”

<sup>3</sup> Wáina inát tu Pol yá yánuk, “Iná umi wu rina kuhuráng?” ingga yánán du watá inuráng, “Jon dá umi kukuháya miuk wáina kuháng námuráng.”

\* **18:25:** Jon dá umi kuháng yámuk wata hulá ku pahán hurik táená wata táráknká, iná Jesu yá umi kuháng yámámáya miuk wata hulá ku málámba naráng háting mená wata táráknká. Wawu tárak káman re muná. Kámá kámá.

<sup>4</sup> Wáina inát tu Pol yá yánuk, “Jon dá umi kukuháya miuk wawu pahán hurik tátáyan da kukuhá. Ináku ámna náráwa yá ámna nukngá Jon torong káin áwinek wata naráng háting mámáya yánuk wawu Jesu.” <sup>5</sup> Pol yá wáina yánán naránga ku Táwi Jesu kutná hára umi kuhuráng. <sup>6</sup> Kulá Pol yá ketná yá yáin yáni hára usáng hang tingga sáponga táuk waháranon Iruk Káungá watá áwáng ep ihán du me hulá hulá me tánga ku profet me miuráng. <sup>7</sup> Ámna wata sale yáni ku 12 hám wáina.

<sup>8</sup> Kulá yap kaláhu wata kinan du Pol yá wakáin ma pitáená káto hálengga átang Juda yan miti itná kinan hangga me pingnga álosim wa yánánga átkiuk. Ánutu yan átkuku wawu wáina ingga yánánga inán kanán tánga Táwi yan me hulá ku wáina wáina ingga pahán yáni seng tárut tánggiuk. <sup>9</sup> Iná kámá yá ku pahán yáni káto hánám hálendu pálipuk ingga ma naránggiuráng, ináku rahán táwi hára ku Táwi isutsut tán kálu wata wu kandák ingga menggiuráng. Wáina tát tu Pol yá wa yápmangga ni ámna náráwa Táwi ya naráng háting mená wa rewe ihánga me rina wa mengga inán kanán tánga nanaráya wu rámá rámá ámna káman kutná Tiranus watán it káman nanará yánáng totolijan wakáin kunggiuráng. <sup>10</sup> Yara yará wata kinan du wáina re tánga kungga árát tu Juda me Grik ámna náráwa Esia provins kinan árená watá kámuk hánám Táwi yan me wa naráng háliuráng.

<sup>11</sup> Ánutu yá Pol háláng imán tárák hulá kámá kámá tátáwi hánám wáina tánggiuk. <sup>12</sup> Ámna náráwa yá lap me angkesip yáni iháng kung Pol sutná hára tángganga ku wa iháng kung ilalák mara usáng yámát tu ilalák yáni yá álo hálenggiuk me iruk wáik ká ep ihánga árená watá yápmangga kunggiuráng.

<sup>13</sup> Kulá Juda kámá yá ku sup yáupmá ya iruk wáik yásutang átninggiuráng. Tárák tánga kakaya Táwi Jesu kutná hára mengga wahára ámna náráwa yan káin iruk wáik yásusut ta tánga ku ing menggiuráng, “Jesu Pol yá menggoek wata kutná hára, no ing kanin, áwáng kep káin hang.” <sup>14</sup> Kulá Juda yan pris táwi yáni káman kutná Skewa wata nángánange ámnaná 7 watá ku kálu wáinanon isutkiuráng. <sup>15</sup> Rám káman wáina tángngárát tu iruk wáik káman dá ing yánuk, “Jesu wawu há naráng met, me Pol wawu há naráng met, iná sán du ren?” <sup>16</sup> Wáina yánánga ku ámna iruk wáik ká ep táená watá yáni ya ketnán hiring hitangga áréngga kámá hára kungkung tánga háláng yáni tánga hangga táup hánám ráhán du muláng re sip hanghaling it wa sanga hururung re há yáni kuráng.

<sup>17</sup> Kulá pingnga wa Juda me Grik Efesus hára árená watá naruráng hára wu pikpiták táwi hánám tánga ku Táwi Jesu kutná wa meng tárut tánga áturáng. <sup>18</sup> Ámna náráwa táup hánám Jesu ya naráng háting muráng watá áwánga ku átkuku náni kandák ku wáina wáina ingga hiták hánám meng tunggapa táuráng. <sup>19</sup> Ámna náráwa sárum yáni pálak táup sim bá yon kutná kutná ya yambo yáni táená, me tará hulá hulá táená, me yáikuram kandák kálu táená wata mená papia hára uyená wa iháng áwáng rahán hára káráp siuráng. Iná papia wata yumnak yáni wu sup táulá silva” 50,000 dá yuyuwáyan tárák wáina. <sup>20</sup> Kálu wa táuráng wahára kungga ku Táwi yan me watá hálángngá pálak hánám ámna náráwa yan káin kung hilák tánga kuk ngáyá emá re kunggatuk.

<sup>21</sup> Wáina tunggafen hangga sanga ku Pol málám Masedonia yot Akaia provins kálu kungga Jerusalem káin kukuya naruk. Wáina naránga ku Jerusalem káin kungga sanga ku it yáilá Rom káin hányon kuinet ingga naruk. <sup>22</sup> Málám háláng imámá ámna yará Timoti káling Erastus suring yámán watá kálak Masedonia káin kun du málám bu Esia provins káin rám hasák sim átuk.

### *Efesus káin kuk táwi tánga timtáum táwi hánám bá tunggafiuk*

<sup>23</sup> Rám ore wahára ku ámna kámá yá Táwi isutsut tán kálu wata ingga kámkáyam tánga wata mená táwi hánám táuráng. <sup>24</sup> Ámna káman kutná Demitrius wawu sup yáupmá ku silva yá kutná kutná iháng tolingngátak. Wata kinan yon yáupmá tángngátak wawu ánutu náráwa kutná Atemis watán miti itná wata tárákná wa ina isikikimo silva yá iháng tolingngátak. Ámna kámá yá wáinanon iháng tolit tu Demitrius yá kálu ná iháng toling yámán yuwát tu sup táwi hánám ihánggiuráng. <sup>25</sup> Kulá Demitrius málám ámna wáina iháng tolinggiuráng watyot ámna kámá wáinanon Atemis yan kutná kutná wata tárákná iháng tolinggiuráng wa men áwát tu yánuk, “Ámna nuknukna, ing há nareráng wa, yáup wa tángngátamán wata supmá álo kámá hánám wa uyingngátamán. <sup>26</sup> Enendu ámna Pol watá ámna náráwa táup hánám wa iháng uyin kun du ing yánángoek, ánutu ámna ket yáni yá iháng tolená wawu kusák ingga yánánga iháng yakyawák tánggoek, Efesus kinan re muná ináku Esia provins kinan kámuk. <sup>27</sup> Wata wáina tán du nándá sup yáupmá tátá wata kutná yá hahaná háleiwon, me ánutu náráwa kutná árená hánám Atemis watán miti itná wa kat ále hánám háleiwon. Ámna náráwa

\* 19:19: Sup silva táulá káman da hálángngá wu ámna káman dá káe káman hára yáup tánga sup rina ihánggim wáina.

Esia provins re muná ináku káwak ketná kámuk watá Artemis ináng sákngingngátaráng, enendu Pol yan me watá tán du Artemis kutná watá ále hánám háleinek.”

<sup>28</sup> Me wa wáina yánán naránnga ku ámma watá pahán suksuk hánám naránnga “Efesus yan ánutu Artemis wawu kutná árená hánám!” ingga mangmantáng kuráng. <sup>29</sup> Wahára re it yáilá hára árená watá kámuk káman háleangga menman táwi tángga kung Pol nuknukngá ámma yará Masedonia nan Gaius káling Aristakus wa ket ihánnga iháng yingngatang urum komená káin kuráng. <sup>30</sup> Wáina tát Pol málám urum wakáin kuin ingga tángngarán Jesu yan tombong háranan dá oletná mat tu há átuk. <sup>31</sup> Provins watán ámma yáilá kámá Pol yanuknukngá hálendu watá urum komená káin wa ma hánám áwindalák ingga me hányon sat kung muk.

<sup>32</sup> Ámma náráwa urum táwi watá naráng yakyawák tángga kámá yá kámá kámá menman tángga kunggiuráng. Táup hánám watá ku náuta kung átamán ingga ma naráng rákit táuráng. <sup>33</sup> Juda yá ku kuk wata hulá ku wáina wáina ingga yánáng ingga ámma káman kutná Aleksenda wa seng isurát kung máta ya átuk. Wáina árán du ámma kámá urum kinan áturáng watá wáina wáina meng ingga inánggaturáng, enendu watá yolop árát no me mein ingga ket tárák táng yámuk. <sup>34</sup> Enendu ámma wawu Juda ingga há kangga ku wata watán me ma naruráng, ináku milun káman hálen sonson ing mantánnga re árát kungga aua yará háliuk, “Efesus yan ánutu Artemis wawu kutná árená hánám!”

<sup>35</sup> Wáina tángga árát it yáilá watán kolek uyiyi ámma watá áwáng yolop átniráng ingga yánánnga ku ing yánuk, “Efesus ámma, káwakngá káwakngá kámuk hánám bá ing há nareráng, ánutu náráwa kutná árená hánám Artemis watán it káungá wawu Efesus ámma náráwa nándá re pinná tángngátamán ingga há nareráng, hang sup káungá alek kálu háuk watyot pinná tángngátamán ingga hányon nareráng. <sup>36</sup> Wata ku káman dá me náta kusák ingga ma menggim. Sándá yolop átneráng. Rina kámá sopmuná ma táindaráng. <sup>37</sup> Sándá ámma yará ná ihánnga áweráng wawu watá náut kámá kámá miti itná kinan káinnan manek ma ihánnga áwángngátamálák me nándán ánutu náráwa Artemis wata rina kámá ma mengga áwángngátamálák. <sup>38</sup> Iná Demitrius yot yáup káman yáni tángngátaráng watá ámma kámá yan káin me yá átak hálen wawu me nanará ámma rahán yáni hára átang ku wahára me yáni wa met me nanará wata horengga narineráng. <sup>39</sup> Iná sándán káin me nukngá kámá átak hálendu máriya urum táwi tángga ku urum hára me wa táng tolineráng. <sup>40</sup> Wáina wata ku ing narinemán, iná kapman dán ámma yáilá yá kula nándá rina táemán wa nareráng, háin ináku márampá táwi táng tunggang táeráng ingga náháng me hára tinggalát. Hulá kámá muná hánámá hánám wa táemán, wata nánáng sulit tu rina menggatnem?” <sup>41</sup> Ámma watá me wa wáina yánáng hálingga sangga ku yánán há yáni kuráng.

## 20

### *Pol yá Masedonia provins yot káwak Grik káin kuk*

<sup>1</sup> Ámma náráwa yá ohok menman tángga áturáng watá sálíngkin du Pol yá me san Jesu yan tombong ingga áturáng wata kun áwáng árát tu me yánánnga iháng káto tángga sangga ku Masedonia provins káin kuindet ingga yánánnga ku kuk. <sup>2</sup> Málám Masedonia kinan átningga me yánánnga iháng káto tángtáng kuk. Wáina táng hálingga ku Masedonia sangga káwak Grik káin kung hiuk. <sup>3</sup> Káwak Grik káin kung yap kaláhu átang sangga ku kilang hára árángga Siria provins káin kuin ingga naruk wahára ku Juda yá utkámud tátáya me hárotang átaráng ingga met naránnga sangga ku málám son Masedonia kálu kukuya naráng hátiuk. <sup>4</sup> Ámma 7 watá Pol yot kuráng wata kut yáni ku ná, Pirus nanggená Sopata wawu it táwi Beria nan, Aristakus káling Sekundus wawu it yáilá Tesalonaika nan, Gaius it yáilá Debe nan, Tikikus káling Trofimus Esia provins nan hang Timoti watá watyot kuráng. <sup>5</sup> Watyot kungga ku ámma watá kálak kuráng ngáyá kung it táwi Troas káin háleng námánnga átkiuráng. <sup>6</sup> Iná nándu rám táwi Másáng Yisná Muná Néená wa it yáilá Filipai káin kangga sangga ku kilang hára kungga árátne rám 5 hálen Troas káin kung hengga ku kápánnga rám 7 wahára átumán.

### *Pol yá Yutikus yá há kámurán táng tárut táuk*

<sup>7</sup> Kulá sonda ore hulátitiná hára ku Táwi sip yánámá nanaya urum táumán. Wahára ku Pol yá me emá re nánánnga árán kungga yáung táitná háliuk, náuta tembát tu há kuinet ingga wata wáina táuk. <sup>8</sup> Kulá it pahálá torong hánám káin nándá átumán wahára wu lam táup hánám watá rang háleangga áturáng. <sup>9</sup> Wahára wu nangge máto káman kutná Yutikus wawu windua hára putung átang ku Pol yá rám hasák me emá re nánánnga árán du káramatingga átang rapmung gá sán du hundup hánám há ruhuk. Wáina ruhánnga átang gu sohing hang káwak káin kátin hangga tángga káumán du há kámurená, náuta it pahálá yará wata torong káin kaláhuná káin átang háuk wata. <sup>10</sup> Wáina hálendu Pol málám háuk watá hang ámma máto wata torong hára pándák hangga poláng mángga átang gu ámma náráwa yánuk, “Ma pitáindaráng, ma kámurak, há átak.” <sup>11</sup> Ingga wáina yánán du son árángga it kinan kungga



Táwi yan sip yánumá natne ku Pol yá me nánánnga árán kungga it tá háin du yápmangga kuk. <sup>12</sup> Iná ámna náráwa yá ku ámna máto wawu son tárutang há árán pahán yáni álosim nangnaráng engotang it yáni ya kuráng.

*Pol yá Efesus yan miti itná yan ámna yáilá me pukon yánánnga yápmáuk*

<sup>13</sup> Kulá Pol málámbá háram kálu it táwi Asos káin kukuya naránnga ku sándá kálak kilang hára kungga it wakáin kuineráng ngáyá ku wakáin átang nák ka hálang namánnga átneráng ingga nánuk. Pol yá nánuk wáina há kungga sangga ku hálang mángga árátne <sup>14</sup> Pol yá áwáng hen Asos káin kankan tángga kámuk náni kilang hára áránnga it táwi Mitilini káin kumán. <sup>15</sup> Tembátnáya ku wahára átang kungga ailan Kios wata tangtang kálu kumán. Wata tembátnáya ku kungga ailan Samos wata tangtang kálu kumán, iná wata tembátnáya ku kungga it táwi Miletus káin kumán. <sup>16</sup> Pol málám Esia provins káin áre rám há ma sálíknngindak, ináku sopmuná kungga rám táwi Iruk ká Háuk wawu Jerusalem káin káinet ingga nangnaráng átkuk, wata ku it yáilá Efesus táng hátingga kukuya naruk.

<sup>17</sup> Wáina naránnga ku Miletus káin átang gu Pol yá áwánnga málám kakaya me san Efesus miti itná yan ámna yáilá yan káin kung yámuk. <sup>18</sup> Ámna yáilá watá Pol yan káin áwáng het tu ing yánuk, “Esia provins kinan hulátingga hánám áwáng hiut waháranon átang áwánnga sápmáut hára, no sányot átang tárák rina tángga átut wawu sáni há naréráng wa. <sup>19</sup> Rám máro hánám Juda yá neháng hang tingga nutkámút tátáya me hárotnándaráng. Wáina tát no pahán márapmá táwi hánám tángga kut káyawát tángngátat, enendu naya kutná tángga hangga Táwi yan yáup tángga átningngátat. <sup>20</sup> Ing há naréráng wa, no sán hálang sásámáya ma pitáená Táwi yan me menggiut, rahán hára me it sáni kinan káman káman sánánnga kunggiut. <sup>21</sup> No hiták Juda me Grik ámna náráwa ing yánut, pahán hurik tángga Ánutu yan káin kungga ku Táwi náni Jesu naráng háting mineráng.

<sup>22</sup> “Iná rám ore nahára wu Iruk ká neháng tiyap táek, wata ku Jerusalem káin há kuinet. Wakáin koe nák sutná hára rina tunggafeinek wawu ma narát. <sup>23</sup> Ing rewe ku há naret, it yáilá kámuk wakáin kung hengngátat hára wu Iruk Káungá yá kalabus me márapmá táwi watá hálang kamánnga átak ingga nanánngátak. <sup>24</sup> Enendu na ku ing naránngoet, nangán átnát wata nare hánámá hálanggoek, ináku Táwi Jesu yá yáup rina namuk wa tángga koe kungga tarákná hára sálíknnginek. Yáup rina namuk wawu me pingnga álosim wa ing yánánngoet, Ánutu yá ukuro naráng námánngátak ingga yánánngoet wa.

<sup>25</sup> “Kulá no ing há naret, huphuráp no orek sáni hára átang Ánutu yan átkuku wata mená sánánngiut, enendu máriya ku sándá son inamna ma nahindaráng. <sup>26-27</sup> Wáina wata ku hiták ing sánin, no Ánutu yan hulá wa kátu táng kilak tingga ma sánut, wata ku orek sáni hára ámna káman dá Ánutu ya ma naráng háting mindák hálen wawu wata hulá ku nák ma háleindák. <sup>28</sup> Sándá ku sáni me Ánutu yan ámna náráwa kámuk wata kándáng hálang rákit tángga átneráng. Ámna náráwa wawu Nanggená sipmá yá há iháng yuwánnga ihuk. Iná Iruk Káungá yá ku sipsip wa pin yáni tátáya sán há sáháng tunggap táuk. <sup>29</sup> Ing há naret, no sápmangga kuinet wahára wu ámna yá ang páyom wáik ina watá áwáng Ánutu yan sipsip sán wa sáháng wáik táineráng. <sup>30</sup> Sánin tombong waháranan dá yon tárutang gu me kusák wa mengga Ánutu yan ámna náráwa wa iháng uyin yásutang kuineráng. <sup>31</sup> Wata ku kándáng hálang rákit tángga átneráng. Yara kaláhu wata kinan rámá rámá káen me yáungán rahánna uminá kinan re átang sánáng rákit tángga átut wata naráng hátingeráng.

<sup>32</sup> “Kulá sáháng Ánutu ketná hára te ku málámbán me yá ukuro naráng sáminek ingga mek watá ku pin sáni táinek. Me watá yon du sáháng káto tángga Ánutu yá náut málámbán ámna náráwa yámámáya tiyawingga san átak wa sán hányon sáminek. <sup>33</sup> No ámna káman dán hára silva me gol me lap kámá ma kápáng narut. <sup>34</sup> Sáni ing há naréráng wa, no naya ketna náta yon du na hálang imánngiut me niyá nákkot átkiuráng wa hálang yámánngiut. <sup>35</sup> No rina rina tánggiut wawu sándá ing tángguineráng ingga wata sálenggiut, sándá yáup hálang wáinanon há tángga ku ámna náráwa ukuro hálang yáni muná wa hálang yámámáya tángguineráng. Táwi Jesu yan me ing wa naráng hátingeráng, ‘Ámna niyá kutná kutná yáminek watán heronge yá ámna niyá kutná kutná ihinek watán heronge wa táng hátek.’ ”

<sup>36</sup> Pol málám me wa yánánnga sangga ku ámna yáilá watyot tun yáni hára imánngatang sáponga táuráng. <sup>37</sup> Sáponga tát sálin du kámuk yáni kutkáyawát tángga poláng mángga tánggatang kang kumiuráng. <sup>38</sup> Táup hánám ukuro táuráng wawu inamna son ma káindaráng ingga yánuk wata. Wáina tángga ku kámuk ingmen engot kung kilang káin sáuráng.

## 21

*Pol yá Jerusalem káin kuk*

<sup>1</sup> Kulá ámna yáilá wa yápmangga kilang kinan árangga kutne ku kilang gá it wa sangga kungga ailan Kos káin kándáng hánám kuk. Iná tembatnáya ku ailan Rodes káin kumán náya wata tembatnáya ku kungga it táwi Patara káin kumán. <sup>2</sup> Wahára káumán du kilang káman dá ále Ponisia káin kukuya tán kangga ku son kilang wahára árangga ku kumán. <sup>3</sup> Kulá ailan Saiprus wawu ket kandák kálu árán kanggang kungga ku Siria provins káin it táwi Tair wahára kung hengga it watán kutná kutná kilang watá ihán kumán wa hirarán hahaya tán du kilang sangga kep káin háumán. <sup>4</sup> It wahára hangga kung Ánutu yan ámna náráwa wa táng suling kung kápánga watyot rám 7 átumán. Kulá wahára ku Iruk ká pahán yáinin han du Jerusalem káin ma kuindalák ingga Pol inánga son son táuráng, <sup>5</sup> enendu kilang gá son kuinán tán du kilang gá átuk káin wa kukuya tátne ku Ánutu yan ámna watá áwá nangege yáni yot kámuk nángotang it wa sangga sán káin kung tun náni hára imánga átang sáponga táumán. <sup>6</sup> Wáina tángga sangga ku ket yáinin tángga nánda kilang kinan kutne ku watá son it yáni ya kuráng.

<sup>7</sup> Kulá Tair sangga kungga ku it táwi Tolemes káin hangga ku Ánutu yan ámna náráwa wakáin kápánga watyot rám káman átumán. <sup>8</sup> Tembatnáya ku Tolemes sangga kungga ku it yáilá Sisaria káin ámna káman kutná Filip watán it káin átumán. Ámna wawu Táwi yan me wa yánánga átningngátak, me málám wawu huphuráp ámna 7 aposel yá iháng tunggap tát náráwa kawát háláng yáyamáya yáup yámuráng waháranan. <sup>9</sup> Ámna wata yáuriwa máto 4 watá wu profet me mengngátaráng.

<sup>10</sup> Nánda wahára rám kámá há áratne ku profet káman kutná Agabus watá Judia ále kálu áwáng háuk. <sup>11</sup> Kulá ámna watá nándán káin áwuk watá áwáng Pol yan let wa táng málamba ketná hárammá wa hárotang gu ing miuk, “Iruk Káungá yá ing mek, tárák ná táet wáinanyon du Juda ámna Jerusalem káin átaráng watá let náta márumá wa hárotang táng ámna kámá káinnan da ket yáni hára tineráng.”

<sup>12</sup> Wáina men naránga ku nán me ámna náráwa wahára átumán watá Jerusalem káin ma árialalák ingga inánga son son táumán. <sup>13</sup> Wáina inátne ku Pol yá ing nánuk, “Sándu náuta ku kutang nák pahánna táng hang tiktik tángoeráng? Ná k ku Táwi Jesu kutná meng tárut tángoet wata ket háramna álo hárotneráng, me Jerusalem káin nutkámút tátáya hálendu álo wáina táineráng. Ná k ku kátámút ta há tiyawingga átkoet.” <sup>14</sup> Wáina nánán du nánda káumán du nánda watán pahán káin átuk wa táng yakyawák tátáyan tárák muná hálendu ing miumán, “Táwi yá rina tunggafefeya narek wáina álo tunggafeinek.”

<sup>15-16</sup> Wata torong káin du náni tiyawingga ku Táwi yan tombong kámá Sisaria nan watyot kámuk náni árangga kungga Jerusalem káin kumán. Wakáin kutne ku nángot kung ámna káman Saiprus nan kutná Nason watán it káin nápmáuráng. Nason wawu huphuráp pon hánám Táwi yan tombong háliuk.

### *Pol yá Jerusalem káin átuk*

<sup>17</sup> Kulá rám nánda Jerusalem káin kung hiután wahára wu Táwi yan tombong watá heronge pálak áwángga náhuráng. <sup>18</sup> Kulá tembatnáya ku Jeims Táwi kulaná wa kakaya Pol yot kutne ku miti yan ámna yáilá watá kámuk ingmen wakáin áwát tu átumán. <sup>19</sup> Kung átang gu Pol yá heronge me yánánga ku málamba ketná hára Ánutu yá ket tárák rina ámna náráwa kámá káinnan watán káin táuk wata pingnganá kándáng hánám wáina yánuk.

<sup>20</sup> Pingnga wa yánán naruráng hára wu yáni wu Ánutu kutná meng tárut tángga ku Pol inuráng, “Kang, nuk náni, Juda ámna náráwa Jesu ya naráng háting mená táup hánám táwi watá Moses yan meng rákit mená wawu táwi hánám ingga naránga isutkoeráng. <sup>21</sup> Ámna náráwa kátu yá yánát tu kák ka ing menggoeráng, ‘Pol yá Juda ámna kámá káinnan da orek yáni káin átaráng wa Moses yan me wa ma isutnándaráng, me nángánangege sáni kep yáni ma marindaráng, me táwi ilom náni yan kálu wa ma isutnándaráng ingga yánángoek,’ ingga wáina menggoeráng. <sup>22</sup> Kulá wáina áwelák ingga há narinderáng, wata ku rina táinemán? <sup>23</sup> Ko naráng, nanará káman nánda naremán wáina isutnelák wawu ing, Jesu yan tombong waháranan ámna 4 yá Ánutu yan káin me káto há miuráng. <sup>24</sup> Ámna 4 nátyot kungga ku watá Ánutu rahalá hára rongrongngá háháleya Moses yan meng rákit mená isutang rina táineráng, ko ku wáinanyon táinelák. Watán towet sisiyan kutná kutná wa yuwáng yámátá ku watá yáin yáni rommá wa komkomá hárinéráng. Wáina tátá kámá yá kahánga ku me kák ka rina mená wawu kusák ingga narineráng, iná kaya ku meng rákit me wa isutnándalák ingga narineráng. <sup>25</sup> Iná ámna náráwa kámá káinnan Jesu ya naráng háting mená watán káin du me kak mená wa isutang papia ing há uyingga satne kung yámuk, sungi songgo ánutu kusák ka towet sing mená ma náindaráng, songgo yánumá hára sip pá há árán kanggang wa ma náindaráng, songgo san yáni hára iháng kátámút táená wata yánun yáni wa ma náindaráng, hang márámamák hára ma kuindaráng.”

<sup>26</sup> Wáina inát tu tembátnáya ku Pol yá ámna watyot kungga ku rina tángga rongrongngá háháleya mená wáina táuráng. Wáina tángga sangga ku málám Táwi yan it káungá hánám kapmená káin kungga ku rám bu rina hára rongrongngá háháleyan watá sálikngin du watán towet sisi wa ihánga áwinemán ingga pris yánuk.

*Pol ket táuráng*

<sup>27</sup> Kulá rám 7 watá sálin ingga tángga átuk wahára ku Juda ámna kámá Esia provins káinnan watá Pol ku it káungá kapmená káin wa kangga ku ámna náráwa kátu wata pahán yáinin hat Pol ya kuk táng máat tu Esia ámna watá kung ket tángga ku <sup>28</sup> ing mantáuráng, “Israel ámna, áwáng háláng námániráng. Ámna náwu ále rehára rehára átningga ámna náráwa ing yánáng tolingngátak, nándán ámna náráwa, nándán meng rákit mená me nándán it káungá wawu wáik hánám ingga yánángngátak. Kulá kámá ku ing táuk, Grik yángot áwáng it káungá ná táng konep táuk.” <sup>29</sup> Wáina miuráng wawu ing wata, rám káman Trofimus Efesus nan watá it yáilá Jerusalem wata kinan Pol yot seng sulingga átninggun kápuráng hálendu Pol yá it káungá kapmená káin engotang kuk hám ingga wata naránga miuráng.

<sup>30</sup> Me yá wáina kun naránga ámna náráwa yá hárámutang nangnga yáni han wakáinnan wakáinnan áwáng áturáng watá áwáng Pol káto tángga táng uyingga tánggatang it káungá yan kumbi kep káin hangga ku kálu mungnganá wa sokmuná hánám káto táng háliuráng. <sup>31</sup> Yáni wu táng kung utkámút tánin ingga tángga árát tu Jerusalem ámna wu kun tátáya menman tángga átaráng ingga me watá Rom bán tewe ámna yáin yáni táwi watán káin kuk. <sup>32</sup> Kun naránga málám sopmuná ingmen málamba tárang hára átnándak tewe ámna urum kámá ya yáin yáni watyot tewe ámna ihánga urum áturáng káin wa hat kápánga ku ámna urum táwi watá Pol utang áturáng wa sáuráng.

<sup>33</sup> Tewe ámna yáin yáni táwi watá áwuk ngáya áwáng Pol ket tángga tewe ámna yánán sen yará yá hároturáng. Wáina tát tu málám “Ámna náwu ni, me kandák ku rina táek?” ingga yánáng suliuik, <sup>34</sup> Wáina yánáng sulingga árán du ámna kámá yá mantánga kámá kámá ingináng tángga táng kukalák tát tu hulá resim hánám ingga ku kándáng ma naruk. Wáina hálendu málám Pol engotang yáinin átnát káin kukuya tewe ámna yánuk. <sup>35</sup> Wáina yánán Pol engotang tirak hulá hára kung hengngárát ámna náráwa yá utkámút tátáya táup hánám tát kápánga ku tewe ámna yá árong Pol wa táng hip tángga áránga kuráng. <sup>36</sup> Wáina tángga kut ámna náráwa urum táwi yásutang kuráng watá “Utkámút táwiráng! Utkámút táwiráng!” ingga sonson mantánga áturáng.

*Pol yá urum táwi wa yánuk*

<sup>37</sup> Kulá tewe ámna yá Pol tángga kung it yáni kinan hanin ingga tát tu Pol yá tewe ámna yáin yáni táwi wa inuk, “No me káman álo kanánggem me?” ingga inán du watá inuk, “E! Kák ku Grik me há me tángngátalák. <sup>38</sup> Nák ka kák ku Isip ámna huphuráp sim kapman yot erawánga ámna kápi ká erawená 4,000 wa ihánga ále komkomá ámna muná káin kuk wa ingga narángoet,” ingga inuk.

<sup>39</sup> Wáina inán Pol yá inuk, “Nák ku wa muná. Nák ku Juda ámna it yáilá Tasus Silisia provins nan. Nákkán it yáilá wawu kutná pálak. Ko álo nepmatá no me kámá ámna náráwa álo yánánggem me?”

<sup>40</sup> Wáina inán tewe ámna yáin yáni watá álo ingga inán du Pol málám tirak hára hetang átang ketná yá urum táwi áturáng wa yolop átniráng ingga tárak tán kangga yolop ingmen árát tu Hibru me kálu yánuk.

## 22

<sup>1</sup> “Yanuknukna me nun ilomna, no naya áráng hákhátik naya ing sánin, no kandák kámá ma táut,” ingga wáina yánán <sup>2</sup> urum táwi áturáng watá naruráng gu Hibru me kálu yánán naránga ku yolop hánám áturáng.

<sup>3</sup> Wáina árát tu Pol yá yánuk, “Nák ku Juda ámna, it yáilá Tasus Silisia provins káin wa tunggafiut, enendu it yáilá nahára átang tiháut. Nák ku tiksa Gamaliel watá táwi ilom náni yan meng rákit me me kándáng hánám wa nanáng toktolik tán du no Táwi yan me wa táng káto táin ingga tánggiut, nahára átaráng sáni há tánggoeráng wáina. <sup>4</sup> Nák ku Jesu isutnárát wa iháng wáik tángga átninggiut. Ámna me náráwa hányon iháng sen dá hárotang kalabus kinan tinggiut, me ihánga iháng ráháng kátkámút tánggiut. <sup>5</sup> Pris yáin yáni me ámna Juda yan kaunsol urum hára átnándaráng watá no rina tánggiut wawu há nareráng, watá wáina ingga álo sánánggalát. Yáni nák háláng nanamáya ku nuknuk yáni it yáilá Damaskas káin átaráng watán papia uyingga namuráng. Kulá papia wa tángga kung yáme wakáin Jesu yan ámna náráwa átaráng wa ket háram yáni hárotang iháng áwáng Jerusalem káin yáup káto tátáya Damaskas ya kut.

<sup>6</sup> “Kungga átnáre káe táitná hám wáina kálu ku Damaskas tangtang yamá káman sیرهترنأ pálak alek kálu máuk watá mangga rang hálangga neháng támotuk. <sup>7</sup> Wáina tán káwak káin táng hang káte ku me káman dá ing nanuk, ‘Sol! Sol! Náuta ku nák neháng lem tánggoelák?’

<sup>8</sup> “Ingga nanán naránga ku no ing inut, ‘Ámna hulá, kák ku ni?’

“Wáina ine ku watá nanuk, ‘Nák ku Jesu Nasaret nan, ko neháng lem tánggoelák wa,’ ingga wáina nanuk. <sup>9</sup> Nuknukna káman átumán watá yamá wawu há káuráng, enendu me yá áwuk wawu ma naruráng.

<sup>10</sup> “Wáina nanán du no ing inut, ‘Táwi, no rina táinet ta narelák?’ wáina ine ku watá nanuk, ‘Tárutang it yáilá Damaskas káin kutá ku ámna káman dá ko yáup rina táinelák ka naret wawu watá wakáin kaninek,’ ingga nanuk. <sup>11</sup> Kulá yamá watá hálangngá wu rina kámá hánám wa man no náit kámá kákápáyan du muná hálendu wahára átang gu nuknukna káman kumán watá ketnan tát tu kungga it yáilá káin kung hiúmán.

<sup>12</sup> “Kung hetne ku ámna káman kutná Ananaias watá nanaháya áwuk. Ámna wawu Ánutu tárang káin hánám átang meng rákit mená wa kándáng hánám isutnándak. Juda Damaskas hára wa árená watá ámna wawu álo kámá ingga mengngátaráng. <sup>13</sup> Ámna watá áwáng nák rupna tangtang hetang átang gu ing nanuk, ‘Nukna Sol, rahála yá álo háleik,’ ingga men du wahára re rahánna yá álo hálen hálangga ámna wa káut.

<sup>14</sup> “Wáina káe ku nanuk, ‘Táwi ilom náni yan Ánutu watá málámba pahálá káin rina átak wa kakaleya keháng tunggap táuk, me Ámna Kándáng wa kangga málámbá milunná yá rina kaninek wa nanaráya keháng tunggap táuk. <sup>15</sup> Ko ku wa hálang imánga rina káelák me narelák wa meng tunggap tánga ámna náráwa táup táwi yáinelák. <sup>16</sup> Kulá náuta hálanggoelák? Tárutang Táwi kutná mengga umi kuhátá ku mukmuroka yawonek,’ ingga Ananaias yá nanuk.

<sup>17</sup> “Wáina nanán du rina tátáya nanuk wáina tánga son Jerusalem káin kung Táwi yan it káungá hánám kinan káin sáponga tánga átang gu ára hára ina kanggáre <sup>18</sup> Táwi yá ing nanuk, ‘Jerusalem nan ámna náráwa yá ko náka rina yáinelák wawu ma narindaráng, wata ku sopmuná ingmen it yáilá ná sangga kung.’

<sup>19</sup> “Wáina nanán du no inut, ‘Táwi, ámna náráwa wu no Juda yan miti itná átaráng wahára kámá hára kungkung tánga ámna náráwa kákka naráng hátingga árená wa ráhángga iháng kung kalabus káin tingting tánggiut wawu há nareráng. <sup>20</sup> Hang Stiwen wawu kangán me wa meng tunggap tánga yánánga átkungngátak wata ingga utkámút táuráng rám wahára wu náku hányon átang wawu álo kámá táeráng ingga kápánga átang lap yáni hákhásák wata pin yáni tánga átu wawu hányon nareráng.’

<sup>21</sup> “Wáina ine ku Táwi yá nanuk, ‘Kung, kák ku suring kame mulangán hánám ámna náráwa ále kámá káinnan watán káin wa kuinelák.’ ”

*Polýa náku ku Rom ámna ingga tewe ámna yánuk*

<sup>22</sup> Juda ámna náráwa urum táwi watá káramatingga árát kungga Pol yá ámna ále kámá káinnan da miuk hára wawu pahán káráp tánga san yáni táng hip tánga hahatingga ing mantáuráng, “Utkámút táwiráng! Ámna wáinaná watá átnát tán tarák muná!”

<sup>23</sup> Wáina mantánga lap yáni hákhásák wa yalingga hirarát kun ámalum ihángga hirarát alek kálu árán <sup>24</sup> kangga ku tewe ámna yáin yáni táwi watá tewe ámna yánán Pol tánga yáin it káin kuráng. Tewe ámna yáin yáni yá hulá ku náuta ingga pahán káráp tánga Pol ya ohok menman táng meráng ingga nanaráya tewe ámna yánán lahot mánga ku wáina wata ingga nánik ingga ináng susulíya yánuk. <sup>25</sup> Pol lahot mámya ket hárammá hárotang kándáng ting sat árán du tewe ámna yáin yáni káman dá Pol rupmá tangtang hetang árán Pol yá wa inuk, “Rom ámna káman ma ináng sulingga hulá ma narená hánámá lahot mámya watán meng rákit mená kámá átak me?”

<sup>26</sup> Wáina inán tewe ámna yáin yáni watá wa naránga ku son yáin yáni watán káin kung wáina mek ingga inángga ku inuk, “Ámna wawu Rom ámna, wata ku rina táng minelák?”

<sup>27</sup> Wáina inán du tewe ámna yáin yáni táwi yá málámbáyon Pol yan káin kungga inuk, “Nanáng, kák ka pálipuk Rom ámna me?” ing inán du Pol yá inuk, “O, náku ku Rom ámna.”

<sup>28</sup> Wáina inán du tewe ámna yáin yáni táwi watá inuk, “No Rom ámna háháleya ku supna táwi hánám wa sáut,” ing inán du Pol yá inuk, “Iná náku ku mamna yá Rom ámna hánám wa neháng tiuk.”

<sup>29</sup> Wáina men naránga waháranon du tewe ámna kámá lahot mámya naránga áturáng watá yolopon sáuráng. Kulá tewe ámna yáin yáni táwi watá Pol Rom ámna wa táng sen dá hárotuk wawu Rom bán meng rákit mená wa hitik táuk wáina hálendu Pol yá náku ku Rom ámna ing men naránga ku háramutang pitáuk.

*Polýa Juda yan kaunsol wa me yánuk*

<sup>30</sup> Kulá tembátnáya ku tewe ámna yáin yáni málám hulá náuta ku Juda yá Pol táng káyam tárang ingga hulá wa kakaya ku Juda yan ámna hulá hulá me pris tátáwi yáni wa men áwát tu Pol engot kung orek yáni hára tiuk.

## 23

<sup>1</sup> Pol yá ámna hulá hulá wa kárek hánám kápánga átang yánuk, “Yanuknukna, nák ku Ánutu rahálá hára yáup rina tátáya namená wawu há tángga áwánga átkoet wata pahánna álosim hánám hálek. Nawu kandák kámá ma táut ingga naret.” <sup>2</sup> Wáina men pris yáin yáni Ananias yá ámna niyá Pol rupmá tangtang áturáng wa milunná káting pálák tátáya yánuk.

<sup>3</sup> Wáina yánán Pol yá inuk, “Ánutu yá kák kutnek! Kák ku kumbi wáik pen hakna yá kuháng mená wáina, kák pahála kinan káin du wáinanyon wáik hálenga árená wa ámna náráwa yá ma kangngátaráng. Kák ku meng rákit me wa isutang gu nák neháng me hára titiya áwáng putung átalák, iná kawu meng rákit me wa táng hátingga ku nák nutnut ta yánelák.”

<sup>4</sup> Wáina inán ámna rupmá tangtang áturáng watá Pol inuráng, “Ko Ánutu yan yáup ámna pris yáin yáni wata mátan táelák watá kandák hálek.”

<sup>5</sup> Wáina inát tu Pol yá yánuk, “Yanuknukna, nák ku pris yáin yáni ingga ma narát. No kandák táet, náuta Táwi yan me ing uyená átak, ‘Ámna hulá ka káman da me kandák ma meindalák.’”

<sup>6</sup> Wáina mengga ku Pol málám ámna hulá hulá áwáng áturáng wawu wáina ingga há kápuk wawu kámá wa Sadyusi iná kámá wu Farisi ingga há kápánga ku wa ing yánuk, “Yanuknuk, nák ku Farisi, hang nanna wu Farisi yon. Náku kámutang tátárut wata naráng hátingngátat. Hulá wata hánám bu neháng me hára teráng.” <sup>7</sup> Kulá me wa men naránga ku Farisi yá Sadyusi yot orek yáni hára menmen tángga urum káman áturáng watá horet yará háliuk.

<sup>8</sup> Sadyusi yá ku há kámurená yá son tátárut wawu wáina ma árak ingga narángngátaráng, hang angelo me iruk hulá hulá kámá ma áraráng ingga narángngátaráng. Iná Farisi yá ku kámuk wáina há átaráng ingga narángngátaráng.

<sup>9</sup> Kulá menmen dá táwi hánám wa tunggafen du lo yan tiksa kámá wu tombong Farisi wata kinan áturáng watá tárutang me hahatiná kálu ing miuráng, “Ámna nátán káin kandák kámá ma árán kámán. Me menggoek wawu kámá angelo yá me iruk ká inát meng kuiwon.”

<sup>10</sup> Wáina mengga menmen tángga hála erawinán tát kápánga tewe ámna yáin yáni táwi málám Pol unuyin tát rákitang kámuriwon ingga pikpito hánám naránga ku tewe ámna yánán hahatingga hang orek yáni hára Pol tángga engotang yáin it káin kuráng.

<sup>11</sup> Kulá rám waháranon yáungán du Táwi yá áwáng Pol tangtang átang gu inuk, “Ma pitáindalák, káto yon háleinelák. Nákkán me Jerusalem káin yánulák, wáinanyon Rom káin yáinelák.”

### *Juda ámna yá Pol utkámú tátáya me hároturáng*

<sup>12</sup> Kulá tembátnáya hilápmá ku Juda ámna kámá yá kilak urum tángga Pol utkámú tátáya me hároturáng. Urum yáni hára wu Ánutu rahálá hára me káto hánám ing miuráng, “Kula wu pálipuk hánám Pol wawu utkámú táinémán. Wáina ma táená átamán hára wu sungi me umi ma náená hánámá átnémán.” <sup>13</sup> Ámna urum me wa hároturáng wawu sale yáni wu 40 torong káin náut wáina. <sup>14</sup> Yáni wu pris tátáwi yáni me ámna hulá hulá yáni yan káin kung ing yánuráng, “Nándu Ánutu rahálá hára me káto hánám há memán, náut kámá káman ma náená átang kungga Pol utkámú táinémán. <sup>15</sup> Wáina wata ku sányot kaunsol ingga átaráng watá tewe ámna yáin yáni táwi wa ingirungngit tu Pol engotang áwát málámbán hulá wa kándang men kanin ingga inát tu wáina táinek. Nándu tiyawingga hálenga átnémán da ku sándán káin ma áwindák waháranon há utkámú táinémán.”

<sup>16</sup> Wáina mengga árat tu Pol táripmá yá me wa met naránga ku sopmuná ingmen tewe ámna yan it káin kung me wáina hárotaráng ingga Pol inuk.

<sup>17</sup> Wáina inán Pol yá tewe ámna yáin yáni káman men áwán du inuk, “Nangge máto ná engotang yáin sáni yan káin kutá watán me tángga átak wa ininek,” ingga wáina inán du <sup>18</sup> ámna watá engotang kung tewe ámna yáin yáni táwi wa inuk, “Pol kalabus kinan átak watá men koe ku nangge máto ná engotang kákkán káin áwáwáya nanán du engotang áwet, náuta kákkán me kámá watá tángga átak.”

<sup>19</sup> Wáina inán du tewe ámna yáin yáni táwi watá nangge máto wa ketná hára tángga tákto kálu hangga ku ináng suliuik, “Kulá me ku rina naninán áwelák?”

<sup>20</sup> Wáina inán du nangge máto watá inuk, “Juda ámna yá pahán káman hálendu ko tembát Pol engotang kaunsol rahán yáni hára kutá ku málámbán hulá wa kándang yáinek ka meráng. <sup>21</sup> Wáina áwáng kanineráng, enendu wawu kanggarungngineráng, wata ku ma engotang kuindalák. Ámna sale yáni 40 torong káin náut wáina watá kilak átang hálenga

\* 23:5: Son Iháhá 22.28

átneráng. Yáni wu Ánutu rahálá hára me káto ing meráng, sungi me umi ma náená átang kungga Pol utkámút táineráng. Wáina tátáya há tiyawingga átang gu ko álo wáina táinet ingga minelák wata hálangga átaráng.”

<sup>22</sup> Wáina inán du tewe ámna yáin yáni táwi watá nangge máto wa oletná mangga ku ing inuk, “Kungga ámna káman me ná ámna wa wáina inet ingga ma yáindalák.” Wáina inángga ku suring mán háná kuk.

*Tewe ámna yá Pol tángga Sisaria káin kuráng*

<sup>23</sup> Wáina inán kun du tewe ámna yáin yáni yará yánuk, “Sándu tewe ámna 200, tewe ámna hos ketnán árená 70, hang yokyok ihená 200 wa ihángga yáungán 9 kilok hára Sisaria káin kuineráng. <sup>24</sup> Pol yan hos tiyawing mángga mápápmá yá táiwon da ku kándáng gon pinná tángga engotang kawana Feliks yan káin kuineráng.”

<sup>25</sup> Wáina yánángga ku papia káman ing uyiuk:

<sup>26</sup> Nák ku Klodius Lisias no papia ná ámna hulá kawana táwi Feliks kákkán da uyet. Káe álosim.

<sup>27</sup> Juda ámna yá ámna ná ket tángga táng utkámút tátáya tát kápángga ku Rom ámna ingga há kangga ku nangán tewe ámna yáne kung káyam ket yáni háranan yámáng hutang tángga áwuráng. <sup>28</sup> Hulá wu náuta utnut ta tánggoeráng ingga engotang kaunsol yáni yan káin háut. <sup>29</sup> Rám wahára káut tu yáinin meng rákit mená wahára kungga wata ingga mengga utnut ta tángga áturáng, iná hulá káman wa utkámút tátáyan me táng kalabus hára titiyan du muná. <sup>30</sup> Kulá son du utkámút tátáya me kilak hárotang árát tu káman dá kilak áwáng nanán narángga ku sopmuná ingmen tewe ámna yáne kákkán káin engotang áweráng. Ámna niyá wata rina menggoeráng wawu hányon suring yáme kákkán káin áwineráng.

<sup>31</sup> Wáina uyingga yámán du tewe ámna yá yáin yáni watán milun isutang yáungán wahára ku Pol engotang kungga it táwi Antipatris káin kung hiuráng. <sup>32</sup> Kulá tembátnáya ku ámna hos ketnán árená watá engotang Sisaria káin kut tu kátu watá ku son hurik tángga Jerusalem káin it yáni ya áwuráng. <sup>33</sup> Iná ámna hos ketnán putung árená watá Sisaria káin kung hengga ku Pol engot kung kawana Feliks ya sangga ku papia wa táng imuráng. <sup>34</sup> Wáina imát tu kawana yá papia wa sáingingga ku Pol ináng suliu, “Kák ku ren provins nan?” ingga inán du Pol yá inuk, “Nák ku Silisia provins káinnan.” <sup>35</sup> Wáina inán du watá inuk, “Kákkán mápápmá wawu máriya rendá kákkán kálu me rina tángga átaráng watá nahára áwáng het tu wáina káinet.” wáina inángga ku Pol táng it álosim hánám Herot tá táuk wata kinan tingga tewe ámna yánán pinná tángga áturáng.

## 24

*Juda yan ámna yáilá yá Pol táng me hára tiuráng*

<sup>1</sup> Rám 5 átang sangga ku pris yáin yáni Ananias watá ámna yáilá kámá yot lo yan hulá nanará kutná Tertulus watyot kámuk Sisaria káin Pol táng kawana rahálá hára me hára titiya áwáng háuráng. <sup>2</sup> Kulá kawana Feliks yá Pol ya men áwán du Tertulus yá Feliks rahálá hára Pol táng me hára titiya ing miuk, “Feliks kák ku ámna álosim hánám. Nán Juda ámna náráwa wawu kák tárang káin átang rám hásák kun erawák ma táená álo kámá hánám átang áwángoemán, me kákkán nanará álosim wa isutang kálu kandák kámá kak rina árená wa sangga kálu kándáng wa rewe isutkoemán. <sup>3</sup> Ále rekáin rekáin watá kálu rina rina me nanará kákkán káinnan kunggoek wa kangga pahán álosim hánám wa narángoemán. <sup>4</sup> Kulá nánda kákkán rám ma táng uyindámán, ináku ko nán pahán námángga nándan me hátetná kimo ná narinelák wawu ing, <sup>5</sup> nánda káemán du ámna nátá tán mápápmá hulá hulá yá tunggafenggoek. Itná itná káin Juda ámna náráwa átaráng wata orek yáni káin ámna nátá tán kuk tángga menman tángga kun erawák tángngátaráng. Ámna wawu Juda nán nápmangga tombong káman kutná Nasaret ing menggoeráng wata táwi yáni ya átkoek. <sup>6-8</sup> Hang Táwi yan it káungá hánám wa hányon táng konep tátáya tán kangga ku wata ket táumán.\* Wata ku ko kayon ináng sulitá málámbá milunná hára men kangga ku nánda me rina memán wawu pálipuk ingga káinelák.”

<sup>9</sup> Kulá wáina men Juda yáni wu kámuk hánám me wawu pálipuk ingga Tertulus háláng imángga miuráng.

\* **24:6-8:** Nanará ámna kámá yá ing narángngátaráng, me kátu kámá tombong ore nahára hányon átak wawu ing, “Wáina wata ku nánda Juda nánin meng rákit mená wahára yárengga átang me hára táng tinggoemán, enendu tewe ámna kámuk ka yáin yáni Lisias yá tewe ámna ná yot áwáng náháng háting hirarát kun nán ket náni háranan táng uyingga kuráng. Wáina tángga ku Lisias yá ing miuk, ni ámna yá ámna ná táng me hára titiya ku kákkán káin tángga áwat ko me horengga narinelák.”

<sup>10</sup> Watá met sálin du Pol yá me metátáya Feliks yá ket tárák hára inán du Pol yá ing miuk, “Há naret, kák ku yara táup pon ále nátán ámna náráwa yan me horengga nanará ámna átnándalák, wata ku no pahánna yá álo kámá nangnaráng nangán kálu árang hákhátik naya ku ing meindet. <sup>11</sup> No Ánutu ináng sákngin ingga Jerusalem káin árut náya áwáng rám nahára átat wawu rám kula ku 13 hálengga átak. Ko ámna kámá yánang sulingga káulák ináku wata pálipuk ingga kanát naránggim. <sup>12</sup> Rám Jerusalem káin átut wahára wu no it káungá káin wa ámna káman yot menmen kámá ma tángga áre nahuráng, me it yáilá wata kinan me Juda yan miti itná kinan wakáin ámna iháng urum tángga pahán yánin haha kámá ma tángga áre nahuráng. <sup>13</sup> Iná me ná mengga nák neháng me hára teráng wawu kusák rewe. Watá me yáni wawu pálipuk ingga mengga kálu kámá kák kakaleyan wawu muná. <sup>14</sup> Me meráng wahára káman wawu pálipuk, no Jesu yan kálu wa isutnándat, wawu miti kusák ing meráng wa. Wata kinan yon nák ku táwi ilom náni yan Ánutu wa ináng sákngingngátat. Hang meng rákit me yá rina mek me profet tá rina uyená kámuk hánám pálipuk ingga narángga isutnándat. <sup>15</sup> Iná nák ku pahánna káin du Juda ámna nahára átaráng nátán káin átak wáinanyon átak, wawu máriya Ánutu yá ámna há kámurená wa iháng tárut táinek, ámna kándang me ámna mukmuro táená wa kámuk. <sup>16</sup> Kulá wáina wata ku na rina tángga ku rámá rámá Ánutu rahálá hára pahánna watá kándang re árik me ámna náráwa rahán yáni hára ket tárákna yá kándang re árik ingga yáupmá hálang tángngátat.

<sup>17</sup> “Yara táup simbon it kámá káin átningga sangga ku nangán tombong hára ukuro mara wa sup yámamáya me taha titiya Jerusalem káin áwut. <sup>18</sup> Kulá wáina táin ingga Táwi yan it káungá hánám káin kung áre nahuráng. Rám wahára wu Táwi rahálá hára rongrongngá há átut. Wahára no ámna urum kámá yot átang márapmá kámá ma táumán. <sup>19</sup> Enendu Juda kámá Esia provins káin árená watá áwáng nahánga kuk táng namánga me táng namuráng. Wáina wata ku ámna Esia nan watá neháng me hára titiya naránga hálendu yáni yon áwáng kák rahála hára hulá rina wa kándang kaníneráng. <sup>20</sup> Iná muná hálendu Juda yan kaunsol ámna nahára átaráng watá kaunsol rahán yáni hára me kandák rina me nahuráng wa yáni meineráng. <sup>21</sup> No me káman ing mengga orek yáni hára hetang átang mantáe naránga nák ka heronge ma naráng namuráng wata há, ‘Nák ku ing naráng hátingngátat, kámurená wawu son tárutneráng. Hulá wata ku neháng áwáng me hára ná ting sat átat,’ kaunsol rahán yáni hára wáina mantáut,” Pol yá me pukon Feliks wáina inuk.

<sup>22</sup> Feliks yá Jesu isusut tán kálu me rina rina naráng háting mángngátaráng wawu kándang hánám há narek. Kulá Pol yá me meng háliuk rám wahára wu Feliks yá Juda ámna ing yánu, “Sándá kung yolop átnárát, rám tewe ámna yáin yáni táwi Lisias watá áwáng han du wáina sándán me ná táng tolinet.” <sup>23</sup> Wáina yánánga ku tewe ámna yáin yáni káman inán Pol táng it kinan tingga pinná tángga ku kimo san along sim árán nuknukngá yá náut kámá kámá hálang iminán du álo hálang imineráng ingga inuk.

<sup>24</sup> Rám kámá átang sangga ku Feliks málám áwáná Drusila Juda náráwa watyot Pol ya pin tin áwáng Jesu ámna náráwa son iháhá wata naráng háting mámá wata men narumálák. <sup>25</sup> Kulá Pol yá me mengga Ánutu rahálá hára kándang átnát, me ámna náráwa yá yánin átkuku wa kándang pinná tátá, hang Ánutu yá máriya me hára ámna náráwa iháng tinek wata men naruk hára wu Feliks yá pitángga ku Pol inuk, “Kula yan me ku wa rewe. Há ka kung máriya no rám nukngá tingga ku son pin te áwinelák.” <sup>26</sup> Rám wahára wu Feliks málám bu Pol yá sup kámá namán sáe along kuínek ingga naránga ku rám máro yon Pol ya pin san kun áwán du meme yánda tángga átkiumálák.

<sup>27</sup> Kulá yara yará yá sálkngin du ámna káman kutná Posius Festus watá Feliks yan kome tángga kawana háliuk. Iná Pol wawu Feliks yá Juda ámna iháng heronge tátáya ku san kalabus kinan há átkiuk.

## 25

### *Pol yá Festus rahálá hára átuk*

<sup>1</sup> Festus yá Judia ále káin áwáng it yáilá Sisaria hára rám kaláhu átang sangga ku Jerusalem káin árángga kuk. <sup>2</sup> Kulá wakáin du pris tátáwi yáni me Juda yan ámna hulá hulá watá áwáng me hulá hulá inánga Pol táng me hára titi wata inuráng. <sup>3</sup> Wáina inánga ku son ing hányon inuráng, “Ko nán náháng heronge tátáya ku tewe ámna yánátá Pol engotang Jerusalem káin áwíneráng. Ko wáina wu há hánám táinelák ingga naremán,” ingga inuráng. Wáina inuráng wawu náuta ámna kámá yánát kálu káin kandingga átang Pol utkámut tátáya me hároturáng wata. <sup>4</sup> Wáina inát tu Festus yá ing yánu, “Pol wawu Sisaria káin kalabus kinan átnándak, iná nawu nahára rám hátefná kimo átang gu wakáin há kuínet. <sup>5</sup> Wáina wata ku ámna hulá hulá sán háranan kámá yá áwat nákkot kungga ku kandák kámá táuk hálendu sándá táng wakáin me hára tineráng.”

<sup>6</sup>Wáina yánánnga ku Festus málám Jerusalem káin rám 8 me 10 hám wáina átang sangga ku son Sisaria káin háuk. Kulá tembatnáya ku me nanará komená hára kung átang Pol ya yánán tewe ámma yá engotang watán káin áwuráng. <sup>7</sup>Pol engotang áwát tu Juda ámma Jerusalem kálu áwáng háuráng yáni wu áwáng áwálák tálaga hetang átang gu kandák ku wáina wáina táuk ingga táwi hánám miuráng, enendu me yáni wata páliná yá kándáng álo ma háliuk.

<sup>8</sup>Wáina tát tu Pol yá málamba áráng hákhátik ngá tálaga ku Festus ing inuk, “Nák ku kandák kámá ma táut. Juda yan meng rákit mená, me Táwi yan it káungá yan meng rákit mená, me Sisa yan meng rákit mená kámá ma yaliut.”

<sup>9</sup>Wáina inuk, enendu Festus málám Juda ámma wa pahán álosim yámámáya naránnga ku Pol ing inuk, “Álo Jerusalem káin árángga me ná wakáin no kangga táng totoliya narelák me rina?”

<sup>10</sup>Wáina inán Pol yá inuk, “Muná, náwu Rom bán me nanará itná hára hetang átat. Nák ku Rom ámma, wáina wata ku nákkán me nahára nanará wawu álo. Ka kándáng hánám há naráng namelák wa, Juda ya kandák kámá ma táng yámángngátat. <sup>11</sup>Pálipuk no kandák kámá rina táut hálen wawu álo neháng kung kátkámut tán kálu hára tin kámutnet. Iná Juda yá nák ka rina rina meráng wawu kusák re, wata ku káman dá nák neháng ket yáni hára titi wawu muná. Nák ku Sisa málambá hánám nákkán me ná narinek ka naret.”

<sup>12</sup>Wáina inán Festus málám ámma niyá nanará imángngataráng watyot me metáng hálingga ku inuk, “Ko Sisa yá kákkán me nanaráya melák, wata ku Sisa yan káin kuinelák!”

#### *Festus yá Pol ya King Agripa inuk*

<sup>13</sup>Rám kámá átang sangga ku King Agripa yot yitná Benaisi watá Sisaria káin Festus kangga pahán káman átang yáup tálaga átnát wata áwumálák. <sup>14</sup>Yándi wu Festus yot rám máro yon wakáin átumálák hárendu Pol ya wáina wáina ingga King Agripa inuk, “Felix yá uláp pon ámma káman táng kalabus káin tiuk wawu inggálu há re átak. <sup>15</sup>Kulá no Jerusalem káin kut hára wu pris tátáwi yáni me Juda yan ámma hulá hulá yáni yá no watán me naránnga táng me hára tingga márappá kámá imámáya nanuráng.

<sup>16</sup>“Wáina nanát tu no ing yánut, ‘Rom bán kálu ku wáina muná. Ámma káman dá me hára átang wawu ámma niyá táng me hára tineráng watyot kot hára káman átneráng. Wáina átang rám kámá imátne me rina watán kálu meineráng wata topmá men narinemán.’ <sup>17</sup>Kulá rám ámma watá nákkán áwuráng wahára ku no ma táng husiut, ináku tembatnáya ku me nanará komená hára átang yáne ámma wa engotang áwuráng. <sup>18</sup>Wáina engotang áwát Juda ámma yá tárutnaráng me miuráng wawu náut kámá káman táwi táená no naret wáina wata kámá ma miuráng. <sup>19</sup>Ináku watá miuráng wawu yáin miti wa isusut wata honhorená yot tu ámma káman há kámutuk kutná Jesu wawu Pol yá son tárutuk ingga mengngátak wata. <sup>20</sup>Wáina hárendu no me wata hulá kándáng narin ingga táut, enendu naráng yakyawák tálaga ku kándáng ma naráng rákit táut, wáina hárendu ing inut, ‘Álo Jerusalem káin árángga me ná wakáin no kangga táng totoliya narelák me rina?’ <sup>21</sup>Wáina ine ku Pol yá muná nák ku Sisa yá ku nákkán me narinek ingga men du inut, ‘Wáina hárendu kalabus kinan átnará suring kame yáin náni Sisa yan káin kuinelák,’ ingga inut.”

<sup>22</sup>Festus yá wáina inán du Agripa yá inuk, “No ámma watán me nanaráya naret,” ing inán du Festus yá inuk, “Álo tembat tu ko watán me narinelák.”

<sup>23</sup>Wáina hárendu tembatnáya ku Agripa káling Benaisi yándi wu kutná kutná álosim wa tánggánengga áwán ámma náráwa yá heronge táng yámát tu tewe ámma yáin yáni táwi yot it yáilá watán ámma yáilá watyot kung urum tátáyan it pahálá kinan háuráng. Wáina hat tu Festus yá tewe ámma yánán Pol engotang áwuráng. <sup>24</sup>Pol engotang áwát tu Festus yá ing yánuk, “King Agripa yot ámma ni nányot átaráng, sándá ámma ná káeráng wawu Juda kámmuk hánám watá Jerusalem káin me nákkán kandák wáina wáina tánggoek ingga mengga menman táwi tálaga ‘ma átnándák ináku há kámutnek’ ingga mantánnga áturáng. <sup>25</sup>Enendu no káut wawu náut kámá kandák táwi káman táuk ngáya wata ingga utkámút tátáyan tárák ku muná. Málambá ku nák ku Sisa yá nákkán me narinek ingga miuk, wata ku no Rom káin kuinek ingga miut. <sup>26</sup>No me rina uyingga ku hulá wata ingga mengga suring me yáin náni Sisa yan káin kuinek wawu kándáng ma narát. Wáina wata ku no King Agripa kák rahála hára me ámma wa átaráng sán rahán sáni hára ámma ná táng áwáng tet, wawu watá rina men naránnga ku sándá háláng namát me wata hulá no kándáng naránnga ku wáina kolek uyingga se yáin náni yan káin kuinek. <sup>27</sup>Kalabus kinan nan ámma káman suring me ámma yáilá náni yan káin kukuya hulá wáina ta me hára tiuráng ingga ma uyindát wawu watá kándáng ma háleindák.”



<sup>1</sup> Festus yá wáina men du Agripa yá Pol inuk, “Ko kangán kálu me metátayan du along átak,” ingga inán du Pol yá ketná hip tángga ku málámbán kálu ing miuk, <sup>2</sup> “King Agripa, Juda yá nácka rina miuráng wata hulá ya no ing kanin. Álo kámá ku ko náckán me ná narindelák, <sup>3</sup> náuta kák ku Juda yan kálu wa erek hánám narelák, me náuta menmenná tángngátamán wa erek kon narelák. Kulá wáina wata ku ko yolop átang náckán me ná narinelák.

<sup>4</sup> “Uláp nange kimo hára nangán káwak káin me Jerusalem káin rina átang áwut, wawu Juda wu erek hánám naráng nameráng. <sup>5</sup> Rám hásak hánám há naráng namánga áwuráng. Yáni kakanáya naránga hárendu álo ing kanánggalát, nák ku uláppon átang gu tombong Farisi wata kinan átang me káto rina rina mengga tená wa isutang átkiut. <sup>6</sup> Iná me hára ná átat náwu Ánutu yá táwi ilom náni me rina yánuw wata naráng hátingga átnándat, wata ingga tángga ku me hára ná átat ná. <sup>7</sup> Israel tombong 12 wawu káen me yáungán Ánutu wu pahán yot ináng sákngingga átang gu me rina yánuw wata páliná yá tunggafen kanin ingga hálangga átnándaráng. King, nák ku wáinanyon wata naráng hátingga hálangga átnándat wata ingga ku Juda ámma yá neháng me hára ná tiuráng. <sup>8</sup> Hulá náuta ku sán háranan kámá yá Ánutu yá kámurená háranan iháng tárut tángngátak wawu pálipuk ingga ma naráng háting kuráng?

<sup>9</sup> “Nák ku uláp pon Jesu Nasaret nan kutná wa táng hang titiya yáupmá táwi hánám táin ingga naránggiut. <sup>10</sup> Wáina naránga ku Jerusalem káin wáina há tánggiut. Wáina tángga ku pris tátáwi yáni yá háláng wa namát wa tángga átang gu Táwi yan ámma náráwa táwi hánám wa iháng kalabus kinan tinggiut. Iná Juda yan ámma yáilá yá watá kámutneráng ingga menggiuráng wawu nák ku wáina hányon menggiut. <sup>11</sup> Hang rám táuppon miti itná táup táwi káin yon hangga ket ihángga iháng lem tánggiut. No wáina táe Táwi kutná wa sangga wa me wáik inániráng ingga yáupmá táwi hánám tánggiut. Táwi yan ámma náráwa wata kuk táwi hánám wa naráng yámánggiut hárendu it mulangan káin suling kung kápánga iháng lem tánggiut.

<sup>12</sup> “Rám ore waháranon du pris tátáwi yáni watá wáina táinelák ingga háláng wa namát tu Damaskas káin kuin ingga kut. <sup>13</sup> King, káe táitná náut wáina hálangga árán du kunggatang kangngare alek kálu nan yamá hak hánám káe yamá ina muná wa táng hátek watá na me tombongna nákkot kumán wa náhang támotuk. <sup>14</sup> Wáina tán du nán kámut hánám iháng hang káwak hára kátingga áratne me ákaman Hibru me kálu ing mengtán narut, ‘Sol, Sol, náuta ku nák neháng lem tánggoelák? Ko Ánutu táng lem táet kayon ka táng lem tánggoelák.’

<sup>15</sup> “Wáina mengtán naránga ku no inut, ‘Ámma hulá, kák ku ni?’ ingga me ku Táwi yá nanuk, ‘Nák ku Jesu, ko neháng lem tánggoelák wa. <sup>16</sup> Kulá tárutang hetang álák. No káckán káin tunggafet wawu kák keháng tunggap táe ko yáup nange háleinelák wata, me ko ku náuta káckán káin tunggafek wa, me náut kaleinet wa wáina ingga yáinelák wata. <sup>17</sup> Rám kangán tombong me ále kámá káinnan watá kutkámut táin ingga táineráng wahára ku no háláng kame álo átkuinelák. No suring kame Juda me ále kámá káinnan watán káin kuinelák, <sup>18</sup> wawu kung rahán yáni yawondang páyung hára árená wa iháng hurik tátá yamá káin kuineráng, me Satan dán háláng tarang káin átaráng watá Ánutu yan háláng tarang káin kuineráng. Wáina wata ku Ánutu yá mukmuro yáni yawon yámán du nácka naráng háting namánga rongronggá háléná waháranon sengsaráp tángga Ánutu yan ámma náráwa háleineráng,’ wáina ingga Táwi yá nanuk.

<sup>19</sup> “King Agripa, nák ku alek kálu ára hára ina wa men narut watán milun ma yaliut, <sup>20</sup> ináku hulátingga ku Damaskas káin Táwi yan me yánánga ku Jerusalem ámma náráwa, Judia ále yan ámma náráwa, me ámma náráwa ále kámá káinnan watán káin hányon kungga Táwi yan me yánánga kut. Pahán hurik tángga Ánutu yan káin kuineráng ingga yánánga ku pahán hurik táineráng wata páliná ku ket tárák sáni hára hiták tunggafeinek ingga yánánggiut. <sup>21</sup> Kulá Juda yá it káungá kapmená káin ket nehángga ku nutkámut táin ingga táuráng wawu hulá ku wa met wata. <sup>22</sup> Wáina táuráng enendu Ánutu yá háláng namán átang áwángga kula ná átang gu ámma hulá me ámma hánámá sán me wa sánet. No me sánet wawu Moses me profet tá rina tunggafeinek ingga miuráng wanyon sánet, <sup>23</sup> wawu ámma Ánutu yá ámma náráwaná son iháháya miuk watá ku mápámpá sungga ku kámurená háranan tátárut wawu watá kálak son tárutang gu Ánutu yan yamá wata málámbán tombong Juda me ámma ále kámá káinnan wa yánánga kuk.”

<sup>24</sup> Pol yá me emá mengga átnarán du Festus yá me hahatiná kálu ing inuk, “Pol, kák ku hohoná. Kák ku nanará táwi táulák watá tán du wa hohelák.”

<sup>25</sup> Wáina inán du Pol yá ing inuk, “Festus ámma álo kámá, nák ma hohit. No me rina menggoet wawu pálipuk hulá pálak menggoet. <sup>26</sup> King Agripa wawu no me wa menggoet wawu wáina ingga há naráng hálek, wata ku no wa kándáng inánáya ma pitát. Ing há naret, no me wa met wawu king gu há narek ngá met, náuta wa táuráng wawu rahán táwi hára

táuráng.”<sup>27</sup> Wáina Festus inángga ku king ing inuk, “King Agripa, kák ku profet tán me wawa pálipuk ingga narelák me rina? Há naret, kák ku pálipuk ingga narelák.”

<sup>28</sup> Wáina inán du king gá inuk, “Rám hátetná kimo nahára ko me nanátá no nare álo hálen Jesu yan tombong álo hálenggem ingga ma narindalák.”

<sup>29</sup> Wáina inán du Pol yá topmá ing inuk, “Rám hátetná me hasák, no Ánutu ya sáponga táng mánggátat wawu watá tán kák me ni nákkán me ná naránga átaráng watá nák inanyon háleineráng, enendu sen náta nan dá ket sáni hárotmirot wata takta naret.”

<sup>30</sup> Kulá Pol yá wáina men du King Agripa, kawana Festus, Benaisi me ámna wahára kámuk áturáng watá tárutang<sup>31</sup> it pahálá wa sangga kungga ku yáni meme ing táuráng, “Pálipuk hánám ámna nátá kandák káman táuk ka táng kalabus kinan titiyan tárák me táng utkámut tátayan tárák kámá ma hálek.”

<sup>32</sup> Iná Agripa yá ku Festus inuk, “Ámna náwu Sisa yá watán me nanaráya ma miuk ináku satá along háná kunggam.”

## 27

### *Pol tángga kilang hára Rom ba kuráng*

<sup>1</sup> Kulá Pol pinná tángga áturáng watá nándá káwak Itali káin kukuya me hárotang sat árán du Pol yot kalabus kinan nan ámna kámá yot iháng tewe ámna urum káman da táwi yáni kutná Julius watá yángotang kukuya ketná hára tiuráng. Ámna wawu Sisa yan tewe ámna tombong háranan. <sup>2</sup> Kulá kilang káman it táwi Adramítium wakáinnan dá áwán wahára árángga kungga ku Esia provins wata kinan táp tangtang it táwi átaráng wahára hanghang tángga kukuya ku hulátíngga kumán. Ámna káman kutná Aristakus wawu Masedonia provins nan it yáilá Tesalonaika káin átnándak watá nányot kumán. <sup>3</sup> Tembátnáya ku it táwi Saidon káin kung hengga ku Julius yá Pol háláng imámáya naránga ku Pol san kungga nuknukngá kápán náuta kesák táuk wa háláng imámáya kuk. <sup>4</sup> Kulá wahára átang gu Saidon sangga kungga kálu kukuya kumán wawu iruk ká hásingga kálu maráng námán du ailan Saiprus numkálu kumán. <sup>5</sup> Táp táitná háng tángga kungga ku Silisia provins yot Pamfilia distrik kán táp isutang kungga Lisia provins káin it yáilá Maira káin kung hiután. <sup>6</sup> Kung wakáin du tewe ámna yáin yáni watá káuk ku it yáilá Aleksandria yan kilang káman dá Itali kukuya tán kangga ku kilang wahára árángga ku Itali ya kumán. <sup>7</sup> Kulá wahára átang gu iruk ká táwi hánám náhángga árán du rám máro yon tumtumá hánám kumán. Wáina kungga yáup háláng hánám tángga it Nidus tangtang kálu kumán, enendu iruk ká táwi hánám tán wakálu ma kukuyan háleudu son hurik tángga ailan Krit kálu kungga wu Salmone kuro tak táng hátingga kungga ailan Krit numkálu kumán. <sup>8</sup> Wáina kungga ku Krit tán táp hulá wa isutang kumán wawu háláng háláng hánám wáina kungga ku ále ore káman kutná Pasis Álo Kámá wahára kung hiután. Ále wawu it Lasea wata tangtang káin.

<sup>9</sup> Rám máro hánám watá há kung du Juda yá rám sungi sangngataráng wawu há táng hátiuráng. Táp pá wáik hálengga árán kálu kukuyan watá pikpito háliuk háleudu Pol yá yánuk,

<sup>10</sup> “Ámna náut, no káet tu kálu ná áwemán wawu kungga márapmá táwi hánám hára kukuyan tárák hálengga átak. Náni me kutná kutná me kilang kot kámuk yakyawinémán dán tárák.”

<sup>11</sup> Pol yá wáina yánuk, enendu tewe ámna yáin yáni watá ku Pol yan me wa ma narená ku kilang gán kepten me kilang márumá watán nanará isutuk. <sup>12</sup> Pasis wa áturáng wawu iruk ráma hára átnát tán tárák muná wáina háleudu táup hánám watá ku pasis wa sangga ku kung it táwi Finiks yan pasis káin árátne iruk ráma watá sálíngkig ingga miuráng. Finiks yan pasis wawu ailan Krit káin átnándak, káe yá haha irang kálu along álo kukuyan me káe yá haha ámang kálu along wáinanyon kukuyan.

### *Iruk ká hásingga táp pá wáik hánám háliuk*

<sup>13</sup> Kulá ámuta kálu nan iruk isikimo yá hásiuk wahára wu watá nángorán rehára kukuya miután wakáin álo kuinemán ing mengga sangga ku anka uying sat árán du Krit tán táp hulá isutang kumán. <sup>14</sup> Kungga átumán enendu rám isikimo emá kungga átnáne iruk maming hánám táwi watá ailan trong kálu hásingga háuk. Iruk wawu ámuta yan iruk ing mengngataráng. <sup>15</sup> Iruk watá áwáng kilang wa táwi hánám tán du kilang pinná tátá watá kilang wa táng hurik tátáya tát men du sat iruk watá kilang wa hásingga tángga kuk. <sup>16</sup> Wáina tán du ailan isikimo kutná Kauda wata susuya kung árátne iruk ká hálángngá han du bot isikimo uying satne kilang wata kinan áwik ingga ku yáup háláng hánám wa tángga átang gu uying satne árán páup pá káto hárotumán. <sup>17</sup> Kulá wáina tángga ku kilang wa káto hárot táng sat átnát ta páup maming tátáwi hিরarát kilang tárang kálu kut tu iháng kik táuráng. Iruk ká iháng kung táp káin ále ore káman kutná Sitis wawu sán dá táp kinan yamán dá ina átaráng wata ketnán tiwon ingga pikpito naruráng, wáina háleudu lap kilang káin putená wa uying hirarát hat, hang palang maming táí anka ina putíngga sat táp kinan han du kilang gá ku

tumtumá kuk. Wáina tángga ku sat tu iruk ká kilang wa tángga kuk. <sup>18</sup> Tembátána ku iruk me táp watá táwi hánám wa tángga náháng sunggulinán tán kangga ku kilang pinná tátá yá wu yumnak tátáyan kutná kutná kilang kinan nan wa táng hirarát táp kinan háuráng. <sup>19</sup> Wáina tángga árán rám kaláhu há lengga árán du kilang pinná tátá watá kutná kutná kilang tán kándáng kuku wa táng hirarát táp kinan háuráng. <sup>20</sup> Wáina tángga rám máro hánám wa káe me hitung kámá ma kápumán, hang táp me iruk táwi tángga átuk wáina há lendu kungga kep káin kukuyan nanará wa nápmangga kun du muná kuku wahára pahán tingga itumán.

<sup>21</sup> Kulá ámna yá sungi ma náená rám há sák árát tu Pol yá orek yáni hára tárutang gu yánuK, “Sándá nákkán milun isutang ailan Krit káin há átumán ináku rám wáik ing ma kanggatnem me kutná kutná táí nátá ing ma yakyawinggalát. <sup>22</sup> Enendu pahán sáni ma háindak, náuta orek náni hára káman dá ma yakyawindák, ináku kilang gá re ku wáina márikngingga háineK. <sup>23</sup> Kuip yáungán Ánutu ni náK nangot koek me no naráng háting mánggoet watán angelo yá áwáng kondonna hára árán kangngáre <sup>24</sup> ing nanák, ‘Pol, ma pitáindalák. Há átag kungga Sisa rahálá hára ku há átnelák. Ánutu yá kák pahán kamek wata tángga ku ámna kilang hára átaráng waháranan káman dá ma yakyawindák.’ <sup>25</sup> Wáina nanák wata ku pahán sáni ma háindak. No ing hánám há naret, Ánutu yá rina nanák wawu wáina há táineK. <sup>26</sup> Wáina táineK enendu kilang wawu kung rehára kámá ailan hára kátingga wáik háleineK.”

### *Kilang gá márikngiuk*

<sup>27</sup> Kulá yáung 14 wahára ku Mediterenian táp wakálu iruk ká náhán kungga átumán. Yáung táitná náut wáina kálu kilang pinná tátá yá “kámá káwak tangtang háM áwemán,” ingga mengga ku <sup>28</sup> yáni wu náut kámá márapmá páup pá putená wa táp kinan sat han táp há sákngá wa káuráng gu 40 mita kangga son isikimo sim kungga son sat han káuráng gu 30 mita. <sup>29</sup> Yáni wu kungga sup ketnán áráninggom ingga pitángga ku anka 4 hirarát sárummá kálu han du álo áratne kungga it tá háineK ingga wata sáponga tángga áturáng. <sup>30</sup> Kilang pinná tátá yá bot isikimo hára árángga kilang sangga kunin ingga ku bot isikimo páupmá yalit táp káin han du kusák pilengga kilang kuro káin anka hiratne hangga átaráng ingga tángga áturáng. <sup>31</sup> Wáina tát kápángga Pol yá tewe ámna yáin yáni yot tewe ámna wa yánuK, “Ámna nátá kilang káin ma átnándárang wawu sándu yakyawineráng.” <sup>32</sup> Wáina ingga yánán du watá páup bot putená wa maráng rákrákit tát tu bot watá hánámá kuk.

<sup>33</sup> Kulá káe yá áráng heinán tángga átuk kálu ku sungi kámá nanaya Pol yá me káto ing yánuK, “Rám há sák hánám átnemán me kámutnemán ingga pahán sáni sángen sungi ma náená árát rám 14 há lengga átak. <sup>34</sup> Wata ku sungi náineráng watá ku há lánng sámineK. Ing narineráng, sándu rina kámá ma táindárang. Sán kámuk ku álo rewe átneráng.” <sup>35</sup> Wáina yánángga ku másáng táng rahán yáni hára sáponga tángga ulángga náuk. <sup>36</sup> Wáina tán kangga kámuk hánám pahán yáni álosim hálen narángga ku sungi yáni iháng náuráng. <sup>37</sup> Kilang kinan átumán wata sale náni kámuk ku 276. <sup>38</sup> Yáni wu sungi tarák yáni hára álo nangga ku wit bek kilang kinan árená wa táng hirarát táp kinan hat tu kilang gá tiyawingga áruk.

<sup>39</sup> Kulá it tá háiuK hára há lengga káwak ku enanggon árán há káuráng, enendu wahára áwemán ingga ma naruráng. Ále wahára áwemán ingga ma narená pasis káman sán dá re álo kámá árán kangga ku kung wahára álo háM hanggatnem ingga ku kilang wa raták tátne wahára kuik ingga naruráng. <sup>40</sup> Wáina nangnaráng gu anka páup yáni wa marángga ku yápmat táp kinan hat tu waháranon kilang táng hukhurik tátá yangngá káin átnándamálák wata páup yándi yalingga sel kuro tangtang árená wa uyit árán iruk ká wahára hásingga árán du sán káin hanin ingga kuráng. <sup>41</sup> Enendu kilang kuro watá kung táp kinan sán ketnán árángga káto há lengga árán táp punggilá yá áwáng kilang yangngá wa káting mákmárák tángtáng tángga átuk. <sup>42</sup> Wáina tángga árán kangga ku tewe ámna yá ku kalabus kinan nan ámna wa ráháng kátkámut tátáya me táuráng, náuta táp kinan hangga pipiya tángga há yáni kuniroK ingga wata. <sup>43</sup> Tewe ámna yá nanará wáina tiuráng, enendu tewe ámna yáin yáni watá Pol yan átkuku wa ma táng háteK tátáya naruk, wáina wata ku watá kalabus kinan árená wa ma ráháng kátkámut táindárang ingga yánuK. Niyá pipiya álo tátáyan watá kálak kilang sangga hitangga pipiya tángga sán káin kuniráng ingga yánuK. <sup>44</sup> Iná kátu yá ku palang me kilang márikngená kátu hára tángga átag gu sán káin kuniráng ingga yánuK. Wáina yánán du watán me isutang kámuk hánám sán káin há kumán. OreK náni hára káman kámá ma yakyawiuk.

## 28

### *Pol yá ailan Malta káin átuk*

<sup>1</sup> Kung sán káin álo re hangga káumán du ailan wawu Malta. <sup>2</sup> Iná ailan waháranan watá náhángga áwáng rina kámá ma táuráng ináku heronge náháng mengga ku ále yá tangga átag kotkoringga átuk há lendu káráp sing námuráng. <sup>3</sup> Pol yá kung káráp kámá kámondang iháng

áwáng singngárán kunap wáik káman káráp kinan átuk watá káráp yamá yá kan áwáng Pol ketná hára sánga tuhánga átuk. <sup>4</sup> Wáina kangga ámna náráwa ailan waháranan dá yáni meme táuráng, “Ámna náwu ámna ráháng kátkámut tángngátak háam, wata ku márapmá táwi wata kinan hanggoek. Táp káin márapmá kinan háuk, enendu ma kámurak, kulá hang márapmá nukngá yá ku táp tangtang káin son táek. Ánutu náni kutná Topmá Tátá\* watá ámna nátá ma háam átnát ta narek.” <sup>5-6</sup> Wáina mengmeng átang káuráng gu Pol yá kunap wa kátang san kung káráp ranga árená wata kinan háuk. Kulá ámna náráwa yá ku Pol ketná yá tiháinek me kámutang táng hang kátinek ingga ráam háasák kangga áturáng, enendu rina kámá kámá Pol sutná hára ma tunggafiuk. Wáina ma tunggafen kangga ku nanará wa sánga son ámna náwu ánutu káman ing miuráng.

<sup>7</sup> Kulá it kapme táwi káman enanggon wahára átuk wata márumá ku ámna káman kutná Puplius. Ámna wawu ailan watán ámna hulá táwi. Ámna watá heronge mená nánánga nángot kung itná káin tingga pin náni kándáng tán watyot ráam kaláhu átumán. <sup>8</sup> Iná ámna wata naning gu ilalák tánga kámun táptáráp sippot sippot tánga sutná yá ángárangin átuk. Wáina árán Pol málám kung wa kangga sáponga táng mángga sánga ku ketná yá yáilá hára usáng hang tin álo háliuk. <sup>9</sup> Wáina álo hálek ingga met naránga ku ilalák mara ailan wahára árená watá kámuk Pol yan káin áwánga álo hánghálang táuráng. <sup>10</sup> Wáina hálendu kut náni meng toling nángnámáng kándáng hánám wa náháng tolingga árát kungga nánda kukuya táumán wahára wu kutná kutná náuta kesák táumán wa hálang námuráng.

#### *Rom káin kung hiúmán*

<sup>11</sup> Ailan wahára yap kaláhu átumán. Kulá it yáilá Aleksandria yan kilang káman ailan wahára iruk ráamá watá sálin kuin ingga hálang mángga átuk. Iruk ráamá watá há sálikngin du kilang wahára kumán. Kilang wata kuro káin du ánutu kusák yará wawu punpuraan Kasto káling Poluks wata utni yándi yá átumálák. <sup>12</sup> Kungga ku it táwi Sirakyus wakáin kung ráam kaláhu wahára átumán. <sup>13</sup> Kulá waháranan dá ku kungga it táwi Regium káin kung hiúmán. Iná tembátnáya ku káwak ámuta yan iruk watá tárutang hálang námán du Regium sánga kungga ráam nukngá hára wu it táwi Puteoli wakáin kung hiúmán. <sup>14</sup> It wakáin du Jesu yan tombong kámá wakáin kápátne ku watá sonda orek kámá nányot átnérang ingga nánánga nángorát kumán. Kulá waháranan dá ku háram kálu kungga it yáilá Rom ba kumán. <sup>15</sup> Kulá Jesu yan tombong Rom káin áturáng watá wáina áwánga átkoeráng ingga met naruráng hára wu kálu pana nánáhaya áwuráng. Wáina áwát nándu kungga Apius yan maket wahára kámá kápánga ku son kungga it kutná Lombu It Kaláhu wahára kámá kápumán. Wa kápánga ku Pol yá Ánutu heronge táng mángga ku pahálá kinan hálang táuk. <sup>16</sup> Kulá Rom káin kung hiúmán hára wu tewe ámna yáin yáni yá álo ingga men Pol wu it hánámá káman sang mát tu tewe ámna káman táng tin wata pinná átuk.

#### *Pol yá Rom káin Táwi yan me yánánggiuk*

<sup>17</sup> Kung Rom káin ráam kaláhu átang sánga ku Pol yá Juda wakáin árená wata yáin yáni watá áwineráng ingga men áwát tu yánu, “Yanuknukna, no ámna náráwa náni Juda ya rina kámá ma táut, me táwi ilom náni yan kálu wa kámá ma hitik táut, enendu Jerusalem káin ket nehánga neháng Rom ket yáni hára tiuráng. <sup>18</sup> Wáina tát Rom bá nákkán me wa naránga káuráng gu no rina kámá káman táut náya kátkámut tán tárak ku muná. Wáina hálendu nepmat along kukuya táuráng, <sup>19</sup> enendu Juda yá no along kuku wata taktak yámán du wáina ma tátá ingga Rom yánuráng, wata ku no Sisa yá nákkán me narinek ingga miut. No wáina miut wawu náuta no nare há átnát tán káluná muná. Wáina miut wawu no tombongna Juda wa iháng Rom rahán yáni hára me hára titiya muná. <sup>20</sup> Wáina hálendu me wa sásánáya ku pin te áweráng. Ánutu yá ámna náráwaná son iháhá watá áwinek ingga Israel nán uláp nánu. No me wa pálipuk ingga naráng hátingngátat wáina hálendu sen dá ná káto nehánga átak ná.”

<sup>21</sup> Wáina yánán du Juda áturáng watá inuráng, “Nánda papia kámá Judia kálu nan kák ka wáina ingga kámá ma sat áwán káumán, hang nuknuk náni kámá wakálu áwuráng watá kák ka me kandák kámá ma met narumán. <sup>22</sup> Ináku inggálu ku ámna náráwa itná itná watá miti mirak tunggafen wata wawu wáik ingga menggoerágu, wata ku ko rina hánám wa kándáng metá narinemán.”

<sup>23</sup> Wáina inánga ku ráam káman tingga wahára áwinemán ingga miuráng. Rám wahára ku ámna táup hánám watá it Pol yá átuk wakáin hilápmá kálu áwáng árát kungga yonyon tiuk. Wahára wu málám Ánutu yan átkuku wata wáina ingga hiták hánám yánánga ku Moses yan meng rákit me, me profet tán me wa kámá mengga ku me wahára kungga kándáng naránga Jesu ya naráng háting mániráng ingga kándáng hánám yánáng toktolik táuk. <sup>24</sup> Wáina yánán

\* **28:4:** Ailan Malta wahára wu ánutu yáni táup waháranan káman du kutná ku Topmá Tátá.

du kámá yá ku Pol yá rina miuk wawu pálipuk ingga naruráng, iná kámá yá ku pálipuk ingga ma naruráng. <sup>25</sup> Wa nangnaráng tángga ku kunin ingga tángngárát tu Pol yá ing miuk, “Iruk Káungá watá profet Aisaia wata milunná hára táwi ilom nani wa me pálipuk hánám yánuk, wawu ing,

<sup>26</sup> ‘Ko kungga ámna náráwa wa ing yánáng,

“Sándu narineráng enendu wata hulá hánám bu wáina ingga ma narindáráng,  
me rahán sáni hálengga átneráng enendu páliná wu ma káindáráng,” wáina ingga yánáng.

<sup>27</sup> Ámna náráwa wata pahán yáni wu há káto háliuk,  
iná káráman yáni yá me nanará ya taktak yámán  
yáni yon rahán yáni ruháng táringga átaráng.

Wáina táuráng, náuta rahán yáni yá kangga  
káráman yáni yá narángga  
wata hulá wáina ingga pahán yáni káin narángga ku

pahán yáni hurik tát no iháng totoliya takta naruráng wata.†

Aisaia yá ku me wáina miuk.

<sup>28-29</sup> “Kulá wata ku sándá ing narineráng, Ánutu yá ámna náráwa son iháhaya miuk watán me wawu san ámna náráwa ále kámá káinnan watán káin há kuk wa watá ku narineráng.‡”

<sup>30</sup> Kulá Pol málám bu yara yará it káman hára átkiuk. Átang gu it wahára átnát ta it wata márumá sup kámá imánggiuk. Káman niyá kakaya áwánggiuk wawu iháng heronge tánggiuk.

<sup>31</sup> Táwi yan me yánáng tolinggiuk wahára wu náut kámá káman dá káto táng mámáyan du muná. Málám ma pitáená Ánutu yan átkuku wata yánángga ku Táwi Jesu Son Iháhá wawu wáina wáina ingga yánáng tolinggiuk.

---

† 28:27: Aisaia 6.9-10 ‡ 28:28-29: Nanará ámna kámá yá ing narángngátaráng, me kátu kámá tombong ore nahára hányon átak wawu ing, “Pol yá wáina meng hálin du Juda ámna yá sangga kuráng. Sangga kungga orek yáni hára menmen táwi tángga honhoren dá tunggafiuk.”

## Pol yá Galesia yan papia uying yámuk

<sup>1</sup> Nák ku aposel Pol. Ámna káman dá aposel yáup ná tátáya ma suring namuk, me ámna káman dá aposel yáup wa táinelák ingga ma neháng tunggap táuk. Jesu Son Iháhá me Nan Ánutu ni Jesu há kámurená háranan táng tárut táuk watá yáup ná namumálák. <sup>2</sup> Yanuknukna nayot átamaná nándá papia ná satne Jesu yan tombong Galesia provins káin átaráng sándán da áwek.

<sup>3</sup> Nan nání Ánutu yot Táwi Jesu Son Iháhá watá pahán sámán du pahán láláp pá sányot átnek. <sup>4</sup> Jesu yá Nan nání Ánutu yan pahán isutang nándán mukmuro yanyawon da málámbán átkuku wa sáuk. Wáina tángga káwak nátán mukmuro hulá hulá táwi hánám wata kinan nan son náhuk. <sup>5</sup> Wáina wata ku ráma ráma Ánutu kutná meng tárut tángga átkuinemán. Wa pálipuk.

*Me pingnga álosim wawu káman dá re hánám átak*

<sup>6</sup> Nák ku pahánna kinan yon táwi hánám háramutut náya wáina re átang áwángoet, náuta sándu Jesu Son Iháhá watá pahán sámánga yáup rina táuk wahára kungga ku Ánutu yá málámbán ámna náráwa háháleya mantáng sámuk, enendu sándá sopmuná hánám wa sangga me pingnga hulá kámá ma wa isutkoeráng. <sup>7</sup> Wáina tánggoeráng enendu me pingnga álosim wawu káman dá re hánám átak, nukngá kámá ma árak. Ámna kámá yá nanará sáni wa táng yakyawák tángga ku me hulá kámá wa iháng áwáng Jesu Son Iháhá yan me pingnga álosim wa táng hukhurik tát kámá kámá kunggoek. <sup>8</sup> Iná nán háranan ámna káman me alek káinnan angelo káman me ámna nukngá kámá yá áwáng me pingnga álosim nándá uláp sánuman wa sangga me nukngá kámá sáninemán hárendu ámna niyá kálu wáina táinek wawu káráp lánggop sásáliná muná watán pingnga háleinek! <sup>9</sup> Me há miután wa son meinándet. Káman niyá áwáng me pingnga álosim sándá uláp táuráng wa sangga me nukngá kámá sáninek hálen ámna wawu káráp lánggop sásáliná muná watán pingnga háleinek!

<sup>10</sup> Kulá no me wa met wawu ámna yá naráng namát álosim háháleya, me Ánutu yá naráng namán álosim háháleya me? Me hánámá ámna pahán yáni táng heronge tátáya re hám tánggoet? Muná. Uláp pu met wáina tánggiut, iná inggálu pálipuk no hánámá ámna pahán yáni táng heronge tátáya re tánggoet hálen wawu nák ku Jesu Son Iháhá watán yáup nangge muná.

*Pol yá aposel háliuk watán pingnga*

<sup>11</sup> Yanuknukna, no pálipuk hánám ing sánin, no Jesu yan me pingnga uláp sánut wawu ámna nangge yá ma táng tunggap táená. <sup>12</sup> No me pingnga álosim wa ámna káman dán hára ma táut, me káman dá ma nanáng toliuk. Ináku Jesu Son Iháhá málámbá ku me pingnga álosim wa meng tunggap tán hiták hálen no wa táut.

<sup>13</sup> Uláp no Juda yan miti hára kálu ket tárak rina isutkiuráng wa isutang átang Jesu yan ámna náráwa wa iháng wáik tánggiut wawu sáni pingngana há nareráng wa. No Jesu yan tombong iháng lem hánám tángga ku wa iháng wáik táe pukon muná kukuya tánggiut. <sup>14</sup> No táwi ilomna yan kálu wa isusut wata táup hánám káto hálenggiut. Juda yan miti káuluná isusut wawu no ámna tunggafefe nání káman nákkán tombong Juda nan áturáng wa iháng hátingga kándáng hánám isutkiut.

<sup>15</sup> Wáina tánggiut enendu uláp mam kinan átu waháranon Ánutu yá há neháng tunggap tángga ku málámbá pahán namánga mantáng namánga neháng málámbán pingnga ya tiuk. Málámbán pahán isutang <sup>16</sup> Nanggená wa wáina ingga hiták naliuk wawu náuta, no Jesu yan me pingnga álosim wa ámna náráwa ále kámá káinnan wa yánánga átkukuya. Kulá Ánutu yá wa naliuk wahára wu Jesu ya naráng mámáya no kung ámna kámá ma yánáng suliut, <sup>17</sup> hang no Jerusalem káin kung ámna aposel kut watá kálak tát no táut wa yánáng sulingga nanaráya manyon kut. Ináku waháranon kung ále Arebia káin átang gu máriya ku son it yáilá Damaskas káin kut.

<sup>18</sup> Kulá Jesu ya naráng háting mángga áre yara kaláhu hárendu Jerusalem káin Pita kangga kámá yá kámá ya narángmán narángmán tátáya wata kut. Kung wakáin watyot rám 15 átumát. <sup>19</sup> Enendu rám wa átu wahára aposel kátu wa ma káput, Táwi Jesu kulaná Jeims wa rewe ku káut. <sup>20</sup> Ánutu rahálá hára no ing sánin, no me pingnga wa uying sámánga átat wawu pálipuk hánám, ma sángsárunggiut. <sup>21</sup> Kulá wata torong káin du provins Siria yot Silisia káin kut. <sup>22</sup> Iná Jesu Son Iháhá yan ámna náráwa judia ále hára it wakáin wakáin áturáng watá ku nák kurák mátapna wáina ingga ma rewe káená áturáng. <sup>23</sup> Ináku pingngana rewe ku ing naránggiuráng, “Huphuráp pu ámna watá náháng wáik tángga Jesu yan me

pingnga álosim wa táng wáik tánggiuk, enendu inggálu ku wanyon meng isutang átninggoek.”  
 24 Ánutu yá nák neháng rina táuk wa naránga ku wata Ánutu kutná meng tárut tánggiuráng.

## 2

### *Aposel yá Polyot pahán káman háliuráng*

<sup>1</sup>Yara 14 átang sangga ku Banabas yot nát tá Jerusalem káin son árangga kukuya no Taitus ine nátyot káman kumán. <sup>2</sup>Kulá Táwi málámbá wakáin kuinelák ingga há nanán du kut watá kung Jerusalem káin átang gu Jesu yan ámna náráwa yáin yáni wa rewe ku me pingnga álosim ámna ále kámá káinnan yánángngátat wata yánut. Yáup rina tánggoet me uláp tánggiut watá hánámá háleiwon ingga ku wata yánut. <sup>3</sup>Rám wahára wu Taitus yot káman átumát. Wawu Grik ámna, enendu Juda yan kálu isutang kípma mamaráya kámá ma miuráng. <sup>4</sup>Kip mamará mená watá tunggafuk wawu ámna kámá Jesu yan tombong ingga kusák pilengga átninggátaráng watá náháng hang titiya nanará yáni káin kilak árán wa pálak áwáng nándán urum wata kinan áturáng. Kálu kándáng Jesu Son Iháhá yá námuk wawu meng rákit me yan kumbi kinan árená waháranan náháng along tiuk wa ámna watá son tát kung watán kumbi kinan átnát ta naruráng. <sup>5</sup>Wáina miuráng enendu nánda watán me kátu kimo káman wahára miuráng waháranan naránga ma hánám táumán. Wáina táumán wawu nánda ku me pingnga álosim watán me páliná watá wáina re sányot átnát wata.

<sup>6</sup>Ámna kámá wu miti yáup watán ámna yáilá ya átaráng, enendu nákkán nanará káin wawu ámna kut yáni pálak me ámna hánámá watá kutná táwi ma hálek. Ánutu yá ámna nangge sut me kut ihená ma kangngátak, ináku pahán yáni kinan kangngátak. Ámna yáilá ingga wahára áturáng watá no me pingnga álosim yánánga átninggátat wata yáne watá rina kámá kámá wata ketnán ma miuráng. <sup>7</sup>Watá kauráng gu Ánutu yá yáup nák namuk wawu no Jesu yan me pingnga wa ámna náráwa ále kámá káinnan yánánáyan, hang kauráng gu Pita wu yáup wáinanyon imuk wawu Juda ámna náráwa wa me pingnga álosim yánánáyan. <sup>8</sup>Pálipuk, Ánutu yá hálang wa Pita imán Juda ámna náráwa arek yáni káin aposel yáup tánggoek, wáinanyon du nák hálang namán no ámna náráwa ále kámá káinnan arek yáni káin aposel yáup tánggoet. <sup>9</sup>Kulá Jeims, Pita me Jon wawu ámna náráwa yá kápát miti yan ámna yáilá háleinggátat watá nák nahánga ku Ánutu yá pahán imánga ku yáup wa imán tánggoek ingga naránga Banabas yot ket nátin tánga nuk náni ingga náhuráng. Wáina náhát watyot pahán káman háleingga ku nát tá ále kámá káinnan watán káin yáup táte ku yáni wu Juda yan káin yáup táineráng ingga me hárotumán. <sup>10</sup>Me káman re nánuráng wawu ámna náráwa ukuro árená wa hálang yámánga átningguinemálák ingga nánuráng. Yáup wáina wawu uláp há tánga áwánggiut náya emá re há tánga átkuinet wata heronge narángoet.

### *Polyá Pita yan kandák wa hiták meng tunggap táuk*

<sup>11</sup>Pita yá it yáilá Antiok káin áwáng átang gu kálu kandák hiták hánám tán kangga rahán táwi hára me táng mut. <sup>12</sup>Pita yá kandák táuk wata pingnganá ku ing, huphuráp pu ámna ále kámá káinnan Jesu yan tombong háleingga árená watyot káman átang sungi nanggiuráng. Máriya ku Jeims yá ámna kámá suring yámuk watá Antiok káin áwáng arát tu Pita yá wa kápánga pitáng yámánga ku ámna ále kámá káinnan watyot sungi káman nana wata pahán yará tánga árongga átang yápmang kung Juda ámna yot rewe átuk. Wa pitáng yámuk wawu Juda ámna Jesu ya naráng háting mená kátu yá ku ámna Jesu yan tombong hálená wawu kámuk hánám kip yáni há mamará háleinek ingga mengngátaráng wata. <sup>13</sup>Kulá Pita yá ket tárák kandák wáina tán kangga Juda kámá Antiok káin árená watá wa isutang wáinanyon tánggiuráng. Wáina tánga arát tu Banabas wawu watán ket tárák kandák watá hányon uying san kung wata kinan háuk.

<sup>14</sup>Wáina tánga arát no kápút wawu me pingnga álosim watán me páliná hánám wa kándáng ma isurát tu rahán yáni hára Pita ing inut, “Kák ku Juda ámna, enendu ku ket tárák tánggoelák wawu ále kámá káinnan dá ina tánggoelák. Juda ámna yá ina ma tánggulák. Wáina há tánggoelák ngáyá ku náuta ále kámá káinnan yánátá watá Juda yan kálu wa isusut ta káto háleinggoelák?”

<sup>15</sup>“Juda nán wawu tombong Juda waháranan hánám tunggafená, wata ku Moses yan meng rákit me rina wa há naremán. Nánu ále kámá káinnan meng rákit mená wa ma narená waháranan muná. <sup>16</sup>Enendu ing narinemán, ámna niyá Moses yan meng rákit me wa rewe isutnek wata Ánutu yá ámna kándáng ingga ma meindák, ináku niyá Jesu Son Iháhá wata naráng háting minek wa rewe ku Ánutu yá ámna kándáng ingga meinek. Nánu Jesu ya naráng háting mángoemán, kálu wahára re wu Ánutu yá ámna kándáng ingga náninek, meng rákit me káluná wahára muná. Ámna káman dá meng rákit me wa kándáng hánám isurán Ánutu yá ámna kándáng ingga ma meindák.

17 “Nándá Jesu Son Iháhá wata naráng háting mámá káluná wahára áratne ku Ánutu rahálá hára kándáng háliuk. Nánu naráng hákhátik kálu isutang átkoemán iná meng rákit me yan kálu wa ma isutkumán, wata ku Juda árna yá sándu kandák tánggoeráng ingga mengngátaráng. Wáina mengngátaráng, wata ku Jesu malámba ku kálu kandák táená wa táng kátó tánggoek ingga ku álo hám menggatnem? Wawu muná hánám, wáina ma meindamán. 18 Iná meng rákit me isusut wa nayon há yawondang gu máriya son táng tárut táinet wawu kandák há táinet. 19 Uláp náku ku meng rákit me wata tárang káin átkiut, iná inggálu ku meng rákit me káluná wa há sangga ku Ánutu yan átnát álosim wata kinan káin átang malámba tárang káin átkoet. 20 Maripong hára Jesu Son Iháhá yot há kámutang átkuku mirak wa há táut. Enendu átkuku wawu nákkán muná, ináku Jesu yan átkuku álosim wawu náku kinan átak, wáina hálendu no káwak ketnán ket tárák rina tánggoet wawu Ánutu Nanggená ya naráng háting mámá kálu wahára. Watá náku ka kikiná hánám naránga káwak sutná wa náku háláng namámáya saúk. 21 Ánutu yá náku pahán namánggoek wa káe wu ále hánám ma háleindak. Iná no meng rákit me wa isutang Ánutu rahálá hára álo árna kándáng háleinet hálen wawu Jesu Son Iháhá wawu hánámá kámutuk ina háleinek.”

### 3

#### *Naráng hákhátik káluná me meng rákit me isusut káluná*

1 Galesia sándu árna náráwa hohoná! Nándá Jesu Son Iháhá wawu maripong hára kátuiráng ingga há sánátne naruráng. Niyá sán nanará sáni táng yakyawák tánggoek? 2 No me káman re ing sánáng sulin, sándá Iruk Káungá wawu kálu rekálu táuráng? Sándá Iruk Káungá wa táuráng wawu Moses yan meng rákit me wa isutang átang me, me pingnga álosim wa naránga ku Jesu ya naráng háting mángga ku wa táuráng? 3 Sándu há hohinggoeráng! Hulátingga Táwi yan árna náráwa háliuráng wawu Iruk Káungá watán háláng hára átninggiuráng, enendu inggálu ku son árna yan háláng hára átkukuya tánggoeráng me? 4 Wawu rina, uláp márapmá táwi hánám suwánggiuráng wawu hánámá suwánggiuráng hám? No naret wawu watá hánámá ma háháleya. 5 Ánutu yá Iruk Káungá wa sámángga ku orek sáni káin ket tárák hulá hulá tán tunggafenggoek wawu rina ta ku wáina tánggoek? Ánutu yá wáina tánggoek wawu sándá meng rákit me wa isutang árat tu wata tánggoek, me sándá me pingnga álosim wa naránga naráng hákhátik hára árat tu wata tánggoek?

6 Kulá sándá Abraham ba narániráng. Ánutu yan papia káin me ing uyená yá átak, “Abraham bá ku Ánutu pálipuk ingga naráng háting muk, wáina wata ku Ánutu yá árna kándáng ingga miuk.”\* 7 Wáina wata ku ing narineráng, niyá me pingnga álosim wa naránga naráng hákhátik hára kátó hálengga átkuineráng wawu Abraham nánangnge páliná hánám. 8 Ánutu yá uláppon ing há naruk, árna náráwa ále kámá káinnan dá me pingnga álosim wa naránga naráng hákhátik hára árat tu no árna náráwa kándáng ingga meinet ingga naruk. Wáina hálendu uláppon me pingnga álosim wa Abraham há inuk, wawu malámbán papia káin ing mek, “Kák hára kungga ku Ánutu yan sambe yá árna náráwa kámuk kán káin tunggafengga kuinek.”† 9 Abraham wawu naráng hákhátik hára átuk hálendu Ánutu yá kuram táng muk, wáinanyon du árna náráwa niyá naráng hákhátik hára átneráng wawu Ánutu yá kuram táng yáminek.

10 Iná árna náráwa kámá yá meng rákit me wa isutang átang Ánutu rahálá hára kándáng átninggoemán ingga narángaátaráng, enendu wawu muná. Ináku yáni wu mukmuro pálak háleineráng, náuta Ánutu yan me papia káin ing átak, “Árna niyá meng rákit me papia káin átak wa kámuk hánám ma isutang átkungátaráng wawu mukmuro yáni pálak, wata ku Ánutu yá márapmá yáminek.”‡ 11 Kulá Ánutu yan papia káin me ing átak, “Árna niyá naráng hákhátik hára átnek wawu Ánutu yá árna kándáng ingga men átkuku álosim wata kinan átneráng.”§ Wáina wata ku me yá ku hiták ing nálek, káman dá meng rákit me wa isurán wata ingga Ánutu yá árna kándáng ingga meme wawu káluná muná. 12 Meng rákit me isusut watá naráng hákhátik watyot imáng ronrosin tángga ma áramálák. Ánutu yan me yá papia káin du ing mek, “Árna niyá meng rákit me wa isutang átkuinek wawu meng rákit me watá átkukuná wa pinná tán átkuinek.”\*\* 13 Ánutu yan papia yá ing mek, “Árna ni táng káráp hára tuháng sat átnek wawu árna mukmuro pálak, wata ku watá márapmá ihinek.”†† Rám Jesu Son Iháhá watá maripong hára kámutuk wawu nándán kome tángga ku kut “árna mukmuro pálak” wa tángga kámutuk, wahára kungga ku meng rákit me isutang árna mukmuro pálak

\* 3:6: Hulátitiná 15.6 † 3:8: Hulátitiná 12.3, 18.18, 22.18 ‡ 3:10: Meng Rákit 27.26 § 3:11: Habakuk 2.4

\*\* 3:12: Pris 18.5 †† 3:13: Meng Rákit 21.23



háhále wata kinan átkutne son náhuk. <sup>14</sup> Ánutu yá Abraham kuram táng mángga ku ámna náráwa kámuk kán káin sambe yá tunggafengga kuinek ingga inuk. Wáina hálendu Jesu Son Iháhá watá yáup táuk wahára kuram wa tiuk wata páliná yá ámna náráwa ále kámá káinnan watán káin tunggafuik. Wáina wata ku nándu naráng hákhátik náni wahára kungga ku uláp Ánutu yá miuk wa isutang Iruk Káungá yá ep náhuk.

*Ánutu yan meng rákit me watá Ánutu yá me káto wáina táinet ingga miuk wa ma hánám yawonándák*

<sup>15</sup> Yanuknukna, no ámna nangge nánin átkuku hára tárák káman ing tin, ámna kámá yá me rina hárotang tinggalát wawu nukngá kámá yá me rina hárotgalát wa sengsáráp tángga me nukngá ma tinggalát me, me rina menggalát wa ma yawongalát. Ámna yá me káto wáina táinemán ingga mengga isutnándaráng wáinananyon du Ánutu yá Abraham inuk wa. <sup>16</sup> Uláp Ánutu yá me káto wáina táinet ingga miuk wawu Abraham enot tán. Táwi yan me ná uyená watá “e ilomya” ingga ma mek me ámna náráwa táup táwi hánám wata ma mek. Ináku “eka”<sup>††</sup> ingga mek wawu káman re, Jesu Son Iháhá wata mek. <sup>17</sup> Nákkán me wata hulá wu ing, Ánutu yá Abraham bot pahán káman mená wa hárotumálák wahára átang yara 430 wata torong káin du meng rákit mená wa Moses ketná hára tiuk. Kulá meng rákit mená máriya tunggafuik watá pahán káman mená uláp tiuk wa yawondang me káto wáina táinet ingga há miuk wa tán ále hánámá ma háliuk. <sup>18</sup> Kulá nánda meng rákit me wa isutang wahára kungga ku Ánutu yá kuram táng nánámáya miuk wa álo ihinemán hálen wawu me káto wáina táinet ingga miuk wahára kungga muná. Ináku ing há naremán, Ánutu yá me káto wáina táinet ingga Abraham inuk wahára kungga ku kuram wa imámáya pahán imángga inuk.

<sup>19</sup> Kulá wáina wawu náuta ku meng rákit me watá átak? Wawu ing, ámna náráwa yá mukmuro náni wawu táwi hánám ingga kangga kándáng naráng rákit tátáya Ánutu yá meng rákit me wa Moses imuk. Wáina imuk wawu Abraham me káto wáina táinet ingga inuk wata torong káin. Meng rákit me watá árán kungga ku Nanggená yá tunggafen du meng rákit me watá sáliknginek ka naruk. Uláp kuram Abraham imámáya me káto wáina táinet ingga inuk wata páliná ku Nanggená yá tunggafuik wa. Kulá Ánutu yá meng rákit mená wa angelo yámán watá táng Moses ámna ore háranan wa imát tu watá táng Israel yámuk. <sup>20</sup> Ámna káman dá málám re yáup táin ingga wawu málám yáup wa táng ámna ore háranan wa ma imánggim. Iná Ánutu wawu málám káman re watá ku kuram wa Abraham imámáya me káto wáina táinet ingga miuk.

<sup>21</sup> Wáina wata ku meng rákit me watá Ánutu yá kuram nánámáya me káto wáina táinet ingga miuk wa táng káyam táek hámm? Wáina muná. Iná Táwi yá meng rákit me wa hulá kámá námán watá átkuku álo námámáyan hálen wawu niyá meng rákit me wa isutgim wata ámna kándáng ingga álo memeyan. Enendu wáina kámá ma árak. <sup>22</sup> Iná Ánutu yan me papia káin uyená watá ku ing mek, ámna náráwa kámuk hánám káwak ketnán átaráng wawu mukmuro yan kumbi kinan átaráng, wáina hálendu niyá Jesu Son Iháhá wata naráng háting minek watá ku Ánutu yá átkuku sásáliná muná wa yámámáya me káto wáina táinet ingga miuk wa isutang yáminek.

<sup>23</sup> Uláp Jesu ya naráng háting mámá wata káluná watá ma tunggafená átuk wahára wu meng rákit me watán kumbi kinan átkiumán. Wáina árátne áwángga ku Jesu yá naráng háting mámá wata káluná yá hiták háliuk. <sup>24</sup> Meng rákit me watá ku hánámá pin náni tángga átang áwángga ku Jesu Son Iháhá watán rám káin áwán du nánda me pingnga álosim wata naráng hátitne ku Ánutu yá ámna náráwa kándáng ingga nanuk. <sup>25</sup> Kulá rám nahára wu naráng hákhátik watá há áwuk, wata ku meng rákit me watá pin náni tán ma átninggumán.

*Naráng hákhátik watá tán du Ánutu nángánangge háliumán*

<sup>26</sup> Sándu Jesu Son Iháhá wata naráng háting mámá kálu wahára kungga ku kámuk Ánutu nángánangge háliuráng, <sup>27</sup> me umi kuhángga ku Jesu Son Iháhá watyot tántápin tángga kutná wa táng sut sáni tánggániuráng. <sup>28</sup> Kulá Jesu yan tombong hára ku Juda nan me Grik nan, yáup nangge hánámá me yáup nangge muná along arená, me ámna me náráwa watá rina kámá ma hálek. Jesu Son Iháhá watyot tántápin tánggoeráng, wata ku sán kámuk ku káman re átaráng. <sup>29</sup> Wáina wata ku sándá Jesu Son Iháhá watán tombong átaráng hálen wawu sándu Abraham nángánangge yá re átaráng. Wata ku Ánutu yá náut Abraham imámáya me káto wáina táinet ingga mengga inuk wawu sándá hányon ihineráng.

†† 3:16: Hulátitiná 12.7, 13.15, 24.7

## 4

*Jesu yan yáup hára kungga ku yáup nangge hánámá nándá Ánutu nángánangge háliumán*

<sup>1</sup> Waháranon da ing, ámma káman da nanggená káman átgim watá ku máriya naning gán kutná kutná wa ihánggim. Kutná kutná wawu nangge watán pingnga ingga há átgim, enendu nangge wawu isikimo wáina hálendu kutná kutná wa ma pin yáni tátáyan tárak, wata ku yáup nangge yá inanyon átgim. <sup>2</sup> Nangge málám bu naning gá ámma nini yá málám me kutná kutná wa pin yáni tátáya iháng tunggap tánggim wata tárang káin áran kungga naning gá rám naránggim wahára ku wáina. <sup>3</sup> Nándu wáinanyon, nangge kikimo nanará náni muná yá ina átang káwak nátán kálu hulá hulá átaráng me iruk wáik hulá hulá watán yáup nangge hálangga átkiumán. <sup>4</sup> Wáina átkiumán enendu Ánutu yá rám tiuk wahára hánám bu Nanggená suring mán áwuk. Áwuk wawu ing, náráwa yá wa tángga táng tin ámma nangge hálangga juda yan meng rákit me wata tárang káin yon átuk. <sup>5</sup> Wáina áwuk watá ku ámma náráwa nánda meng rákit me wata tárang káin átumán waháranan son náhán Ánutu nángánangge háliumán. <sup>6</sup> Nándu Ánutu nángánangge átkoemán, wata tángga ku Nanggená yan Iruk wa suring mán pahán náni kinan háuk. Wáina hang átang gu pahán yot ing mantángga san kunggoek, “Aba\*, Nan.” <sup>7</sup> Wáina wata ku sándu son yáup nangge hánámá ma áraráng, ináku Ánutu yá tán sándu málámba nángánangge háliuráng, wata ku málámábá náut álosim tiyawuk wawu sándán.

*Pol yá Galesia ya narángpak táuk*

<sup>8</sup> Uláp pu sándu Ánutu ma naráng mená áturáng wáina hálendu ánutu kusák watán yáup nangge hálangga átkiuráng. <sup>9</sup> Iná inggálu wu Ánutu há naráng meráng - son ing mein, Ánutu yá há naráng sámek. Wáina enendu rina tángga ku son hurik tángga káwak nátán kálu hulá hulá me iruk wáik hálang yáni muná watán káin kungga ku son watán yáup nangge háleinán tánggoeráng? <sup>10</sup> Rámá rámá wu miti yá hahayan rám táwi, yap mirak kán rám táwi me yara mirak kán rám táwi wahára rina isusut ta mená wa há isutnemán ingga naránggoeráng. <sup>11</sup> No sándán ket tárak wata narángga ku pitángoet, náuta no yáup rina sán orek sáni káin táut watá hánámá yakyawiwon wata.

<sup>12</sup> Yanuknukna, no pahánna yot ing sánin, wata uláp meng rákit me isusut wa sangga sán inanyon háliut, wáinanyon inggálu ku sándá nák inanyon háleineráng. Sándá náka kandák kámá ma táng namuráng. <sup>13</sup> Sáni há nareráng wa, sutna ilalák pálak wata ku hulátangga hánám kung sándán káin me pingnga álosim wa mengga kut. <sup>14</sup> Rám wahára wu sutna ilalák pálak kut hálendu no sándá sárum namángga náka taktak sáminek ingga narut, enendu wáina ma táuráng. Ináku sándá nák ku Ánutu yan angelo me Jesu Son Iháhá táng tolinggalát ina nák neháng toliuráng. <sup>15</sup> Rám wahára wu heronge hánám tángga nák pahán namuráng, enendu inggálu ku heronge wawu rekálu kuk? Pálipuk ing sánin, rám wahára wu nák hálang namámáya álo kámá hánám táuráng. Rám wahára sándá rahán sáni holengga namámáya wu álo yon holengga namánggalát. <sup>16</sup> Kulá inggálu ku rina? No me páliná wa sánángoet wata ku sándá nák káyamma hálanggoeráng me?

<sup>17</sup> Ámma wawu hahatingga pahán sáni haha tángga ku sán sáhát watán tombong háhále wata tánggoeráng, iná watán káin du sán hálang sámámáyan nanará kámá ma átyámák. Watán nanará káin wawu sán sáháng horet sándá nák nepmangga ku yáni yot káman hálangga átnát wata tánggoeráng. <sup>18</sup> Ámma káman dá nanará álosim sánáng tolin narángga ku wa álo isutneráng. Rámá rámá wu wáina tángga átkuineráng, no sányot átnet wahára rewe muná. <sup>19</sup> Yanángánanggena, no láwit narángoet wawu nangge yá tunggafeinán tát mam yáni yá láwit naránggátaráng wáinanyon narángga áre kungga Jesu Son Iháhá yan átkuku watá sándán pahán kinan táwi hánám háleinek. <sup>20</sup> Ukuro hánám bu no rám nahára sányot ma árat wata. Iná na sányot há átang ináku me wa tángga hangga káluná hára mengga sánánggem. No sándá narángpak hánám tángngátat, enendu no mulángán káin átnándat hálendu rina hálang sámánggem wawu ma narát.

*Sara káling Hagar yan me tárakngá*

<sup>21</sup> Kulá sán niyá juda yan meng rákit me wata tárang káin átnát ta nareráng watá nanániráng, sándá meng rákit me wa ma hám nararáng? <sup>22</sup> Táwi yan me wu ing uyená yá átak, Abraham wawu nanggená ámmaaná yará. Káman wawu yáup náráwa hánámá yan, hang káman wawu áwáná hánám along átuk watán. <sup>23</sup> Nanggená yáup náráwa hánámá watán wawu kálu rehára nangge yá tunggafengátaráng wa isutang tunggafiuk, iná áwáná hánám along átuk wata nanggená wawu Ánutu yá me káto wáina táinet ingga mengga Abraham inuk wa isutang gu watá tunggafiuk.

\* 4:6: Aba wawu Aramek me kálu ku “nan”.

<sup>24</sup> Kulá pingnga wata kinan du me tárakngá yá átak wawu ing, náráwa yará watá ku pahán káman me yará Ánutu yá káman Abraham imuk, káman Moses imuk wata tárakngá. Hagar yá ku ále yáilá Sainai káin pahán káman me imuk wata tárakngá. Pahán káman me wawu ing, ámna náráwa yá rámá rámá meng rákit me wa kámuk hánám isutang átningga ku meng rákit me watán yáup nangege hálangga átkuineráng. <sup>25</sup> Hagar watá ku ále Arebia káin ále yáilá Sainai watyot Jerusalem nahára átak wata tárakngá. Jerusalem wawu hánám yáup náráwa, iná yanánganngéná wawu yáup nangege rewe. <sup>26</sup> Iná Jerusalem kámá irawa káin átak wawu mam náni. Wawu meng rákit me watán yáup náráwa muná, áwáná hánám Sara ina. <sup>27</sup> Táwi yan me hára ing uyená,

“Náráwa kátoná kák niyá nangege ma iháng tingngátalák, heronge táinelák.

Náráwa kák niyá nangege iháng tingga láwit narená wa ma narulák, kák ku pahán álosim naránga hahatingga yon mantáinelák.

Náuta náráwa kátoná yá nangege iháng tinek wawu náráwa nánáun yáni pálak ká nangege iháng tingngátaráng wa iháng hátingga táup hánám iháng tinek.”†

<sup>28</sup> Kulá yanuknukna sándu Aisak inanyon Táwi yá me káto wáina táinet ingga mengga Abraham inuk wata nánganange. <sup>29</sup> Rám wahára nangege Ismael wawu kálu rehára nangege yá tunggafengngátaráng wa isutang tunggafiuk watá ku nangege Aisak Iruk Káungá yan hálanggá hára tunggafiuk wa táng lem tánggiuk. Rám nahára wu tárak wáinanyon. <sup>30</sup> Wáina átkoek enendu Ánutu yan me yá rina mek? “Yáup náráwa hánámá wata nangege not wa yásurátá kundimálák, náuta máriya yáup náráwa wata nangege yá áwáná hánám along átuk wata nangená watyot naning gán kutná wa ma horengga ihindámálák.”‡ <sup>31</sup> Wáina wata ku, yanuknukna, nándu yáup náráwa wata nánganange muná, ináku áwáná hánám along átuk wata nánganange.

## 5

*Jesu Son Iháhá wahára kungga ku meng rákit me wata tárang káin ma áramán*

<sup>1</sup> Jesu Son Iháhá watá náhang along tiuk wáina hárendu meng rákit me wata tárang káin ma áramán. Wáina wata ku káto hálangga átang gu sáni táng kung son meng rákit me yan yáup nangege háhále wakáin ma tinaráng.

<sup>2</sup> Naráneráng! Nák ku Pol no ing sánindet, kep sáni maránga ku Ánutu rahálá hára rongrongngá háleinemán ingga nareráng hálen, wawu Jesu Son Iháhá watán yáup watá sán hálanggá sásámáyan wawu kálna muná hánám. <sup>3</sup> Sán ámna nini yá nándu Ánutu yot pahán káman háleinemán ingga sáni álo ing met kep sáni marineráng, wawu son hiták ing sánindet, wáina há táineráng, wata ku meng rákit me rina átak wa kámuk hánám kándang isutneráng.

<sup>4</sup> Iná sándá meng rákit me wa isurátne ku Ánutu yá ámna kándang ingga náhinek ingga naránga átninggoeráng hárendu wawu Jesu Son Iháhá háranan horengga Ánutu yá pahán námuk wa sangga kunggoeráng. <sup>5</sup> Iná nándu Iruk Káungá yá hálanggá námán Ánutu yá náut álosim námámáya miuk wata hálangga átkoemán. Náut álosim wata hálangga átkoemán wawu málámbá ámna náráwa kándang hánám ingga náninek wa, náuta nándu Jesu Son Iháhá ya naráng háting háting mánggoemán wata. <sup>6</sup> Káman dá Jesu Son Iháhá watyot átak hálen wawu kepmá marená me kepmá ma marená watá ále hánám hálek. Iná káman dá Jesu ya naráng háting mámá kálu wahára káto átnék watá ku páliná hánám hálek. Naráng hákhátik watá ku kámá ya kikiná nanará wa tán ámna watán átkuku káin tunggafeinek.

<sup>7</sup> Huláttingga ku kálu kándang wahára re há kungga áturáng, enendu niyá hánám bu pana hangga kálu sung sámán du me pálina wa ma isutkuráng? <sup>8</sup> Kálu kándang sasayan me karo wawu Ánutu niyá mantáng sámánga átkoek watán káinnan muná. <sup>9</sup> Ing naraneráng, yis isikimo watá tán másang watá kámuk tihangngátak wáinanyon du me kusák isikimo watá ámna náráwa táup táwi iháng wáik tángngátak. <sup>10</sup> Nák nanarána káin du ing hánám naránga átat, Táwi yá álo hálanggá sáminek ingga naret wawu ing, sándu ámna kámá yan me ma isutnándaráng, ináku nákkán me ná rewe isutneráng. Iná ámna káman ni, kutná táwi me ámna hánámá, watá sán sáháng yakyawák tángga átninggoek wa, wawu málámbá kandák wa tánggoek wata watán márappá táwi suwinek. <sup>11</sup> Yanuknukna, pálipuk no Táwi yot pahán káman háháleya kep marineráng ingga yánánga átninggoet hálen wawu náuta ku Juda yá emá re nák neháng lem tángga átkoeráng? Iná no watán nanará wata álo ingga mengga Juda yan meng rákit me isutnemán ingga sánánggem wawu Juda yá wata neháng lem ma tánggalát, me Jesu yá maripong hára kámutuk wata me wáik ma menggalát. <sup>12</sup> Ámna niyá nanará sáni táng yakyawák tánggoeráng wawu káto hálangga kep mamará kálu wa isusut ta sánánggoeráng,

† 4:27: Aisaia 54.1 ‡ 4:30: Hulátitiná 21.10

wáina hálandu álo kámá wawu yáni wu yáni ya kep yáni wa maránga ku ponggon yáni wa hányon ránineráng!

<sup>13</sup> Yanuknukna, pálipuk sándá along átnéráng ingga ku Ánutu yá mantáng sámuk. Enendu sándá along átaman ingga kung pahán kakngá isusut kálu wahára hanerot, ináku sán káman káman wawu Táwi yan ámna náráwa wa kikiná kápánga watán yáup nange hálangga átkuineráng. <sup>14</sup> Meng rákit me isusut wata mená wu wahára erek áthálek wawu ing, “Kaya kikiná rina naránggatalák wáinanyon nange nuknukka ya kikiná narinelák.”\* <sup>15</sup> Iná sándá kuk tángmán tángmán tángga orek sáni hára kámkáyam átkoeráng hálandu wawu ing naráng rákit táineráng, wáina táená wata kámuk naráng hákhátik sáni yá sohingga hangga wáik háleiwon.

*Iruk Káungá yan kálu me pahán kakngá yan kálu*

<sup>16</sup> Wáina wata ku no ing sánin, sándu Iruk Káungá watán kálu wahára átkuineráng, watá ku pahán kakngá yan kikiná wa ma isutang átkuindaráng. <sup>17</sup> Há naremán wa, pahán kakngá watá Iruk Káungá wa táng hang tin ingga tán, Iruk Káungá watá pahán kakngá wa táng hang tinán yon tán du yándi honhoren átnándamálák, wáina wata ku rina tátáya narineráng enendu ma táindaráng. <sup>18</sup> Iná Iruk Káungá watá sán sángorán átninggoeráng hálen wawu sándu meng rákit me wata táng káin ma áraráng.

<sup>19</sup> Kulá pahán kakngá yan ket tárák wawu hiták ing átak, márámamák, ket tárák reprepmá, put ang gán ket tárák. <sup>20</sup> ánutu kusák ináng sákngingi, iruk wáik kán nanará isusut, kámkáyam tátá, menmen tátá, kámá yan kutná kutná kápáng naknarák, pahán káráp tángga kuk tátá, ka rewe hálang kamán átnát tán nanará, honhoren tátáyan nanará, kámá yá kámá táng hang titiyán nanará, <sup>21</sup> álo kámá árát kápánga pahán káráp táng yámámá, umi káto nat ip ráráhá, umi sinak táená kinan ket tárák kandák tátá, me ále ket tárák wáina wa. Uláp há sánut enendu son wanyon ing sánindet, ámna niyá ket tárák wáina tángga átkuinek wawu kungga Ánutu yan átkuku wata kinan ma háindák.

<sup>22</sup> Iná Iruk Káungá yá ámna káman da pahálá kinan árán du átkukuná káin páliná ing tunggafen káineráng, kámá ya narán kikiná háhále, pahán heronge, pahán láláp, pahán káráp sopmuná ma tátá, kámá hálang yámámá, ket tárák álosim tátá, rámá rámá kándáng re árán kangga meng toling mánggataráng, <sup>23</sup> hangga yolopon átkuku, hang átkukuná kándáng pinná tátá. Meng rákit me káman dá ket tárák wáina wa ma táng hang tindák. <sup>24</sup> Ámna náráwa ni Jesu Son Iháhá watán pingnga watá pahán kakngá watyot watán kikiná wa iháng maripong hára kátit há kámutuk. <sup>25</sup> Iruk Káungá watá átkuku páliná námuk, wata ku nándá satne Iruk Káungá watá nángorán átkuinemán. <sup>26</sup> Nándá náni ya kut náni ma tángga áringmán, kámá ya pahán yánin hatne watá kuk ma táindaráng, me kámá yan kutná kutná wa ma kápáng narindamán.

## 6

*Náut sungi itná hinelák wawu páliná watanan yon ihinelák*

<sup>1</sup> Yanuknukna, nuk sáni káman dá kandák tán wáina táek ingga naránga hálandu sán ni Iruk Káungá yá sángorán átaráng sándá yolopon kungga inánga kut tu watá kandák rina táuk wa táng tolinek. Wáina tángtáng gu sáni wu kándáng gon hálang rákit tángga átkuineráng, sáni kung ingirungingi wáina háranyan hanerot. <sup>2</sup> Kámá hálang imán imán tángga mápámá sáni wa suwíneráng. Kálu wáina isutneráng watá ku Jesu Son Iháhá yan kálu rina átak wa tát kándáng háleinek. <sup>3</sup> Kulá ámna káman du kutná muná, enendu málámbá nawu kutná árená ingga naránga átningim, wawu nanaráná watá málám ingirungingim. <sup>4</sup> Ámna náráwa káman káman dá málámbán átkukuná rina wa kangga narán álo hálandu wata herongená táinek. Watá málámbán átkuku watyot táng kámá yan átkuku yot tingga ma káindak, <sup>5</sup> náuta álo kámá ku ámna káman káman dá málámbán átkuku wata naránga pinná tángga átkuinek.

<sup>6</sup> Ámna káman niyá Ánutu yan me wa sánáng tolin du sándá kutná kutná sáni álosim wa kátu horengga iháng niyá sánáng tolinek wa imineráng.

<sup>7</sup> Ámna káman dá málámbon ingirunginga no Ánutu álo ingirunginet ingga nariwon. Wáina kámá ma tátáyan. Náut sungi itná hinek wawu máriya wu páliná watanan yon ihinek. <sup>8</sup> Niyá pahán kakngá ya heronge naráng mángga watán ket tárák wáik táinek wawu pahán kakngá watá páliná wáik táng tunggap táng mán máriya wáik hálangga muná kuinek. Iná niyá Iruk Káungá ya heronge naráng mángga watán ket tárák álosim wa táinek wawu Iruk Káungá watá páliná álosim táng tunggap táng mán máriya átkuku sásáliná muná wa táinek. <sup>9</sup> Wáina wata ku ket tárák álosim wa tángga kungga átang hálang haha ma táindaráng. Nándá ket tárák álosim wa tátáya hálang haha ma táindámán hálandu Ánutu yá rám tiuk wahára wu

\* 5:14: Pris 19:18

páliná álosim wa ihinemán. <sup>10</sup> Wáina wata ku rám rina hára ket tárák álosim wa kámá ya táng yámamáyan hálen kangga ku wahára táinemán. Ámna náráwa kámuk ka ket tárák álosim táng yáminemán, iná ámna náráwa Táwi ya naráng háting mángga átaráng wawu hun káman ina átamán, wáina wata ku wa kálak hánám bu wáina táng yáminemán.

*Pol yá Jesu yan maripong ga heronge naruk*

<sup>11</sup> Me kátu kimo náwu no nayon uyingga átat. Ná kaniráng, no kolem maming táwi kálu mena ná uyingga átat.

<sup>12</sup> Ámna niyá kep sáni marineráng ingga táup sánángoeráng wawu wáina tángga ku Juda ámna ya rahán yáni hára kut náni árená hálengga átnin ingga wata wáina tánggoeráng. Jesu Son Iháhá yan maripong wata naráng háting mánggoeráng ing mengga náháng wáik tánirot ingga narángga ku wáina tánggoeráng wa. <sup>13</sup> Ámna kámá kep yáni há maruráng watá meng rákit me yáni wa kándáng ma isutnándaráng. Enendu sándá kep sáni marineráng ingga sánángga ku sán sut sáni hára rina táineráng wata ingga kut táwi ihineráng wata tánggoeráng. <sup>14</sup> Iná no ku naya kutna me ni kámá káman da kutná ma táng hip táindát, ináku Táwi náni Jesu Son Iháhá yá maripong hára kámutuk, wata tángga ku no wata kutná wa rewe táng hip táinet. Jesu yá maripong hára yáup táuk watá ku káwak nátán kálu rina rina watá nák nanarána káin há sálikngek hálek, me no nawu maripong hára há kámutut ina hálek, wata ku káwak kán kálu rina rina wa ma isutnándát. <sup>15</sup> Kep mamará me muná wawu rina kámá ma hálek. Iná Ánutu málámbá tán nándu ámna náráwa mirak háliumán watá ku kutná táwi hálek. <sup>16</sup> Ánutu yá málámbán ukuro me pahán láláp wa san niyá me wa narángga isutang átaráng watyot átnek, ámna náráwa wa, wawu Ánutu yan ámna náráwa hánám bu wa.

<sup>17</sup> Ámna yá nuturáng ga sutna káin párángna yá há átaráng, kámá yá párángna wa kangga náku ku Jesu yan yáup ámna páliná ingga nareráng. Wáina wata ku rám nahára átang kuinek hára ámna káman dá nák pahán márapmá son ma namindak.

<sup>18</sup> Yanuknukna, Táwi náni Jesu Son Iháhá yá pahán sámángga iruk sáni káman káman watyot átnek. Wa pálipuk.

## Pol yá Efesus yan papia uying yámuk

<sup>1</sup> Nák ku Pol, Jesu Son Iháhá watán aposel. Ánutu yá málámbán pahán isutang gu nák neháng tunggap tángga aposel yáup tátáya tiuk. Kulá no me ná uyingga se Ánutu yan ámna náráwa Efesus it yáilá káin Jesu Son Iháhá ya naráng háting mángga isutang átkoeráng sándán káin koek.

<sup>2</sup> Nan náni Ánutu yot Táwi Jesu Son Iháhá watá pahán sámán pahán láláp watá sányot átnek.

*Jesu hára kungga ku Ánutu yá alek kán kutná kutná álosim wa námángoek*

<sup>3</sup> Ánutu kutná meng tárut tánin, málám wawu Táwi náni Jesu Son Iháhá watán Ánutu, me wata Naning. Jesu Son Iháhá wahára kungga ku alek kán kutná kutná álosim wa iruk náni káman káman háláng imóamáya námángoek. <sup>4</sup> Káwak ná ma táng tunggap táena átang málámbá Jesu hára kungga rahálá hára rongronggá átang me muná kándáng re átnát wata náháng tunggap tán málámbán pingnga háliumán. <sup>5</sup> Uláppon nánda kikiná narángga ku Jesu Son Iháhá watá náháháya yáup táinek wahára kungga ku málámba nángánange háháleya náháng tunggap táuk. Ánutu yá málámbán pahán isutang wáina táuk. <sup>6</sup> Málámbá nanggená wata kikiná naránggátak. Nanggená wahára kungga ku pahálá nán námuk wawu táwi hánám. Wáina táuk wata nánda málámba kutná meng tárut tángga átkuinemán. <sup>7</sup> Ánutu yá pahán námuk wawu táwi hánám, wáina háendu maripong hára Jesu sipmá yá háuk wahára kungga ku náháng yuwánga mukmuro náni yawonduk. <sup>8</sup> Wáina tángga pahálá káinnan náut nán námínán naruk wawu táwi hánám kulin háuk waháranan du nanará hulá hulá álosim wa námuk. <sup>9</sup> Ánutu yá kálu rina isusut ta nanará tiuk wawu uláp káwak ámna nánda ma kakaya táng kilak ting san átuk, enendu rám nahára ku nanarána álosim wa há nálen kangga átaman, wawu Jesu Son Iháhá wahára. <sup>10</sup> Watán nanará wu rám málámbá narángga átak wahára wu kutná kutná alek káin me káwak káin wa iháng ámna yáilá káman wata tarang káin tinet ingga naruk, wawu Jesu Son Iháhá wa.

<sup>11</sup> Ánutu yá málámbán pahán isutang gu rina rina wa tán tunggafengngátaráng, wáinanyon du Juda nán náháng tunggap tán málámbán ámna náráwa háliumán. Wáina táuk wawu uláp hánám wáina táinet ingga há naruk wa isutang táuk. <sup>12</sup> Wáina náháng tunggap táuk wawu Juda nánda kálak hánám bu Jesu Son Iháhá wata naráng háting mángga isutnemán, wata ku Ánutu yan yamá me hálángngá táwi wata narángga kutná meng tárut tángga átkuinemán. <sup>13</sup> Kulá ámna náráwa kámá káinnan sándu me páliná wa há naruráng wawu Ánutu yá son há sáhuik watán me pingnga álosim wa. Wata ku sándu Jesu Son Iháhá ya naráng háting mángga watyot hányon tápingga átkoeráng. Kulá Ánutu yá ku uláp me káto miuk wa isutang gu Iruk Káung wa sámuik watá sánggit ta árán du málámbán ámna náráwa hánám bá átarang ingga narángoeráng. <sup>14</sup> Nándu Iruk Káung wa há táumán wata ku ing há narémán wa, máriya ku Ánutu yá málámbán ámna náráwa wa náut álosim yámamáya miuk wawu hányon ihinemán. Jesu yá son áwánga náháng yuwán málámbot átnemán wahára ku kutná kutná wa ihinemán. Wáina táuk wata ku nándu wata yamá me hálángngá táwi wata narángga kutná meng tárut tángguinemán.

*Ánutu yá nanará Efesus yámik ingga Pol yá sáponga táuk*

<sup>15</sup> No sándán pingnga ku ing met narut, sándu Táwi Jesu wata naráng háting mángga Ánutu yan ámna náráwa wa kámuk hánám pahán yámángga kikiná naráng yámángoeráng. <sup>16</sup> Wáina wata ku rámá rámá no sáponga tánggoet wahára sánda narángga ku Ánutu heronge mená inángga sáponga tánggoet. <sup>17</sup> No rámá rámá sáponga hára Táwi náni Jesu Son Iháhá watán Ánutu. Nan náni yamá pálak wa inánggoet wawu Iruk kán nanará álosim sámán du sándá málámbán me wata hulá wa kándáng narineráng, wahára ku málámba kándáng naráng minéráng. <sup>18</sup> No sáponga tánggoet wawu málámbá pahán sáni watán kálu yalin yamá man du sán náut álosim sásamáya mantáng sámángoek wata naráng yáminéráng, wawu alek kán kutná kutná iháháya háheng yámángga átaráng wa. No sáponga tánggoet wawu sándá kutná kutná álosim Ánutu yá ámna náráwaná sándán tiyawuik wata naráng yáminérang wata. <sup>19</sup> Hang no sáponga tánggoet wawu Ánutu yan háláng watá ku ámna náráwa niyá wata naráng háting memán wa táwi hánám wa háláng námángga átkoek wata naráng yáminérang wata. Ánutu yan háláng táwi watá kutná kutná kámuk kán háláng wa iháng hátingga átak. Watán háláng táwi nándán káin yáup tánggoek, <sup>20</sup> watá yon uláp Jesu Son Iháhá hára yáup tán Jesu yá há kámuk háranan son hálángngá táwi watá táng tárut tángga táng árang alek káin ketná álák kálu tiuk. <sup>21</sup> Wáina tán irawa káin hánám árán du iruk káto káto háláng yáni pálak, ámna yáilá

yáni, kapman kámuk, me kutná kutná háláng yáni pálak watá Jesu Son Iháhá wata tárang káin re átaráng. Ámna me iruk kut yáni pálak inggálu átaráng me máriya átneráng watá málámba tárang káin re átkuineráng. <sup>22</sup> Ánutu yá kutná kutná wa iháng Jesu Son Iháhá wata tárang káin tingga málám táng tin wata yáin yáni átak, wata ku kálu wahára kungga ku miti yan ámna náráwa wata yáin yáni átak. <sup>23</sup> Táwi yan ámna náráwa wawu Jesu Son Iháhá wata sutná, iná Jesu yan átkuku watá ku kutná kutná kámuk wata kinan tuwat hánám átnándak, hang málámbán ámna náráwa wata kinan wáinanyon átnándak.

## 2

*Ámna náráwa nándu há kámurená enendu Ánutu yá tán Jesu yot há tárutumán*

<sup>1</sup> Uláp sándu mukmuro hulá hulá wa tángga átang gu iruk sáni wawu há kámurán áturáng. <sup>2</sup> Rám wahára wu káwak nátán kálu kandák hulá hulá wata kinan átang alek táitná hára iruk wáik yáin yáni watán nanará isutang átkuráng. Iruk wáik watá emá re hánghálángngá hánám ámna kámá niyá Ánutu yan milun yayali tángngátaráng watán pahán kinan káin yáup tángga átkoek. <sup>3</sup> Uláp pu nán kámuk tombong wahára átang pahán wáik kakngá watán kikiná wa isutang átninggumán. Átang gu pahán náni kakngá watyot tu náin nanará watán milun sungga átkumán. Wa átkumán wáina re átang ináku Ánutu yá wáina átang yumnakngá wáik rina iháhaya tiyawiuik wa ihánggatnem. <sup>4-5</sup> Mukmuro náni watá náháng lem tán há kámutang átumán, enendu málámbá nánda kikiná hánám naránga urák náni táwi naruk hálendu náháng tárut tán Jesu Son Iháhá watyot tárutang átningoemán. Málámbá pahán táwi hánám námánga ku wáina tángga son náhuk. <sup>6</sup> Ánutu yá Jesu Son Iháhá watyot náháng tárut tángga ku náháng alek káin átang kutná kutná pin yáni tátáyan kome wahára Jesu yot tin átningoemán. <sup>7</sup> Ánutu yá wáina táuk wawu inggálu me máriya málámbá pahán námuk wa hiták táng tunggap táin ingga táuk. Pahán rina námángoek wawu táwi hánám kutná kutná kátu wa iháng hátinggoek hánám námángoek wahára kungga ku náháng álolo tán Jesu Son Iháhá watyot ronrosin átkoemán. <sup>8</sup> Ánutu yá pahán sámamáya naruk wa isutang gu son sáhuk. Sándá náut kámá káman táuráng ga wata ingga tángga Ánutu yá ma sáhuk. Ináku Jesu ya naráng háting mámá kálu wahára re Ánutu yá hánámá ná hánám wáina táuk. <sup>9</sup> Wáina táuk wawu sándá náut kámá yáup káman táng mát wata yumnakngá ya muná, wata ku káman dá málámba kutná tángga árangga kukuyan du muná. <sup>10</sup> Jesu Son Iháhá wahára kungga ku Ánutu yá tán ámna náráwa mirak háliumán. Wáina hálengga átang gu yáup álosim nánda tátáya uláppon há tiyawing námuk wa tángga átkukuya.

*Jesu Son Iháhá watá kámkáyam tángga tombong yará wa tán káman háliumán*

<sup>11</sup> Kep yáni marená watá sándu kep sáni ma marená wata ku sándu Ánutu yan tombong wata kinan ma áraráng ing sánángngátaráng. Wáina wawu ámna nangge yá re ket tá káwak sut hára tángngátaráng. Ing narineráng, uláp wawu sándu kámá káinnan tunggafená hálendu <sup>12</sup> Jesu Son Iháhá watán tombong hára ma áturáng, ináku mulangán áturáng. Hang Israel ámna háháleyan káluná muná, me pahán káman átnát mená Ánutu yá hárotuk, me Israel iháng álolo tátáyan me káto wáina táinet ingga mená wata kinan ma áturáng. Sándu káwak ketnán Ánutu yá náut kámá álosim káman sásámáya miuk ka wata ma hálengga áturáng, me Ánutu ya ma naráng mená áturáng. <sup>13</sup> Uláp pu mulangán hánám káin áturáng, enendu inggálu ku Jesu Son Iháhá wata sipmá watá sáháng áwáng málámbot tin du Ánutu tangtang hánám wáina átaráng.

<sup>14</sup> Jesu Son Iháhá málámbá pahán láláp wa táng hang Juda me ále kámá káinnan orek náni hára tin du pahán káman háliumán. Uláp pu kumbi ina watá Juda me kámá káinnan wa náháng horen kámkáyam tángga átumán. Iná inggálu ku Jesu Son Iháhá watá kumbi ina wa yalingga ku kámkáyam tángga tombong yara átumán waháranan son náhán káman re háliumán. <sup>15</sup> Jesu yá kámutuk wahára kungga ku Moses yan meng rákit me wa yawondang gu tombong yará wa tán tombong káman re mirak háliuk. Wáina táuk wahára kungga ku Juda me ále kámá káinnan wa náhán pahán káman háliumán. <sup>16</sup> Jesu yá tombong yará árená wa tán tombong káman re hálengga Ánutu nuknukngá háliuráng wawu málámbá maripong hára kámutuk wahára. Wáina táuk watá ku kámá yot kámkáyam tátá wa tán sálíkngiuk. <sup>17</sup> Jesu yá káwak káin hangga me pingnga álosim wa mengga ing miuk, “Pahán káman dá orek sáni hára átnek.” Sán ámna kámá káinnan Ánutu tangtang ma áturáng sányot Juda nán Ánutu tangtang átumán wa me pingnga álosim ná nánuk. <sup>18</sup> Jesu Son Iháhá wahára kungga ku Iruk Káungá káman watá rewe kámuk Juda me kámá káinnan wa háláng námán Nan náni wata rupmá káin kumán.

<sup>19</sup> Wáina wata ku sándu áwená ina muná, ináku sándu Ánutu yan ámna náráwa watyot tombong káman re átaráng. Sándu Ánutu yan ámna náráwa pánpáliná hánám átaráng. <sup>20</sup> Sándu it Ánutu yá tánggim ina. Málámbá nán aposel yot profet náháng kumammá ya mangga ku Jesu Son Iháhá málám bu táng kumam káto ya ore hára man watá it hálángngá ya átang it káto tángga átgim wáina. <sup>21</sup> It kuratná watá kámuk hánám Jesu hára sengsáráp tángga átang it wa tát Táwi yan it káungá káto hánám maming táwi hálangga átkoek. <sup>22</sup> Sándu Jesu hára hányon sengsáráp tángga átaráng, wata ku Ánutu yá kámuk sáhan málámbán it táwi hánám ina hálangga árát tu málámbán Iruk Káungá watá it wata kinan átkuinek.

### 3

*Polyan yáup pu ále kámá káinnan wa Táwi yan me yánána*

<sup>1</sup> Hulá wata ku nák Pol no Ánutu yan káin sáponga tánggoet wawu sán háláng sásámáya. Me pingnga álosim wa ále kámá káinnan sándán káin mengga kunggoet wawu Jesu Son Iháhá watán yáup tánggoet wata tángga ku neháng kalabus kinan tit átat.

<sup>2</sup> No ku ing naret, sándá nareráng wawu Ánutu yá pahán namánga ku nák neháng tunggap tángga ále kámá káinnan sándán káin me pingnga álosim wa meng tunggap tángga kukuya yáup namuk. <sup>3</sup> Iná Ánutu yá yáup wáina táinet ingga naruk wata mená wawu uláp pu kilak átuk, enendu Ánutu málámbá nák há naliuk, wa no káto isikimo rewe ná uyet. <sup>4</sup> Wáina wata ku sándá me wa sángingga ku ing káineráng, nák ku me kilakngá Jesu Son Iháhá watán kálu wawu kándáng hánám há naret. <sup>5</sup> Uláp rám káman Ánutu yá mená ná táng hiták kámá ma tiuk. Iná rám nahára wu Ánutu yá Iruk Káungá yan háláng hára me wa táng aposel yot profet ná káungá nándán káin hiták tiuk. <sup>6</sup> Kulá me wawu ing, me pingnga álosim wahára kungga ku sán kámá káinnan me nán Israel watá tombong káman hálangga sut káman háliumán. Wata ku nán kámuk ká kutná kutná álosim Ánutu yá náminek ka miuk wa Jesu Son Iháhá wahára kungga ihinemán.

<sup>7</sup> Ánutu yá tán du no me pingnga álosim wa meng tunggap tátáyan yáup nangge háliut. Málámbá pahán namánga málámbán háláng wa namán no wahára kungga ku yáup wa tánggoet. <sup>8</sup> Ná k ku ámna wáik Ánutu yan ámna náráwa wata márin yáni káin átat, enendu málámbá pahán namánga yáup táwi ná namuk, wawu no ámna náráwa ále kámá káinnan watán káin Jesu yan me páliná wa yánána. Me páliná watá ing mek, Jesu Son Iháhá watán kutná kutná álosim wawu kut yáni táwi árená hánám, wáina hálendu ámna náráwa nándá sángingga ma naráng háháliyan. <sup>9</sup> Ánutu niyá kutná kutná íháng tunggap táuk watá uláp pon ámna náráwa yan káin rina tátáya nanará tiuk wa táng kilak tiuk. Iná inggálu ku yáup ná ná k namánga málámbá nanará rina táng kilak tiuk wa no meng tunggap tángga ku Ánutu yá wáina tángngátak ingga yánána wata yáup wa namuk. <sup>10</sup> Ánutu yá yáup wa namuk wawu miti ámna náráwa hára wa kungga ku angelo yot iruk wáik watá wawu Ánutu yan nanará hulá hulá álosim ingga kakaya. <sup>11</sup> Alek káwak ká ma tunggafená árán yon nanaráná káin wáina táinet ingga nanará há tiuk, wáina hálendu áwánga Táwi náni Jesu Son Iháhá watá yáup táuk wahára ku tán hiták háliuk. <sup>12</sup> Wáina hálendu nándá Jesu ya naráng háting mánggoemán wahára ku nándá Ánutu kondolá hára kungkungngá kunggoemán. <sup>13</sup> Wáina wata ku ing sánin, no sán háláng sásámáya láwit rina naránga átat wata sándá ná k naránpak tángga háláng haha ma táindaráng. No wáina tángga átat watá háláng sámán Ánutu yot átkoeráng, wata ku sándá heronge narineráng.

*Efesus yá káto hálangga átnát ta Pol yá sáponga táng yámuk*

<sup>14</sup> Nan Ánutu yá rina rina tánggoek wata há sánet wata naráng hátingga ku kondolá hára átang tunna hára imánga turingga hanggoet. <sup>15</sup> Alek káin angelo me káwak káin ámna náráwa átaráng watán tunggafefe yáni hulá wawu Ánutu rewe. <sup>16</sup> Ná k ku ing sáponga tánggoet, Nan dá kutná kutná álosim táwi hánám wa sásámáya tiyawiuik, wata ku málámbán Iruk Káungá wa pahán sáni kinan molán tuwatang gu sáháng káto tán átneráng. <sup>17</sup> Wáina árát tu Jesu Son Iháhá wata naráng háting mánggoeráng wahára kungga ku watá pahán sáni káin kome táinek. Son ing sáponga tánggoet, nangge nuk ka kikiná nanará watá átkuku sáni káin káto hánám átnek, wawu káráp pá ráhulá san káwak kinan kun káto átnándak wáinanyon átneráng. <sup>18</sup> Átang gu Ánutu yá málámbán ámna náráwa yot sán kámuk nanará sámán du nanará watá háláng sámán Jesu Son Iháhá yá nánda narán kikiná háliuk wata hulá ing wa narineráng, wawu hahala hánám, há sák hánám, irawa káin hánám, me kinan hánám koek wáina. <sup>19</sup> No sáponga ing tánggoet, ámna káman dá Jesu Son Iháhá watá nánda kikiná wáina naruk ingga ma nanaráyan, enendu sándá ku há naráng minéráng. Wáina wata ku kutná kutná álosim Ánutu yan káin átak watá sándán káin hányon átnek.



<sup>20</sup> Ánutu yan háláng watá pahán náni kinan yáup tángngátak. Háláng wawu nándán nanará wa táng hátek. Nándá rina tátaya narangga inángngátamán watán háláng watá Ánutu yan háláng wa ma táng háhátayan. <sup>21</sup> Wáina wata ku ámna náráwa yá Jesu Son Iháhá watyot málámbán ámna náráwa wa kápángga wata Ánutu kutná mengga meng tárut tángga átnemán, inggálu me rámá rámá, wa pálipuk.

## 4

### *Nándu Jesu Son Iháhá wata sutná ina*

<sup>1</sup> Nák ku Táwi yan yáup tángngátat wata ku kalabus kinan átat. No me káto mengga ing sánin, Ánutu yá sándá kálu kándáng wahára re átkuku wata mantáng sámuk, wata ku sándu málámbá rina átkukuya narek wahára re átkuineráng. <sup>2</sup> Rámá rámá sándu kámá ya tárang káin átang pahán láláp hára re ket tárák sáni ku yolopon hára wa yáleineráng. Pahán káráp sopmuná ma táng yámindaráng, ináku kikiná naráng yámángga ku márapmá rina sámíneráng wa sungga átnéráng. <sup>3</sup> Pahán káman átnát wawu Iruk Káungá watá námuk, wata ku rina tángga ku kálu wáina wa tángga pahán láláp wata kinan urum káman hálengga átnin ingga wata yáupmá háláng hánám táineráng. <sup>4</sup> Kulá Jesu ya naráng háting mená nándu sut káman dá re ina átang Iruk Káungá káman wa rewe táumán. Kálu wáinanyon du nán kámuk wawu náut kámá káman re Ánutu yá námámáya miuk wata hálengga átnát ta mantáng námuk. <sup>5</sup> Nán kámuk wawu Táwi náni káman re, naráng hákhátik káuluná káman re, hang umi ku tárák káman re kuhumán. <sup>6</sup> Ánutu káman re átak, wawu nán kámuk ka Nan náni. Táwi yan ámna náráwa kámuk ka yáin náni átang, nán kámuk ka kinan átang, nán kámuk hára kungga yáup tángngátak. <sup>7</sup> Iná Jesu Son Iháhá watá málámbán pahán isutang gu Iruk kán yáup hulá hulá wa horengga yáup tátayan háláng watyot nán káman káman námán tánggoemán. <sup>8</sup> Wáina wata ku Ánutu yan me yá ing mek:

“Irawa káin árángga kun du ámna ket ihená watá sárummá ya isutang árángga kut tu

málámbá ámna náráwa yan kutná kutná álosim tiyawiwuk wa yámuk.”\*

<sup>9</sup> “Irawa káin árángga kuk,” me wata hulá wawu rina? Wata hulá wawu ing, hulátingga wu ámu káin káwak kinan háuk. <sup>10</sup> Ámna watá hulátingga ámu káin háuk ngáya ku árángga alek kinan irawa káin hánám kungga ku málámbán háláng watá rekáin rekáin wa kámuk hánám átnát wata. <sup>11</sup> Watá yon du kámá profet yáup tátaya yámángga, kámá aposel yáup tátaya yámángga, kámá ewenselis yáup tátaya yámángga, kámá pasto yáup tátaya yámángga ku kámá wu Táwi yan me pingnga álosim wa yánáng totoliiyan yáup wa yámuk. <sup>12</sup> Jesu yá yáup wa yámuk wawu watá Ánutu yan ámna náráwa wa háláng yámát tu watá yáup álosim wa álo tángga ku ámna náráwa Jesu Son Iháhá wata sutná ina watá káto hálengga kándáng átnek wata. <sup>13</sup> Yáup wawu wáina re arán kungga nán kámuk ká Ánutu Nanggená wata naráng háting mángga málámba kándáng hánám naráng minemán. Wahára kungga ku pahán káman hálengga arátne ku naráng hákhátik náni yá káto hálen Jesu Son Iháhá watán káin ket tárák rina rina átaráng watá nándán káin hányon átnéráng. <sup>14</sup> Nándá wáina átang gu nangge kikimo yá ina ma átnándamán. Iná wáina átnemán wahára wu ámna me karo táng námángga nángnárungingi yan me meineráng watá náháng waík táinek. Wáina watá ku táp punggilá me iruk ká bot tángga wakálu wakálu tán ále rehára kukuya kunggim watá wakáin ma kunggim wáinanyon du nándá ma kuindámán. <sup>15</sup> Wáina ma átnándamán, ináku me pálipuk wahára re átang kámá ya kikiná nanará kálu wahára átnemán. Wáina átang ku naráng hákhátik náni watá tihangga táwi hálen Jesu Son Iháhá watán ket tárák wahára re rina rina wa tángga átnemán. Jesu wawu káwak sut káman da yáilá tiuk wáina, málámbán ámna náráwa nánda yáin náni, <sup>16</sup> iná nán kámuk wawu wata sutná ina. Káwak sut tán kurat me ulin watá áwáng gu sut wahára seng kunkun tángga ku káto átnándaráng. Wáinanyon du nán Táwi yan ámna náráwa yá nuk náni kámá kikiná kápángga háláng imán imán tángga káto átnándamán. Sut kátu káman káman watá yánin yáup wa kándáng táineráng wahára wu sut kámuk watá káto átnéráng.

### *Táwi yan ámna náráwa watá átkuku mirak hára átkuineráng*

<sup>17</sup> No Táwi kutná hára me káto mengga ing sánindet, sándá Ánutu ma naráng mená yá ina átninggoeráng wawu sámíneráng. Nanará yáni káin rina narángga átninggoeráng watá kámá ma háláng yámindák. <sup>18</sup> Pahán yáni wu káto hánám, wáina hálen du Ánutu ya ma naráng máráng. Wáina wata ku nanará yáni wawu páyung arán Ánutu yan átkuku wata kinan ma araráng. <sup>19</sup> Watá rina rina tángngataráng wata reprepamá ma narángngataráng. Yáni wu ket tárák waík hánám wa tángga wata kinan hánám hangga átninggoeráng. Rámá rámá wáina re tátaya narát táwi hánám hálengngátak.

\* 4:8: Kap Papia 68.18

<sup>20</sup> Iná sándu Jesu Son Iháhá wata há naráng muráng wawu wáina tátáya ma háina táurang.  
<sup>21</sup> Pálipuk sán wawu Jesu ya naráng muráng wahára wu Jesu yan me pálina wa re isutang há sánang toliurang.  
<sup>22</sup> Uláp pahán kakngá isutang átnnggiurang wawu me kusák hára kungga náut kámá wáik wa tátáya pahán tátárut tát watá sáháng lem tánggiuk, enendu ing sánang toliurang, pahán kakngá isusut wa sangga átang gu <sup>23</sup> sat Ánutu yá nanará sáni wa tán mirak háleinek.  
<sup>24</sup> Ánutu yá tán sándá áma náráwa mirak málam inanyon rongrongngá hánám hálanga kándáng hánám re átnérang.

<sup>25</sup> Wáina wata ku sáni káman káman dá me kusák wahára ma átkuindaráng, iná nuknuk sáni yáininán du me pálipuk rewe yáneráng, náuta náni wu sut káman da kátu rewe.  
<sup>26</sup> Pahán káráp tángga hárendu kandák ma táindaráng, Pahán káráp emá re tángga átnárát káe yá kung ma háindak.  
<sup>27</sup> Wáina hára Satan da tirak hing mát áwáng sángorán kandák tánirot.  
<sup>28</sup> Niyá manek tángngátak hárendu son ma táindak, ináku ketná yá hánám yáup álosim táinek ka ku niyá kesák táinek wawu waháranan iháng hálang yáminek.

<sup>29</sup> Pahán táng wáik tátáyan me káman dá sán milun sáni kálu ma áwáng háindak, ináku pahán táng káto tátáyan me watá re ku wáina áwáng háinek. Rám wa átnérang hára me álosim rina memeyan wa rewe mengguineráng watá ku niyá me wa narineráng wa hálang yáminek.  
<sup>30</sup> Rina kámá tát Ánutu yan Iruk Káungá watá pahán máráp táiwon. Ánutu yá Iruk Káungá wa sámuk wawu sán hára sánggit tingga sándu nákkán ingga mengga son sáhan along átnérang ingga ku wáina táuk.  
<sup>31</sup> Pahán suksuk, kuk nanará, pahán káráp, menmen, mengmán mengmán, me ket tárák kandák hulá hulá tátá wa erek sang hálineráng.  
<sup>32</sup> Áma náráwa ya urák yáni naréngga ket tárák álosim wa táng yámángga átnérang. Wáina átang gu kátu yáni sáineráng, Ánutu yá Jesu Son Iháhá watán yáup wahára kungga ku kátu sáni sáuk wáinanyon.

## 5

### *Yamá hára átkuinemán*

<sup>1</sup> Ánutu yá málamba nángánange sándá kikiná táwi hánám naráng sámánggoek, wata ku watá ket tárák rina tángngátak wáinanyon táineráng.  
<sup>2</sup> Kámá ya kikiná naráng yámamá kálu wahára átnngguineráng, Jesu Son Iháhá watá nánda kikiná naréngga átkukuná wa nán hálang námámáya sáuk wáinanyon. Átkukuná wa táng Ánutu ya taha mungnganá kikiná ting muk wáinanyon.

<sup>3</sup> Sándu márámamák ma táindaráng, ket tárák reprepamá ma táindaráng, hang há áran nukngá ya mekmek ma táng kuindaráng. Ket tárák kátu kimo káman wáina kálu tát wata ingga meng sámánirot. Ánutu yan áma náráwa sándá kálu wáina ma táng kuindaráng.  
<sup>4</sup> Sándá me wáik, me kandák me, me kakarák wáik wáina ma táindaráng. Ket tárák wáik wáina wawu nánda ma táng kuindamán, iná nánda wu heronge me rewe Ánutu inángga átkuinemán.  
<sup>5</sup> Sándu kándáng ing narineráng, niyá márámamák táinek, ket tárák reprepamá táinek, me há áran nukngá ya mekmek táinek wawu ánutu kusák ináng sákngená wáinanyon. Wáina pálak watá Ánutu yot Jesu Son Iháhá watán átkuku wata kinan kung hahayan tárák ku muná.

<sup>6</sup> Kándáng hálang rákit táineráng, áma yan me kandák watá sángsárungingga sáháng uyin kung mukmuro wa tánirot. Ánutu yá milun yayali áma wata pahán káráp táng yámángngátak wawu ket tárák wáina tángngátaráng wata hánám.  
<sup>7</sup> Wáina wata ku áma wáinaná watyot nuknuk ma átnándaráng.  
<sup>8</sup> Uláp pu páyung kinan áturáng, enendu inggálu ku Táwi yá sáháng yamá hára ting san átaráng, wata ku inggálu wawu yamá yan áma náráwa yá ina átkuineráng.  
<sup>9</sup> Sándá yamá hára átkut tu watá wata pálina álosim ing táng tunggap táinek, ket tárák álosim, kándáng re átkuku, hang me pálina isutang átkuku.  
<sup>10</sup> Táwi Ánutu yá rina átkukuya kikiná narek wa naráng rákit táineráng.  
<sup>11</sup> Sándá áma niyá páyung gán ket tárák tángga átkut watyot nuk ma táindaráng, ináku sándá ku ket tárák wáina wawu kandák ingga meng tunggap tát áma náráwa yá káineráng. Ket tárák wáina watá pálina álosim ma tindák.  
<sup>12</sup> Milun yayali áma watá ket tárák kilak tángngátaráng wa mengga nanarán tátáyan wawu reprepamá.  
<sup>13</sup> Iná yamá watá ku ket tárák rina rina wa iháng hiták tin du áma náráwa yá wawu wáik ingga kápángngátaráng.  
<sup>14</sup> Yamá watá tán náut kámá káman dá hiták átang wawu watá hányon yamá mangga átnándak, wata ku me ing átak:

“Ni áma kák ruhángga átalák, kák ku miráingga tárutnelák.

Tanggán káinnan dá tárurátá ku

Jesu Son Iháhá wata yamá yá kák hára yamá máinek.”

<sup>15</sup> Wáina wata ku átkuku sáni káin kándáng hánám wa átkuineráng. Hohoná yá ina ma átkuindaráng, ináku nanará sáni pálak ká ina átkuineráng.  
<sup>16</sup> Sándá rám nahára átkuineráng wawu Ánutu yan káinnan ket tárák álosim wa kándáng táineráng, náuta rám náwu wáik hára

átamán, wata ku kándáng hánám átneráng, rám watá hánámá sálikngiwon. <sup>17</sup> Hohoná yan tárák wa ma táená ku Táwi yan pahán káin rina átak wa kándáng naráng rákit táineráng. <sup>18</sup> Umi káto táup nangga ma hohindaráng, kálu wáina watá sángorán ket tárák kandák wahára kunirot. Ináku sat Iruk Káungá watá ep káto sáhinek. <sup>19</sup> Kámá ya kap mantáng yámineráng wawu Kap Papia káinnan, me miti kap waháranan, me Iruk Káungá yá pahán sáni káin kap rina sánáng tolinek waháranan mantáng yámineráng. Táwi yan káin kap milun sáni hára me pahán sáni kinan mantángga átkuineráng. <sup>20</sup> Rámá rámá Táwi náni Jesu Son Iháhá wata kutná hára rina rina tunggafeng sámánggatak wata Ánutu heronge mená inineráng.

*Ámna náráwa ket tántán há táená watán me yángorá*

<sup>21</sup> Jesu Son Iháhá wawu Táwi náni ingga narángga ku náni tángga hangga nuknuk náni wata tárang káin átkuinemán.

<sup>22</sup> Náráwa sándu, nánáun sáni ya tárang káin átneráng, Táwi ya tárang káin átnándaráng wáinanyon, <sup>23</sup> náuta ámna yá ku áwáná ya yáilá átak, wawu Jesu Son Iháhá watá miti ámna náráwaná wata yáin yáni ya átak wáinanyon. Miti ámna náráwa wawu Jesu sutná kátu, ni Jesu málámbá son ihuk wa. <sup>24</sup> Miti ámna náráwa yá Jesu Son Iháhá wata tárang káin átaráng wáinanyon du náráwa sándá rámá rámá nánáun sáni ya tárang yáni káin átneráng.

<sup>25</sup> Ámna sándu áwáwá sáni ya kikiná hánám narineráng, Jesu Son Iháhá watá miti ámna náráwaná ya kikiná hánám narángga átkukuná wa háláng yámámáya sáuk wáinanyon. <sup>26</sup> Wa tán rongrongngá háháleya wu umi yot málámbán me watá ku miti ámna náráwaná wa iháng yawolán málámba rahalá hára rongrongngá háliuráng. <sup>27</sup> Wáina táe ku rahánna hára álosim hánám konep muná sinsin muná me kandák muná rong hánám átniráng ingga narángga wáina táuk. <sup>28</sup> Wáina wata ku ámna sándá áwáwá sáni wa kikiná hánám kápineráng, sáni ya sut sáni ya kikiná nareráng wáinanyon. Ámna niyá áwáná ya kikiná narek wawu málámba kikiná narek. <sup>29</sup> Ing há naremán, káman dá málámba sutná táng káyam ma tánggim, ináku sungi sing mángga ku pinná kándáng tánggim, Jesu Son Iháhá watá miti ámna náráwaná wata tángngátak wáinanyon, <sup>30</sup> náuta nándu Jesu Son Iháhá wata sutná kátu. <sup>31</sup> Ánutu yan me yá ing mek, “Hulá náta ku ámna yá naning maming yápmangga áwáná yot káman hálengga yará watá sut káman háleinemálák.”\* <sup>32</sup> Me kilakngá náwu hulá táwi hánám, enendu no naret wawu Jesu Son Iháhá watyot miti ámna náráwaná málámbán há háléná wata mek. <sup>33</sup> Iná me náta wu ámna káman káman watá sáni ya kikiná nareráng wáinanyon áwáwá sáni ya kikiná narineráng ga mek. Hang náráwa sándá nánáun sáni ya kekendik táng yámineráng ga mek.

## 6

*Nan mam me nangge yan me yángorá*

<sup>1</sup> Nange sándu Táwi yan pingnga yá átaráng, wata ku nan mam sáni yan milun susuwá hára átneráng. Kálu wáina táineráng watá ku kándáng hálek. <sup>2</sup> Táwi yan me yá ing mek, “Nan mamya tárang káin átnelák,” ingga meng rákit me hára hulátek watá wáina mek wawu málámbán me káto wáina tunggafeinek ingga miuk watá wata kinan átak. <sup>3</sup> Me káto wawu ing, “Wáina átnelák wawu káwak ketnán átkuku ka yá kándáng re árán rám hásák átang átkuinelák.”\*

<sup>4</sup> Nange nanan yáni sándu nángánangge sáni wa iháng wáik tát watá sándá pahán káráp ma táindaráng. Ináku pin yáni kándáng tángga ku iháng tolingga Táwi yan me kálu yánáng tolingguineráng.

*Yáup nangge hánámá yot ámna hulá yáni yan me yángorá*

<sup>5</sup> Sán niyá yáup nangge hánámá ingga átaráng, sándu ámna hulá sáni ingga niyá átaráng wata tárang yáni káin átang pahán sáni yot watán milun suwineráng. Rahán yáni hára kandák táninggom ingga ku Jesu Son Iháhá yá tárang káin rina átnándaráng wáinanyon átneráng. <sup>6</sup> Sándá ámna hulá sáni ingga átaráng yáni sáhángga árat watá álo kámá náhániráng ingga rahán yáni hára re yáup hánghálangngá ma táindaráng, ináku nándu Jesu Son Iháhá watán yáup nangge ingga narángga ku pahán sáni káin Ánutu yan nanará wa isusut wata yáup táineráng. <sup>7</sup> Ámna yan yáup táemán ingga ma narindaráng, ináku Táwi yan yáup táemán ingga nangnaráng gu pahán heronge hára re átang yáup táineráng. <sup>8</sup> Sándu ing narineráng, ámna káman dá yáup álosim táinek wawu Táwi yá yumnakngá álosim iminek, yáup nangge hánámá me yáup nangge muná along árená wawu tárakngá káman wáina re yáminek.

<sup>9</sup> Kulá ámna hulá yáni ingga átaráng, sándu yáup nangge me rina yánet wa, sándá wata wáinanyon táng yámineráng. Yáup ma tát tu sáráhinet ingga yánangga iháng piták ma táindaráng, náuta wa me sándán Táwi wu alek káin átak. Málámbá re ku ámna náráwa kámuk kán átkuku hára wáina wáina ingga kápángga ku tárák káman re horeinek.

\* 5:31: Hulátitiná 2.24 \* 6:3: Meng Rákit 5.16

*Táwi yan ámna náráwa sándu tewe ámna yá ina átneráng*

<sup>10</sup> Pukon da ku ing sánindet, sándá ku Táwi yot tántápin tángga árát tu málámbán háláng táwi watá sányot árán wahára kungga ku káto hálengga átkuineráng. <sup>11</sup> Káto átang Ánutu yá tewe ámna yan kutná kutná sut tátámot tán káto káto námínek wa tánggánengga átang gu Satan dá kilak átang rina rina nángnárungin ingga táínek wa lháng hátíнемán. <sup>12</sup> Nánu ámna náráwa yot ma erawánggumán, ináku iruk káto káto, me kutná kutná háláng yáni pálak rám nahára káwak ketnán páyung wa pinná táeráng watyot, hang ále táitná ánu hára iruk wáik átaráng watyot erawánggoemán. <sup>13</sup> Wáina wata ku Ánutu yá tewe ámna yan kutná kutná sut tátámot tán rina sámánga átkoek wa kámuk ihággáneineráng. Wa ihággánengga ku rám wáik hára wu iruk wáik kot erawáwá hára káto hálengga átneráng, me erawáwá watá sálikngínek enendu emá re káto hálengga átneráng. <sup>14</sup> Sándá káto hálengga átnán wawu me páliná wa táng let sáni ina pánáp sáni hára táng kik tángga, kálu kándáng átkuku wa táng siot káto ina muiyip sáni pop táíneráng. <sup>15</sup> Me pingnga álosim watá ing mek, Ánutu yá ámna náráwa yot pahán káman hálenggoeráng. Sándá wata naráng hátinggoeráng wawu erawáwáyan tiyawíngga ku su mongoeráng ina hálek. <sup>16</sup> Wata káto yon du naráng hákhátik hára átkuku wa táíneráng watá ku palang káto yá ina árán du Satan dá sáut lánggop pálak wa mulán áwíneráng watá wahára kátíngga háíneráng. <sup>17</sup> Ánutu yá son há náhuk ingga narát tu watá at káto yá ina átsámínek. Iná Ánutu málámbán me watá ku Iruk Káungá yan kápik ká ina átsámínek. <sup>18</sup> Hang Iruk Káungá watán háláng hára ku sáponga tángguineráng. Rámá rámá sáponga tángga háláng námáng ingga Ánutu inángguineráng. Wáina tángga ku háleng rákit tángga átang Ánutu inát tu málámbán ámna náráwa wa háláng yámánga átnék. Kálu wáina wa ma sáíndaráng.

<sup>19</sup> Sándá sáponga tángga Ánutu inát nák hányon háláng namánga me wa táng nák milunna káin tin no ma pitáena me pingnga álosim watán me kilakngá wa meng tunggap tángga átkuinet. <sup>20</sup> Ánutu málámbá me pingnga álosim wa memeya suring namuk ka wata hánám bu no kalabus kinan átat. No me álosim wa memeyan yáup pá átak, wata ku sándá sáponga hára Ánutu inát tu watá háláng namínek, watá ku no ma pitáena ámna náráwa yan káin me álosim wa meng tunggap tángga átkuinet.

*Me pukon yánuk*

<sup>21</sup> Tikikus yá ku no átkoet me rina rina tángga átkoet wata pingnganá sánínek. Málám wawu nuk náni Táwi yan yáup ámna álosim, no málámba kikiná naráng mánggoet. <sup>22</sup> No wa suring me sándán káin áwánga ku nándá rina átkoemán wata sánán naríneráng, hang waháranon du sáni sáháng káto táínek.

<sup>23</sup> Nan Ánutu yot Táwi Jesu Son Iháhá watá yanuknukna sán pahán láláp sámánga sáháng káto tán du sándá naráng hákhátik hára káto átang kámá ya narát kikiná hálengguínek. <sup>24</sup> Ámna náráwa niyá Táwi náni Jesu Son Iháhá wata kikiná táwi hánám naránga ma sangguráng wawu Ánutu yá pahán sámínek.

## Pol yá Filipai yan papia uying yámuk

<sup>1</sup> Nák ku Pol, Timoti yot nát tu Jesu Son Iháhá watán yáup nangge. Kulá na Pol no papia ná uye ku sate Jesu Son Iháhá watán ámna náráwa it yáilá Filipai káin átaráng sándán káin áwek. Hang wata kinan ámna ni miti ámna náráwa pin yáni tátáyan, me ámna náráwa ni miti ámna náráwa háláng yámámáyan watán káin hányon áwek.

<sup>2</sup> Nan náni Ánutu yot Táwi Jesu Son Iháhá watá pahán sámán du pahán láláp pá sányot átnek.

*Pol yá Filipai ya naránga sáponga táng yámánga ku wata heronge me Ánutu inánggiuk*

<sup>3</sup> Nák ku Pol no rám kámá sánda naráng hátinggoet wahára wu heronge me Ánutuna inánggoet. <sup>4</sup> No Ánutu yá sán kámuk háláng sásámáya sáponga tánga inánggoet wahára wu pahánna álosim hánám nangnaráng inánggoet. <sup>5</sup> Hulátangga sándá Jesu yan tombong háliurang wahára átang inggálu áwánga átkoeráng wahára sándá ná háláng namánga me pingnga álosim wa ámna náráwa yánángoeráng wata no álosim hánám naráng sámángoet. <sup>6</sup> No ing hánám há naret, Ánutu málámbáyon iruk sáni kinan káin yáup álosim tátáya hulátang sámuk wawu málámbá wáina re tánga arán kungga Jesu Son Iháhá watán rám háleinek wahára wu yáup wa pukon tán sálikinginek.

<sup>7</sup> Sándu pahánna kinan hánám átaráng, wata ku no sánda álosim hánám narángoet wawu kándang hálek. No kalabus kinan átkoet me, káyam bá me páliná táng hang titiya tát áráng hákhátik tánga me pingnga álosim wawu pálipuk hánám ingga ámna náráwa yánángoet wahára wu Ánutu yá nák pahán namuk, wáinanyon du sán kámuk pahán sámuk. Pahán wa námuk wahára kungga ku málámbán yáup wa tánggoemán. <sup>8</sup> Ánutu málámbá ing wawu pálipuk ingga naránga átak, Jesu Son Iháhá yá sánda kikiná narángoek wáinanyon du no sánda kikiná naránga ku pahánna káin sán sásáháya táwi hánám narángoet.

<sup>9</sup> Rámá rámá no sáponga tángoet wawu Ánutu yá kikiná nanará káliná me nukngá ya kikiná nanará káliná watá sándán átkuku káin emá rewe táwi hánám háleenga kungga átkuinek, hang iruk kán kálu nanará sáni yá táwi hálen kándang gu wáina kandák ku wáina ingga naráng rákit tánga átkuineráng. <sup>10</sup> Wáina wata ku ket tarák kámuk wa sándá kándang kápang rákit tánga ku resim bu álosim hánám wa ihángguineráng. Wáina wata ku Jesu Son Iháhá watá son áwinek rám wahára wu Ánutu rahálá hára kandák ká sán hára ma átnándák ináku rongrongngá hánám átneráng. <sup>11</sup> Wáina átang Jesu Son Iháhá yan háláng wahára kungga ku ket tarák álosim bán páliná watá sándán káin tuwatang átnek. Iná ámna náráwa yá ku wa kungga ku Ánutu kutná meng tárut táineráng. Sáponga ku wáina kálu táng sámánga áwángoet.

*Pol yá kalabus kinan átuk watá ku me pingnga álosim wa táng káto táuk*

<sup>12</sup> Yanuknukna, sándá ing narineráng, nák hára rina tunggafuk watá Táwi yan me pingnga álosim watán kálu wa ma suwuk, ináku watá háláng imán du me pingnga álosim watá káto háleenga átkoek. <sup>13</sup> Wáina wata ku tewe ámna kámuk Rom bán ámna yáilá Sisa yan it pinná tátá me ámna náráwa táwi yon watá no Jesu Son Iháhá watán yáup tángoet wata ku ámna kámá yá neháng kalabus kinan tiuráng ingga há nareráng. <sup>14</sup> Táwi yan ámna náráwa táup táwi hánám bá yon du no kalabus kinan átkoet wata pingngana narángoeráng. Kulá ná pingngana watá ku pahán yáni táng káto tán Táwi yan káin naráng hákhátik tátá watá káto háleenga átkoek. Wáina tánga ku pikpito ma narená hánghálángningga átang Ánutu yan me wa meng tunggap tánga kunggoeráng.

<sup>15-16</sup> Ámna kámá yá ku nanará álosim wahára átang ná háláng namámáya naránga ku Jesu Son Iháhá watán me pingnga álosim wa meng tunggap tánga kunggoeráng. Ámna wawu ing há nareráng, no kalabus kinan átkoet wawu me pingnga álosim wa táng káto tátáya, wáina hálendu nák ka kikiná hánám naráng namánga ku Táwi yan me wa mengga átninggoeráng.

Iná ámna kámá yá ku no yáup tángoet wata kalán nán yon du nákk pahán kandák naráng namánga ku neháng hang tingga yáni ya kut yáni táng hip tátáya, wata ku Jesu Son Iháhá watán me pingnga álosim wa meng tunggap tánga kunggoeráng. <sup>17</sup> Ámna wawu yáni rina átnát wata naránga wata ingga ku wáina tánggoeráng, hang wawu nanará kándang watá watyot arán na táng kuráng. Márápmá suwángoet wawu kalabus kinan átkoet wa, son du márápmá nukngá ná ketnán tinin ingga wata wáina tánggoeráng. <sup>18</sup> Wáina tánggoeráng enendu káman niyan káin nanará álosim watá átmán Jesu Son Iháhá yan me menggoek, me nanará kandák watá átmán Jesu Son Iháhá yan me menggoek wawu álo kámá re. Ámna kámuk wáina tánggoeráng wawu Jesu Son Iháhá watán me pingnga álosim wa mengga kunggoeráng. Wáina tát tu no heronge hánám narángoet.

*Pol yá kámutnet me há átnet wawu álo rewe ingga naruk*

<sup>19</sup>Nák ku heronge hára rewe átnet, náuta sándá sáponga tángga nák háláng nanamáya Ánutu inánggoeráng, me Jesu Son Iháhá watán Iruk watá neháng káto tánggoek wata. Na ku ing há naret, márapmá rina tá nehángga átkoek, enendu kálu yará wa met wahára kungga ku Ánutu yá háláng namángga káyam ket yáni háranan son nehinek. <sup>20</sup>Wáina wata ku no pahánna yot hánám ing naret, no hánghálángngingga átang gu náut kámá kandák káman ma táindat. Kandák káman tángga ku Ánutu rahálá hára reprepmá naringgom. Inggálu me máriya wawu pikpito ma narená káto re átang ket tárák álosim rámá rámá tángngátat wa rewe tángga átnet. Kámutnet me átnet wawu rina rina tánggoet watá ku Jesu Son Iháhá wata kutná meng tárut táinek. <sup>21</sup>Iná nákkán nanará káin wawu ing, no ma kámurená átnet wata hulá wawu Jesu Son Iháhá wata kutná meng tárut tángga átnet, iná há kámutnet wawu álosim hánám, náuta Jesu yot átnemát. <sup>22</sup>Iná no ma kámurená átnet wawu yáup tángga áre yáupna wata páliná yá álo kámá sángga átnek. Kámutnet me há átnet wawu álosim re, enendu resim bu álosim hánám? Wawu ma narát. <sup>23</sup>Yayará wawu álosim rewe. No kung Jesu Son Iháhá watyot átnet wawu álosim hánám ingga naret. Kámutang kung Jesu yot átnet watá ku káwak káin átnát, náuta Jesu yot hátek. <sup>24</sup>Wáina enendu káwak káin há átang san háláng sáminet wawu kutná táwi hánám. <sup>25</sup>No me wawu pálipuk ingga narángga átkoet, wata ku no ing há naret, no káwak ketnán há átang yáup tángga háláng sáme naráng hákhátik sáni yá káto hálen heronge átneráng. <sup>26</sup>Wáina táe ku rám no son sásáhaya sándán káin áwinet wahára ku sándá náh kungga ku Jesu Son Iháhá wata heronge táwi hánám táng mángga ku kutná meng tárut táineráng.

*Ánutu yá Filipai iháng toliuk ngáyá ku márapmá susuwáyan káluná wa hányon mengga ting yámuk*

<sup>27</sup>Kutná táwi hánám wawu átkuku sáni yá kándáng re árán Jesu Son Iháhá watán me pingnga álosim wa rewe isutang átkuineráng wa. Wáina árát tu no áwángga sáhinet, me pingnga sáni re narinet wahára ku no ing há narinet, sándu káto hálangga pahán káman me nanará káman hára re átang gu hánghálángngingga áma náráwa yan naráng hákhátik káin me pingnga álosim wa táng káto táng yáminéráng. <sup>28</sup>Niyá yáup wata ingga sáháng káyam tát tu ma pitáindaráng. Wáina tát sáhángga ku káyam bá ku ing narineráng, nándu Ánutu yá náháng lem há táinek, iná sándu málámbá háláng sámángga son sáhinek ingga sáhángga ku wáina narineráng. Ánutu málámbá ku wáina hánám táinek. <sup>29</sup>Ánutu yá Jesu Son Iháhá wata naráng háting mámáyan káluná wa táng toling sámuk waháranon du Táwi ya naráng háting mánggoeráng wata ku wa isutang gu márapmá susuwáyan káluná wa hányon mengga ting sámuk. <sup>30</sup>Sándá márapmá rina suwánggoeráng wawu no sáni yot wakáin átang suwánggiut wáinanon, hang rám nahára kalabus kinan átang suwángga átkoet wáinanon.

## 2

*Pahán káman átang gu áma náráwa iháng álo táinemán*

<sup>1</sup>Sándá Jesu Son Iháhá watyot tántápin tángga átkoeráng, wata ku málámbá pahán sáni táng tárut tángga átkoek. Me Jesu yá sándá kikiná hánám naránggoek, wata ku sándá pahán láláp tángga átkoeráng. Me sándá Iruk Káungá watyot pahán káman átkoeráng. Hang Ánutu yá sándá urák sáni narángga sáháng álo tánggoek. <sup>2</sup>Sáni wáina átang gu nanará káman re kámá ya kikiná narángmán narángmán tátá watá orek sáni hára árán pahán káman re átneráng. Iná sándá wáina átneráng hálen wawu nák pahánna yá álosim hánám háleinek. <sup>3</sup>Rina rina táineráng wahára wu sáni ya re narát árená hálen kut sáni táng hip ma táindaráng, ináku sáni ya narát háená hálen kámá kápát kut yáni táwi ina háleineráng. <sup>4</sup>Sán káman káman dá sánin pahán káin rina átak wata re ma narindaráng, ináku áma náráwa nukngá yan pahán káin rina átak wa háláng yámámin ingga narineráng.

*Jesu Son Iháhá yá málám tángga han Ánutu yá táng áráng tiuk*

<sup>5</sup>Pahán nanará sáni wu Jesu Son Iháhá watá pahán nanará rina tingga átkoek wáinanon tingga átkuineráng. Kulá pahán du ing tingga átkoek:

<sup>6</sup>Málám bu Ánutu yon, enendu watá Ánutu yan uliháláng nák hára átak wa káto tángga árin ingga ma naruk.

<sup>7</sup>Ináku málámbán kut táwi wa wáina san árán málám tán ále hánám háliuk.

Áma nangge hánám hálangga yáup nangge hánámá kutná muná ina háliuk.

<sup>8</sup>Áma nangge hánám wáina hálangga ku málám tángga hangga Ánutu yan nanará isutang kámutuk. Wa kámutuk wawu hulá kámá hánám, wawu maripong hára kámutuk wa.

<sup>9</sup>Hulá wata hánám bu Ánutu yá Jesu táng hip táng áráng tin árená hánám árán, kut káman imuk wawu álo kámá hánám, kut watá ku kut kátu wa erek hánám iháng hátek.

- <sup>10</sup> Ánutu yá wáina tán du alek káinnan, me káwak káinnan, me káwak tárang káinnan watá kámuk hánám turingga hangga tun yáni hára imángga Jesu kutná meng tárut tángga wata tárang káin re átneráng,
- <sup>11</sup> hang milun kámuk ká ing meng tunggap táineráng,  
 “Jesu Son Iháhá wawu Táwi” ingga meineráng. Wáina meineráng wawu Nan Ánutu kutná meng tárut táineráng.

*Nándá ku ámna náráwa orek yáni hára alek káin hitung gá ina yamá mangga átkuinemán*

<sup>12</sup> Wáina hálendu, yanuknukna pánpáliná, sándá ku ráma ráma Ánutu yan milun isutnándaráng, wáinanon du inggálu wáina re isutang átkuineráng. No sányot áre wahára re ma isut kuindaráng, ináku sányot átnet me ma átnándát wawu sándá ku kándáng re átang átkuineráng. Ánutu yá son sáhángga ku sándá málámba rahálá hára rongrongngá hánám háháleya ku wata yáupmá tángga átkoek, wata ku wata naránga sáni tángga hangga Ánutu tárang káin átang gu mukmuro táninggom ingga wata pikpito naránga hánghálangngingga átang ket tarák álosim wa rewe tángga átkuineráng. <sup>13</sup> Ánutu málámba pahán sáni kinan káin yáup tángga áran pahán sáni tárurán du sándá rina tátáya narek wawu málámbá hálang sámán wa tánggoeráng.

<sup>14</sup> Sándá rina rina táineráng wata mená yon táwi tángga menmenná pálak ma táng kuindaráng. <sup>15-16</sup> Wáina tángga ku Ánutu nángánange yá ina átang ámna náráwa rahán yáni hára kandák ma árená rongrongngá kándáng re átneráng. Me átkukuná pálak wa tángga átang ámna náráwa yámamáya tángguineráng, hang ámna náráwa niyá kálu kándáng wa sangga kandák hánám átaráng wata orek yáni hára alek káin hitung gá yam yáni mangga átnándaráng sándá wáinanon átkuineráng. Wáina átneráng watá ku Jesu Son Iháhá watá son áwinek rám wahára wu no sándá ket tarák álosim tánggoeráng wata heronge naránga meng toling sámángga ku ing narinet, no yáup táwi rina tánggiut watá hánámá ma háliuk ingga narinet. <sup>17</sup> No Táwi yan yáup tánggoet wata ámna kámá yá nák nutkámut tátáya tánggoeráng. Sándá Jesu ya naráng háting mánggoeráng, wawu átkuku sáni wa taha sáni ina Ánutu yan alta káin tinggoeráng. Iná nák há nutkámut tát hálendu nák sipna watá ku taha titiya wáin kulená wa ina hálendu sándá átkuku sáni táng taha ina tinggoeráng wata ketnán kukuliyán wáina háleinek. Wáina tunggafeinek enendu nák ku heronge rewe átang átkuinet, hang no sányot heronge tángga átang átkuinet. <sup>18</sup> Kulá wáinanon du sándá heronge rewe táineráng, hang sándá nákkot heronge tángga átkuinemán.

*Pol yá Timoti suring mán Filipai káin kukuya miuk*

<sup>19</sup> Táwi Jesu yá narán álo hálén wawu Timoti suring me sándán káin kungga rám rina hára nákkán káin son áwinek wahára ku sándán me pingnga nanán naránga ku no heronge narinet. <sup>20</sup> Ámna nukngá kámá wa ina nákkot nahára kámá ma árak, iná ámna málám náwu nákkot pahán káman hálén sán hálang sásámáya pahán yot yáup tánggoemát. <sup>21</sup> Ámna nukngá kámá wu yáin pahán káin rina átak wata rewe narát árená hálendu Jesu Son Iháhá yan yáup wa meng isurát kuku wata ma narángguráng. <sup>22</sup> Iná Timoti yan ket tarák álosim wawu sáni kangga ku yáup ámna álosim ingga sáni há kangngátaráng wa. Sáni há nareráng wa, watá hálang namán du me pingnga álosim wata yáupmá tánggoemát wawu nange káman dá naning hálang imángngátak tarák wáinanon. <sup>23</sup> Wáina wata ku no sopmuná ingmen suring me sándán káin áwánggim, enendu huláttingga hánám bu ná hára rina tunggafen káin ingga wata hálet. <sup>24</sup> Iná nák ku ing hánám há naránga átat, Táwi yá kálu táng toling namán du máriya sim bu hányon áwángga sáhinet.

*Pol yá Epafrotitus suring mán Filipai káin kukuya miuk*

<sup>25</sup> Kulá hang nanará káman du ing naret, Epafrotitus kálak há suring me sándán káin son áwinek. Ámna wawu nák nukna me yáup nákkot káman tángngátamat, hang ámna wawu tewe ámna yá hánghálangngingga erawánggátaráng tarák wáinanon du miti yáup tánggoek. Ámna wawu sáni suring mát áwáng sánin me nanuk. No náut ta kesák táut wahára hálang namamáya suring mát áwuk. <sup>26</sup> Ámna málám wawu sán sásáháya táup tángga átak, hang ing hányon naruk, málámbá ilalák táuk wawu sándu há naruráng, enendu málám bu álo háliuk me muná wawu sándu ma narárang, wata ku pahán márap táwi hára átak. Wáina hálendu, no suring me sándán káin kuinek. <sup>27</sup> Wawu pálipuk, ilalák márapmá hánám tángga hála kámujuk, enendu Ánutu yá urákná naránga ku ilalákná wa tán álo háliuk. Ánutu yá wata re urákná ma naruk, ináku nák ka urákna hányon naruk, wawu márapmá táwi nukngá yá nákkot átnát ta ma naruk. <sup>28</sup> Wáina wata ku no há hánám suring me áwán du sándá kat álo áran kangga heronge narineráng, me no sándá ingga narángpak ma táindát. <sup>29</sup> Rám Epafrotitus yá sándán káin áwáng hínek wahára wu sándá ku wa Táwi kutná hára álo

kámá áwelák ingga inángga heronge táwi hánám táng mineráng. Sándá ámna wáinaná wawu kut yáni táng hip tángguineráng. <sup>30</sup> Jesu Son Iháhá watán yáup pa ingga átkukuná hála saúk. Málámbán átkuku wata narán táwi ma háliuk, ináku nák háláng nanamá wata narán táwi háliuk. Sándá háláng nanamáyan wawu káluná muná, wáina wata ku Epafrotitus yá sándán kome tángga nák háláng namánggiuk.

### 3

*Niyá Jesu ya naráng háting minek wawu ámna náráwa kándáng hánám*

<sup>1</sup> Yanuknukna, me nukngá ing sánin, Táwi ya heronge hánám naráng mineráng.

No me ing son uying sámamáya takta ma narát, náuta me nátá ku háláng sámán álo kámá átnéráng.

<sup>2</sup> Ámna kámá ang páyom bá ina ket tarák wáik tángga átninggoeráng ga ku sándá hálang rákit kándáng tángga átkuineráng. Ámna wáinaná watá ku ámna ing yánáng tolinggoeráng, “Sándá átkuku sásáliná muná wa tánin ingga wawu kip sáni wa mamará háleinek.” Me wáina yánánga átninggoeráng, enendu me wawu kusák hánám. <sup>3</sup> Iná nándu Ánutu yan ámna náráwa pánpáliná hánám. Nándu Iruk Káungá watán háláng hára Ánutu ináng sáknginggoemán. Nándu Jesu Son Iháhá watán yáup hára re ku Ánutu yá son náhuk wata heronge hánám naránga Jesu kutná meng tarút tánggoemán, wáina wata ku, ing há naremán, ámna yá yáni ya sut yáni hára tarák hulá hulá rina tángngataráng watá kámá ma háláng yámindák.

<sup>4</sup> Iná sut tán kutná kutná watá álo háláng nánámáyan iná wawu nák ku álo kámá hánám wáina átgem. Ámna kámá yá sut tán kutná kutná hára háláng yáni tin átarang wáina no átang iná wawu no erek hánám iháng hátinggem. <sup>5</sup> Náku ku tunggafengga rám 8 áre ku kepna maruráng. Iná náku ku Israel ámna náráwa waháranan, me tombong Benjamin waháranan, me nanna me mamna wawu tombong Hibru hánám wata ku nawu Hibru hánám bon. Náku ku tombong Farisi hálendu Moses yan meng rákit me wa kándáng hánám isutnándat. <sup>6</sup> Uláp pu no Jesu yan ámna náráwa wawu Ánutu káyammá ingga naránggiut, wata ku Ánutu kutná meng tarút tán ingga ku wa iháng lem táup hánám tánggiut. Iná ámna náráwa yá meng rákit me wahára ting kung nákkán átkuku wa káineráng wawu nákkán kandák kámá ma káindaráng.

<sup>7</sup> No uláp pu ále hulá hulá wáina táe Ánutu yá wa kápangga ku neháng álole táinek ingga wáina tánggiut, enendu inggálu ku Jesu Son Iháhá wata naráng háting mánggoet, wata ku sut hára hulá hulá wáina tátá wawu nare ále hánám hálanggoek. <sup>8</sup> Wata kátu háranon du ing, no naret tu Táwina Jesu Son Iháhá wata naráng háting mámá wawu kutná táwi hánám, wata ku kutná kutná kámuk hánám wawu kápe ku ále hánám hálanggoeráng. Náku ku Jesu ya naráng háting mángga ku kutná kutná kámuk wawu erek hánám há sang háliut. No wa kápe ku susut ina hálet Jesu Son Iháhá wa rewe káto tángga <sup>9</sup> watyot ronrosin átkuinemát. No meng rákit me watán kálu wa isutnet wata re ámna kándáng ma háleindát. Ináku ámna kándáng háháleyan káluná wawu Jesu Son Iháhá ya naráng háting mámá wa rewe. Jesu ya naráng háting mátné ku Ánutu yá ámna náráwa kándáng ingga náninek. <sup>10</sup> No Jesu Son Iháhá wata kándáng hánám naráng minán naret. Jesu yá há kámurán Ánutu yan háláng watá son táng tarút táuk. Ánutu yan háláng watá nákkot átnék wata naret. Rám na márampá suwánggoet wahára ku naráng kung Jesu yá márampá hányon suwuk wa naránga ku watá neháng káto tánggoek, hang no ku Jesu yan yáup wa háláng imóamáya kátkámut ta tiyawinet, tarák wáinanon du Jesu yá nák háláng namámáya kámutuk. <sup>11</sup> No me wa mengga háet wata páliná yá há tunggafeineráng ga naret, náuta máriya ku Ánutu yá kátkámut háranan son há neháng tarút táinek ingga naret wata.

*Polyá tawon tená hára kung heheya hururung kungngátak*

<sup>12</sup> Jesu Son Iháhá watán ket tarák ká átak wáinanon hánám nákkán ket tarák watá kung wahára hánám ma árak, wata ku nawu kándáng álo átat ingga ma menggem, ináku ráma ráma wu yáup háláng hánám tángga Jesu inanyon háháleya yáupmá tánggoet. Jesu yá no málám inanyon átnát ta naránga málámbán pingnga ya há nehuk. <sup>13</sup> Yanuknukna, nawu ket tarák wáina hánám há tángga átat ingga ma narát, iná no nanará káman naránggoet, wawu uláp rina tánggiut wata ma naránggiut, ináku yáup háláng tángga ku máriya rina tunggafeinek wa tátá wata naráng tánggoet. <sup>14</sup> Náku ku yumnak álosim wa tán ingga tawon tená wahára kung heheya hururung hánám kungga átkoet. Yumnak wawu ing, Jesu Son Iháhá watá yáup táuk wahára kungga ku no áráng alek káin Ánutu málámbot álo kámá átnát ta wata ingga mantáng namuk.

<sup>15</sup> Kulá sán niyá naráng hákhátik hára há káto hálangga átaráng hálendu sándá ku nanará álosim no wa met wawu pálipuk ingga naránga ku wa isutneráng. Iná nanará sáni yá kámá



áta k hálén wawu Ánutu málámbá ku nanará sáni wa táng tolingga táng kándáng ting sámínek. <sup>16</sup> Iná kutná táwi hánám wawu ing, nándu Ánutu yá nanará páliná há námán kangga táumán wa káto tángga átang wa isutnemán.

<sup>17</sup> Yanuknukna, sándá ku nákkán ket tárák rina wa há káuráng, wata ku kung nuknuk sáni hára sengsáráp tángga ku nákkán ket tárák watá isutkoeráng wáinanyon sándá ku hányon isutnéráng. Sándá ku ámna náráwa niyá nándán ket tárák wa kangga wáinanyon isutkoeráng wa kápánga ku wáinanyon isutkuineráng. <sup>18</sup> Wawu náuta, ámna táup pá yon Jesu Son Iháhá watán maripong wata káyammá hálangga átaráng wata. Me náwu rám máro hánám há sánánga áwut, wanyon du kula ku rahánna umíná kinan átang wa son sánet. <sup>19</sup> Ámna wawu sut tán kikiná wa rewe isutkoeráng, wata ku sut tán kikiná watá ánutu yáni hálanggoek. Káwak kán kutná kutná wata re narát árená hálén káwak kán tirik tárák reprepamá átaráng wa isusut ta reprepamá ma naréngguráng, ináku wa tátáya heronge hánám naránga wáina tánggoeráng. Ámna wáinaná wawu Ánutu yá iháng lem tán muná kuineráng. <sup>20</sup> Iná náni wu it náni hulá wu alek, wata ku Táwi Jesu Son Iháhá watá alek kálu hangga ku son náhínek wata pahán yot hánám hálang mángga átamán. <sup>21</sup> Málámbán háláng hára kutná kutná kámuk hánám wa tán málámba tárang káin árát tu háláng watá yon du káwak sut náni nátá márapmá suwánggoeráng wa tán kokolingga hulá kámá hálangga ku málámba sutná yá áta ina álosim hánám háleineráng.

## 4

### *Heronge hára pahán káman átang nanará álosim wa tángga átnemán*

<sup>1</sup> Wáina wata ku, yanuknukna, sándá ku wáina re átang gu Táwi hára káto yáreng kátíngga átkuineráng. Ná k ku sándá kikiná hánám naránga ku sán son sásáhaya álo kámá hánám naránggoet. No yáup háláng rina táut wata páliná wu sán, wata ku no sándá heronge hánám naráng sámánggoet.

<sup>2</sup> Yuodia kálíng Sintike, no ing há táinemálák ka naret, sándá ku menmen ma táená ku pahán káman átkuinemálák, náuta sán yayará wu Táwi yan yáup náráwa. <sup>3</sup> Iná yáup náti káman hánám tángga árená kák ku ing kaníndet, ko ku náráwa yará wa háláng yámátá ku watá pahán káman átkuinemálák. Náráwa yará watá nákkot káman átang yáup háláng tángga Jesu yan me píngnga álosim wa ámna náráwa yánánga átkumán. Náráwa yará wa, me Klemen yot tu ámna náráwa nukngá kámá átaráng watyot kámuk náni káman átang gu me píngnga álosim wa yánánga átkumán. Ánutu yá átkuku yan papia hára kut yáni há uying san átaráng.

<sup>4</sup> Rámá rámá Táwi ya heronge naráng mineráng. Son me wanyon ing meíndet, heronge naráng mineráng! <sup>5</sup> Sándá ámna náráwa kámuk iháng pahán láláp táng yámát tu pahán láláp sáni wa hiták káineráng. Táwi yá áwáwáyan rám wawu hátewingga áta. <sup>6</sup> Náut kámá káman da narángpak ma táindaráng, ináku rámá rámá náut ta naránga ku sáponga tángga Ánutu heronge me inánga ku háláng sásámáya inángguineráng. <sup>7</sup> Wáina tángga ku pahán láláp Ánutu yá námánggoek watá pahán nanará sáni kándáng pínná tángga átnék. Ánutu yá pahán láláp námánggoek wawu Jesu Son Iháhá wata naráng háting mánggoemán wata. Ánutu yan pahán láláp wawu álosim hánám, ámna nangge yá wata hulá wa nanaráyan tárák ku muná hánám.

<sup>8</sup> Yanuknukna, me nukngá kámá ing sánin, rámá rámá ku ing naránga átkuinemán, me pálipuk re isusut, kámá iháng totolí, kálu kándáng isusut, rongrongngá re átkuku, náut kámá álosim ba kikiná nanará, kámá yá álosim rina tát kákápá, álo kámá rewe átnát, me álosim tátne kámá yá wa kangga Ánutu kutná meng tárut tátá, wa hánám naránga wahára re átang átkuinemán. <sup>9</sup> Wáina átang gu no me rina sánáng tole táuráng me nákkán hára rina naruráng me nákkán hára rina káuráng wa iháng tárák hára tit tu Ánutu pahán láláp márumá watá sányot átnék.

### *Pol yá Filipai yá taha yáni sat málámbán káin kuk wata heronge naruk*

<sup>10</sup> Kulá rám hásák sim átang áwuráng wahára sándá ma háláng namuráng. Iná rám nahára ná k háláng namámáya son naráng hátit no Táwi ya heronge táwi hánám naráng mánggoet. Pálipuk uláp pu háláng nanamáya naránggiuráng, enendu háláng nanamáyan káluná wawu muná. <sup>11</sup> No wáina sánet wawu no kutná kutná ya kesák tángga átang wata ingga ma sánát. Ná k ku átnátna káin náuta rina tunggafengngátak wawu álo rewe ingga naránggátat. <sup>12</sup> Kesák átnát rámá me kutná kutná pálak átnát rámá wawu nákkán káin há tunggafeng namuk. Rina rina nákkán káin tunggafeinek wawu álo rewe ingga há narinet. Sungi na pálak me sungi na muná, hang kutná kutná na pálak me kutná kutná na muná átnet wawu álo rewe ingga narinet. <sup>13</sup> Jesu Son Iháhá watá neháng káto tánggoek, wata ku watán háláng hára ku no kálu rina rina watá nákkán káin tunggafeinek wawu álo rewe átnet ingga naret.

<sup>14</sup>Enendu no sándá háláng namángga márappá rina sungga átkoet wa táng láláp táuráng wata heronge naráng sámét. <sup>15</sup>Kulá Filipai ámna náráwa sáni ing há nareráng, Jesu yan me pingnga álosim watá hulátíngga sándán káin áwuk wahára átang árongga no Masedonia provins wa sáut wahára wu sándá re ku sup pán kálu nák háláng namuráng, Jesu yan ámna náráwa urum kámá yá ku muná. <sup>16</sup>Hang it yáilá Tesalonaika wakáin átang kesák tángga átkiut wahára wu sándá rám máro sim bon nák háláng namámáya sup hirárat nákkán káin áwánggiuk. <sup>17</sup>Sándá sup nukngá wáinanyon háláng nanamáya narineráng ingga narángga wata ma sánát, ináku ket tárák álosim wáina wa tángga re árát tu Ánutu yá sáháng álolo táng sámínek ingga naret. <sup>18</sup>Kulá sup táwi Epafrotitus imát ihángga áwuk wawu há namuk, iná sup wa sat áwuk watá ku nákkán kesák rina wa erek hánám táng tolin du álo rewe átát. Iná sup wa sat áwuk watá ku Ánutu ya towet sing mát mungganá kikiná hásin álosim narángngátak wáina. <sup>19</sup>Ánutuna wawu kutná kutná kámuk hánám wata márúm yáni. Wáina wata ku málámbá náuta kesák tángga átkoeráng wa sáhángga ku Jesu Son Iháhá yan yáup wahára kungga ku wa sámángguínek. <sup>20</sup>Nan náni Ánutu wawu rámá rámá sásáliná muná kutná meng tárut tángga átkuinemán. Wa pálipuk.

*Pol yá káe álo ná meng san Filipai yan káin kuk*

<sup>21</sup>Sándá nákkán káe álo\* táng kung Jesu Son Iháhá watán ámna náráwa kámuk yáinineráng. Hang nuknukna nákkot átaráng watá káe álo yáni hányon meng sat sándán káin áwek. <sup>22</sup>Jesu yan ámna náráwa it yáilá nahára átaráng watá káe álo yáni meng sat sándán káin áwek, me Jesu naráng mená Rom bán ámna yáilá Sisa watán it kinan yáup tángga átkoeráng watá káe álo yáni pahán yot hánám meng sat sándán káin áwek.

<sup>23</sup>Táwi Jesu Son Iháhá watá pahán sámángga iruk sáni yot átnék. Wa pálipuk.

---

\* **4:21:** Me “káe álo” náwu Pol yá papia ná káen uyiuk ingga ma miuk, ináku Pol yá heronge me mengga uyiuk. Pol yá papia ná uyiuk wawu hilápmá me yonyon me rina kálu uyiuk wawu ma narámán.

## Pol yá Kolosi yan papia uying yámuk

<sup>1</sup> Nák ku Pol, Jesu Son Iháhá watán aposel. Ánutu yá málámbán pahán isutang gu no aposel yáup tátáya neháng tunggap táuk. Nuk náni Timoti ku nákkot átamát.

<sup>2</sup> No papia ná uye ku sate nuknuk náti sán it yáilá Kolosi hára átaráng sándán káin áwek. Sándu rongrongngá hánám átang Jesu Son Iháhá wata naráng háting mángga ku naráng hákhátik sáni ma sáená káto hánám tángga átkoeráng.

Nan náni Ánutu yá pahán sámán pahán láláp pá sányot átnek.

*Kolosi yá Jesu ya pálipuk hánám naráng háting mángga átkoeráng*

<sup>3</sup> Nát tá sáponga tánggoemát wahára wu rámá rámá sándá narángga Táwi náni Jesu Son Iháhá wata Naning Ánutu wa heronge me inánggoemát. <sup>4</sup> Sándá Jesu Son Iháhá wata naráng háting mángngátaráng, me Jesu yan ámna náráwa wata kikiná naráng yámángngátaráng wata ingga met narángga ku wáina tánggoemát. <sup>5-6</sup> Rám me páliná, me pingnga álosim, watá sándán káin áwuk wahára ku Ánutu yá alek kán kutná kutná álosim málámbán ámna náráwa yámámáya tiyawingga san átak wata sánát naruráng. Kulá inggálu sándá pálipuk há hánám táinemán ingga narángga wa tátáya hálengga átkoeráng, wata ku Jesu ya naráng háting mángga kámá ya kikiná naráng yámánggoeráng. Káwakngá káwakngá me pingnga álosim wa mengga kut narángga ámna náráwa yá wa isutang árát me páliná watá páliná álosim sángga kungga átkoek. Kulá sándu wáinanyon, hulátingga hánám Ánutu yá pahán námángoek watán me páliná wa kándáng hánám há narángga wa táurang hára átang áwánga inggálu sán hára wáinanyon páliná sángga átkoek. <sup>7</sup> Epafras yá me pingnga álosim wa sánáng tolin du wa narángga táurang. Epafras wawu Jesu Son Iháhá watán yáup ámna álosim, nányot yáup káman táená. Nándá wata kikiná hánám naráng mánggoemán. Watá nán kurák mátap náni tángga sándán káin kungga Jesu yan me pingnga álosim wa sánuk. <sup>8</sup> Ámna watá ku sándu Iruk Káungá watán hálang wahára kungga Ánutu yan ámna náráwa wata kikiná narángngátaráng ingga nánuk.

*Ánutu yá Kolosi hálang yámámáya Pol yá sáponga táuk*

<sup>9</sup> Wáina wata ku hulátingga sándán pingnga wa narumát wahára átang áwánga inggálu átamát wahára ku rámá rámá sáponga tángga Ánutu inánggoemát wawu sán hálang sámán du málámbá sándá rina átnát ta narek wa kándáng narát tu Iruk Káungá watá nanará álosim wa sámán nanará watá sándán káin táwi táí háháleya. <sup>10</sup> Wáina sáponga tánggoemát wawu nát tá ing narángga wata, sándá ket tárak álosim Táwi yá sándá rina átnát ta narek wa há hánám tángga átang gu Ánutu málámba kándáng naráng mángga árát nanará sáni watá táwi hálengga kungga árán du sándá ket tárak álosim kámuk wa tángga árát watá páliná álosim sángga árát tu málámba wa kangga álosim naráng sáminek. <sup>11</sup> Hang sáponga ing hányon tánggoemát, Ánutu yan hálang wawu táwi hánám yamá sireretná pálak emá re átang watá hálang sámán du sándá káto átang márappmá hulá hulá wata kinan háineráng enendu heronge rewe pahán láláp hára átang márappmá wa suwánga átkuineráng. <sup>12</sup> Wáina átang gu Nan náni heronge me inángguineráng. Málámbáyon tán du sándá málámbán ámna náráwa páliná háliuráng, wata ku ámna náráwa sán yamá kinan átaráng watá alek kán kutná kutná álosim sásámáyan tiyawiwuk wawu álo ihineráng ingga miuk. <sup>13</sup> Páyung watán hálang wata tárang káin árátne watá pin náni tángga átkiuk, enendu Ánutu málámbá son náhángga náháng málámba Nanggená kikiná hánám naráng mángngátak watán kumbi kinan tingga málámbá pin náni tángga átkoek. <sup>14</sup> Nanggená watán yáup wahára kungga ku Ánutu yá son náháng yungga nándán mukmuro wa yawonduk.

*Jesu Son Iháhá watá kutná kutná kámuk hánám wa iháng hátingga árang átak*

<sup>15</sup> Nándá Ánutu ma kakayan, enendu Nanggená wawu Ánutu málámbon, wata ku Jesu há naráng memán hálendu Ánutu há naráng memán hálek. Nanggená yáilá ku wa, wata ku kutná kutná málámbá narán tunggafiuráng wata yáin yáni ku málám wa rewe. <sup>16</sup> Nanggená wahára kungga ku Ánutu yá kutná kutná kámuk hánám wa iháng tunggap táuk. Alek káin me káwak káin, rahán dá kakayan me ma kakayan, angelo me iruk hulá hulá átaráng me kutná kutná uliháláng yáni pálak átaráng wawu Ánutu yá Nanggená wahára kungga ku Nanggená málám watán da iháng tunggap táuk. <sup>17</sup> Nanggená wawu há árán torong káin du ále kutná kutná watá tunggafiuráng, hang watá tán kutná kutná kámuk hánám watá kándáng re átkoeráng. <sup>18</sup> Nanggená málám bu miti ámna náráwa wata yáin yáni, hang miti ámna náráwa wawu wata sutná. Watá yon du miti ámna náráwa watán átkuku wata hulá, me kámurená háranan dá son tátárat wawu málámbá kálak máta yáriuk, wata ku kutná kutná

kámuk hánám ba yáin yáni háliuk. <sup>19</sup> Ánutu málámbán káin nanará me háláng me átkuku rina átaráng watá erek hánám Nanggané wahára átnérang ingga miuk, wata ku Ánutu málám bu Nanggané wahára átak. <sup>20</sup> Jesu yá yáup táuk wahára kungga ku Ánutu yá alek káin me káwak káin kutná kutná kámuk hánám átaráng watá málámbot pahán káman háháleyan káluná wa sariuk. Kálu wawu ing, Jesu yá maripong hára kámurán sipmá yá sungguliuk wahára kungga ku Ánutu yot pahán káman háliumán.

<sup>21</sup> Uláp pu sándu Ánutu yot sansan átang gu nanará kandák me ket tárak wáik wa tánggiuráng wahára kungga ku wata káyammá átkiuráng. <sup>22</sup> Wáina átkiuráng, enendu inggálu ku Jesu Son Iháhá watá málámbán káwak sut wa táng kung kátkámut kálu hára tiuk wahára kungga ku Ánutu yá tán du sándá málámbot pahán káman há háliuráng. Wáina tán du rahálá hára rongrongngá káungá hánám árat sán sáháng áwáng kondolá hára tin du ni kámá káman dá me hára sáháng titiyan tárak kámá muná. <sup>23</sup> Kulá sándu naráng hákhátik wa káto tángga kándang átkuineráng. Ánutu yan me pingnga álosim watá ku nanará káman ing nánang toliuk, nándá ku Ánutu yá alek kán kutná kutná álosim wa náminek ingga hálengga átnemán. Náut kámá káman dá sángsarungingga sáháng uyingga kun nanará wa sanirot. Me pingnga álosim wawu káwak ketnán ámna náráwa kámuk hánám átaráng watán káin meng isurát kuk, hang nák Pol nák ku me pingnga álosim watán yáup ámna hányon háliut.

*Pol yá Jesu yan ámna náráwa háláng yámámáya yáup tánggiuk*

<sup>24</sup> Ná k ku sán háláng sásámáya márampá suwángoet wata heronge narángga átat. Jesu Son Iháhá watá márampá me láwit rina rina no susuwáyan da mengga tiuk wawu málámbá márampá rina suwuk wáinanyon no kámuk hánám ma suwut, wata ku yáup emá re tángga átang kungga sutna hára márampá rina wa erek hánám sung hálinet. No wáina tánggoet wawu míti ámna náráwa wa háláng yámámáya tánggoet, wawu Jesu málámba sutná wa.

<sup>25</sup> Ánutu málámbá neháng tunggap tán du no Jesu yan ámna náráwa háláng yámámáyan yáup ámna háliut. Nákkán yáup wawu Ánutu yan me erek hánám sánang tolinggoet wa.

<sup>26</sup> Málámbán me náwu Ánutu málámbá uláp pon táng kilak ting san rám hasák hánám átang áwuk, wáina hálendu ámna náráwa yá ma narená átkiuráng. Iná inggálu wawu Ánutu málámbáyon Jesu yan ámna náráwa rahán yáni hára me wa táng hiták tiuk. <sup>27</sup> Ánutu yá málámbán pahán isutang gu me kilak átuk wa táng hiták tiuk. Me wawu álosim hánám watá ámna náráwa káwakngá káwakngá átamán wa kámuk hánám álo háláng náminek. Me wawu ing, Jesu Son Iháhá wawu pahán sáni kinan káin átak, wata ku watá sángot kung alek káin kutná kutná álosim tiyawing sámu ku sáminek ka wata hálengga átkoeráng.

<sup>28</sup> Nándu pahán náni káin ing narángoemán, ámna náráwa yá Jesu Son Iháhá wata naráng hákhátik hára káto hánám hálengga árat tu nándá yángot kung Ánutu rahálá hára tinemán. Wáina narángoemán, wata ku nándá me pingnga álosim wa meng tunggap tángga ámna náráwa káman káman yánángoemán. Wáina tángga ku ámna náráwa kámuk hánám rina kákámá wa tátáya mená yánánga nanará álosim Ánutu yá námená wa isutang yánang tolinggoemán. <sup>29</sup> Wáina wata ku no hánghálangngingga átang yáup wa tánggoet. Jesu Son Iháhá yá málámbán háláng táwi wa namángoek wahára kungga ku wáina tánggoet.

## 2

*Naráng hákhátik hára káto átang gu me kusák wa kátang hang tinemán*

<sup>1</sup> No sándá ing narineráng ga naret, no sán me ámna náráwa í táwi Laodisia káin átaráng wa, me ámna náráwa káto ná k kurák mátapna ma naráráng wa háláng sásámáya hánghálangngingga átang yáup wa tánggoet. <sup>2</sup> Yáup wa tánggoet wawu sán pahán sáni táng káto tátáya, me pahán sáni seng tárut tae Ánutu yan ámna náráwa kikiná kápánga pahán káman átnát wata. Sándá no me wa met wáina átang gu Ánutu yan me pingnga álosim wa kándang hánám naráng rákit tángga wahára kungga ku iruk kán kálu kutná kutná álosim hulá hulá átaráng wa ihineráng. Wáina tángga ku Ánutu yan me kilakngá wata hulá wawu Jesu Son Iháhá wa ingga narineráng. <sup>3</sup> Jesu Son Iháhá watá rewe ku álo háláng námán nanará álosim tángga Ánutu yan me maming tái álosim hánám wa kándang hánám naráng rákit táinemán. <sup>4</sup> Ámna kámá yá sángsarungingga me karo táng sámánirot ingga no me ná sánet. <sup>5</sup> Ná k ku sányot ma árat, enendu iruk kálu ku sányot há átat, hang sándá ket tárak álosim tángga naráng hákhátik sáni Jesu Son Iháhá hára káto hálengga átaráng wa met naránga heronge naráng sámángoet.

*Jesu Son Iháhá yot tántápin tángga átang gu átkuku páliná wa táinemán*

<sup>6</sup> Wáina wata ku Jesu Son Iháhá wawu sáni Táwi náni ingga há táuráng, wata ku watyot emá re átkuineráng. <sup>7</sup> Káráp pá káwak uminá pálak hára ráhulá kun áráng hengga átnándak

wáinanyon du sándá Jesu hára káto hálangga átneráng. Me pingnga álosim sánuráng wahára káto yárengga arát tu naráng hákhátik sáni watá káto hálangga arán du Ánutu heronge me táwi hánám inángguineráng.

<sup>8</sup> Kándáng hánám hálang rákit tángga átneráng! Ámna kámá yá miti yan kálu nanará kusák me, me hánámá hánámá wa sánát tu sándá watán nanará wa ma isutnándaráng. Ámna wáinaná wawu Jesu Son Iháhá watán nanará ma isutnándaráng, ináku ámna nangge yan nanará yot káwak kán nanará wa isutnándaráng.

<sup>9</sup> Jesu Son Iháhá wawu ámna nangge hánám háliuk, ngáyá ku Ánutu málámbon. Ánutu málámbán káin nanará me hálang me átkuku rina átaráng watá wahára erek hánám átháleráng. <sup>10</sup> Angelo me iruk hulá hulá átaráng me kutná kutná uliháláng yáni pálak átaráng wata yáin yáni ku málám wa rewe, iná sándu watyot tántápin há táuráng, wata ku Ánutu yá átkuku wa sámán du átkuku álosim watá sányot táwi hánám wa átang kuinek. <sup>11</sup> Sándu Jesu yot ronrosin átang gu kep mamará watán hulá kándáng hánám nareráng. Wawu ámna yá ket yáni yá sándán káwak sut mamará hálanggátak wáina muná, ináku Jesu Son Iháhá watán yáup wahára kungga ku pahán kakngá wa yalingga táng san kuk hálek. Kep mamará wata hulá hánám bu wa. <sup>12</sup> Jesu kutná hára umi kuhuráng rám wahára wu Jesu tanggán káin usuráng wáinanyon sándu Ánutu yá tanggán káin sáháng usuk ina hálek. Wáina tán du Ánutu yá kátkámut kálu wahára Jesu son táng tárut táuk wáinanyon du sándá watán hálang wata naráng hátinggoeráng wahára kungga ku Ánutu yá Jesu yot son sáháng tárut táuk ina hálek.

<sup>13</sup> Uláp pu sándu mukmuro hulá hulá wa tángga pahán kakngá wa isutang átkiuráng rám wahára wu há kámurená yá ina átkiuráng, enendu Ánutu málámbá tán sándu átkuku mirak wa tángga Jesu Son Iháhá watyot ronrosin átkoeráng. Ánutu yá mukmuro náni kámuk hánám wa yawonduk. <sup>14</sup> Meng rákit me watá náháng me hára tingga mukmuro náni wa iháng hiták tín du nánda watán hálang wata tárang káin átkiumán, enendu Ánutu yá me retá náháng me hára titi wa yawondang gu meng rákit me watán hálang wa táng hang tingga táng Jesu yot maripong hára kátiuk. <sup>15</sup> Jesu yá maripong hára kámutuk wahára kungga ku Ánutu yá iruk hulá hulá me kutná kutná hálang yáni pálak watán hálang wa rahán táwi hára iháng hang tingga táe ále hánám háleráng ingga táng hiták yáliuk.

*Jesu yot há kámutumán wata ku meng rákit me watá ma hálang námindák*

<sup>16</sup> Wáina wata ku ámna kámá yá umi sungi nanayan meng rákit me, me miti yan kálu rám táwi kákápáyan meng rákit me, hang yap mirak kán rám me Sabat tán rám watán meng rákit me wa sándá ma isutkuráng ingga meng sámát watán me wa ma narindaráng. <sup>17</sup> Ále meng rákit me wa meme hálek wawu yongnga rewe. Uláp Ánutu yá meng rákit me wa málámbán ámna náráwa yámuk wawu Jesu Son Iháhá yá máriya áwinek ingga wata tárakngá yá ku wa yámuk. Wata ku meng rákit me wata hulá hánám bu Jesu Son Iháhá málám. <sup>18</sup> Iná ámna kámá yá kusák hára kungga yáni tángga hangga angelo yánáng sáknnginggoeráng. Wáina tángga ku sándá wáinanyon há tániráng ingga wata sánánggoeráng. Sándá ámna wáinaná wa yápmat watá sángot kung ket tárak wáik wa tángga átang yumnak álosim Ánutu yá sásámáya tiyawing san átak wa ma ihánirot. Ámna wáinaná wawu ára rina kangngátaráng wahára yárengga átang gu náni wu kut náni pálak ingga narángngátaráng. Iruk Káungá watán nanará wa ma isurená náni wu nanará náni pálak ingga narángngátaráng, enendu nanará yáni wawu ále hánámá rewe.

<sup>19</sup> Wáina átang gu yáin náni Táwi Jesu wahára ma rosená átkungngátaráng. Káwak sut káman da yáilá yá átang gu sutná kátu wa hálang yámángga arán du ulin watá tán du sut seng dunkun táená wa iháng káto tángga átnándaráng. Wáinanyon du yáin náni Jesu wata málámbán ámna náráwa wa hálang yámángga arán du málámbot káman hánám átkoeráng. Wáina átang gu Ánutu yan hálang hára Jesu sutná watá tihangga kungga átkoek.

<sup>20</sup> Sándu Jesu Son Iháhá watyot há kámuturáng, wata ku káwak kán nanará wata tárang káin ma átnándaráng. Rina ta ku káwak ámna yá ina átnnginggoeráng? Rina ta ku me wáina isutneráng ingga meng rákit me kámá ing tená wa isutkoeráng, <sup>21</sup> “Ma ihindalák, ma náindalák, ma ihánggápindalák?” <sup>22</sup> Meng rákit me wáina watá ku káwak ketnán kutná kutná ku sopmuná wáik háleineráng wata rewe mek. Meng rákit me wáina wawu ámna yá re narát tunggafen du wáina isusut ta nánená, wata ku sándá wa ma isutnándaráng. <sup>23</sup> Meng rákit me wáina wawu ing, miti yan kálu meng rákit mená hulá hulá, me kusák hára kungga yáni tángga haha, hang káwak sut hára kálu rina rina kandák táe Ánutu yá nahángga álosim naráng námik ingga tátá. Kámá yá ku me wáina wawu pálipuk nanará álosim ingga narángga átkoeráng, enendu me wáina watá hálang námán pahán kakngá yá ket tárak wáik táin ingga narángoek wata hálangngá tángga hahayan tárak ku muná.

## 3

*Jesu Son Iháhá watyot kámurená háranan son tárutumán*

<sup>1</sup> Ánutu yá Jesu Son Iháhá watyot kámurená háranan son sáháng tárut táuk, wata ku alek kán kutná kutná álosim wata pahán kinan hánám kikiná naránguineráng. Alek káin irawa wawu Jesu Son Iháhá watá Ánutu ketná álák kálu putung átkoek. <sup>2</sup> Rámá rámá nanará sáni wu alek kán kutná kutná rina átaráng wata re nanará sáni kinan káin naránga átkuineráng. Iná sándá ku káwak kán kutná kutná rina rina átaráng wata ma naránga átkuinderáng. <sup>3</sup> Sándán pahán kakngá wawu há kámurán du átkuku sáni wawu Jesu Son Iháhá watyot kilak árán Ánutu hára tápingga átkoeráng. <sup>4</sup> Jesu Son Iháhá wawu átkuku sáni wata hulá, wata ku rám Jesu yá hiták háleinek wahára ku sándu watyot yamá hálangngá pálak wahára hányon hiták háleineráng.

*Nándu ámna náráwa mirak háliumán*

<sup>5</sup> Wáina wata ku káwak kán ket tárák rina sányot átak wa erek yápmang hálineráng. Ket tárák ing wata met, máramamá, ket tárák reprepamá, pahán dá tárurán ket tárák kandák tátá, me há árán nukngá ya mekmek. Há árán nukngá ya mekmek wawu ánutu kusák ináng sáknéná wáinanyon. <sup>6</sup> Ket tárák kandák wáina táená wawu Ánutu yan milun yalingngátaráng, wata ku málámbán pahán káráp watá ihinek. <sup>7</sup> Sándu uláp Jesu ya ma naráng háting muráng wahára wu ket tárák kandák wáina wa há tánggiuráng.

<sup>8</sup> Iná rám nahára ku ket tárák ing wa erek sang hálineráng, kuk tángmán tángmán, pahán káráp, ket tárák kandák kámá yáyále, mengmán mengmán me, me wáik meme. <sup>9</sup> Me kusák nange nuk sáni ya ma mengguinderáng, náuta sándu pahán kakngá isusut wawu há sáuráng. <sup>10</sup> Iná sándu ámna náráwa mirak há háleingga átninggoeráng. Ánutu málámbáyon tán mirak háleingga átkut rámá rámá málámba kándáng naráng mámá wa sámán átninggoeráng, hang málámbá tán málám inanyon háleingga átninggoeráng. <sup>11</sup> Kulá nán ámna náráwa mirak háliumán wawu tárák káman re átninggoemán. Tombong Grik me tombong Juda háranan, kep marená me ma marená me, me kámá kámá káinnan, me káwak kámá kámá káinnan, me yáup nange hánámá tirik tárák kán me yáup nange muná along arená, wáina wawu kutná táwi ingga ma narindamán. Ináku kutná táwi hánám wawu Jesu Son Iháhá wa rewe, iná málám wawu nán kámuk ka kinan átak.

*Kámá ya kikiná nanará kálu wahára átnemán*

<sup>12</sup> Ánutu yá sándu nangán pingnga ingga sáháng há kankalingga ku sándá kikiná hánám naráng sámángoek. Wáina wata ku sándu ket tárák ing wa tánga átneráng, kámá ya urák yáni naránga kándáng iháng totolí, sáni tánga haha, pahán yámamá, sopmuná pahán káráp ma tátá. <sup>13</sup> Sándá nange nuk sáni káman dá ket tárák káman tán wa kangga takta naránga hálen wata pahán káráp ma táng mindaráng, iná sándá ku wata pahán láláp táng mineráng. Hang sándá kandák káman táng sámán hálen wawu watán kátu wa sáineráng. Táwi yá sándán kátu wa sáuk, wata ku sándá wáinanyon nange nuk sáni yan kátu wa sáineráng. <sup>14</sup> Kámá kikiná kápineráng, watá ku ket tárák álosim kátu átaráng wa erek iháng hátingga ku wa iháng kátu tán hálang yáni pálak átaráng.

<sup>15</sup> Sándu sut káman dá re ina átkoeráng, hang pahán káman átnát ta Ánutu yá mantáng sámuk, wata ku sat Jesu Son Iháhá watá pahán láláp sámángoek watá ku pahán sáni pinná tánga átnek. Rámá rámá Ánutu heronge me inánga átkuineráng. <sup>16</sup> Jesu Son Iháhá watán me wa táng pahán sáni káin kátu ting sat árán nange nuk sáni wa rina kákámá ma tátáya mená wa yánánga ku nanará álosim watá sányot árán wa yánáng tolit tu watá ket tárák álosim wa rewe tánga átkuineráng. Pahán sáni káin Ánutu heronge me inánga ku Kap Papia káinnan, me miti kap waháranan, me Iruk Káungá yá pahán sáni káin kap rina sáminek wa mantáng kuineráng. <sup>17</sup> Me rina mengguineráng, me yáup rina tánguineráng, me ket tárák kámuk rina tánguineráng wawu Táwi Jesu kutná hára rewe tánguineráng, hang Jesu kutná háranan du Nan náni Ánutu heronge me inánguineráng.

*Ámna náráwa yot tu nángánange yáni watán me yángorá*

<sup>18</sup> Náráwa sándu, nánáun sáni ya tarang káin átkuineráng, náuta kálu wáina watá ku Táwi rahálá hára kándáng hálek.

<sup>19</sup> Ámna sándu, áwáwá sáni wa kikiná kápánga ku pahán yáni táng wáik ma táindaráng.

<sup>20</sup> Nange sándu, nan mam sáni tarang káin átag rina rina met milun yáni suwánga átkuineráng, náuta Táwi wawu ket tárák wáina wata heronge narek.

<sup>21</sup> Iná nanan yáni sándu, nángánange sáni yá rina kákámá tát táup hánám ma yánáng seindaráng. Wáina tát pahán káráp tánga pahán yáni yá han ket tárák álosim ma tánggatnem ingga naránirot.

*Yáup nangge hánámá yot tu ámna hulá yáni watán me yángorá*

<sup>22</sup> Yáup nangge hánámá sándu, ámna hulá sáni tárang káin átang rina rina met milun yáni suwánga átnérang. Yáni sáhánga árát wahára re ku yáup álosim tátne ku ámna hulá náni yá náhángga álosim naráng námániráng ingga ma narindaráng, ináku rámá rámá wu yáup kándáng tánin ingga naránga yáup tánga átkuineráng. Jesu wawu Táwi náni ingga naránga ku sáni tánga hangga pahán yot hánám yáup táng yámánga átkuineráng. <sup>23</sup> Yáup rina rina wawu pahán yot hánám tánga átkuineráng. Yáup wa tánga átkuineráng wawu kat ámna háláng yámámáyan ina ma háleindak, ináku Táwi háláng imámáyan ina háleinek. <sup>24</sup> Máriya Táwi yá wata yumnakngá sáminek wawu sáni há nareráng. Yumnak wawu alek kán kutná kutná álosim málámbán ámna náráwa watán da há tiyawingga ting san átaránya. Sándu Táwi Jesu Son Iháhá watán yáup nangge átang málámbán yáup wa tánga átkoeráng. <sup>25</sup> Iná ámna niyá kandák táinek watá ku kandákngá wata yumnakngá táinek. Ánutu yá ámna náráwa yan me horengga narinek wawu tárak káman rewe.

#### 4

<sup>1</sup> Sán niyá yáup nangge hánámá yan ámna hulá ya átaráng, sándá ket tárak álosim me kálu kándáng wa rewe yáup nangge sáni ya táng yámineráng. Náuta sáni ing há nareráng, Ámna Hulá náni alek káin hányon átak.

*Sáponga tánga kálu kándáng re isutang átkuinemán*

<sup>2</sup> Sáponga tánga átkuku yan kálu wa káto tánga átkuineráng, me kándáng narát kátin du sáponga tánga Ánutu heronge me inángguineráng. <sup>3</sup> Ánutu yá nán háláng námánga kálu yalin nánda Jesu Son Iháhá watán me wa meng tunggap tátá wata hányon sáponga tánguineráng. Me wawu uláp pu kilak átkiuk, iná inggálu ku hiták hálengga átkoek. Ámna kámá yá me wa nanará wata taktak yámán du nák neháng kalabus kinan ting sat átkoet. <sup>4</sup> Sándá ku sáponga hára háláng namát tu no Jesu yan me wa kándáng meng tunggap tánguinet, Ánutu yá no rina táinet ta narek wáina. <sup>5</sup> Sándá ámna náráwa Jesu ya ma naráng háting mená watyot átnérang wahára wu nanará álosim wa tánga kálu kándáng wa re isutkuineráng. Rámá rámá Jesu Son Iháhá watán ket tárak álosim wa yáyále wata tiyawingga átningguineráng. Kándáng hánám átnérang, rám watá hánámá sálikngiwon. <sup>6</sup> Ámna yá sungi hára táp tit tu sungi yá kikinínggáatak wáinanyon du sándá rámá rámá ámna náráwa me yánánáya ku watá kikiná nanaráyan wahára me tánga átningguineráng. Wáina tát tu rám me pingnga álosim wata sánang sulineráng wahára wu sándá ku kándáng álo há naráng rákit tánga ku me wata hurikngá kándáng yámineráng.

*Pol yá Tikikus káling Onesimus suring yámán Kolosi káin kumálák*

<sup>7</sup> Tikikus yá ku nákkán pingnga sáninek. Ámna watá ku nányot yáup káman tánggoemán wawu nánda nuk náni pánpáliná hánám. Málám wawu Táwi yan yáup ámna álo kámá. <sup>8</sup> No wa suring me áwinek wata hulá wawu nákkán rina átkoemán wa sásaná wata, hang sán pahán sáni táng káto tátá wata. <sup>9</sup> Iná no Onesimus hányon suring me Tikikus yot wakáin kuinemálák. Onesimus wawu sáni hárananyon. Málám wawu nán nuk náni pánpáliná hánám, hang wawu Táwi yan yáup ámna álo kámá. Ámna yará watá ku nákkán rina tunggafenggoek wata pingnganá sáninemálák.

*Táwi yan yáup ámna yá káe álo yáni sat Kolosi yan káin kuk*

<sup>10</sup> Aristakus wawu nákkot kalabus kinan átnándamát watá káe álo\* ná san sándán káin koek. Iná Mak wawu Banabas yan sip kátu watá káe álo ná san sándán káin hányon koek. Iná watá sándán káin hányon áwán hálen du heronge hára kang meineráng, uláp wata ingga me há se sándán káin áwuk wáina. <sup>11</sup> Hang ámna kutná Jesu kutná nukngá Jastus watá káe álo ná sándán káin hányon san koek. Tombong Juda háranan du ámna kaláhu watá re ku nák háláng namát Ánutu yan átkuku wata kinan rina átang átkuku wata mengga táng káto tánggoemán. Watá ku nák pahánna táng káto tánggoeráng.

<sup>12</sup> Epafras yá káe álo ná san sándán káin koek. Ámna wawu sáni hárananyon, hang Jesu Son Iháhá watán yáup ámna. Rámá rámá hánghálángningga átang Ánutu yá sán háláng sásámáya sáponga tánggoek. Wáina háláng sámán du sándá naráng hákhátik hára káto hálengga átang gu Ánutu yá ket tárak álosim rina sándá tátáya narek wa kándáng hánám naráng rákit táineráng. <sup>13</sup> No pálipuk hánám ing sánin, ámna watá ku Kolosi sányot tu it táwi yará Laodisia me Hierapolis kinan Jesu ya naráng háting mená ámna náráwa sán háláng sásámáya yáupma háláng hánám tánggoek. <sup>14</sup> Hang nuk náni pánpáliná hánám dokta Luk watyot tu Demas watá

\* 4:10: Me “káe álo” náwu Pol yá papia ná káen uyiuk ingga ma miuk, ináku Pol yá heronge me mengga uyiuk. Pol yá papia ná uyiuk wawu hilápmá me yonyon me rina kálu uyiuk wawu ma narámán.

káe álo yánda meng san sándán káin koek. <sup>15</sup> Sándá nákkán káe álo wa táng kung yanuknukna Laodisia káin átaráng wa yánineráng, hang káe álo na wa táng kung yáup náráwa Nimfa yot miti ámna náráwa niyá watán it hára urum tángngátaráng wa yánineráng.

<sup>16</sup> Sándá papia ná há sángingga naránga sangga ku sat miti ámna náráwa Laodisia watán káin kun du watá hányon sángeráng. Iná papia no Laodisia yan da se kuk wawu sándá ku hányon sángingga narineráng.

<sup>17</sup> Iná Akipus wawu ing inineráng, yáup rina Táwi yá imán táuk wawu pukon táng hálinek, kátu ma sáindak.

<sup>18</sup> Nák Pol, no nayon ketna yá káe álo na ná uying sámét. Nák ku kalabus kinan re há átkoet, wata ku naráng háting namineráng. Ánutu yá pahán sámángguinek.



## Pol yá hulátingga Tesalonaika yan papia ná uying yámuk

<sup>1</sup> Nák ku Pol yá Sailas káling Timoti yot átang no papia ná uye ku satne Jesu yan tombong it yáilá Tesalonaika hára átaráng sándán káin koek. Ámna náráwa sándu Nan Ánutu yot Táwi Jesu Son Iháhá wahára tápingga átkoeráng. Ánutu málámbá pahán sámán pahán láláp watá sányot átnek.

*Pol yá Tesalonaika yan naráng hákhátik wata heronge naruk*

<sup>2</sup> Rám nándá sáponga tánggoemán wahára wu sándá naránga kut sáni mengga sáponga náni hára tingga rámá rámá Ánutu heronge me inángoemán. <sup>3</sup> Naráng hákhátik sáni yá ságorán ket tárak álosim tánggoeráng, nangge nuk sáni ya kikiná naráng yámángoeráng watá ságorán yáup álosim tánggoeráng, me Táwi náni Jesu Son Iháhá watá son áwinek wata hálang mánga áwángoeráng watá ságorán naráng hákhátik hára káto átkoeráng wata naránga nándá Nan náni Ánutu heronge me inángoemán.

<sup>4-6</sup> Yanuknuk, Ánutu yá sándá kikiná hánám narángoek. Me pingnga álosim nándá sándán káin tánga áwumán wahára me hánámá yá ina ma áwuk, ináku hálang got tu Iruk Káungá watot áwuk. Iná nándu me rina sánumán wawu pálipuk hánám ingga naránga ku sán sánátne nándán naráng hákhátik wa sáni há kauráng. Hang nándá sányot átang sáni hálang sásámáya ket tárak rina táumán wawu sáni há kauráng wa. Rám Jesu yan me watá sándán káin áwuk wahára wu sándá Iruk Káungá watá tán watán heronge hára me wa táuráng, wata ingga ku sándán káin mápamá hulá hulá watá tunggafeng sámuk, enendu sándá nándán ket tárak me Táwi yan ket tárak wanyon táuráng. Wa memán wa kápánga ku nándá naremán du sándu Ánutu yá málámbán pingnga ya há kankaliuk. Wáina wata ku Ánutu heronge me inángoemán. <sup>7</sup> Sándá wáina tát met naránga ku Jesu ya naráng háting mená Masedonia me Akaiá provins káin átaráng watá sándán ket tárak álosim wanyon táuráng. <sup>8</sup> Táwi yan me watá wáum manná yá ina yatná sungga kungga átuk. Iná man watá kuk wawu kungga Masedonia me Akaiá kinan re ma kuk, ináku kungga it táup táwi káin kung hálin sándá Ánutu ya rina naráng háting mángoeráng wata há naruráng, wata ku nándá sándá wáina ingga yánána yan tárak muná. <sup>9</sup> Yáni yon du nándá sándán káin kutne rina tunggafuk wata pingnganá met narángoemán, yáni yon du sándá ánutu kusák wa yápmangga pahán hurik tánga Ánutu pálipuk átkukuná pálak watán káin kungga watán yáup nangge háliuráng ingga met narángoemán, <sup>10</sup> hang Nanggená kámurán son táng tárut táuk watá alek sangga son áwinek wata hákhálek tánga átkoeráng ingga met narángoemán. Nanggená Jesu watá son náhuk, wata ku máriya Ánutu yan pahán káráp pá tunggafeinek hára wawu álo kámá re átnemán.

## 2

*Pol yá Tesalonaika káin miti yáup táuk wata miuk*

<sup>1</sup> Yanuknuk, nándá sányot átang yáup táumán watá hánámá ma háliuk ingga sáni há nareráng. <sup>2</sup> Nándá sándán káin ma áwená it yáilá Filipai káin átumán wahára náhang lem tánga me keke nánuráng. Sáni há nareráng wáina, sándán káin áwumán hára wu káyam bá nándán me káting hang tiktik táwi táuráng, enendu Ánutu náni watá pahán náni táng káto táng námán ma pitáená káto hálengga átang Ánutu yan me pingnga álosim wa sándán káin miután. <sup>3</sup> Kulá nándá Jesu ya naráng háting minieráng ingga ámna náráwa yánánggátamán wahára me kandák kámá ma yánánggátamán, hang me kámá táng tingga wahára meng pilingga ma átningngátamán, me yángyáringingiya ma átningngátamán. <sup>4</sup> Ánutu málámbá náhán kándang hálen du yáup álo táineráng ingga naránga ku me pingnga álosim wa mengga kukuya yáup námuk. Nándá ku ámna náráwa yá nándán yáup wa kangga heronge naráng nánámáya yáup ma tánggumán. Ináku Ánutu málámbá pahán náni wa kangga heronge naráng náminek ka wata yáupmá tánggoemán. <sup>5</sup> Sáni há nareráng wáina, nándá me karo kámá ma táng sámumán, hang nándá há árán nukngá ya nanará káluná wahára kungga sándán kutná kutná wa ihánin ingga ma sángsárungumán. Rina rina táumán wawu kándang re ingga Ánutu yá há narek. <sup>6</sup> Nándá sándán káin me ámna náráwa kámá yan káin kut táwi tánin ingga wata yáupmá ma táumán.

<sup>7</sup> Nándu Jesu Son Iháhá watán aposel, wata ku nán kut náni meng tárut tániráng ingga naránga iná wu sánátne álo wáina tánggalát. Enendu wáina ma táumán, ináku rám sányot átumán wahára wu nangge maming gá nanggená isikimo pinná tánga átnándak wáina ina yolop náni hánám átumán. <sup>8</sup> Nándá sándá kikiná táwi hánám naránga ku Ánutu yan

me pingnga álosim wa sámánin ingga heronge rewe átumán. Hang sándá nán nuknuk náni hánám háliuráng, wata ku nándá kutná kutná náni kámuk hánám sán hálang sásámáya yápmanin ingga heronge rewe átumán.

<sup>9</sup> Yanuknuk, nándá sányot átang Ánutu yan me pingnga álosim wa sánumán wahára nánin átnát kálu rina átnát wata yáupmá táumán wawu sáni há nareráng wa. Sándá re hálang pin náni tánirot ingga ku wata káen me yáungán yáup hálang hánám tángga átkumán.

<sup>10</sup> Ámna náráwa Jesu ya naráng háting mená sányot átumán rám wahára nándá ket tárak rina táumán wawu sáni há nareráng me Ánutu yá hányon narek. Nándu Ánutu rahálá hára rongrongngá átang ket tárak kándáng wa rewe táumán, watá kandák kámá ma háliuk. <sup>11</sup> Sáni há nareráng wáina, nan dá nángánangená ya ket tárak rina tángngátak wáinanyon du nándá sán káman káman dá táumán, <sup>12</sup> wahára ket tárak wata kinan du me sán sámáng rorosi watyot pahán sáni táng káto tátá wa sánánga átumán, hang sándá ket tárak álosim Ánutu yá rina átnát ta narek wa há hánám tángga átnát ta sánánga átumán. Ánutu yá mantáng sámánga átkoek wawu málámbán ámna náráwa pánpáliná hánám hálangga málámbán yamá sireretná pálak wata kinan árát málámbá pin sáni tángga átkuinek wata ingga mantáng sámángoek.

<sup>13</sup> Sándá nán milun náni káinnan Ánutu yan me wa naránga táuráng wawu ámna yan me ina ma táuráng, ináku Ánutu yan me páliná ingga táuráng, wata nándá ráma ráma Ánutu heronge me hányon inángoemán. Me watá ku niyá naráng hákhátik hára átaráng sándá pahán sáni káin átang yáup tángga átkoek. <sup>14</sup> Yanuknuk, sándu miti ámna náráwa Judia ále káin átaráng wáinanyon háliuráng, ámna náráwa wakáin wawu Jesu Son Iháhá watyot ronrosin átaráng. Nuknuk sáni Táwi ya ma naráng háting mená watá mápápmá sámuráng wáinanyon du Judia ámna kámá yá Judia ále káinnan ámna náráwa mápápmá yámuráng. <sup>15</sup> Judia ámna yá profet ráháng kátkámut táuráng me Táwi Jesu utkámut táuráng ngáyá hang nán hányon násurát kungngátamán. Wáina tát tu Ánutu yá takta kápánggátak. Ámna watá yon du ámna kámuk iháng káyam tánggoeráng. <sup>16</sup> Ánutu yá ámna náráwa ále kámá káinnan wa son ihik ingga nándá watán káin me álosim wa mengga kunin ingga tánggoemán, enendu Ánutu yá wáina ma táindak ingga Juda ámna yá nándán kálu susuwá tánggoeráng. Wáina tángga ku mukmuro yáni wa ketnán ketnán tit maming táwi hálangga árángga kunggoek, wata ku Ánutu yan pahán káráp watá watyot há átak.

### *Pol yá Tesalonaika son kákápáya kikiná naruk*

<sup>17</sup> Yanuknuk, Judia yá kandák tát nándá sán sápmangga kung mulangán káin rám hátetná kimo átang gu sán sásáháya kikiná naránggumán. Kurák mátap sáni ma kanggumán, enendu pahán náni wu sányot átkiuk. Nándá son áwánga sásáhá wata kikiná hánám naránga kálu ya hálang hánám sulinggumán. <sup>18</sup> Nándá sándán káin kunin ingga naránga no rám máro hánám kálu ya sulinggiut, enendu Satan dá kálu sung námánggiuk. <sup>19</sup> Kulá rám Táwi náni Jesu yá son áwinek wahára wu náutá ku náháng káto tán du málámba rahálá hára átang heronge tángga átnemán? Náut ihánga ku kung Jesu elengga átang yáup náni kándáng táumán ingga ininemán? Wawu sán. Sándá naráng hákhátik hára káto hálangga átneráng ingga há naremán, wata ku rám wahára Jesu rahálá hára nándá heronge táineman. <sup>20</sup> Pálipuk, nándu sándá heronge táwi narángoemán. Sándá tát tu nándá pahán láláp hára átkoemán. Hulá wata hánám bu nándá son áwánga sán sásáhá wata kikiná hánám narángoemán.

## 3

### *Pol yá Tesalonaika iháng káto tátáya Timoti suring mán kuk*

<sup>1</sup> Nándá sándu rina átaráng ingga naránpak hánám tángga átang rám hásak ma táng uyindámán ing mengga ku nát tá Athens káin átang gu <sup>2</sup> Timoti suring máte sándán káin kuk. Nuk náni Timoti wawu Ánutu yan yáup ámna Jesu Son Iháhá watán me pingnga álosim wa meng tunggap tátáyan ámna. Nát tá wa suring mumát wawu sán sáháng káto tángga sándán naráng hákhátik wa hálang imámá wata. <sup>3</sup> Mápápmá rina sunggoeráng watá tán naráng hákhátik sáni yá háiwon, wata ku wáina táumát. Sáni ing há nareráng wa, Ánutu yá mápápmá wáina suwíneráng ingga mantáng námuk. <sup>4</sup> Nándá sányot átang gu mápápmá hulá hulá watá náhinek ingga há sánánggumán. Rina sánánggumán wawu wa tunggafenggoek wa ingga há kangga narángoeráng. <sup>5</sup> Hulá wata hánám bu naránpak na watá táwi hánám háliuk, hang no sándá rina átaráng ingga nanaráya ma háleindát ingga narut. Wáina wata ku no sándán naráng hákhátik wata Timoti yá men nanaráya ingga suring me sándán káin kuk. Satan dá sángsarungin nándán yáup watá páliná muná hánámá háleiwon ingga naránggiut.

### *Timoti yá Tesalonaika yan pingnga álosim tángga áwán Pol yá heronge naruk*

<sup>6</sup> Iná Timoti wu sán sápmangga áwuk watá nákáin áwánga sándá naráng hákhátik hára rina átang kámá ya narát kikiná hálen átningoeráng wata me pingnga sáni álosim nánuk. Hang sándá nánda naránga pahán álosim naráng námángoeráng, me sándá inam náni nánáháya kikiná hánám narángoeráng, wáinanyon du nánda inam sáni sásáháya kikiná hánám narángoemán ingga nánuk. <sup>7</sup> Yanuknuk, sándu naráng hákhátik hára káto hánám átaráng ingga pingnga sáni narumán wahára wu me pingnga sáni watá ku márappá rina suwángoemán wata pahán náni táng káto táng námángoek. <sup>8</sup> Sándá Táwi yot ronrosin tángga káto hánám átaráng wa naránga ku pahán náni me sut náni yá láláwingga átak. <sup>9</sup> Rám nánda sáponga tánggoemán wahára wu sándá Ánutu heronge me inángoemán, náuta sándán pingnga wa naráng hátingga ku wata heronge táwi hánám wa naráng sámángoemán. Heronge ná Ánutu yá námángoek wawu táwi hánám, enendu nánda Ánutu heronge me rina inángoemán wawu watán tarák muná isikimo rewe. <sup>10</sup> Káen yáungán pahán yot sáponga hára re átkoemán wawu Ánutu yá naráng námán kungga sán sáhánin ingga wata, hang sándán káin naráng hákhátik kálu kesákgá kámá átak hálendu nánda wáina kungga ku táng káto táinemán wata.

<sup>11</sup> Nánda sáponga tánggoemán wawu Nan náni Ánutu yot Táwi náni Jesu watá kálu sareng námán sándán káin kuinemán ingga wata. <sup>12</sup> Táwi Jesu málámbá tán málámbán ámna náráwa wata narát kikiná háhále watá sándán káin káto hánám átnék, hang nánda sán pahán sámángoemán wáinanyon sáni káman káman dá Ánutu yan ámna náráwa me ámna náráwa kámuk wa pahán yámineráng ga sáponga tánggoemán. <sup>13</sup> Kálu wahára ku Ánutu yá pahán sáni táng káto tán árát tu rám Táwi náni Jesu yá rongrongngá árená yot son áwineráng, wahára wu rongrongngá kándáng re Nan náni Ánutu rahálá hára átneráng. Wa pálipuk.

## 4

### *Ket tarák álosim tát tu Ánutu yá álosim sáhinek*

<sup>1</sup> Yanuknuk, me pukon du ing sánin, ket tarák rina tángga árát Ánutu yá álosim sáhinek ingga há sánáng toliumán wáina hánám isutang tánggoeráng. Kula rina tánggoeráng wa emá re tángga árát táwi hánám hálangga kuinek ingga wata Táwi Jesu kutná hára sánánga sáháng káto táemán. <sup>2</sup> Me rina rina Táwi Jesu málámbá námán sánumán wawu há nareráng wáina.

<sup>3</sup> Ánutu yan pahán káin wawu sándá málámbán ámna náráwa hánám átang kándáng hánám ing átneráng, márámamák ma táindaráng, <sup>4</sup> hang sáni káman káman dá sut sáni kándáng pinná tángga ku ket tarák rongrongngá ámna náráwa yá álosim ingga kangga meng tolíneráng wa rewe tángga átkuineráng. <sup>5</sup> Nanará kandák ká ságorán kung Ánutu ma naráng mená yá ina márámamák tánirot. <sup>6</sup> Nuknuk sáni Jesu naráng mená kámá yángvárungingga kálu hitik tángga kung wata áwáwá yáni me nánáun yáni yot márámamák tánirot. Káman niyá kálu wáina táinek wawu Táwi yá márappá iminek ingga uláp há sánáng rákit táumán. <sup>7</sup> Ánutu yá kálu kandák wáina wa tátáya ma mantáng námuk, ináku Ánutu yá nánda káungá átang átkuku wata ingga mantáng námuk. <sup>8</sup> Kulá káman niyá me náta taktak minek wawu ámna yan me ya ma taktak mindák, ináku Ánutu málámbá málámbán Iruk Káungá sámángoek watán me wata taktak minek.

<sup>9</sup> Kulá nuknuk sáni Jesu naráng háting mená wa pahán yámineráng ingga no papia kámá ma uying sámindát, náuta Ánutu yá kálu wáina isutneráng ingga wu há sánáng toliuk. <sup>10</sup> Pálipuk hánám, sándá nuknuk sáni Jesu naráng háting mená Masedonia provins káin átaráng wa pahán há yámánggataráng, enendu, yanuknuk, sáháng káto tátne ku ket tarák wáina wa emá re tángga árát táwi hánám hálangga kuinek ingga wata sánánga sáháng káto táemán. <sup>11</sup> Sáni yolop átang gu kámá yan yáup me márappá wata márúma ma hálená ket sáni yá sánin yáup rina rina wa tát tu watá yon sáni hálang sáminek ka uláp sánumán wa rewe káto tángga isutang átneráng. <sup>12</sup> Wáina tángga átang gu rámá rámá kutná káta ya kesák tángga kámá yan hálang hára ma átnándaráng. Wáina átneráng wahára wu ámna ni Jesu ma naráng háting mená watá sáhángga ku álosim naríneráng.

### *Táwi Jesu yá son áwinek*

<sup>13</sup> Yanuknuk, ámna náráwa há kámurená átaráng watán káin rina tunggafeng yáminek, wata sándá kándáng ing naráng yámineráng ga naremán. Ámna náráwa kámá yá Ánutu ya ma naráng háting mánggataráng me tanggán káin tátárut wata narát kusák hálanggátak watá nuk yáni káman dá kámurán du ukuro maming táwi tángngataráng. Iná sándá ku watá ina ma táindaráng. <sup>14</sup> Jesu yá kámurená háranan son tarutuk wawu pálipuk ingga narángoemán, wata ku Ánutu yá ni Jesu naráng háting mángga átang kámuturáng wa iháng tarut tán Jesu yot son áwineráng wawu pálipuk ingga narángoemán. <sup>15</sup> Táwi yá me rina miuk wanyon ing sánindemán, rám Táwi yá son áwinek wahára wu nán ma kámurená nánda kálak

kámurená wata máta yáreng yámánga árangga kungga Jesu ma káindámán. <sup>16</sup> Man káman dá hahatingga hálánga pálak mantán angelo máta yáyáre watá mená metán Ánutu yan támun watá mantáinek, waháranon du Táwi yá alek sangga han, niyá Jesu Son Iháhá wata naránga háting mánga átang kámuturáng watá kálak tárutneráng. <sup>17</sup> Wata torong hára ku ámna náráwa ma kámurená há átamán wawu árangga mukam kinan ámna náráwa kámutang tárurená watyot kungga alek táitná ále páliná muná wahára Táwi yot kankan tánga ku kungga ráma ráma watyot átkuinerámán. <sup>18</sup> Wáina wata ku sándá me ná Jesu yan ámna náráwa nukngá átaráng wa yánánga ku iháng káto tánga átkuineráng.

## 5

### *Táwi yá áwinek wata tiyawingga átnemán*

<sup>1</sup> Kulá, yanuknuk, nánda rám rina hára watá wáina tunggafeinek ingga sásánáyan wawu muná. <sup>2</sup> Sáni há nareréng wáina, Táwi yá áwáwayan rám wawu manek mara yá yáungán áwángngátaráng wáinanyon áwinek. <sup>3</sup> Ámna náráwa yá ing meineráng, “Kula wu rám álosim hánám,” wáina mengga átneráng wahára wu rám wáik watá watán káin tunggafengga iháng lem táinek, wawu náráwa yá kawin átang nangge iháháya láwit narángaátaráng wáina watá sopmuná hánám ámna náráwa watán káin tunggafen watá wa táng háhátíyan káluná yá ma tunggafeindák.

<sup>4</sup> Iná yanuknuk sándu páyung kinan ma áraráng, wata ku rám watá tunggafen kangga káman dá manek mara kápánga háramutgim wáina ma háramutnandaráng. <sup>5</sup> Sándu erek yamá me haknga wata nángánange. Nán me sán kámuk náni wu páyung me yángomá watán muná. <sup>6</sup> Wáina wata ku ámna náráwa kámá yá ruhánga átaráng wáinanyon ruhánga átninggom. Ináku náni wu rahán náni hálengga nanará náni yá ruwarán átang náni ya pin náni kándang tánga átnemán. <sup>7</sup> Há naremán wáina, yáungán du ruháhayan rám, hang ámna umi káto nat ip ráháhayan watá yáungán umi káto nat ip ráhán átnandaráng. <sup>8</sup> Iná nándu haknga yan, wata ku nanará náni yá ruwarán átang Jesu ya naránga háting mámá me kámá ya kikiná nanará wa iháng siot káto ya mondang átnemán, me Ánutu yá son náhinek wawu pálipuk ingga naránga ku wata hálengga átnát wa táng at káto ya usánga átnemán. <sup>9</sup> Ánutu yá málámbán pahán káráp wa kakaya ma náháng tunggap táuk. Watá náháng tunggap táuk wawu Táwi náni Jesu Son Iháhá watá son náhinek wata ingga náháng tunggap táuk. <sup>10</sup> Jesu wu nán háláng námámá wata kámutuk, wata ku kámutnemán me átnemán wawu málámbán átkuku wa tánga málámbot átnemán. <sup>11</sup> Wáina wata ku sándá Jesu yan ámna náráwa wa pahán yáni táng káto tánga hálang yámát naránga hákhátik yáni yá káto háleinek. Wa tánggoeráng wáina re tánga átang átkuineráng.

### *Pol yá me yángorá yánuk*

<sup>12</sup> Kulá, yanuknuk, nánda ing sánánin, ámna yáilá ingga átaráng wawu yáup háláng hánám tánga Táwi ya naránga háting mámá kálu pin sáni tánga sándán átkuku wa táng tolingga átkoeráng, wáina wata ku sándá wata kekendik táng yámánga ku meng toling yámineráng. <sup>13</sup> Sándu watá yáup rina tánggoeráng wata naránga pahán yámánga meng toling yámánga kikiná kápineráng. Iná sáni wu pahán káman re átang átkuineráng. <sup>14</sup> Yanuknuk, sándá ku ámna niyá yáup tátáya taktak yámán hánámá átninggoeráng wa yánát tu ket tárak wa sangga yáup táineráng, me pitánga átninggoeráng wa pahán yáni táng káto táineráng, me naránga hákhátik yáni káto ma áraráng wa hálang yámineráng. Wáina há táineráng ingga wata pahán sáni táng tárut táemán. Yolopon átang ámna náráwa wa kámuk wáina re táng yámineráng. <sup>15</sup> Ámna kámá yá sáháng wáik tát hálen wawu wata topmá wáinanyon ma táindaráng. Sán háranan káman dá wáina táinán tán du sándá ku wata topmá ma táindalák ingga inineráng. Rámá ráma wu káto hálengga átang Ánutu yan ámna náráwa me ámna náráwa kámá wa kámuk ket tárak álosim wa táng yámineráng.

<sup>16</sup> Rámá ráma heronge rewé átang <sup>17</sup> sáponga tánga átkuineráng. <sup>18</sup> Kálu rina rina tunggafeng sámán kangga ku Ánutu heronge me inángguineráng. Ámna náráwa niyá Jesu Son Iháhá watyot ronrosin átaráng watá wáina hánám wa tánga átneráng ga Ánutu yá narek.

<sup>19</sup> Iruk Káungá watá rina tátáya pahán sáni táng tárut tán wawu sándá wa oletná ma táng mindaráng. Wáina táineráng wawu Iruk Káungá yá káráp sinek wa kating kámut táineráng. <sup>20</sup> Ámna káman dá profet me sánán du sándá wata pahán kandák ma naránga mindaráng. <sup>21</sup> Ináku me rina rina sáninek wa kándang kangga naránga rákit tánga ku me páliná rina meinek wa káto táineráng. <sup>22</sup> Wáina tánga wáik ku rina wa kangga táng hátineráng.

<sup>23</sup> Nánda Ánutu yá ing táng sámámáya naremán, Ánutu pahán láláp márúma málámbáyon tán du sándá káungá hánám háleineráng. Wáina hálet iruk sáni yot sut sáni wa pin yándi kándang tánga árán kungga Táwi náni Jesu Son Iháhá watá áwinek, wahára sáhán kandák kámá ma

háleindák. <sup>24</sup>Ánutu mantáng sámuk watá me rina miuk wáina hánám há isutnándak, wata ku wáina táng sámínek.

<sup>25</sup>Yanuknuk, sándá Ánutu yan káin sáponga tát tu watá nán háláng námínek. <sup>26</sup>Nuknuk sáni yot kankan tánguineráng hára wu nuknuk sáni ya heronge táng yáminán du ket yámin tángga kápáng kumeineráng. <sup>27</sup>Ing hánám há táineráng ingga Táwi kutná hára sáninet, papia náwu táng Ánutu yan ámna náráwa ingga átaráng wata kámuk hánám ságing yámineráng.

<sup>28</sup>Táwi náni Jesu Son Iháhá watá pahán sámínek.

## Pol yá Tesalonaika yan papia nukngá ná uying yámuk

<sup>1</sup> Nák ku Pol yá Sailas káling Timoti yot átang no papia ná uye ku satne Jesu yan tombong it yáilá Tesalonaika hára átaráng sándán káin áwek. Ámna náráwa sándu Nan náni Ánutu yot Táwi Jesu Son Iháhá wahára tápingga átkoeráng.

<sup>2</sup> Nan náni Ánutu yot Táwi Jesu Son Iháhá watá pahán sámán pahán láláp watá sányot átnek.

*Tesalonaika yá káto hálangga átang márapmá suwángngátaráng*

<sup>3</sup> Yanuknuk, nándu rámá rámá sándá naránga Ánutu heronge me inángoemán. Nánda wáina tánggoemán wawu álosim, náuta sándán naráng hákhátik watá táwi hálangga kunggoek, hang sán káman káman kámuk sáni Jesu yan tombong kápát kikiná háhále kálu watá táwi hálangga átkoek wata. <sup>4</sup> Hulá wata hánám bu nánda it kámá káin Ánutu yan tombong gá átaráng wakáin kunggoemán wahára wu sándá meng toling sámángoemán. Ámna náráwa yá rina sáháng wáik tángngátaráng me sándá márapmá rina suwángngátaráng, enendu sándá káto hálangga naráng hákhátik hára átnandaráng wata ingga yánángoemán.

*Rám kálu Ánutu yá kálu kándáng hára wa kungga me náni horengga narinek*

<sup>5</sup> Márapmá rina sán hára tunggafen káto hálangga átkoeráng wata ku Ánutu yá kálu kándáng re isutang ámna náráwa kámuk kán me horengga narinek ingga naremán. Sándá Ánutu yan átkuku wa táng tárut tánggoeráng, wata ku wata ingga márapmá hányon suwánggoeráng. Wáina wata ku sándu Ánutu yan átkuku wata kinan álo átnát tán tárak hánám ingga Ánutu málámbá minek. <sup>6</sup> Ánutu yá kálu kándáng táinek wawu ing, niyá márapmá sán sámángoeráng wa wáinanyon márapmá yámangka ku <sup>7</sup> sán hára márapmá rina tunggafenggoek wa tán sálin du sándá ku sek narineráng, iná nándu wáinanyon sek narinemán. Ánutu yá wáina táinek wawu Táwi Jesu yá káráp lánggop pot angeloná hálang yáni pálak watyot alek sangga hiták háleineráng rám wahára. <sup>8</sup> Rám wahára ku ámna niyá Ánutu ya ma naráng háting mená átninggoeráng me Táwi náni Jesu yan me pingnga álosim wa ma isurená átninggoeráng wata Jesu yá iháng lem táinek. <sup>9</sup> Ámna watá márapmá suwíneráng wawu ing, yáni wu Táwi yamá yot hálangngá táwi wa ma káindaráng, ináku Táwi yot átnát tán wa pukon yásuran kung mulangán átang gu rámá rámá wáik hálangga átneráng. <sup>10</sup> Kulá Táwi yá áwínek wawu málámbán ámna náráwa ní málámba naráng háting mená watá kangga ku málámbán ámna náráwa iháng álolo tánggoek wata naránga málámba kutná meng tárut tángga Táwi yá rina tánggoek wa kangga nangnga yáni háinek ka watá áwínek. Iná sáni wu wáinanyon watyot átneráng, náuta nánda me rina sánumán wa naránga káto há tángga isutang átninggoeráng wata.

<sup>11</sup> Nánda wáina tunggafeinek wata naránga ku Ánutu náni yá hálang sásámáya sáponga táng sámángoemán. Sándá átkuku álosim tátáya mantáng sámuk, wata ku sáhángga álo táineráng ingga meinek wata sáponga tángga inángoemán. Málámbá hálang sámán naráng hákhátik sáni isutang álosim rina tátáya narángngátaráng wáina há táineráng wata ingga ku inángoemán. <sup>12</sup> Wáina inángoemán wawu ámna náráwa nukngá yá Táwi yá sán rina sáháng álolo tánggoek wa kangga Táwi náni Jesu kutná meng tárut táineráng ga ku Táwi yá wáinanyon sán kut sáni meng tárut táinek. Ánutu náni yot Táwi Jesu Son Iháhá watá pahán sámangka rina sánemán wa tán sándán káin tunggafeinek.

## 2

*Milun Yayali Ámna yá tunggafeinek*

<sup>1</sup> Kulá, yanuknuk, Táwi náni Jesu Son Iháhá watá son áwán náni watyot urum átnemán wata sánidemán, wata ku kándáng narineráng. <sup>2</sup> Táwi yan rám bu há tunggafiuk ingga kámá yá sánát naránggoeráng, enendu hárámutang wata narát ma márawindak. Iná ámna káman dá ing meinek, “Iruk Káungá yá ing nanek, rám bu há tunggafiuk,” me ámna káman dá wáina met narut ingga meinek, me ámna káman dá ku nánda papia uyingga kungga ku me wáina wata kinan uyumán ingga meinek, enendu me wawu kusák rewe, wata ku sándá wa naránga sokmuná hárámutang narát ma márawindak. <sup>3</sup> Ámna káman dá me wáina mengga ma sángsarungindak. Rám watá hánámá ma tunggafeindák, ináku hulátingga ku ámna náráwa táup hánám watá árená tángga Ánutu sárum imíneráng watyot Milun Yayali Ámna\* watá hiták háleinek. Iná ámna wawu Táwi yá káráp lánggop pán pingnga ingga há

\* 2:3: Milun Yayali wawu Ánutu yan Meng Rákit Me Sárum Imámá wata mek.

táng tiuk, wata ku wakáin pukon muná kuinek. <sup>4</sup> Ámna watá ku ámna náráwa yá ánutu kusák yánáng sákngingngátaráng wa, me Ánutu ni pálipuk wa, iháng káyam tángga málámba kutná táng tárut tángga rina rina menggoeráng wa iháng hang tinek. Wáina tángga ku Ánutu yan it káungá hánám kinan wa kung hang kome tángga átang gu ing meinek, “Nák ku Ánutu.”

<sup>5</sup> No rám sányot átut wahára wu wáina wata ku há sánánggiut, enendu kalot sámuk hám? <sup>6</sup> Sándu rám nahára náutá Milun Yayali Ámna wa kik tángga árán watá hiták ma hálengguk wawu há nareráng. Ánutu yá rám ting muk wahára ku wáina watá hiták háleinek. <sup>7</sup> Rám nahára wu milun yayaliyan hálang watá kilak há yáup tángga árán ámna náráwa yá Ánutu yan meng rákit me wa yalinggoeráng. Wawu kilak wáina re árán kungga niyá Milun Yayali Ámna wa kik tángga átnándak wa Ánutu yá yaling mán du <sup>8</sup> Milun Yayali Ámna watá hiták háleinek. Hiták hálengga átang árongga árán du máriya ku Táwi Jesu yá yamá táwi watyot áwángga ku máta mulá yáre Milun Yayali Ámna táng lem tángga yamá watá yon tán du muná kuinek. <sup>9</sup> Kulá Milun Yayali Ámna yá hiták hálengga átnek wahára wu Satan dán hálang hára ket tárak hulá kákámá hálangngá pálak hánám wáina táinek, enendu wawu kusák rewe. <sup>10</sup> Wáina tángga ku niyá muná kukuyan kálu hára há átaráng wa ket tárak wáik hulá hulá wahára yángyárunngga ihinek. Muná kukuyan kálu hára átaráng wawu Ánutu yá me páliná wa yánángga ku son iháháya táuk, enendu watá me wa narángga átkuku álosim wa tátáya takta naruráng. <sup>11</sup> Hulá wáina wata ku Ánutu yá nanará yáni wa táng yawák táwi hánám tán du watá me kusák wa me páliná ingga kangga isutkoeráng. <sup>12</sup> Ámna niyá me páliná wata narát ále hánám hálen kálu kandák wa isusut wata heronge tánggoeráng wawu kámuk Ánutu rahálá hára, me hára átang kandák yáni watán márapmá ihineráng.

*Ánutu yá son sáhinek ka sáháng kankaliuk*

<sup>13</sup> Kulá, yanuknuk, Táwi yá sándá kikiná naránggoek. Nándá sándá narángga ku Ánutu heronge me inánggoemán. Nándá wáina tánggoemán wawu álosim, náuta málámbá hulátitiná káin yon son sáhinek ka há sáháng kankaliuk, hang me páliná wata narát pálipuk háliuk me Iruk Káungá watá tán rongrongngá hálenggoeráng, wahára kungga ku Ánutu yá son sáhuk. <sup>14</sup> Ánutu yá wáina watá sándán káin tunggafefeya há naruk, wáina háleudu málámbáyon nán suring námán kung me pingnga wa sánumán. Wahára kungga ku Ánutu yá mantáng sámuk wawu sándá Táwi náni Jesu Son Iháhá watán yamá me hálang wata kinan átkuineráng wata. <sup>15</sup> Wáina wata ku, yanuknuk, káto hálengga átang Ánutu yan me rina sánáng tolingngátamán wa narineráng. Me hára mengga sánumán me papia hára uyingga sámánggoemán wa naráng hátingga isutang átkuineráng.

<sup>16-17</sup> Nan náni Ánutu yá kikiná naráng námángga ku pahán námánggoek wahára kungga ku hálang námán rámá rámá káto átang Ánutu yá náháng álolo táinek wata hálengga átkoemán. Ánutu yot Táwi náni Jesu Son Iháhá watá pahán sáni táng káto táng sámángga hálang sámán kálu kándáng isutang me álosim re mengga átkuineráng.

### 3

*Sándá ku Ánutu yá nán hálang náminek ka sáponga tángga inineráng*

<sup>1</sup> Yanuknuk, me pukon du ing sánindemán, sándá sáponga tángga Ánutu inát hálang námán du nándá Táwi yan me pingnga wa meng isurátne itná itná káin sokmuná kungga táwi hálinek, sán orek sáni káin táwi háliuk wáinanyon. <sup>2</sup> Ámna náráwa táup hánám bu naráng hákhátik yáni Jesu hára ma áraráng, wata ku Ánutu yan káin sáponga tát tu málámbá ámna wáik hánám wata ket yáni háranan náhinek. <sup>3</sup> Iná Táwi wu me rina mengngátak wawu kándáng hánám isutnándak. Wata ku málámbá sáháng káto tángga pin sáni tángga árán ámna wáik Satan watá sán hára rina kámá kámá ma táindák. <sup>4</sup> Táwi málámbá tán nándá kándáng hánám ing há naremán, sándu nándá rina tátáya sánánggoemán wa há tángga átkoeráng, hang máriya wu wáina re tángga átkuineráng. <sup>5</sup> Táwi málámbá pahán sáni wa táng tolingga árán du sándá Ánutu yá ámna náráwa ya narán kikiná háhále wa ingga narineráng. Hang Jesu Son Iháhá yá káto hálengga márapmá rina suwuk sándá tárak wáinanyon suwineráng wáina sáponga táng sámánggoemán.

*Kámuk ká yáup táineráng*

<sup>6</sup> Yanuknuk, Táwi náni Jesu Son Iháhá wata kutná hára nándá ing sánindemán, nuknuk sáni kámá yá hánámá átang me rina sánumán wa ma isutnándaráng, wawu sándá ámna náráwa wáinaná wa yápmangga kung mulangán átneráng, <sup>7</sup> náuta sáni há nareráng wa, nándá sáni yot átang ket tárak rina tátne náhuráng sándá ku wáinanyon tángguineráng. Nándá sányot átumán

wahára táng taktak kámá ma táumán, <sup>8</sup> me sándán sungi káman hánámá ma náumán, ináku yungga yon dú nanggiúmán. Nándá káen me yáungán yáup háláng hánám wáina tánggiúmán wawu sán márappmá sámáninggom ingga wata. <sup>9</sup> Nándá wáina tánggiúmán wawu sándá kutná kutná námát nándá ma iháháya muná, ináku nándu Táwi yan yáup ámna wata ku sándá há háláng námát ihátne kándáng hálenggim, enendu kálu álosim wáina átak ingga sán sáletne sándá wáinanyon isusut, wata ku wáina tánggiúmán. <sup>10</sup> Nándá sáni yot há átumán wahára me káto ing mengga sánánga átkiumán, káman dá yáup ma táindák wawu sungi ma ihánga náindák.

<sup>11</sup> Wáina sánánga átkiumán enendu inggálu wu sán háranan kámá wu yáup ma táená hánámá yáni átkoeráng ingga met naremán. Yáni wu hánámá átang kámá yan kutná kutná wata mená tánga átkoeráng. <sup>12</sup> Kulá Táwi Jesu Son Iháhá wata kutná hára nándá ámna niyá hánámá átkoeráng wa me káto ing mengga sánindemán, ket tárák wáik wáina wa sangga kándáng átang yáup tánga átneráng ga ku sungi sáni kangga nangga watá háláng sámán átneráng. <sup>13</sup> Yanuknuk, iná sándá ku ket tárák álosim wa tátáya ma taktak sámindak.

<sup>14</sup> Ámna kámá yá nándá papia hára me ná uyingga satne áwek wa ma isurát hálendu miti ámna náráwa rahán yáni hára ámna ku wa ingga mengga yápmang kung mulangán árát sáhánga ku yáni rina táená wata reprepmá narineráng. <sup>15</sup> Sándá nuknuk sáni wa káyam sáni ina kákápáya ma sánámán, ináku nangge nuk sáni ina kápánga ku kandák yáni wa re iháng totoliya me yánineráng ga sánemán.

*Pol yá káe álo ná yánuk*

<sup>16</sup> Táwi pahán láláp márúmá málámbá tán kutná kutná kámuk hára rámá rámá pahán láláp hára re átneráng. Táwi yá rámá rámá sán kámuk kot átkuinek.

<sup>17</sup> Nák Pol no nayon ketna yá kolem ná uyingga káe álo\* ing sánet. No papia uyingngátat hára wu me tárákná ing rewe uyená kangngataráng wawu no na hánám papia ná se áwek ingga káineráng wata ingga tángngátat.

<sup>18</sup> Táwi náni Jesu Son Iháhá yá sán kámuk pahán sáminek.

---

\* **3:17:** Me “káe álo” náwu Pol yá papia ná káen uyiuk ingga ma miuk, ináku Pol yá heronge me mengga uyiuk. Pol yá papia ná uyiuk wawu hilápmá me yonyon me rina kálu uyiuk wawu ma narámán.



## Pol yá hulátingga Timoti yan papia ná uying muk

<sup>1</sup> Nák ku Pol, Jesu Son Iháhá watán aposel. Ánutu son nánáhá watyot tu Jesu Son Iháhá watá yánda neháng tunggang tán aposel háliut. Nándá Jesu Son Iháhá yá náháng álolo táinek ingga há naránga ku wata hálang mángga átkoemán.

<sup>2</sup> Timoti, no papia ná uyingga se kákkán da áwek. Kák ku Jesu Son Iháhá wata naráng háting mánggoelák wata hánám bu kák ku nák nanggena ina átalák. Nan náni Ánutu watyot Táwi náni Jesu Son Iháhá watá urákka naránga pahán kamán pahán láláp hára átnelák.

*Ámna kámá yá me kusák kámá sánang tolinirot*

<sup>3</sup> Uláp Masedonia provins káin kuin ingga me rina kanut wáinanyon ing kanindet, ko it yáilá Efesus káin átang ámna kámá Ánutu yan me mengga ámna náráwa me kusák watyot yánang tolingngataráng wa wáina ma tátáya áráng hákhátikngá tángga átnelák. <sup>4</sup> Hang wa yánátá ku uláp pán me pingnga hánámá hánámá tánggoeráng me táwi ilom yáni kut yáni wata ingga mengga kunggoeráng wa sáineráng. Me wáina watá tán du menmen tángga honhoren tánggoeráng. Me wáina watá Ánutu yan yáup rina tátáyan wa ma hálang mindák. Ináku naráng hákhátik ká ku Ánutu yan yáup wa hálang iminek. <sup>5</sup> Me wawu hulá ing wata kanet, kámá ya kikiná narángmán narángmán tátá watá táwi hálangga kuinek wata ingga kanet. Jesu ya pálipuk hánám naráng háting mámá, pahán rongrongngá átnát, me náni ket tárák rina táinemán wa narátne kándang háhále, kálu wáina watá hálang yámán du kámá kápát kikiná háleinek. <sup>6</sup> Ámna kámá wu ket tárák wáina wa sangga me hánámá hánámá wahára re hangga átninggoeráng. <sup>7</sup> Yáni wu Ánutu yá meng rákit mená Moses imuk watán tiksa háháleya naránggoeráng, hang me náni wu pálipuk rewe ingga naránggoeráng. Enendu yáni wu me rina menggoeráng wata hulá wawu wáina ingga ma narángguráng.

<sup>8</sup> Há naremán wáina, Ánutu yan meng rákit me wawu álo kámá re átnek, rám tiksa yá kándang re yánang tolineráng wahára. <sup>9</sup> Hang ing hányon naremán wáina, Ánutu yá meng rákit mená wa námuk wawu ámna náráwa ni kándang há átaráng wa ma iháng totoliya. Ináku wawu niyá kálu hitik táená, ámna yáilá yáni me nan mam yáni tarang káin ma árená, Ánutu sárum imená, mukmuro táená, Ánutu yan ket tárák álosim wa sangga káwak kán nanará isurená, nan mam yáni me ámna kámá ráháng kátkámut táená wa iháng totoliya. <sup>10</sup> Hang márámamák táená, ámna yá ámna yot átninggoená, náráwa yá náráwa yot átninggoená, ámna manek ihángga iháng yáup nange yáni ya tená, me kusák mená, me hára átnát tán rám hára me kusák mená, me káman niyá me páliná wa táng káyam táená wa iháng totoliya. <sup>11</sup> Me páliná náwu me pingnga álosim Ánutu yá meng tunggap tángga ámna náráwa yánánaya namuk wáinanyon. Me pingnga álosim watá ku ing nánánggoek, Ánutu wawu kutná táwi hánám yamá yot hálangngá táwi wata kinan átkoek, álo kámá ku nándá kutná há meng tárut táinemán.

*Ánutu yá Pol ya urákná naruk wata heronge mená inuk*

<sup>12</sup> Táwi náni Jesu Son Iháhá watá no watán yáup ná álo táinek ingga naránga neháng tunggap tángga hálang namuk wata no heronge mená inánggoet. <sup>13</sup> Pálipuk uláp pu me mukmuro Jesu inánga málabán ámna náráwa iháng lem tángga ráhánggiut, enendu há naruk no rina rina tánggiut wawu wáina táet ingga ma narená me málabá ma naráng háting mená átuw hára wáina tánggiut, wata ku Jesu yá urákna naránga nákkán kátu sáuk. <sup>14</sup> Táwi náni Jesu Son Iháhá watá pahán táwi hánám namánga neháng tárut tán málabá naráng háting mánggoet me kámá ya naráng yáme kikiná hálanggoek.

<sup>15</sup> Jesu Son Iháhá watá mukmuro táená wa son náháháya ku káwak káin háuk. Me náwu pálipuk hánám wata ku ámna náráwa kámuk hánám watá naránga káto tángga átkuineráng. Kulá uláp pu no ámna kámuk iháng hátingga kandák táwi hánám tánggiut. <sup>16</sup> Wáina enendu Jesu Son Iháhá watán pahán káin du ámna náráwa kámuk ká málam wawu yolopon narán káin átang ámna náráwa ya kutná kutná táng yámángngátak ingga naráng minerángga narek. Wáina hálendu nák ku kandák táwi hánám táená, enendu urákna narán du no tárak ka áre nák hára rina táuk wa kangga ku naráng háting mángga átkuku álosim sásáliná muná wa táineráng. <sup>17</sup> Kulá Ánutu wawu ramá ramá káing átang ma kátkámut tán, hang ámna náráwa yá ku manyon kakayan. Málam wa re wawu Ánutu pálipuk. Wáina wata ku nándá ramá ramá kutná meng tárut tángga táng álolo tángguinemán. Wa pálipuk.

*Timoti yá kálu kandák wa hahatingga táng hang tinek*

<sup>18</sup> Nanggena Timoti, no uláp profet me kák ka miuráng wata naránga ku ko rina táinelák wata me ná kanet. No wáina kane ku profet me watá keháng káto tán Ánutu yan tewe ámna

ya ina erawangga waik rina wa ihang hang tinelak. <sup>19</sup> Waina tangtang gu wata kinan du Jesu ya narang hating mangga atang Anutu rahala hara kandang atat ingga narangga atnelak. Kama ya kalu kandang gu waina ingga ha kanggoerang, enendu sarum imanggoerang, wata ku narang hakhatik yani wata pukon waik halenggoek, kilang ga yaman ketnan kungga waik halengngatak waina tanggoerang. <sup>20</sup> Amna urum waina taena orek yani haraman yara ku Himeneus kaling Aleksenda. Amna yara wata ku Anutu ya me waik mengngatamalak, wata ku no ihang kumbi kep kain tiut wawu Satan ketna hara ina tiut. Waina tae ku kang rakit tangga nanara alosim ba ihan du Anutu ya me waik son ma mindamalak ingga wata waina taut.

## 2

*Saponga tangga Anutu inatne ku amna narawa kamuk halang yaminek*

<sup>1</sup> Kulá kutná táwi hánám sándá wa kálak tangguinerang wawu ing, amna narawa kamuk ka narangga ku Anutu yan kain saponga tangga heronge me inangga ku inat halang yamanguinek. <sup>2</sup> Amna yaila me kapman dan yaup amna atarang wata yot Anutu yan kain saponga tang yamat halang yaman du pahán láláp pá orek sáni hára árán sáni kamuk Anutu ya sándá rina atang atkukuya narek waina atang atkuinerang. <sup>3</sup> Saponga waina táinerang wawu Anutu Son Náhuik wata rahala hara wu alosim hánám, wata saponga waina wata kikiná hánám narek. <sup>4</sup> Málámbá amna narawa kamuk son ihan me pálná wata hulá wa narinerang ga narek. <sup>5</sup> Anutu wu káman dá re átak. Hang amna ore haraman káman dá re átak, Anutu yot amna narawa ya orek yani hára wawu Jesu Son Iháha wata átak. <sup>6</sup> Rám Anutu ya tiuk hára wu, Jesu Son Iháha wata atkukuná wa amna narawa kamuk son yungga iháhaya sauk. Kulá kalu wahára wu Anutu ya amna narawa kamuk son ihin ingga náliuk. <sup>7</sup> Waina wata ku Anutu ya aposel neháng tunggap tauk ngaya ku nákkán yaup pu málámbán me wa mengga kuku wa. Pálipuk hánám sanet, kusák ma pilet. Málámbá amna narawa ale kama káinnan wa me pálná yánang tolingga koe Jesu Son Iháha wata narang hating mamaya yaup ná namuk.

<sup>8</sup> Waina wata ku itná itná kain amna ya atkuku yani wa Anutu imangga rongrongga atang ket yani tang hip tanggatang saponga tangguinerang ga naret. Pahán káráp me honhoren wa sangga ku pahán káman atang saponga re tangguinerang.

*Narawa yan ket tarak alosim*

<sup>9</sup> No ing wata hanyon naret, narawa ya sut yani tangganeinan wawu yani ya sut yani tangga arangga ma tangganeindarang, me amna pahán yani tang waik tata kaluna hara kutna kutna ma tangganeindarang, hang kutna kutna tangganeinan du kaluna kandang rina atak wahara rewe tangganeinerang. Alo kama nahánirang ingga sut sáni tangganene kalu ma tangganeindarang. <sup>10</sup> Narawa niya Anutu isutkoeman ingga mengngatarang wawu yaup alosim hulá hulá wa táinerang, wata ku narawa watán tangganeik alosim ina haleinek.

<sup>11</sup> Miti mengguinerang hara wu narawa ya yolop atang yani tangga hangga ku Anutu yan me wa narangguinerang. <sup>12</sup> No narawa yapmae arang atang amna pin yani tangga Anutu yan me wa amna ma yanangngatarang. Muná. Narawa ya yolop atang gu me rewe narangga atkuinerang. <sup>13</sup> No waina met wawu náuta, Anutu ya Adam kálak tang tolingga ku máriya wu If tang toliuk, <sup>14</sup> hang Adam bá Satan dán me kusák wa narán pálipuk ma háliuk, inaku narawa ya me kusák wa narán pálipuk hálen du mukmuro narawa háliuk wa narangga ku wata waina met. <sup>15</sup> Kulá narawa ya ku nangge iháha yaup wa táinerang. Waina tangga atang gu Jesu ya narang hating mangga, rama rama rongrongga atang, kama ya narat kikiná hálen, tirik tarak alosim wa tangga atkuinerang halendu Anutu ya son ihinek.

## 3

*Miti yan amna yaila ya tirik tarak alosim wa isutnerang*

<sup>1</sup> Me nawu pálipuk hánám. Káman niya miti yan amna narawa pin yani tataya atnan kikiná narangga ku yaup wawu alosim ingga narinek. <sup>2</sup> Miti yan amna yaila ya kalu kandang wa rewe isutang aran du amna narawa ya amna yaila wahara kandak kama ma káindarang. Awána káman yot re kándang atnek, málámbán atkuku wa kándang pinná tangga atnek, kama ya itná kain awat pin yani táinek, me Anutu yan me wa amna narawa yanang tolinek. Waina tán du kama ya watán ket tarak wa kangga alo kama ingga mengga kutna meng toling minerang. <sup>3</sup> Amna wawu umi kato ya tang hoho ma táindak, menmen ininan ma táindak, me pahán káráp tangga amna narawa kama ma ráhindak, inaku pahán láláp hara re atnek. Hang sup pa kikiná táup ma narindak. <sup>4</sup> Málamba awa nangge wa kándang pin yani tangga nangnangge me yanán

narangga isutang malámba tárang káin re átneráng. <sup>5</sup> Ámna niyá áwá nangge wa kándang ma pin yáni táindák watá Ánutu yan ámna náráwa pin yáni tátáyan yáup wa ma táindak. <sup>6</sup> Ámna mirak ká áwáng Jesu yan tombong hálangga miti yan ámna náráwa pin yáni tátáyan yáup wa ma táindak. Nák ku ámna álosim ingga árená tán Ánutu yá táng me hára Satan táng tiuk wáinanyon tiwon. <sup>7</sup> Ámna miti kinan ma árená yá kat miti yan ámna yáilá káman ni kutná yá álosim re átnándak watá re ku ámna yáilá álo háleinek. Iná kat kutná yá álosim ma átnándak wawu ámna yá wata me wáik mengga yánangga átkut tu Satan dán punggip pá táinek.

*Miti ámna náráwa hálang yámámáyan ámna watá ku ket tárák álosim wa isutneráng*

<sup>8</sup> Kulá wáinanyon du miti ámna náráwa hálang yámámáyan yáup ámna watá yáup yáni kándang isutang arát ámna náráwa yá kápát álosim hálen meng toling yámineráng. Watá me yáni yará pálak ma háleindaráng. Watá umi káto táwi nangge ma hohing kuindaráng, me sup táwi hánám ihinán narangga ku kálu kandák hára kungga kámá yan hára sup ma ihindaráng. <sup>9</sup> Yáni wu Ánutu yá malámbán me páliná táwi hánám táng hiták tiuk wa rewe káto tángga átneráng. Rám wáina táineráng wahára ku yáni wu pahán náni kinan kandák káman ma árak ingga kangga narineráng. <sup>10</sup> Hulátangga ku átnát yáni hára wa tárák yáni yá kápineráng, kápát álo hálen wawu sat miti ámna náráwa hálang yámámáyan yáup wa álo tángga átneráng.

<sup>11</sup> Áwáwá yáni watá wáinanyon yáup yáni kándang isutang arát ámna náráwa yá kápát álosim hálen meng toling yámineráng. Watá átkuineráng hára kámá ya ma meng yámangga átkuindaráng. Átkuku yáni wa kándang pinná tángga arát yáup rina tátáya yámená wa álo táineráng ingga ámna náráwa yá kápát átneráng.

<sup>12</sup> Miti ámna náráwa hálang yámámáyan yáup ámna wawu áwáná káman watyot rewe átang gu malámba áwá nangge wa kándang pin yáni tángga átnek. <sup>13</sup> Ámna niyá yáup wáina wa kándang tángga átnek wata ku kut táwi táinek. Wáina átang gu naráng káto tángga átnemán. <sup>16</sup> Pálipuk há naremán wáina, Ánutu yan me páliná wata hulá wawu kutná táwi hánám. Me wata hulá

*Ánutu yan me páliná wata hulá wawu kutná táwi hánám*

<sup>14</sup> No sopmuná kungga kák kahin ingga tánggoet, enendu álo kámá wu me ná uyingga kaninet ingga uyet. <sup>15</sup> Wáina wata ku no sopmuná ma koe hálen du papia ná kangga ku ket tárák álosim rina Ánutu yan tombong hára átaráng sándá tángguineráng wa há narineráng. Nándu Ánutu átkukuná pálak watán tombong. Kumam káto yá it káto tángga átnándak wáinanyon du Ánutu yan tombong nándá ku me páliná wa táng káto tángga átnemán. <sup>16</sup> Pálipuk há naremán wáina, Ánutu yan me páliná wata hulá wawu kutná táwi hánám. Me wata hulá Ánutu yá nálek wawu ing, pálipuk ámna nangge háliuk,

Iruk Káungá yá malám wawu ámna náráwa son iháháyan ámna ingga yáliuk, angelo yá kauráng,

Ánutu yá tángga alek káin irawa kung malámbot árán kut táwi hánám tángga átak,

káwakngá káwakngá káin kungga watán me pingnga wa yánangga kuráng,

hang káwak ketnán ámna náráwa watá wata naráng háting mángngátaráng.

## 4

*Me hulá hulá watá ámna náráwa yan nanará iháng yakyawák tánggoek*

<sup>1</sup> Iruk Káungá watá hiták hánám ing mek, rám bá sálikngin ingga tángga átnek wahára wu ámna kámá wu naráng hákhátik yáni wa sangga iruk wáik ámna náráwa yángvárungingyan wata kárámating yámangga watán me narangga isutneráng. <sup>2</sup> Ámna kusák watá iruk wáik kán me wa ámna náráwa yánineráng. Ámna watá ku ing meineráng, “Nándán me wawu pálipuk hánám,” enendu kandák yáni wawu ma kang rákit táindaráng, náuta nanará yáni álosim wawu há kámutuk wata. <sup>3</sup> Ámna watá ámna náráwa yá ihán kehán ma tátáya me sungi kámá wa ma nanaya yánangngátaráng, Ánutu yá malámba naráng háting mená me, me páliná wa narená watá nangga malámba heronge táng mámáya iháng toliuk wa. <sup>4-5</sup> Há naremán wa, kutná kutná kámuk Ánutu yá iháng toliuk wawu álosim rewe. Ánutu malámbán me watyot nánin sáponga watá tán du sungi kámuk hánám watá Ánutu rahálá hára rongrongngá hálangngátaráng. Nándá kápátne wáik ma háleindak, ináku nándá ku Ánutu heronge me inangga ku sungi wa iháng nánemán.

*Timoti yá Jesu Son Iháhá watán yáup ámna álosim átnek*

<sup>6</sup> Ko me ná táng nuknuk náni wa yánátá ku me álosim rina naráng háting mánggoemán me nanará álosim narangga isutkoelák watá ka keháng káto táinek. Wáina tángga ku Jesu

Son Iháhá watán yáup ámna álosim hálangga átkuinelák. <sup>7</sup> Pingnga hánámá hánámá me, me hánámá hánámá wa sárum iminelák. Me wáina wawu Ánutu yan pahán káinnan muná watá kámá ma hálang námindák. Ináku Ánutu yan tirik tárák rina tátáyan átak wa re háiná táinelák. <sup>8</sup> Ing narinelák, sut náni tátne káto árik ingga háiná tángngátámán, enendu watá ku isikimo hálang námángngátak. Iná nándá Ánutu yan ket tárák watá nán hára káto árik ingga wata háiná táinemán wawu watá táwi hánám hálang náminek. Watá ku átkuku káwak ketnán ná átinggoemán me máriya átkuku sásáliná muná táinemán wahára kándáng hánám hálang námángngatnek. <sup>9</sup> Me náwu pálipuk hánám, wata ku ámna náráwa kámuk hánám watá naránga káto tángga átkuineráng. <sup>10</sup> Ánutu átkukuná pálak ámna náráwa kámuk son iháhá watá málámba naráng háting mená nán son náhuk. Nánda Ánutu ya naráng háting mángga náháng tolik ingga hálang mángga átkoemán wata ingga ku yáup hálang hánám tánggoemán. <sup>11</sup> Ko me ná ámna náráwa yánánga ku yánáng tolitá me yá rina mek wa isutneráng.

<sup>12</sup> Kák ku ámna máto, wata watá kahát kák ku ámna hánámá ma háleindak. Ko ket tárák álosim wa rewe tángga átkutá Jesu yan ámna náráwa watá kák kahánga ku wáinanyon átkuineráng. Ko ket tárák álosim yáleinelák wawu meka me táinelák, tirik tárákka rina táinelák, kámá kápátá kikiná háleinek, naráng hákhátik hára átang átkuinelák, me Ánutu rahálá hára rongrongngá átang átkuinelák hára wa. <sup>13</sup> Ko Ánutu yan papia wa pahála yot hánám ámna náráwa ya sánging yámánga wata hulá wa yánánga Ánutu yá átkuku rina ta narek wa yánáng tolingga átnárát kungga no áwinet. <sup>14</sup> Ko Ánutu yá hálang rina kamuk watá yáup tátáya táng taktak ma táindalák, hálang wawu miti yan ámna hulá yá ket yáni yáila hára usáng hang tit ámna káman dá profet me kák ka miuk wahára táulák.

<sup>15</sup> Yáupya wa pahála yot kándáng pinná tángga árátá ku ámna náráwa kámuk hánám watá kahát ko yáup álosim tánggoelák wa emá re tángga árátá táwi hánám hálangga kuinek. <sup>16</sup> Táwi yan me yánáng tolinelák me ket tárákka rina táinelák wahára wu kándáng nangnaráng átang tángga átkuinelák. Ko káto hálangga yáup álosim wáina tángga átkuinelák wata tángga Ánutu yá son kehángga ámna náráwa niyá kákkán me narineráng watyot son ihinek.

## 5

### *Ámna náráwa wawu kaya sipya kátu hánám ina kápánguinelák*

<sup>1</sup> Ko ámna tátáwi wa me hahatiná kálu ma metáng yámindalák, ináku me láláp hára nanya inángngátalák wáinanyon yánánga iháng tolinelák. Yakukulaka ya ket tárák álosim táng yámángngátalák wáinanyon ámna máto wata ket tárák wanyon táng yáminelák. <sup>2</sup> Mamya ya ket tárák álosim táng mángngátalák wáinanyon náráwa tátáwi wata ket tárák wanyon táng yáminelák. Hang málám ilomya ya ket tárák álosim táng yámángngátalák wáinanyon náráwa máto wata ket tárák wanyon táng yáminelák, wáina wawu Ánutu rahálá hára kálu kándáng álosim.

### *Náráwa kawát wawu niyá pin yáni táinek?*

<sup>3</sup> Náráwa kawát kámá niyá yáni re ukuro hánám árát kápánga ku wa hálang yámángguinelák. <sup>4</sup> Iná kawát káman dá nángánange me e ilommá pálak árán du yánáng tolitá Ánutu rahálá hára naráng hákhátik isutang yáup páliná hánám táineráng wawu mam pawo yáni kawát wa pinná táineráng. Wáina tát tu uláp yáni rina pin yáni táená wata topmá háleinek. Ánutu yá kálu wáina wata wu álosim narek. <sup>5</sup> Kawát kámá niyá yáni re ukuro átang wawu ing tángga átkungngátaráng, Ánutu yá iháng álolo táng yámámáya hálang mángga kéen me yáungán wawu sáponga tángga Ánutu yá hálang yámámáya inánga átkungngátaráng. <sup>6</sup> Iná náráwa kawát káman dá sut tán kutná wata re narán páliná hálen átnándak, náráwa wawu há kámurená yá ina átnándak. <sup>7</sup> Me wáina yánátá kálu kándáng re isutang árát tu ámna náráwa yá ma meng yámindaráng. <sup>8</sup> Ámna káman dá sipmá kátu wa ma pin yáni táindák wawu kandák. Hang ámna káman dá naring maming, málám ilommá, tat kulaná, áwáná me yanángánanggená wa ma pin yáni táindák wawu kandák táwi hánám. Ámna káman dá ket tárák wáina táinek wawu ket táráknká watá ku hiták Jesu ya ma naráng háting mángngátak hálek. Watán ket tárák wawu ni Jesu ma naráng háting máráng wata tárang káin átak.

<sup>9-10</sup> Náráwa kawát kut yáni uyinán du yara yáni 60 hára átang torong kálu koek ngá, nánáun yáni yot rewe kándáng arená, hang álosim rina rina tángngátaráng ngáya kámuk ká naráng yámángngátaráng wáina wa rewe uyinelák. Tárák álosim wawu ing wata menggoet, nangge pin yáni táineráng, lombu pin yáni táineráng, Táwi yan ámna náráwa háram yáni yanyawon

táineráng\*, niyá mápármá hára árán háláng yámineráng me hahatingga átang kámá rina rina wa tǎngga nukngá háláng yámineráng wa. Wáina táená wa rewe kut yáni uyinelák.

<sup>11</sup> Kulá náráwa kawát máto wawu kut yáni papia káin ma tindalák, náuta watá náun áwán háhále watán nanará watá áwínek wahára wu Jesu Son Iháhá yan yáup rewe tǎngga átnemán ingga me káto mengngátaráng wa sangngátaráng wata. <sup>12</sup> Wáina tǎngga ku me káto há mená wa yálineráng wata ingga ku me hára átneráng. <sup>13</sup> Iná ko miti ámna náráwa yá háláng yáminán náráwa kawát máto kut yáni uyinelák wawu yáni tǎng taktak tǎngga it wahára kungkung tǎngga átang kámá yá rina táineráng wa met narǎngga wata meng yámǎngga watá ma hánám memeyan wa mengga átkuineráng. <sup>14</sup> Wata ku no naret tu álosim wawu kawát máto ingga átaráng watá ku ámna ihǎngga nángánange yáni ihǎng tingga ku wata pin yáni tǎngga átneráng, wata ku káyam bá wa kápǎngga ku nán Jesu yan tombong ga ma meng námindaráng. <sup>15</sup> No me wáina met wawu náuta, kawát máto kámá wu Táwi sangga kung Satan isutang há átninggoeráng.

<sup>16</sup> Kulá narǎng hákhátik náráwa káman niyá sipmá kátu káman náráwa kawát hálendu watá wa háláng imínek. Watá miti ámna náráwa nukngá yá yáup watyot tátáya yáup háláng ma yámindak. Iná náráwa watá sipmá kátu wa há háláng imínek hálendu nukngá watá ku kawát niyá yáni re ukuro hánám átaráng wa álo háláng yámámáya narineráng.

*Miti yan ámna yáilá wa nánda kándáng hánám ihǎng álolo táinémán*

<sup>17</sup> Niyá miti yan ámna yáilá ingga átang miti yáup kándáng tǎngga árát tu Táwi yan ámna náráwa watá kut yáni meng tárut tǎngga háláng yámineráng. Iná nini yá Ánutu yan me pingnga mengga yánáng tolingga átkuineráng wawu táwi hánám háláng yámǎngga kut yáni meng tárut táineráng. <sup>18</sup> Wáina táineráng wawu náuta, Ánutu yan me ing uyená yá átak, “Bulmakau yá wit pǎliná ketnán tarengga árán kepmá yá sohit wit ma nanaya milunná ma hárotnándaráng.” Hang ing hányon, “Ámna niyá yáup táinek watá ku yumnakngá ihínek wawu álo kámá.” <sup>19</sup> Káman dá ing meínek, “Miti yan ámna yáilá náta kandák táek,” ing men wawu watán me wa ma narindalák. Ináku ámna yará me kaláhu yá me wa rewe met wawu kárámánya yá narǎngga me wa ting tantan tǎngga káinelák. <sup>20</sup> Ámna yáilá káman dá kandák tán wawu tǎng rahán táwi hára me hára titá ku ámna yáilá nukngá yá wa kangga mukmuro táninggom ingga pitáineráng.

*Timoti yá málámbán ket tárák wa kándáng pinná táinek*

<sup>21</sup> Ánutu, Jesu Son Iháhá me Ánutu yan angelo málámbá há kankaliuk ngá átaráng wata rahán yáni hára ing kanindet, ko me há kanet wa kándáng isutnelák. Wa isutnelák wahára wu ámna náráwa kámuk ket tárák káman re yáleinelák, nuknukka me ámna kámá ket tárák kámá kámá ma yáleindalák.

<sup>22</sup> Ko ámna káman dá miti yan ámna yáilá háleik ingga sopmuná ketya yáin yáni hára usáng hang ma tindalák, náuta watá mukmuro tán watán mápármá watá kák hányon kehiwon. Kawu Ánutu rahálá hára rongrongngá átkuinelák.

<sup>23</sup> Umi hánám rewe ma náindalák, ináku wáin isikimo kulingga ku hányon natá watá kawila kinan ilalákka rámá hára tunggafengfeng tǎngngátak wa tǎng láláp táinek.

<sup>24</sup> Ámna kámá yan mukmuro wawu hiták átnándak, ko ting tantan tǎngga ma kápindalák enendu kandák yáni wawu wáina ingga há naráng yáminelák. Iná kámá wu kilak árán ma narená arátá kungga rám hásak hálendu hiták háleínek. <sup>25</sup> Kulá wáinanyon du ámna kámá yá álosim rina táineráng wawu kámuk ká hiták kangga narineráng. Iná kámá yá álosim rina táineráng wawu waharanyon du hiták ma háleindák, ináku kilak átang kungga máriya ku wáina hiták háleínek.

## 6

*Yáup nangge hánámá yá ket tárák álosim re táineráng*

<sup>1</sup> Ámna ni yáup nangge ya hánámá árená Táwi ya naráng háting mená átaráng watá wu yáni tǎngga hangga ku márúm yáni wata tárang káin átneráng. Ket tárák álosim wáina tát kápǎngga ku ámna náráwa yá Ánutu kutná ma tǎng lem táindaráng, me nánda Táwi yan me yánená wa yanyawon ma táindaráng. <sup>2</sup> Iná yáup nangge hánámá káman da márúmá yá Táwi ya naráng háting mená hálendu yáup nangge watá wata narán nukna hánámá wata ku wata tárang káin ma árin ingga ma narindak. Ináku ing narínek, “Yáup ná tǎnggoet wawu Táwi ya naráng háting mená káman háláng imǎnggoet, me wa káe kikiná háleínek, wata ku kámá yá

\* 5:9-10: Pol yá me ná uyiuk wawu Jon 13.1-17 wa narǎngga wata uyiuk. Jon káin du Jesu yá málám tǎngga hangga disaepelná háram yáni yawonduk. Me me nukngá ku ing, Pol yá me ná uyiuk wawu náráwa yá yáni tǎngga hangga nuknuk yáni háláng yámineráng wata.

márum yáni Táwi ya ma naráng háting mená ya yáup táng mángngátaráng wa táng hátingga yáup kándáng hánám táng minet,” wáina hánám narinek.

Me ná uyená náwu Táwi yan ámna náráwa wa yánáng tolingga yánátá wa há hánám isutneráng.

*Sup pa kikiná nanará wawu mukmuro hulá hulá wata hulá*

<sup>3</sup> Ámna kámá wu me kusák wa sánáng tolinggoeráng. Me rina menggoeráng watá kung Táwi náni Jesu Son Iháhá watá rina kándáng nánáng toliuk watyot káman ma hálengguk, me rina menggoeráng watá ámna náráwa háláng yámán Ánutu isusut wahára ma kungguráng. <sup>4-5</sup> Ámna wáinaná wawu yáni ya narát árená hálenggoek, enendu watá náut kámá káman wáina ingga ma naráráng. Watá tárák kandák ing wata heronge narángga átkoeráng, kámá yot me hánámá hánámá wata hulá ya menmen ná tángga átninggoeráng. Wáina watá ku ámna náráwa yángot kung gu kápáng naknarák, menmen, mengmán mengmán, kámá ya kep kotkot táng yámámá, me honhoren káluná wahára tinggoeráng. Ámna wáinaná watán nanará wawu kandák hánám. Kámá ya me páliná wa táng yakyawák táng yámángngátaráng, hang Ánutu yan yáup hulá hulá tángga ku kutná kutná táwi ihinemán ingga narángngátaráng.

<sup>6</sup> Iná ámna káman dá Ánutu yá ket tárák rina tátáya narek wa rewe isutang átnek wahára wu kutná kutná táwi átminek me isikimo átminek wawu álo rewe ingga narinek. Ámna káman dá wáina táinek wawu Ánutu yan átkuku watá watyot táwi hánám átnek. <sup>7</sup> Mam kinan átang tunggafiumán wahára wu náut kámá káman ma táená áwumán, hang káwak sangga kuinemán wahára wu náut kámá káman tánggatang ma kuindámán. <sup>8</sup> Wáina wata ku sungi me sut tánggáene ya há átnámát wawu álo átnánek ingga narángguinemán. <sup>9</sup> Káman niyá sup táup ihin ingga narinek wawu ingirungingi yá engot kung punggip hára tinek. Pahán yáni watá ket tárák hohoná me wáik hulá hulá tátáya táwi hánám tárurán watá márappmá táwi hánám yámángga iháng lem táinek. <sup>10</sup> Sup pa kikiná nanará wawu mukmuro hulá hulá wata hulá. Ámna kámá wu sup pa kikiná hánám naruráng, wata ku watá iháng yawák tán naráng hákhátik hára átnát wa há sangga ku márappmá táwi sangga átaráng.

*Kándáng re átang kungga ku átkuku álosim wa táinelák*

<sup>11</sup> Kák ku Ánutu yan ámna, ket tárák kandák wata pitáng mángga mulangán átnelák. Wáina tángga ku kálu kándáng átkuku, Ánutu yan pahán isusut, naráng hákhátik hára átkuku, kámá kápátá kikiná háhále, káto hálengga átang márappmá rina rina wa sangga átnát, me nangge nuk kot yolop átnát wawu yáupmá hálánggon tángga ku ihángguinelák. <sup>12</sup> Tewe ámna yá hánghálangngingga átang erawángngátaráng wáinanyon dú ko káto hálengga Ánutu ya naráng háting mángga mílunná sangga átnelák. Ka Táwi ya naráng háting mángga ku Jesu ya naráng háting met ingga rahán táwi hára há yánulák rám wahára Ánutu yá átkuku sásáliná muná tátáya mantáng kamuk, wata ku átkuku wa káto táinelák. <sup>13</sup> Ánutu kutná kutná átkuku yáni yámángngátak wata rahálá hára me Jesu Son Iháhá watá Pontius Pailat rahálá hára me pálipuk miuk wata rahálá hára no me ing kane ko me wa há hánám isutnelák, <sup>14</sup> Táwi yan me rina narulák wa kándáng re isutnelák, wata kinan kámá yá kák hára kandák kámá ma káindaráng, ináku rongrongngá re áratá kungga Táwi náni Jesu Son Iháhá watán rám bá tunggafeinek. <sup>15</sup> Wa tunggafeinek wawu Ánutu yá rám narek wahára.

Ánutu wawu kutná kutná álosim kámuk hánám wata márumá, hang málámbá re ku kutná kutná kámuk wata pin yáni tángga átnándak. Málám bu king átaráng watán King, me táwi átaráng watán Táwi. <sup>16</sup> Málám watá re ku ma kátkámut tán, hang málám bu yamá maming táwi kinan átnándak, wata ku káman dá wata tangtang áwáwáyan tárák ku muná. Káman dá ma káuk me káman dá álo kakayan tárák ku muná. Ánutu yan uliháláng wawu sásáliná muná, wata ku kutná meng tárut tángga átkuinemán. Wa pálipuk.

<sup>17</sup> Ámna kámá niyá kutná kutná ná álo áran káwak ketnán rám nahára álosim átat ingga átaráng wa ing yáinelák, yáni ma tángga árángga kuindaráng, hang sup rina átyámek watá álo háláng náminek ingga ma narindaráng, náuta sup yáni watá rám náut hára muná kuinek wawu ma naráráng. Yánátá ku Ánutu yá re ku álo háláng náminek ingga narineráng, watá re ku heronge tátáyan kutná kutná álosim táup táwi wa háláng námángngátak. <sup>18</sup> Yánátá ku kámá háláng yámámáya tárák álosim táup táwi yon há tángguineráng. Kutná kutná rina átyámek wa iháng niyá kesák táeráng wa ilap tángga yámineráng. <sup>19</sup> Wáina táineráng wawu máriya rám bá áwinek wahára watá háláng yámámáyan kutná kutná álosim hánám wa ihineráng. Wáina tángga ku átkuku álosim wa táineráng, wawu átkuku páliná hánám.

<sup>20</sup> Timoti, kák ku yáup rina Ánutu yá kamuk wa hánám táinelák. Me hánámá hánámá Ánutu yan nanará káin ma áraráng wa sárum yáminelák. Ámna kámá yá ku nándán nanará wu

kándáng ingga naránga meineráng, enendu watán nanará wawu Ánutu yá kandák ingga narek, wata ku ko wa yápmang kung kámá átnelák. <sup>21</sup> Ámna náráwa kámá Jesu yan tombong háliuráng, enendu nanará kandák wáina wa isutang átningga ku Jesu yan me páliná wa sáuráng.

Ánutu yá pahán sámánguinek.

## Pol yá Timoti yan papia nukngá ná uying muk

<sup>1</sup> Nák ku Pol, Jesu Son Iháhá watán aposel. Ánutu yá málámbán pahán isutang yáup wa tátáya neháng tunggap táuk. No aposel hálangga Ánutu yá ámna náráwa niyá Jesu ya naráng háting mángga átneráng watá átkuku álosim táineráng ingga há miuk wa yánánaya ingga wáina táuk. <sup>2</sup> Timoti kák ku nanggena ina, kák ka kikiná hánám naráng kamángoet. No papia ná uyingga se kákkán da koek. Nan náni Ánutu watyot Táwi náni Jesu Son Iháhá watá urákka narángga pahán kamán pahán láláp hára átnelák.

*Yáup rina tátáya Ánutu yá kamuk wa káto hálangga átang táinelák*

<sup>3</sup> Uláp pu táwi ilomna yá Ánutu ináng sáknnginggiuráng, iná inggálu ku no nanarána kinan káin du kálu kándáng hára rewe isutang átkoet ingga narángga wáinanyon Ánutu ináng sáknngingoet. Rámá rámá káen me yáungán kák ka naráng hátinggoet wahára wu Ánutu heronge me inánga málámbán káin kák ka sáponga táng kamángoet. <sup>4</sup> No átang uláp náti sansan táumát hára rahála uminá hinarátá háuk wata naráng hátingga son kakaháya kikiná hánám wa naránggoet. Son kahinet wahára ku pahánna yá álosim hánám háleinek. <sup>5</sup> Uláp pawoka Lois me mamya Yunis yá pahán hurik tángga Jesu yan tombong háliumálák wáinanyon ko pahán hurik tángga Jesu ya pálipuk naráng háting mángga málámbán tombong háliulák wawu pálipuk hánám ingga naránggoet. No naráng hákhátikka káto wata naránggoet, <sup>6</sup> wata ku no son pahála táng tárut táet wawu uláp no ketna yá yáila hára usáng hang tiut wahára wu Ánutu yá náut háláng málámbán yáup tátáyan wa kamuk. Ko wata narángga yáupmá tátá watá átkukuka káin káto átkuinek, ámna nangge yá káráp kátu kátu iháng urum tingga hásit lánggop pá rang háleingngátak wáinanyon rang háleinek. <sup>7</sup> Ánutu yá Irukngá námuk wawu Iruk watá pahán náni táng piták tátáyan muná, watá ku háláng námángga náháng káto tán átkuku, me nangge nuk ka narátne kikiná háhále, me náni kálu kándáng nálen kangga átkuku náni pinná tángga isusut wata Iruk wa námuk watá ku wáina háláng námángga átkoek.

<sup>8</sup> Wáina wata ku ko Táwi yan me ámna náráwa yánánaya reprepmá ma narindalák, me no kalabus kinan átkoet wata ingga iháng reprep ma táindalák. Kalabus kinan átkoet wawu Táwi yan yáup tánggoet wata. Reprepmá ma narindalák, ináku Ánutu yan háláng wa tángga no uláp Táwi yan me pingnga álosim yánánga kungga márappmá rina sunggiut wáinanyon ko me pingnga álosim wa yánánga átningga márappmá sungga átningguinelák. <sup>9</sup> Ánutu yá mantáng námángga son náhuk wawu rongrongngá káungá hánám átnát wata. Nándá náut kámá álosim káman tátne wata ingga wáina ma táuk, ináku málámbá pahán námángga málámbán pahán isutang wáina táuk. Uláp pon alek káwak ma iháng tunggap táená yon átang pahán námángga ku Jesu Son Iháhá yá yáup wáina táinek ingga wu Ánutu yá há naruk. <sup>10</sup> Inggálu ku Jesu Son Iháhá watá káwak káin hangga son náhuk wahára kungga ku Ánutu yá pahán námuk watá hiták há háliuk. Jesu yá kátkámut tán háláng wa táng wáik tángga málámbán me pingnga álosim watá átkuku sásáliná muná wa táng áwáng hiták tiuk. <sup>11</sup> Ánutu yá nák neháng tunggap táuk wawu no yáup ing tátáya, me pingnga álosim wa ámna náráwa yánánaya, aposel háháleya, hang ámna náráwa yánáng totoliya. <sup>12</sup> Ánutu yá yáup wa tátáya neháng tunggap táuk, wata ku no márappmá ná sunggoet, enendu no wata reprepmá ma naránggut, náuta ní naráng háting mánggoet wawu há naret, hang no ing há hánám naret, málámbá yáup wa ketna hára tiuk wa pinná tángga áran kungga Jesu Son Iháhá yan rám táwi watá tunggafeinek.

<sup>13</sup> Ko ku me pálnín ka rina kanut wa kándáng hánám naráng hátingga ku me wáina hánám bon du ámna náráwa yánáng tolingguinelák. Rám wáina tángguinelák wahára ku Jesu Son Iháhá naráng háting mángga kámá kápátá kikiná háleingguinek. <sup>14</sup> Ánutu yá me pingnga álosim wa ketya hára tiuk wawu kándáng pinná táinelák. Me kusák watá táng yakyawák táiwon da ku káto hálangga átnelák. Iruk Káungá náni ya kinan átak watá háláng kamán du me pálnín wa kándáng pinná táinelák.

<sup>15</sup> Ing há narelák wa, ámna náráwa táuppon Esia provins kinan átaráng watá sárum há namángga átaráng, wata kinan ámna yará Fikelus káling Hemokenes watá wáinanyon sárum namángga átamálák.

<sup>16</sup> Iná Onesiforus wawu nukna pánpálnín. Rám máro áwáng nahánga háláng námánggoek, me sen dá neháng kik táená me kalabus kinan átkoet enendu wata iháng reprep ma tángguk, wata ku no Táwi yan káin sáponga táe ámna náráwa itná kinan átaráng wa, me málám iháng álolo táinek. <sup>17</sup> Málám Rom káin áwuk wahára wu nák ka yáup háláng hánám suling námángga átninggan nahuk. <sup>18</sup> No Táwi yan káin ing sáponga tánggoet, Jesu yan rám táwi tunggafeinek



rám wahára wu Ánutu yá Onesiforus uráknká narinek. No Efesus káin áre háláng namámáya yáup máro yon tánggiuk wawu ka há narelák wa.

## 2

*Jesu yan yáup tángga átang márapmá rina áwinek wahára káto hálangga átnelák*

<sup>1</sup> Nanggena Timoti, kák ku Jesu Son Iháhá málámbá háláng kamánggoek, wata ku káto hálangga átnelák. <sup>2</sup> Ámna náráwa táup táwi ya rahán yáni hára me rina yáne narulák me wanyon táng ámna náráwa niyá Táwi yan me káto tángga átaráng wa ket yáni hára tinelák, wata ku watá wanyon táng kung ámna náráwa nukngá yánáng tolineráng. <sup>3</sup> Jesu Son Iháháyan tewe ámna álosim bá ina átnelák. Wáina átang márapmá rina áwinek wahára nánda káto hálangga márapmá suwánggoemán wáinanyon káto hálangga átang márapmá suwinelák. <sup>4</sup> Tewe ámna káman dá yáupmá hára átang waháranon yáup nukngá ma tángngátak. Ináku táwiná pahán álosim imóamáya ku náut yáup imená wa rewe tángngátak. <sup>5</sup> Wáinanyon ámna káman dá hururung kuku wahára watán káluná rina tingga hururung koená wa táng hátingga kandák kunggim wawu wata yumnakngá ma ihánggim. <sup>6</sup> Yáup mara káman dá hái hinek, wata páliná watá áliknginek wawu watá kálak náinek. <sup>7</sup> No me táráknká kanet wata narátá ku Táwi yá háláng káman wata hulá kámuk narinelák.

<sup>8</sup> Rámá rámá Jesu Son Iháhá wata naráng hátingguinelák. Ánutu yá há kámutuk háranan son táng tárut táuk, iná málám wawu king Dewit tán hun háranan. No me pingnga álosim yánángoet wawu wa. <sup>9</sup> No márapmá sungga átkoet wawu me pingnga wa ámna náráwa yánáng tolingngátak wata. Hulá wata hánám bu sen dá neháng kik tángga kalabus kinan manek ámna ina ting sat átkoet, iná Ánutu yan me wawu sen dá táng kik ma tátáyan. <sup>10</sup> Wata ku no káto hálangga átang márapmá hulá hulá suwángga átkoet, wawu no ámna náráwa Ánutu yá nakán ingga iháng tunggap táuk wa háláng yámámáya. Wáina háláng yáme ku Jesu Son Iháhá wata naráng háting mángga árát tu Jesu yá son ihán rámá rámá yamá táwi wata kinan átneráng.

<sup>11</sup> Me ná meindet náwu pálipuk hánám, Iná nánda Jesu yot kámutumán hálen wawu málámbot há átkuinemán. <sup>12</sup> Iná nánda káto hálangga átang márapmá sungga átnemán wawu máriya ámna náráwa hulá hálangga watyot kutná kutná pin yáni tátáyan kome wahára átnemán. Iná nánda Jesu ma naráng mánám ingga meinemán wawu Jesu yá wáinanyon ma naráng sámát ingga meinek. <sup>13</sup> Iná nánda Jesu yan me há isutnemán ingga sungga wáina meinemán ma isutnándámán, enendu Jesu yá pahán sámínet ingga miuk wa há isutnek, náuta me wáina táinet ingga mengngátak wawu ma sangngátak.

*Ánutu rahálá hára yáup ámna álosim átnelák*

<sup>14</sup> Ko Jesu yan ámna náráwa me ná kanet ná sonson yánángguinelák. Ánutu rahálá hára me káto yánánga ing yáinelák, kámá yot me hánámá hánámá wata hulá nanaráya menmen ná ma tángguindaráng. Me wáina watá ámna káman ma háláng imindák, ináku niyá me wa narinek watán naráng hákhátik wa táng yakyawák táinek. <sup>15</sup> Ko hánghálangngingga átang yáupya wa tángga átkuinelák wawu Ánutu yá yáupya wa kangga yáup ámna álosim ingga kahánga árán ko málámba rahálá hára átnát ta reprepamá ma narindálák. Wáina átang gu ko me páliná wa kándáng re kámá yánáng tolingguinelák. <sup>16</sup> Me hánámá hánámá Ánutu yan nanará káin ma áraráng wa sárum yáminelák. Ámna náráwa niyá me kandák wáina mengngátaráng wawu yolop yolop Táwi sungga mulángan kungga kungga átang kandák yáni watá táwi hánám hálangngátak. <sup>17</sup> Me wáina wawu putun dá sippot sippot ámna nangge iháng waík tátáya tángngátak wáina. Ámna wáinaná waháranan ámna yará ku Himeneus káling Filetus. <sup>18</sup> Ámna yará wawu me páliná isusut wa há sáumálák. Ámna náráwa yá há kámutang son tátárut wawu há sálikngiuk ingga mengga ámna náráwa kátu yan naráng hákhátik wa há iháng waík tánggoemálák. <sup>19</sup> Iná Ánutu yan ámna náráwa wawu kumam káto ina ma kongkongngindaráng wata táit yáni hára ku me ing uyingga tiuk, “Táwi yá ámna náráwaná wa kándáng hánám há naráng yáme.” Hang ing hányon uyiuk, “Ámna náráwa niyá nándu Táwi isutnándámán ingga meineráng watá ku mukmuro rina rina wa erek sárum imóneráng.”

<sup>20</sup> It maming tátáwi kámá ya kinan káin du rápmám me rápmám ina hulá hulá yá átaráng. Kámá gol yá iháng tolená me kámá silva yá iháng tolená yá átaráng wawu yáup álosim yámámáyan. Iná kámá káráp pá hoseng tolená me kámá káwak ká iháng tolená yá átaráng wawu yáup hánámá hánámá yámámáyan. <sup>21</sup> Wáinanyon du ámna náráwa kámá yá ket tárák yáni waík wa sang hálíneráng wawu rápmám wa iháng yáup álosim imóamáyan dá ina átneráng. Ámna wáinaná wawu rongrongngá hánám átneráng, wata ku Táwi yáni yá náut yáup álosim

yáminek wawu yáup tátaya há tiyawingga átneráng, wata ku yáup wa kándáng hánám há táineráng.

<sup>22</sup> Wáina wata ku nenggimo yan kikiná waík pahán kinan káin tunggafengngátak wata pitáng máng kung átang gu káto hálengga ing wa ihinán táinelák, kándáng átnát, naráng hákhátik hára átnát, kámá kápátá kikiná háhále me pahán láláp hára átnát wa. Wáina ihinán wawu ámna náráwa niyá Táwi rahálá hára rongrongngá átang sáponga tángga ináng sákngingngátaráng watyot ket tárak wáina wa ihinán táineráng. <sup>23</sup> Ámna náráwa yá me páliná muná wata menmen ná tát ko ka táng kung wata kinan ma tindalák, náuta watá kangot kung honhoren tátá kálu wahára tiwon. <sup>24</sup> Wáina narinelák, Táwi yan yáup nangege nándu káman yot honhoren ma átnándamán. Iná nánda ku ámna náráwa kámuk hánám iháng álolo tángga ku me páliná yánáng totoli káluná wahára átang kámá yá náháng lem tát nánda ku pahán láláp re yáminemán. <sup>25-26</sup> Ámna kámá wawu Satan dá iháng málámbán kumbi kinan tin málámbán yáup kandák hulá hulá wa tángngátaráng. Ámna wáinaná watá nányot kámkýam táineráng wawu nánda ku yolopon hára yánáng tolitne ku Ánutu yá pahán yáni kinan yáup tán álo hám pahán hurik tángga ku me páliná wawu wáina ingga naráng rákit táineráng. Wáina tángga ku nanará álosim watá ihán Satan dán pungpip háranan dá sohingga áwineráng.

### 3

*Rám bá sásáliná kálu ámna náráwa yá mukmuro táwi táineráng*

<sup>1</sup> Ing narinelák, rám bá sálikngin ingga tángga átnék wahára wu márapmá waík hánám watá tunggafeineráng, <sup>2</sup> náuta ámna náráwa yá ing táineráng wata, yáni ya rewe narát kikiná háleineráng, sup pa narát kikiná háleineráng, yáni ya tungtung yáni táineráng, yáni ya narát árená háleineráng, me kandák yánánga iháng hang tiktik táineráng, nan mam bán milun ma isutnándaráng, kámá niyá háláng yáminérang wata ma narindárang, Ánutu yan ket tárak álosim wa sangga káwak kán nanará isutneráng, <sup>3</sup> kámá kápát ále hánám ina háleineráng, kámá ya kátu sang yáyamá ma táindárang, kámá yá kámá ya wáina táek ingga kusák pileineráng, yánin átkuku wa pinná ma táindárang, ámna ángárangngá hánám átang kámá yot álo erawánga iháng waík táineráng, kálu kándáng wata taktak yáminérang, <sup>4</sup> nuknuk yáni wa iháng káyam ket yáni hára tineráng, sopmuná ingmen nanará yáni kandák wa isutneráng, sut yáni tángga árárá táineráng, káwak nátán heronge wata narát kikiná háleineráng, iná Ánutu ya ku kikiná ma narindárang. <sup>5</sup> Yáni wu Ánutu ináng sákngéná yan tárak wahára átkuineráng, iná Ánutu yan háláng gá átkuku yáni wa táng totoliya wu taktak yáminek. Wáina wata ku ámna wáinaná watyot káman hálengga ma átkuindalák.

<sup>6</sup> Ámna wáinaná watá it kinan kung hanin ingga yángyárungingga kálu ya sulingga kangga kung hangngátaráng. Wakáin kung hangga ku náráwa me háting márak tángga nanaráyan tárak muná watán nanará wa pin yáni tángga wáina wáina táinérang ingga yánángngátaráng. Iná náráwa wawu pahán yáni káin kandák wa táwi hánám tátaya naránga mukmuro táwi hánám wa tát watá iháng usánga átnándak, <sup>7</sup> hang rámá rámá nanará mirak wa iháhaya kikiná narángoeráng, iná Jesu yan me páliná wawu kándáng ma naráng rákit tángngátaráng. <sup>8</sup> Uláp ámna yará Janes káling Jambres\* yá Moses táng káyam táumálák wáinanyon du ámna watá me páliná wa táng káyam tánggoeráng. Nanará yáni watá waík hánám árán Ánutu ya naráng háting mámayan káluná watá kándáng ma hálen du Ánutu yá sárum yáwánggoek. <sup>9</sup> Wáina táineráng enendu ámna náráwa yángyárungingi watá táwi ma hálengga kuindák, ináku ámna náráwa yá watán ket tárak wawu hohoná yan ket tárak ingga hiták káineráng, uláp Janes káling Jambres yan ket tárak wawu kandák ingga káuráng wáinanyon.

*Ánutu yan me wa káto tángga átnelák*

<sup>10</sup> Iná kawu no ket tárak rina tángngátat wa kándáng hánám há naráng namelák wáina, wawu ámna náráwa rina yánáng tolingngátat, átnátna rina átnándat, Ánutu ya naráng háting málm hára káto átnándat, pahán láláp hára átang yáup tángngátat, kámá ya nare kikiná hálengngátak, hang káto hálengga átang márapmá suwángngátat. Iná kák ku há narelák, hulá náuta ku no wáina tángngátat. <sup>11</sup> Ámna yá ket tárak waík rina táng namuráng me márapmá rina Antiok káin, Aikoniám káin me Listra káin suwut wawu ka há narelák. Enendu Táwi yá háláng namán du márapmá rina rina nák hára tunggafiuk wawu álo rewe átu. <sup>12</sup> Pálipuk hánám, káman niyá Jesu Son Iháhá watyot tántápin átang Ánutu yan ket tárak wa isurin ingga táinek wawu ámna kámá yá ku táng lemlem táineráng. <sup>13</sup> Iná ámna waík táená yot ámna kusákná watán mukmuro watá ku táwi hánám hálengga kuinek. Watá

\* 3:8: Juda yá ing mengngátaráng, Janes káling Jambres wawu Moses yan rám hára Isip káin Fero yan ámna yará sárum yándi pálak átkiumálák wata kut yándi. Son Iháhá 7.22 káling 9.11 wahára káineráng.

kámá yángyárungingngárát tu ámna nukngá yá yáni yángyárungineráng. <sup>14-15</sup> Iná kawu me wa kanáng toliumán wawu há naráng námélák, hang kawu nange isikimo átulák waháranyon átang hulátingga papia káin Ánutu yan me uyená wa há naránga áwánga átkoelák, wata ku kák ku me rina kanená wa pálipuk hánám ingga há narulák wa káto tángga átkuinelák. Papia watá ku ámna náráwa nanará álosim yámán du Jesu Son Iháhá wata naráng háting mát Ánutu yá son ihángoek. <sup>16</sup> Ánutu yan me wawu Ánutu málámbáyon ámna yan nanará káin tin du wa uyiuráng, wata ku álo kámá háláng yámámáyan. Me watá ku me pálná wa yánáng tolinggoek, ámna kandák táená wa me táng yámángoek, iháng tolingga iháng kándáng tinggoek, hang Ánutu yá tirik tárák álosim rina ta narek wa tátáya yánáng toktolik tánggoek. <sup>17</sup> Wáina wata ku Ánutu yan me watá málámbán ámna náráwa wa háláng yámán tiyawingga átang gu yáup álosim hulá hulá wa táineráng.

## 4

*Timoti yá káto hálengga átang Táwi yan me wa yánánga átingguinek*

<sup>1</sup> Jesu Son Iháhá yá son áwánga ku árená wa me kámurená wa me yáni naránga iháng horeinek. Rám wahára wu ámna náráwa kámuk hánám watán ámna hulá táwi hánám wáina hálengga átnék. Wáina wata ku Ánutu rahálá hára me Jesu rahálá hára no me káto hánám ing kanin, <sup>2</sup> ko Táwi yan me wa há yánánguinelák, rám ámna náráwa yá kákkán me nanaráya heronge táineráng wahára, me táng taktak táineráng wahára me yánáná wata tiyawingga átnelák. Ámna náráwa yánánga iháng tolingga me táng yámánga iháng káto tángguinelák. Yolop hánám átang Táwi yan me káluná kándáng wahára re yánáng tolingguinelák. <sup>3</sup> Me pálná wawu inggálu yon yánánguinelák, máriya kálu wawu ámna náráwa yá me pálná wa nanaráya taktak yámán yánin pahán kandák wa isutneráng. Yáni wu ámna máro yánát áwáng yáni me kusák rina nanaráya kikiná narángngátaráng wa yánáng tolit wa nanaráya heronge táineráng. <sup>4</sup> Me pálná wa sárúm imánga ku me pingnga kusák wa nanaráya heronge táineráng. <sup>5</sup> Iná kawu ráma ráma nanaráka yá kándáng re árán átkukuka kándáng pinná tángga átkuinelák, márapmá yá áwínek wawu káto hálengga átkuinelák, ámna náráwa Táwi yan me pingnga álosim wa yánánguinelák, me Ánutu yá yáup rina rina tátáya kámuk wa kándáng hánám tángga átkuinelák.

<sup>6</sup> Wáina wu há táinelák, náuta nák ku kátkámut na ráma yá há hátewin átat. Sipna yá wáin kulít Táwi yan taha wa hangngátak wáina kulingga háinek. <sup>7</sup> Erawáwa álosim wahára há erawáng háliut. Hururung kuku wahára hururung há kung háliut. Naráng hákhátik káluná wa kándáng hánám há pinná táut. <sup>8</sup> Kulá nák ku hururung kut wawu kung sásáliná káin há kung hiut wata watán yumnakngá wawu tiyawing namáng san átak. Yumnakngá wawu Táwi yá nák ku kut ámna kándáng wa naminek. Yumnakngá wa naminek wawu Táwi yá ámna náráwa iháng káluná kándáng hára horeinek rám wahára. Wawu nák rewe muná, ináku kámá niyá málámbá hiták hálen kakaya pahán yot hánám átang háleng mángga átaráng wa hányon yáminek.

*Pol yá ing miuk, Timoti ko nákkán káin sopmuná áwinelák*

<sup>9</sup> Kálu kámá há hánám kang tunggap tángga ku nákkán káin sopmuná áwinelák. <sup>10</sup> No wáina kanet wawu náuta Demas wawu káwak kán kutná kutná wata narán kikiná hálengngátak, wata ku nák nepmangga it yáilá Tesalonaika káin há kuk, iná Kresens yá ku Galesia provins káin kun, Taitus yá ku Dalmesia provins káin kuk wata ingga ku wáina kanet. <sup>11</sup> Nákkán du Luk ká rewe ku nákkot átamát. Ko ku Mak kangga káman sándi áwinemálák, náuta wawu no miti yáup tánggoet wahára háláng nanamáyan ámna álo kámá. <sup>12</sup> Iná Tikikus wawu suring me Efesus káin kuk. <sup>13</sup> Ko áwinelák wahára ku nákkán kolsiot hásak it táwi Troas káin Karpus yan it kinan uláp tingga sangga áwut wa tángga áwinelák. Hang papia na watyot ihánga áwinelák. Papia songgo kepma yá iháng tolená wa hánám bu há ihánga áwinelák.

<sup>14</sup> Aleksenda wawu ain dá kutná kutná iháng tolingngátak ámna watá nák neháng waik hánám táuk, wata ku máriya Táwi yá topmá wáinanyon táng lem táinek. <sup>15</sup> Ámna watá Táwi yan me wa táng hang titiya táup hánám yáilá káto hálenggiuk, wata ku ko ámna wa hányon kándáng kanggang átkuinelák.

<sup>16</sup> No me hára kung áwáng táut wata hulátitiná káin káman dá áwáng nákkot átang háláng namánga me kámá ma metáuk, ináku erek ingmen nepmangga kúrang. Wata no sáponga tángga watán kátu sasaya Ánutu inángoet. <sup>17</sup> Iná no me hára átu wahára ku Táwi málámbá nákkot átang háláng namuk háendu me pingnga álosim wa kámuk hánám yánáng hále ámna náráwa ále kámá káinnan watá naruráng. Iná rám wa átu wahára wu Ánutu yá háláng namuk háendu kámutek ingga ma miuráng. <sup>18</sup> Káyam bá ket tárák waik rina wa nák sutna hára tánirot ingga Táwi yá nák há háláng namángoek, wata ku nák ku álo átkuinet, hang

neháng kung átkuku álosim alek káin átak wakáin tinek. Rámá rámá kutná meng tárut tángga átkuinemán. Wa pálipuk.

<sup>19</sup> Ko nákkán káe álo táng kung Prisila yot tu náulá Akuila yánelák, hang Onesiforus yot málámbán it kinan átaráng wa nákkán káe álo hányon yánelák. <sup>20</sup> Erastus wawu it yáilá Korin káin há átak, nákkot ma áwuk, iná Trofimus wu it táwi Miletus káin ilalák tángga árán sangga áwut. <sup>21</sup> Kálu kámá há hánám kang tunggap tángga ku sopmuná áwinelák, wakáin átnará kotkotná yot iruk táwi wata rámá yá áwiwon. Yubulus, Pudens, Linus, Klodia hang Táwi yan ámna náráwa nahára átaráng watá káe álo yáni sat kákkán da koek.

<sup>22</sup> Táwi yá pahán kamángga kákkán iruk kot átnek.

## Pol yá Taitus yan papia uying muk

<sup>1</sup> Nák ku Pol, Ánutu yan yáup nangge, Jesu Son Iháháyan aposel. Ánutu yá ámna náráwa málámbán pingnga ya iháng tunggap táuk watán naráng hákhátik wa táng káto tátáya yáup namuk. Wáina háláng yáme watá me páliná wa narát me watá yángorán Ánutu yan kálu kándáng wa isutang átkuineráng. <sup>2</sup> Yáni wu me páliná wa narángga Ánutu ya naráng háting mángga ku átkuku sásáliná muná wawu pálipuk há hánám táinemán ingga narángga hálengga átneráng. Ánutu ma kusák pilengngátak watá uláp pon hánám kutná kutná ma iháng tunggap táená átang gon málámbán átkuku wa há námámáya miuk. <sup>3</sup> Wáina mengga ku rám há tiuk wa isutang gu málámbán me wa meng tunggap tátáya nák yáup namuk háleudu wahára kungga ku Ánutu yan me watá ámna náráwa yan káin hiták háliuk. Ánutu ámna náráwa nán son náhuk watá men du no yáup wa táut.

<sup>4</sup> Taitus, papia náwu no kákkán da uyingga se kung kamek. Kákkán naráng hákhátik Jesu hára átak wawu nákkán inanyon, wata ku kák ku nák nanggena ina. Nan náni Ánutu yot Jesu Son Iháhá ámna niyá son náhuk watá pahán kamán watán pahán láláp pá kákkot átnek.

### *Ámna yáilá iháng tunggap tátáya Pol yá Taitus inuk*

<sup>5</sup> Rám no Krit sáut wahára, ko wakáin há átang gu yáup kátu ma táng háliumát wa táng hálinelák ingga kanángga ku kepmangga kut. Wáina wata ku ko it káman káman háranan miti yan ámna yáilá kámá iháng tunggap táinelák, uláp kanut wáina. <sup>6</sup> Ámna yáilá ku ing árená kápángga iháng tunggap táinelák, ámna náráwa rahán yáni hára kandák kámá ma árená, áwáná káman yot re kándáng árená, ámna wáina wata nángánange yáni wu Jesu re naráng háting mángga átang yáni tángga hangga hohoná yá ina tirik tarák kandák ma táená. <sup>7</sup> Miti yan ámna yáilá ingga átaráng wawu Ánutu yan yáup wa pinná tángga átnándaráng. Wáina wata ku ámna náráwa rahán yáni hára kandák kámá ma árená. Niyá ámna yáilá átnek watá ku nák ku kutná táwi ingga narángga ámna náráwa raták ma pin yáni táindak, pahán káráp sokmuná ma táindak, umi káto yá táng hoho ma táindak, kun erawák ma táindak, hang sup iháháyan kálu, kálu kandák ma táindak. <sup>8</sup> Ináku ing átnek, kámá yá itná hára áwineráng wawu kándáng hánám pin yáni táinek, ket tarák álosim wata kikiná narángga átkukuná wa kándáng pinná táinek, hang kálu kándáng wa rewe isutang rongrongngá átang málámbán pahán dán kikiná kálu wa kándáng hánám pinná táinek. <sup>9</sup> Táwi yan me páliná iháng toliumán wa káto tángga átang kándáng isutang átnek. Wáina tángga átnek watá ku málám háláng imán ámna náráwa me páliná wa kándáng yánáng tolingga pahán yáni iháng káto tán wa isutang átneráng, hang watá ku málám hányon háláng imán ámna yá me páliná wa táng hang tineráng wawu wáina meráng ingga há narángga me wa kandák meráng ingga yánángga iháng tolingguinek.

### *Ailan Krit káin ámna máro yá yon kámá yan naráng hákhátik wa iháng yakyawák tánggiuráng*

<sup>10</sup> Ko ámna kanet wáinaná wa iháng tunggap táinelák wawu náuta ámna táup hánám watá milun yayali tángga me hánámá hánámá wa mengga ámna náráwa yángyárunginggoeráng wata. Ámna wáinaná wawu táwi hánám bu Juda ámna. <sup>11</sup> Ámna wáinaná watá ket tarák ma tátáyan wa yánáng tolingga ku ámna náráwa táuppon naráng hákhátik yáni iháng yakyawák tángngátaráng. Wáina tángngátaráng wawu sup ihánin ingga wata. Wáina wata ku milun yáni pop tátá me ma metángguindaráng. <sup>12</sup> Uláp Krit káinnan nanará ámna káman dá ing miuk, “Krit wawu ámna kusákná rewe, ámna wáik hánám ang páyom ina. Sungi táwi hánám nanaya narángga táng taktak tángga átningngátaráng,” ingga miuk. <sup>13</sup> Me wawu pálipuk hánám, wata ku me hátup kálu yánátá ku Jesu yan me páliná wa kándáng naráng hátineráng. <sup>14</sup> Juda yan pingnga hánámá wata ma naráng háting mindaráng wawu ále umi sungi yáni watá wáinanayon rongrongngá ma átnándaráng. Pahán nanará yáni yá wáik hánám hálengga árán wáina táemán me memán wawu kandák ingga ma naráng hátingngátaráng. <sup>16</sup> Milun yáni yá ku Ánutu há naráng memán ingga mengngátaráng, enendu ket tarák yáni yá ku Ánutu sárum há imená hálengngátak. Wawu milun yayali ámna, watá ket tarák álosim kámá tátáyan tarák ku muná. Tirik tarák yáni wawu Ánutu yá kápángga takta narángngátak.

## 2

*Táwi yan ámna náráwa yá ku ing átningguineráng*

<sup>1</sup> Iná ko ku Ánutu yan me páliná wa kándáng hánám isutneráng ingga ámna náráwa yánáng tolingguinelák. <sup>2</sup> Ko ku ámna tátáwi ing yánelák, átkuku yáni wa kándáng hánám pinná tángguineráng, átnát yáni hára kándáng árát ámna náráwa yá kápát álosim hálen meng toling yámángguineráng, nanará álosim isutang átningguineráng, Ánutu yan me páliná hára naráng hákhátik kálu káto átkuineráng, kámá ya narát kikiná háhále wahára átkuineráng, hang káto átang márappá susuwá wahára átkuineráng.

<sup>3</sup> Wáinanyon du náráwa tátáwi ing yánáng tolinelák, Ánutu tarang káin árát tu tirik tárak yáni watá ku wáina átamán ingga hiták meng tunggap tángguinek, nuknuk yáni ya ma meng yámáng kuindaráng, hang umi káto nanayan nanará watá átkuku yáni wa ma pinná táindak, ináku kálu rina ku álosim wa nuknuk yáni yánáng tolingga átkuineráng. <sup>4</sup> Iná wáina há tángga átkuineráng watá ku náráwa máto álo yánáng totolijan tárak. Kulá náráwa máto ing yánáng tolineráng, nánáun yáni me nángánange yáni wa kápát kikiná háleinek, <sup>5</sup> átkuku yáni wa kándáng pinná tángga Ánutu rahálá hára rongrongngá átkuineráng, it yáni káin yáup rina rina átak wa kándáng tángga átkuineráng, nuknuk yáni ket tárak álosim wa yálengguineráng, hang nánáun yáni ya tarang káin átkuineráng. Wáina tángga árát tu káman dá Ánutu yan me wata me wáik ma meindák.

<sup>6</sup> Wáinanyon du ámna máto wa ing yánángga iháng káto táinelák, átkuku yáni wa kándáng pinná tángga átkuineráng. <sup>7</sup> Ket tárak kámuk hára táinán du ka álosim wa tátá kahángga ku watá wáinanyon táineráng. Ko rám Ánutu yan me wa ámna náráwa yánelák wahára me kusák ma meindalák, hang me wa táng kakarak hára ma yánáng toлиндalák. <sup>8</sup> Ko me kándáng wa rewe minelák wawu niyá keháng káyam tánggoeráng watá me meinelák wa narát kándáng re hálen rina kámá káman náni ya me wáik memeya reprepmá narineráng.

<sup>9</sup> Yáup nangge hánamá tirik tárak kán wa ing yánáng tolinelák, ámna hulá yáni yá rina meineráng wa rewe isutang tirik tárak álosim tángga árát tu heronge kápángguineráng. Ámna hulá yáni wa mátap yáinin ma tángguindaráng. <sup>10</sup> Ámna hulá yáni yan hára kutná kutná manek ma ihángguindaráng, ináku kándáng re árátne álosim náhineráng ingga narángga ku wáina átkuineráng. Wáina tát tu rina rina táineráng watá ámna náráwa iháng tárut tán Ánutu Son Nánáhá wata me menggoemán wawu narát páliná háleinek.

<sup>11</sup> Ánutu yá ámna náráwa nán pahán námuk wawu hiták há háliuk, wata ku ámna náráwa kámuk son álo náhinek. <sup>12</sup> Ánutu yá pahán námuk watá ku kandák wa sárum imóamáya nánáng tolinggoek, wawu ná, Ánutu sárum imóamá, hang káwak nátán kikiná hulá hulá watá nanará náni pinná tátá. Iná Ánutu yá pahán námuk watá ku ing hányon nánáng tolinggoek, rám ná átamán háranon nánin átkuku kándáng pinná tángga ket tárak náni yá kándáng árán Ánutu yan pahán káin átak wa isutnemán. <sup>13</sup> Wáina tángga álosim bá nándán káin tunggafeinek wata háleinemán wawu Jesu yá son áwinek, Jesu Son Iháhá wawu Ánutu náni káto, ámna náráwa son nánáhá. Máriya wu málámbá yamá hálángngá pálak watyot son áwángga hiták háleinek. <sup>14</sup> Jesu yá kandák kán kumbi kinan son náhángga mukmuro náni wa yanyawon da átkukuná wa sáuk, wata ku málámbán tombong hára rongrongngá hánám átang átkuinemán. Wáina átang gu ket tárak álosim wa heronge hára tángga átang átkuinemán.

<sup>15</sup> Kulá ko ku no me wa kanet wawu Jesu ya naráng háting mená ámna náráwa wa yánáng tolingguinelák ka naret. Iháng káto tángga yánátá me wa isutneráng, hang niyá wáina ma tát tu wa metáng yámángga iháng tolinelák. Kák ku wáina memeyan kutya pálak, wata ku ko yápmatá káman dá kákkán me náwu ále hánám ingga ma káindak.

## 3

*Ánutu yá nán náháng álolo táuk wata ku nánda tirik tárak álosim wa há tángga átkuinemán*

<sup>1</sup> Jesu ya naráng háting mená wa ing yánángga árátá ku kapman me it tán ámna yáilá yáni wata tarang káin átang milun susuwá hára re átkuineráng, ket tárak álosim wa tátáya ráma ráma tiyawíngga átkuineráng, <sup>2</sup> nangge nuknuk yáni ya ma meng yámindaráng, menmen ininán ma táindaráng, hang yáni tángga hangga ket tárak álosim wa rewe ámna náráwa kámuk yálengga átkuineráng ingga yánángga átkuinelák.

<sup>3</sup> Uláp nándu wáinanyon nanará álosim hára ma árená milun yayali hára re átkiumán. Ámna wáik watá nángnárungin watán milun wa isutkiumán. Mukmuro yan kumbi kinan árátne pahán tátárut tán ket tárak wáik kot tu sut tán kikiná hulá hulá watá átkuku náni wa pinná tángga átkiumálák. Káyam tátá yot kápáng naknarák wahára átkiumán. Kámá yá nán takta náhát nánda wáinanyon takta kápángga átkiumán. <sup>4</sup> Wáina tángga átkiumán, enendu Ánutu

ámna náráwa son nánáhá watá nánda kikiná naránga ku náháng álolo tánga<sup>5</sup> son náhuk. Wáina táuk wawu nánda ket tárák álosim tátne wata muná, ináku málámbáyon urák náni naránga ku wáina táuk. Wawu ing wahára kungga ku Ánutu yá son náhuk, Iruk Káungá yá náháng yawolán nangge kongakngá yá ina átkuku mirak táumán wahára. <sup>6</sup> Jesu Son Iháhá, ámna ni nán son nánáhá, watán yáup hára kungga ku Ánutu yá Iruk Káungá watán háláng táwi wa kulin nándán káin háuk ngá nányot átkoek. <sup>7</sup> Ánutu yá pahán námán málámba rahálá hára ámna náráwa kándáng átkoemán. Kulá kálu wahára kungga ku Ánutu nángánangge háliumán hálendu átkuku sásáliná muná wa tátáya hálengga átkoemán wa táinemán. <sup>8</sup> No me wa uying kamet wawu pálipuk ingga naránga ku Jesu ya naráng háting mená wa me wawu táwi hánám ingga yánánguinélák. Yánátá ku niyá Ánutu pálipuk ingga nareráng watá ku káto hálenggatang ket tárák kándáng wa tánga átkuineráng. Ket tárák wáina wawu álosim hánám, niyá wa isutnek wawu watá álo háláng iminek.

<sup>9</sup> Iná ko ku me kandák ing wata ma kárámating yámindalák, hánámá hánámá menmen ininán tátá, táwi ilom yáni kut yáni wata ingga mengga kuku, me Moses yan meng rákit me wata menmenná. Me hánámá hánámá wáina watá manyon háláng námindák. <sup>10</sup> Iná ko katá káman dá ámna náráwa iháng hohoreya tán du ket tárák wáina ma táindalák ingga kándáng hánám ininelák. Iná kákkán me wa ma narán wawu son ininelák, hang kákkán me wa rám yará ma narán du ámna wáinaná wawu sárum iminelák. <sup>11</sup> Ko ku ing narinelák, ámna wáinaná wawu káráp henghentongngá ina mukmuroná táwi hánám bá átak. Málámbán átkuku kandák watá yon du táng me hára há ting san átak.

*Polyá me pukon miuk*

<sup>12</sup> No Atemas káling Tikikus waháranan káman suring me kákkán káin kung hinek rám waháranyon du ko áwánga it táwi Nikopolis káin nák nanaháya kálu kámá há hánám kang tunggap tánga ku wakálu áwinelák. Iruk kot kotkotná rámá wawu nák ku wakáin kung átnát ta naret. <sup>13</sup> Apolos káling lo yan nanará ámna Senas watá kálu kukuya tán du kálu yan kutná kutná wa háláng yáminelák ka ku kálu káin kutná kutná ya kesák ma táindámálák. <sup>14</sup> Ko ku ámna náráwa náni ing yánáng tolinelák, káto hálenggatang ket tárák kándáng wa tánga átkuineráng wahára ku nuknuk yáni niyá kutná kutná náut hánám ba kesák tát wa álo háláng yámát tu ket tárák yáni yá ku páliná álosim sánga átkuinek.

<sup>15</sup> Ámna náráwa nákkot átaráng watá káe álo yáni sat kákkán da koek. Kulá ko ku nándán káe álo wa ni Jesu naráng háting mánga nánda kikiná naráng námánga átkoeráng wa yáminelák. Ánutu yá sán kámuk pahán sáminek.

## Pol yá Filemon dán papia uying muk

<sup>1</sup> Nák ku Pol, Jesu Son Iháhá watán yáup tángoet wata neháng kalabus kinan ting sat átkoet. No papia ná uye nuk náni Timoti yot sate Filemon kákkán káin koek. Kák ku nát nuk náti hánám, nát tá miti yáup rina tángoemát wáinanyon tángoelák. <sup>2</sup> Nátán heronge me yá málám náni Apia yan káin koek, me yáup náni káman táená Akipus ní tewe ámna yá ina hángnálángningga erawángngátaráng tárák wáinanyon du miti yáup tángoek watán káin hányon koek, hang miti ámna náráwa kákkán it káin áwáng miti ya hangngátaráng watán káin hányon koek.

<sup>3</sup> Nan náni Ánutu yot Táwi Jesu Son Iháhá watá pahán sámán pahán láláp watá sányot átnek.

*Filemon dán ket tárák álosim wata Pol yá heronge naruk*

<sup>4</sup> No sáponga táng kamángoet wahára wu kákka ingga Ánutuna heronge me inánga átkoet. <sup>5</sup> No wáina tánga átkoet wawu kámá yá ing met narángoet, kák ku Táwi Jesu ya naráng háting mángoelák, me Ánutu yan ámna náráwa wata kikiná hánám naráng yámángoelák. Wáina met narángoet wata ku Ánutu heronge me inánga átkoet. <sup>6</sup> No Ánutu yan káin ing sáponga tángoet, kák ku nányot Jesu Son Iháhá wata naráng hákhátik táng mámá wakálu kámuk náni átnemán. Wáina átang naráng hákhátikka watá ku nanará álosim táng tunggap táng kaminek, me iruk kán kálu nanará álosim kámuk Jesu yá námángoek wa hiták káinelák. Wata hánám sáponga táng kamángoet. <sup>7</sup> Nukna, ko kámá ya kikiná naráng yámánga ket tárák álosim yálenggoelák wahára kungga ku Ánutu yan ámna náráwa watán pahán wa son táng káto tángoelák. Ko wáina tángoelák kálu wahára ku nák pahánna táng káto tátá no heronge táwi hánám narángoet.

*Pol yá Filemon ing inuk, Onesimus wawu son há tátá nukka páliná hánám háleinek*

<sup>8</sup> Wáina wata ku ko náut kámá káman táinelák wata naret. Wa táinelák wawu álo kámá. Nák ku Jesu Son Iháhá watán aposel máta yáyáre ámna, wata ku no wáina táng ingga kanánggem, enendu no wáina táng ingga ma kanindát. <sup>9</sup> Ináku no há naret tu nangge nukka kikiná narángoelák, wata ku no me láláp hára kanindet. Nák ku Pol, ámna tátáwi há hálet me nák ku ámna ní Jesu Son Iháhá watán yáup tángoet wata neháng kalabus káin ting sat átkoet wa.

<sup>10</sup> No me láláp hára ing kanindet wawu ko ket tárák káman Onesimus\* ya táng minelák ka naret. Neháng kalabus kinan tiuráng wata torong hára Onesimus yá nákkán káin áwán Jesu yan me pingnga álosim ine Ánutu yan káinman átkuku mirak táuk, wata ku nák nanggena ina háliuk. <sup>11</sup> Uláp Onesimus yá kák háláng kakamáya yáup kándáng ma tánggiuk, iná inggálu ku watán tirik tárák álosim watá kák me nák álo háláng námámáyan tárák hálangga átak.

<sup>12</sup> No Onesimus ya pahánna kikiná hánám naret, enendu kákkán káin son suring me áwek. <sup>13</sup> Jesu yan me pingnga álosim yánángoet wata ingga neháng kalabus káin ting sat átkoet, wata ku no Onesimus yá nákkot átang kákkán kome tánga nák háláng namánga átgim ingga naret. <sup>14</sup> Wáina naret enendu no kane ko álo ingga nananáyan káuluná ku muná, wata ku no suring me kákkán káin son áwek. Ko rina tátáyan wawu no wáina táng ingga ma kanindát, ináku ko nák pahánna táng heronge táinán du rina táinelák wawu ko kangán nanará isutang táinelák. <sup>15</sup> Kámá Ánutu yá narán hám Onesimus yá kepmangga kung rák isikimo átuk. Wáina hálen wawu wata hulá ku ing, Onesimus yá Jesu ya naráng háting mánga ku son kákkán káin áwánga rák me rák Filemon kákkot átkuinek. <sup>16</sup> Kákkán káin son áwán du ko wa katá yáup nangge hánámá re ina ma háleindak. Watá ku yáup nangge hánámá wa iháng hátingga áráng árená ina háliuk, wawu Jesu ya naráng háting mená, wata ku ko wa katá nukka ina háleudu kikiná káinelák. No wa kanggoet tu nukna hánám háleudu no pahán imángoet, iná ko ku no pahán imángoet wa táng hátingga pahán táwi hánám iminelák. Onesimus yá yáup nangge hánámá yan yáup wa tánga átkuinek wawu álo kámá ingga kangga heronge naránguinelák, hang Táwi Jesu hára wawu katá ku nukka háleudu kikiná káinelák.

<sup>17</sup> Wáina wata ku ko nák nahátá nukka Jesu yan yáup káman tángngátamát háleudu Onesimus son táinelák wawu nák nehánggim táráknká ku wáinanyon hánám táinelák. <sup>18</sup> Onesimus yá kákka kandák kámá táng kamuk hálen wawu no kangga táng tolinet, me kákkán hára náut kámá káman táuk háleudu wata topmá ku no kaminet. <sup>19</sup> Nák ku Pol nayon ketna yá kolek ná uyingga kanet. Topmá ku no álo kaminet. Ko ku ing narinelák, ko nákkán káin topmá nanamáyan hányon átak, ko topmá nanamáyan wawu no Táwi yan me pingnga álosim wa kane ko átkuku mirak táulák. Ko wata kalot yamiwon. <sup>20</sup> Nukna, ko Táwi kutná hára no rina

\* **1:10:** Kut Onesimus wata hulá wawu ing, “ámna kámá háláng yámámáyan.”



kanet wa wáina táinelák ingga naret. Nát tu Jesu Son Iháhá watán ámna yá átamát, wata ku rina kanet wáina tángga ku nák pahánna son táng káto táinelák. <sup>21</sup>No ing há naret, ko nákkán me há isutnelák, wata ku papia ná uying kamet. Pálipuk ing há naret, ko tárák álosim wata táng minelák wawu no rina kanet wa táng hátingga táng minelák.

*Pol nuknukngá yá káe álo yáni Filemon dán sat kuk*

<sup>22</sup>No me nukngá kámá kanindet wawu ing, no ing hánám há narángga átat, Táwi yá sándán me sáponga narán hálendu no sándán káin son kuinet. Wata ku ko itya kinan it pahálá káman nákkán da tiyawingga satá átnek.

<sup>23</sup>Ámna Epafra wawu nákkot kalabus káin káman átkoemát, Jesu Son Iháhá watán me pingnga álosim mengngátak wata. Ámna watá sándán káin káe álo meng san áwek. <sup>24</sup>Me hang yáup nákkot káman táená átaráng, Mak, Aristakus, Demas yot Luk watá sándán káin káe álo yáni hányon meng sat áwek.

<sup>25</sup>Táwi Jesu Son Iháhá watá pahán sámángga iruk sáni yot átnek.